

Namo tassa bhagavato arahato sammāsambuddhassa

Aṅguttaranikāye

Aṭṭhakanipāta-aṭṭhakathā

1. Paṭhamapaṇṇāsakaṃ

1. Mettāvaggo

1. Mettāsuttavaṇṇanā

1. Aṭṭhakanipātassa (3.0193) paṭhame **āsevitāyā**ti ādarena sevitāya. **Bhāvitāyā**ti vaḍḍhitāya. **Bahulīkatāyā**ti punappunaṃ katāya. **Yānikatāyā**ti yuttayānasadisakatāya. **Vatthukatāyā**ti patiṭṭhānaṭṭhena vatthu viya katāya. **Anuṭṭhitāyā**ti paccu-paṭṭhitāya. **Paricitāyā**ti samantato citāya upacitāya. **Susamāraddhāyā**ti suṭṭhu samāraddhāya sukatāya. **Ānisaṃsā**ti guṇā. **Sukhaṃ supatī**ti-ādīsu yaṃ vattabbaṃ, taṃ ekādasakanipāte vakkhāma.

Appamāṇanti pharaṇavasena appamāṇaṃ. **Tanū saṃyojanā honti, passato upadhikkhayanti** mettāpadaṭṭhānāya vipassanāya anukkamena upadhikkhayasaṅkhātamaṃ arahattaṃ pattassa dasa saṃyojanā pahiyantīti attho. Atha vā **tanū saṃyojanā hontīti** paṭighañceva paṭighasampayuttasaṃyojanā ca tanukā honti. **Passato upadhikkhayanti** tesameva kilesūpadhīnaṃ khayasaṅkhātamaṃ mettaṃ adhigamavasena passantassa. **Kusalī tena hotīti** tena mettāyanena kusalo hoti. **Sattasaṇḍanti** sattasaṅkhātena saṇḍena samannāgataṃ, sattabharitanti attho. **Vijetvā**ti adaṇḍena asatthena dhammeneva vijitvā. **Rājīsayoti** isisadisā dhammikaṛājāno. **Yajamānā**ti dānāni dadamānā. **Anupariyagā**ti vicariṃsu.

Assamedhanti-ādīsu porāṇakarājākāle kira sassamedhaṃ, purisamedhaṃ, sammāpāsaṃ, vācāpeyyanti cattāri saṅgahavatthūni ahesuṃ, yehi rājāno (3.0194) lokaṃ saṅgaṇhiṃsu. Tattha nipphannasassato dasamabhāgaggahaṇaṃ **sassamedhaṃ** nāma, sassasampādane medhāvitāti attho. Mahāyodhānaṃ chamāsikaṃ bhattavetanānuppadānaṃ **purisamedhaṃ** nāma, purisasaṅgaṇhane medhāvitāti attho. Daliddamanussānaṃ hatthato lekhaṃ gaḥetvā tīṇi vassāni vinā vaḍḍhiyā saḥassadvisahassamattadhanānuppadānaṃ **sammāpāsaṃ** nāma. Tañhi sammā manusse pāseti hadaye bandhitvā viya ṭhapeti, tasmā sammāpāsanti vuccati.

“Tāta, mātulā”ti-ādinā nayena pana saṅhavācābhaṇaṇaṃ **vācāpeyyaṃ** Nāma, piyavācāti attho. Evaṃ catūhi saṅgahavatthūhi saṅgahitaṃ raṭṭhaṃ iddhañceva hoti, phītañca, bahu-annapānaṃ, khemaṃ, nirabbudaṃ. Manussā mudā moda-mānā ure putte naccantā apārutagharā viharanti. Idaṃ gharadvāresu aggaḷānaṃ abhāvato **niraggaḷanti** vuccati. Ayaṃ porāṇikā paveṇi.

Aparabhāge pana okkākarājakāle brāhmaṇā imāni cattāri saṅgahavatthūni imañca raṭṭhasampattiṃ parivattetvā uddhaṃmūlakaṃ katvā **assamedhaṃ purisamedhanti**-ādike pañca yaññe nāma akaṃsu. Tesu assamettha medhanti vadhentīti **assamedho**. Dvīhi pariyaññehi yajitabbassa ekavīsatiyūpassa ekasmiṃ pacchimadivaseyeva sattanavutipañcapasusataghātābhiṃsanassa ṭhapetvā bhūmiñca purise ca avasesasabbavibhavadakkhiṇassa yaññassetāṃ adhivacanaṃ. Purisamettha medhantīti **purisamedho**. Catūhi pariyaññehi yajitabbassa saddhiṃ bhūmiyā assamedhe vuttavibhavadakkhiṇassa yaññassetāṃ adhivacanaṃ. Sammamettha pāsantīti **sammāpāso**. Divase divase yugacchiggaḷe pavesanadaṇḍakasaṅkhātāṃ sammaṃ khipitvā tassa patitokāse vedhiṃ katvā saṃhāri-mehi yūpādīhi sarassatīnadiyā nimuggokāsato pabhuti paṭilomaṃ gacchantena yajitabbassa satrayāgassetāṃ adhivacanaṃ. Vājamettha pivantīti **vājapeyyo**. Ekena pariyaññena sattarasahi pasūhi yajitabbassa beluvayūpassa sattarasakadakkhiṇassa yaññassetāṃ adhivacanaṃ. Natthi ettha aggaḷāti **niraggaḷo**. Navahi pariyaññehi yajitabbassa saddhiṃ bhūmiyā ca purisehi ca assamedhe vuttavibhavadakkhiṇassa sabbamedhapariyāyanāmassa assamedhavikappassetāṃ adhivacanaṃ.

Kalampi (3.0195) **te nānubhavanti soḷasinti** te sabbepi mahāyāgā ekassa mettācittassa vipākamahantatāya soḷasiṃ kamaṃ na agghanti, soḷasamaṃ bhāgaṃ na pāpuṇantīti attho. **Na jinātīti** na attanā parassa jāniṃ karoti. **Na jāpayeti** na parena parassa jāniṃ kāreti. **Mettaṃsoti** mettāyamānacittakoṭṭhāso hutvā. **Sabbabhūtānanti** sabbasattesu. **Veraṃ tassa na kenacīti** tassa kenaci saddhiṃ akusalaveraṃ vā puggalaveraṃ vā natthi.

2. Paññāsuttavaṇṇanā

2. Dutiye **ādibrahmacariyikāyāti** maggabrahmacariyassa ādibhūtāya. **Paññāyāti** vipassanāya. **Garuṭṭhāniyanti** gāravuppattipaccayabhūtaṃ garubhāvaniyaṃ. **Tibbanti** bahalaṃ. **Paripucchatīti** atthapāḷi-anusandhipubbāparaṃ pucchati. **Paripañhatīti** pañhaṃ karoti, idañcidañca paṭipucchissāmīti vitakketi. **Dvayenāti** duvidhena. **Anānākathikoti** anānattakathiko hoti. **Atiracchānakathikoti** nānāvidhaṃ tiracchānakathaṃ na katheti. **Ariyaṃ vā tuṅhībhāvanti** ariyatūṅhībhāvo nāma catutthajjhānaṃ, sesakammaṭṭhānāmanasikāropi vaṭṭati. **Jānaṃ jānātīti** jānitabbakaṃ jānāti. **Passaṃ passatīti** passitabbakaṃ passati. **Piyattāyāti** piyabhāvatthāya. **Garuṭṭāyāti** garubhāvatthāya. **Bhāvanāyāti** bhāvanatthāya guṇasambhāvanāya vā. **Sāmaññāyāti** samaṇadhammatthāya. **Ekībhāvāyāti** nirantarabhāvatthāya.

3-4. Appiyasuttadvayavaṇṇanā

3-4. Tatiye **appiyapasamsīti** appiyajanassa pasamsako vaṇṇabhāṇī. **Piyagara-**
hīti piyajanassa nindako garahako. Catutthe **anavaññattikāmoti** “aho vata maṃ
añña avajāneyyun”ti anavajānanakāmo. **Akālaññūti** kathākālaṃ na jānāti, akāle
katheti. **Asucīti** asucīhi kāyakammādīhi samannāgato.

5. Paṭhamalokadhammasuttavaṇṇanā

5. Pañcame lokassa dhammāti **lokadhammā**. Etehi muttā nāma natthi, buddhā-
nampi honti. Tenevāha- **lokaṃ anuparivattantīti** anubandhanti nappajahanti (3.0196)
lokato na nivattantīti attho. **Loko ca aṭṭha lokadhamme anuparivattatīti** ayañca loko
ete anubandhati na pajahati, tehi dhammehi na nivattatīti attho.

Lābho alābhoti lābhe āgate alābho āgatoyevāti veditabbo. **Ayasā**dīsupi eseva
nayo. **Avekkhati vipariṇāmadhammeti** “vipariṇāmadhammā ime”ti evaṃ ave-
kkhati. **Vidhūpitāti** vidhamitā viddhamṣitā. **Padañca ñatvāti** nibbānapadaṃ jānitvā.
Sammappajānāti bhavassa pāragūti bhavassa pāraṃ gato nipphattiṃ matthakaṃ
patto, nibbānapadaṃ ñatvāva taṃ pāraṃ gatabhāvaṃ sammappajānātīti.
Imasmīṃ sutte vaṭṭavivaṭṭaṃ kathitaṃ.

6. Dutiyalokadhammasuttavaṇṇanā

6. Chaṭṭhe **ko visesoti** kiṃ visesakāraṇaṃ. **Ko adhippayāsoti** ko adhippayogo.
Pariyādāyāti gahetvā pariniṭṭhapetvā. Idhāpi vaṭṭavivaṭṭameva kathitaṃ.

7. Devadattavipattisuttavaṇṇanā

7. Sattame **acirapakkanteti** saṅghaṃ bhinditvā na cirapakkante. **Ārabbhāti**
āgamma paṭicca sandhāya. **Attavipattinti** attano vipattiṃ vipannākāraṃ. Sesapa-
desupi eseva nayo. **Abhibhuyyāti** abhibhavitvā madditvā.

8. Uttaravipattisuttavaṇṇanā

8. Aṭṭhame **vaṭajālikāyanti** evaṃnāmake vihāre. So kira vaṭavane niviṭṭhattā
vaṭajālikāti saṅkhaṃ gato. **Pāturahosīti** imamatthaṃ devarañño ārocessāmīti
gantvā pākaṭo ahosi. **Ādibrahmacariyako** Ti sikkhattayasaṅgahassa sakalasāsana-
brahmacariyassa ādibhūto.

9. Nandasuttavaṇṇanā

9. Navame **kulaputto** Ti jātikulaputto. **Balavāti** thāmasampanno. **Pāsādikoti** rūpa-
sampattiyā pasādajanako. **Tibbarāgoti** bahalarāgo. **Kimaññatrāti**-ādīsu ayamattho-

kiṃ aññena kāraṇena (3.0197) kathitena, ayaṃ nando indriyesu guttadvāro bhojane mattaññū jāgariyamanuyutto satisampajāññena samannāgato, yehi nando sakkoti paripuṇṇaṃ parisuddhaṃ brahmacariyaṃ carituṃ. Sace imehi kāraṇehi samannāgato nābhavissa, na sakuṇeyyāti. **Itiha tatthāti** evaṃ tattha. Imasmiṃ sutte vaṭṭameva kathitaṃ.

10. Kāraṇḍavasuttavaṇṇanā

10. Dasame aññenāññaṃ paṭicaratīti aññena kāraṇena vacanena vā aññaṃ kāraṇaṃ vacanaṃ vā paṭicchādeti. **Bahiddhā kathaṃ apanāmetīti** bāhirato aññaṃ āgantukakathaṃ otāreti. **Apaneyyesoti** apaneyyo nīharitabbo esa. **Samaṇadūsīti** samaṇadūsako. **Samaṇapalāpoti** vīhīsu vīhipalāpo viya nissāratāya samaṇesu samaṇapalāpo. **Samaṇakāraṇḍavoti** samaṇakacavaro. **Bahiddhā nāsentīti** bahi nīharanti. **Yavakaraṇeti** yavakhette. **Phuṇamānassāti** ucce ṭhāne ṭhatvā mahāvāte opuniyamānassa. **Apasammajantīti** sāraddhaññānaṃ ekato dubbaladhaññānaṃ ekato karaṇatthaṃ punappunaṃ apasammajanti, apasammajjanisaṅkhātena vāta-ggāhinā suppena vā vatthena vā nīharanti. **Daddaranti** daddarasaddaṃ.

Samvāsāyanti samvāsena ayaṃ. **Vijānāthāti** jāneyyātha. **Santavāco** Ti saṅha-vāco. **Janavatīti** janamajjhe. **Raho karoti karaṇanti** karaṇaṃ vuccati pāpakammaṃ, taṃ raho paṭicchanno hutvā karoti. **Saṃsappī ca musāvādīti** saṃsappitvā musāvādī, musā bhaṇanto saṃsappati phandatīti attho. Imasmiṃ sutte vaṭṭameva kathetvā gāthāsu vaṭṭavivaṭṭaṃ kathitanti.

Mettāvaggo paṭhamo.

2. Mahāvaggo

1. Verañjasuttavaṇṇanā

11. Dutiyaṃ paṭhame **abhivādetīti** evamādīni **na samaṇo gotamo** Ti ettha vuttanākārena yojetvā evamettha attho veditabbo (3.0198) “na vandati nāsanā vuṭṭhāti, nāpi ‘idha bhonto nisīdantū’ ti evaṃ āsanena vā nimanteti” ti. Ettha hi vā-saddo vibhāvane nāma atthe “rūpaṃ niccaṃ vā aniccaṃ vā” ti-ādīsu viya. Evaṃ vatvā atha attano abhivādanādīni akarontaṃ bhagavantaṃ disvā āha- **tayidaṃ, bho gotama, tathevāti**. Yaṃ taṃ mayā suttaṃ, taṃ tatheva, taṃ savanañca me dassanañca saṃsandati sameti, atthato ekībhāvaṃ gacchati. Na hi bhavaṃ gotamo ...pe... āsanena vā nimantetīti. Evaṃ attanā suttaṃ diṭṭhena nigametvā nindanto āha- **tayidaṃ, bho gotama, na sampannamevāti** taṃ abhivādanādīnaṃ akaraṇaṃ ayuttamevāti.

Athassa bhagavā attukkaṃsanaparavambhanadosaṃ anupagamma karuṇāsīta-

lena hadayena taṃ aññāṇaṃ vidhamitvā yuttabhāvaṃ dassetukāmo **nāhaṃ taṃ
brāhmaṇā**ti-ādimāha. Tatrāyaṃ saṅkhepattho- ahaṃ,

brāhmaṇa, appaṭihatena sabbaññutaññāṇacakkhunā olokontopi taṃ puggalaṃ etasmiṃ sadevakādibhede loke na passāmi, yamaṃ abhivādeyyaṃ vā paccuṭṭheyyaṃ vā āsanena vā nimanteyyaṃ. Anacchariyaṃ vā etaṃ, svāhaṃ ajja sabbaññutaṃ patto evarūpaṃ nipaccākārārahaṃ puggalaṃ na passāmi. Apica kho yadāpāhaṃ sampatijātova uttarena mukho sattapadavīhārena gantvā sakalaṃ dasasahassilokadhātuṃ olokesiṃ, tadāpi etasmiṃ sadevakādibhede loke taṃ puggalaṃ na passāmi, yamaṃ evarūpaṃ nipaccakāraṃ kareyyaṃ. Atha kho maṃ soḷasakappasahassāyuko khīṇāsavamahābrahmāpi añjaliṃ pagga-hetvā “tvam loke mahāpuriso, tvam sadevakassa lokassa aggo ca jeṭṭho ca seṭṭho ca, natthi tayā uttaritaro”ti sañjātasomanasso patimānesi. Tadāpi cāhaṃ attanā uttaritaraṃ apassanto āsabiṃ vācaṃ nicchāresiṃ- “aggohamasmi lokassa, jeṭṭhohamasmi lokassa, seṭṭhohamasmi lokassā”ti. Evaṃ sampatijātassāpi mayhaṃ abhivādanādiraho puggalo natthi, svāhaṃ idāni sabbaññutaṃ patto kaṃ abhivādeyyaṃ. Tasmā tvam, brāhmaṇa, mā tathāgatā evarūpaṃ paramanipaccakāraṃ patthayi. Yañhi, brāhmaṇa, tathāgato abhivādeyya vā ...pe... āsanena vā nimanteyya, muddhāpi tassa puggalassa rattipariyosāne paripākasithilabandhanaṃ vaṇṭā muttatālahalaṃ viya gīvato chijjitvā sahasāva bhūmiyaṃ nipa-teyya.

Evaṃ (3.0199) vuttepi brāhmaṇo duppaññatāya tathāgatassa lokajeṭṭhabhāvaṃ asallakkhento kevalaṃ taṃ vacanaṃ asahamāno āha- **arasarūpo bhavaṃ gota-moti**. Ayaṃ kirassa adhippāyo- yaṃ loke abhivādanapaccuṭṭhāna-añjalikamma-sā-mīcikammaṃ “sāmaggirasō”ti vuccati, taṃ bhoṭo gotamassa natthi. Tasmā arasa-rūpo bhavaṃ gotamo, arasajātiko arasasabhāvoti. Athassa bhagavā cittamudubhāvajanānattaṃ ujuvipaccanīkabhāvaṃ pariharanto aññathā tassa vacanassa atthaṃ attani sandassento **atthi khvesa, brāhmaṇa, pariyāyoti**-ādimāha.

Tattha **atthi khvesā**ti atthi kho esa. **Pariyāyoti** kāraṇaṃ. Idaṃ vuttaṃ hoti- atthi kho, brāhmaṇa, etaṃ kāraṇaṃ, yena kāraṇena maṃ “arasarūpo bhavaṃ gotamo”-ti vadamāno puggalo sammā vadeyya, avitathavādīti saṅkhaṃ gaccheyya. Katamo pana soti? Ye te, brāhmaṇa, rūparasā ...pe... phoṭṭhabbarasā, te tathāga-tassa pahīnāti. Kiṃ vuttaṃ hoti? Ye te jātivasena vā upapattivasena vā seṭṭhasa-mmatānampi puthujjanānaṃ rūpārammaṇādīni assādentānaṃ abhinandantānaṃ rajjantānaṃ uppajjanti kāmasukhassādasāṅkhātā rūparasā, saddarasā, gandha-rasā, rasarasā, phoṭṭhabbarasā, ye imaṃ lokaṃ gīvāya bandhitvā viya āviñchanti, vatthārammaṇādisāmaggiyañca uppānattā sāmaggirasāti vuccanti. Te sabbe pi tathāgatassa pahīnā. “Mayhaṃ pahīnā”ti vattabbepi mamākārena attānaṃ anu-kkhipanto dhammaṃ deseti, desanāvīlāso vā esa tathāgatassa.

Tattha **pahīnāti** cittasantānato vigatā, pajahitā vā. Etasmiṃ panatthe karaṇe sāmivacanaṃ daṭṭhabbaṃ. Ariyamaggasatthena ucchinnaṃ taṇhāvijjāmayāṃ mūlaṃ etesanti **ucchinna-mūlā**. Tālavatthu viya nesaṃ vatthu katanti **tālāvatthukatā**. **Yathā hi tālarukkhaṃ samūlaṃ uddharitvā tassa vatthumatte tasmīṃ padese kate na puna tassa tālassa uppatti paññāyati, evaṃ ariyamaggasatthena samūle rūpā-dirase uddharitvā tesam pubbe uppānappubbabhāvena vatthumatte cittasantāne**

kate sabbepi te tālāvatthukatāti vuccanti. Aviruḷhidhammattā vā matthakacchinna-
tālo viya katāti tālāvatthukatā. Yasmā pana evaṃ tālāvatthukatā anabhāvaṃkatā
honti (3.0200), yathā nesam pacchābhāvo na hoti, tathā katā honti. Tasmā āha-
anabhāvaṃkatāti. Āyatim anuppādadhammāti anāgate anuppajjanakasabhāvā.

No ca kho yaṃ tvaṃ sandhāya vadesīti yañca kho tvaṃ sandhāya vadesi, so
pariyāyo na hoti. Nanu ca evaṃ vutte yo brāhmaṇena vutto sāmaggiraso, tassa
attani vijjamānatā anuññātā hotīti? Na hoti. Yo hi naṃ sāmaggirasaṃ kātuṃ
bhabbo hutvā na karoti, so tadabhāvena arasarūpoti vattabbaṃ arahati.
Bhagavā pana abhabbova etaṃ kātuṃ, tenassa kāraṇe abhabbaṃ pakāseṇa
āha- “no ca kho yaṃ tvaṃ sandhāya vadesīti. Yaṃ pariyāyaṃ sandhāya tvaṃ
maṃ “arasarūpo”ti vadesi, so amhesu neva vattabboti.

Evaṃ brāhmaṇo attanā adhippetam arasarūpataṃ āropetaṃ asakkonto athā-
paraṃ **nibbhogo bhavanti**-ādīmāha. Sabbapariyāyesu cettha vuttanayeneva yoja-
nākkamaṃ viditvā sandhāyabhāsitamattaṃ evaṃ veditabbaṃ- brāhmaṇo
tadeva vayovuddhānaṃ abhivādanādikammaṃ loke “sāmaggiparibhogo”ti mañña-
māno tadabhāvena ca bhagavantaṃ “nibbhogo”ti-ādīmāha. Bhagavā ca yvāyaṃ
rūpādīsu sattānaṃ chandarāgaparibhogo, tadabhāvaṃ attani sampassamāno
aparaṃ pariyāyamanujāni.

Puna brāhmaṇo yaṃ loke vayovuddhānaṃ abhivādanādikulāsamudācāra-
kammaṃ lokiyā karonti, tassa akiriyaṃ sampassamāno bhagavantaṃ **akiriyavā-**
doti āha. Bhagavā pana yasmā kāyaduccarītādīnaṃ akiriyaṃ vadati, tasmā taṃ
akiriyavāditaṃ attani sampassamāno aparaṃ pariyāyamanujāni. Tattha ṭhapetvā
kāyaduccarītādīni avasesā akusalā dhammā **anekavihitā pāpakā akusalā**
dhammāti veditabbā.

Puna brāhmaṇo tadeva abhivādanādikammaṃ bhagavati apassanto “imaṃ
āgamma ayaṃ lokatanti lokapaveṇī ucchijjati”ti maññamāno bhagavantaṃ **ucche-**
davādoti āha. Bhagavā pana yasmā pañcakāmaguṇikarāgassa ceva akusalacitta-
dvayasampayuttassa ca dosassa anāgāmimaggena ucchedaṃ vadati, sabbākusa-
lasambhavassa pana mohassa arahattamaggena ucchedaṃ (3.0201) vadati,
ṭhapetvā te tayo avasesānaṃ pāpakānaṃ akusalānaṃ dhammānaṃ yathānu-
rūpaṃ catūhi maggehi ucchedaṃ vadati, tasmā taṃ ucchedavādaṃ attani sampa-
ssamāno aparaṃ pariyāyamanujāni.

Puna brāhmaṇo “jigucchati maññe samaṇo gotamo idaṃ vayovuddhānaṃ abhi-
vādanādikulāsamudācāra-kammaṃ, tena taṃ na karoti”ti maññamāno bhaga-
vantaṃ **jegucchīti** āha. Bhagavā pana yasmā jigucchati kāyaduccarītādīhi, yāni
kāyavacīmanoduccarītāni ceva yāva ca akusalānaṃ lāmakadhammānaṃ samā-
patti samāpajjanā samaṅgibhāvo, taṃ sabbampi gūthaṃ viya maṇḍanakajātiko
puriso jigucchati hiriyati, tasmā taṃ jegucchitaṃ attani sampassamāno aparaṃ
pariyāyamanujāni. Tattha **kāyaduccaritenāti**-ādi karaṇavacanaṃ upayogathe
daṭṭhabbaṃ.

Puna brāhmaṇo tadeva abhivādanādikammaṃ bhagavati apassanto “ayaṃ
idaṃ lokajetṭhakakammaṃ vineti vināseti, atha vā yasmā etaṃ sāmīcikammaṃ na

karoti, tasmā ayaṃ vinetabbo niggaṇhitabbo”ti maññamāno bhagavantaṃ **venayiko**ti āha. Tatrāyaṃ padattho- vinayatīti vinayo, vināsetīti vuttaṃ hoti. Vinayo eva **venayiko**. Vinayaṃ vā arahatīti **venayiko**, niggahaṃ arahatīti vuttaṃ hoti. Bhagavā pana yasmā rāgādīnaṃ vinayāya vūpasamāya dhammaṃ desetī, tasmā venayiko hoti. Ayameva cettha padattho- vinayāya dhammaṃ desetīti venayiko. Vicitrā hi taddhitavutti. Svāyaṃ taṃ venayikabhāvaṃ attani sampassamāno aparaṃ pariyāyamanujāni.

Puna brāhmaṇo yasmā abhivādanādīni sāmīcikkammāni karontā vayovuddhe tosentī hāsenti, akarontā pana tāpenti vihesenti domanassaṃ nesaṃ uppādentī, bhagavā ca tāni na karoti, tasmā “ayaṃ vayovuddhe tapatī”ti maññamāno sappurīśācāravirahitattā vā “kapaṇapuriso ayaṃ”ti maññamāno bhagavantaṃ **tapassī**ti āha. Tatrāyaṃ padattho- tapatīti tapo, rosetī vihesetīti attho. Sāmīcikkammākaraṇassetaṃ adhivacanaṃ. Tapo assa atthīti **tapassī**. Dutiye atthavikkappa byañjanāni avicāretvā loke kapaṇapuriso tapassīti (3.0202) vuccatī. Bhagavā pana ye akusalā dhammā lokaṃ tapanato tapanīyāni vuccanti, tesaṃ pahīnattā yasmā tapassīti saṅkhaṃ gato. Tasmā taṃ tapassitaṃ attani sampassamāno aparaṃ pariyāyamanujāni. Tatrāyaṃ vacanatto- tapantīti tapā, akusaladhammānametaṃ adhivacanaṃ. Te tape assī nirassī pahāsi viddhamāsīti tapassī.

Puna brāhmaṇo taṃ abhivādanādīkammaṃ devalokagabbhasampattiyā devalokapaṭisandhipaṭilābhāya saṃvattatīti maññamāno bhagavati cassa abhāvaṃ disvā bhagavantaṃ **apagabbho**ti āha. Kodhavasena vā bhagavato mātukucchismiṃ paṭisandhiggahaṇe dosaṃ dassentopi evamāha. Tatrāyaṃ vacanatto- gabbhato apagatoti **apagabbho**, abhabbo devalokūpapattiṃ pāpuṇitunti adhippāyo. Hīno vā gabbho assāti apagabbho. Devalokagabbhaparibāhirattā āyatīṃ hīnagabbhapaṭilābhābhāgīti. Hīno vāssa mātukucchismiṃ gabbhavāso ahoṣīti adhippāyo. Bhagavato pana yasmā āyatīṃ gabbhaseyyā apagatā, tasmā so taṃ apagabbhataṃ attani sampassamāno aparaṃ pariyāyamanujāni. Tatra ca **yassakho, brāhmaṇa, āyatīṃ gabbhaseyyā punabbhavābhīnibbattī pahīnā**ti etesaṃ padānaṃ evamattho daṭṭhabbo- “brāhmaṇa, yassa puggalassa anāgate gabbhaseyyā punabbhave ca abhīnibbattī anuttarena maggena vihatakāraṇattā pahīnā. Gabbhaseyyāgahaṇena cettha jalābujayoni gahitā, punabbhavābhīnibbattiggahaṇena itarā tisso”pi.

Apica gabbhassa seyyā **gabbhaseyyā**. Punabbhavo eva abhīnibbattī **punabbhavābhīnibbattī**ti evamettha attho daṭṭhabbo. Yathā ca viññāṇaṭṭhitīti vuttepi na viññāṇato aññā ṭhīti atthī, evamidhāpi na gabbhato aññā seyyā veditabbā. Abhīnibbattī ca nāma yasmā punabbhavabhūtāpi apunabbhavabhūtāpi atthī, idha ca punabbhavabhūtā adhippetā, tasmā vuttaṃ- “punabbhavo eva abhīnibbattī punabbhavābhīnibbattī”ti.

Evam āgatakālato paṭṭhāya arasarūpatādīhi aṭṭhahi akkosavatthūhi akkosantampi brāhmaṇaṃ bhagavā dhammissaro dhammarājā dhammasāmī tathāgato anukampāya sītaleneva cakkhunā brāhmaṇaṃ olekento yaṃ dhammadhātumaṃ paṭivijjhītvā desanāvīlāsappattā nāma hoti, tassā (3.0203) dhammadhātuyā suppa-

ṭividdhattā vigatavalāhake nabhe puṇṇacando viya ca saradakāle sūriyo viya ca brāhmaṇassa hadayandhakāraṃ vidhamento tāniyeva akkosavatthūni tena tena pariyāyena aññathā dassetvā punapi attano karuṇāvippahāraṃ aṭṭhahi lokadhammehi akampiyabhāvena paṭiladdhatādiguṇalakkaṇaṃ pathavisamacittataṃ akuppadhammatañca pakāsento “ayaṃ brāhmaṇo kevalaṃ palitasirakhaṇḍadantavalittacatādīhi attano vuddhabhāvaṃ sallakkheti, no ca kho jānāti attānaṃ jātiyā anugataṃ jarāya anusaṭaṃ byādhino adhibhūtaṃ maraṇena abbhāhataṃ ajja maritvā puna sveva uttānaseyyadāraḥabhāvagamaṇiyaṃ. Mahantena kho pana ussāhena mama santikaṃ āgato, tadassa āgamaṇaṃ sātthakaṃ hotū”ti cintetvā imasmiṃ loke attano appaṭisamaṃ purejātabhāvaṃ dassento **seyyathāpi, brāhmaṇāti-ādīnā** nayena brāhmaṇassa dhammadesanaṃ vaḍḍhesi.

Tattha **seyyathāpīti-ādīnaṃ** heṭṭhā vutanayeneva attho veditabbo. Ayaṃ pana viseso- heṭṭhā vuttanayeneva hi te kukkuṭapotaḥpakke vidhunantā taṃkhaṇānurūpaṃ viravantā nikkhamanti. Evaṃ nikkhamantānañca tesāṃ yo paṭhamataraṃ nikkhamati, so jeṭṭhoti vuccati. Tasmā bhagavā tāya upamāya attano jeṭṭhabhāvaṃ sādhetukāmo brāhmaṇaṃ pucchati- **yo nu kho tesāṃ kukkuṭacchāpotakānaṃ ...pe... kinti svāssa vacaṇīyoti**. Tattha **kukkuṭacchāpakānanti** kukkuṭapotaḥkānaṃ. **Kinti svāssa vacaṇīyoti** so kinti vacaṇīyo assa, kiṃ vattabbo bhaveyya jeṭṭho vā kantiṭṭho vāti.

“**Jeṭṭho**”tissa, **bho gotama, vacaṇīyoti**, bho gotama, so jeṭṭho iti assa vacaṇīyo. Kasmāti ce? **So hi nesāṃ jeṭṭhoti**, yasmā so nesāṃ vuddhataroti attho. Athassa bhagavā opammaṃ sampaṭipādento **evameva khoti āha**, yathā so kukkuṭapotako, evaṃ ahampi. **Avijjāgatāya pajāyāti** avijjā vuccati aññāṇaṃ, tattha gatāya. **Pajāyāti** sattadhivacanametāṃ, avijjākosassa anto pavitṭhesu sattesūpi vuttaṃ hoti. **Aṇḍabhūtāyāti** aṇḍe bhūtāya pajātāya sañjātāya. Yathā hi aṇḍe nibbattā ekacce sattā aṇḍabhūtāti vuccanti, evamayaṃ (3.0204) sabbāpi pajā avijjaṇḍakose nibbattattā aṇḍabhūtāti vuccati. **Pariyonaddhāyāti** tena avijjaṇḍakosena samantato onaddhāya baddhāya veṭhitāya. **Avijjaṇḍakosaṃ padāletvāti** taṃ avijjāmayāṃ aṇḍakosaṃ bhinditvā. **Ekova loketi** sakalepi lokasannivāse ahameva eko adutiyo. **Anuttaraṃ sammāsambodhiṃ abhisambuddhoti** uttararahitaṃ sabbasetṭhaṃ

sammā sāmañca bodhiṃ, atha vā pasatthaṃ sundarañca bodhiṃ. Arahattamaggañāṇassettaṃ nāmaṃ, sabbaññutaññāṇassāpi nāmameva. Ubhayampi vaṭṭati. Aññesaṃ arahattamaggo anuttarā bodhi hoti, na hotīti? Na hoti. Kasmā? Asabbaṅgaṇadāyakattā. Tesañhi kassaci arahattamaggo arahattaphalameva deti, kassaci tisso vijjā, kassaci cha abhiññā, kassaci catasso paṭisambhidā, kassaci sāvakaṇāpāramiññaṃ. Paccekabuddhānampi paccekabodhiññaṃmeva deti, buddhānaṃ pana sabbagaṇasampattiṃ deti abhiseko viya rañño sabbalokissarabhāvaṃ. Tasmā aññassa kassacipi anuttarā bodhi na hotīti. **Abhisambuddhoti** abbhaññāsiṃ paṭivijjhīṃ, pattomhi adhigatomhīti vuttaṃ hoti.

Idāni yadetaṃ bhagavatā “evameva kho”ti-ādinā nayena vuttaṃ opamma-sampāṭipādanaṃ, taṃ evaṃ atthena saṃsanditvā vedittabbaṃ- yathā hi tassā kukkuṭiyā attano aṇḍesu adhisayanāditividhakiriyākaraṇaṃ, evaṃ bodhipallaṅke nisi-nnassa bodhisattabhūtaṃ bhagavato attano santāne aniccaṃ, dukkhaṃ, ana-ttāti tividhānupassanākaraṇaṃ. Kukkuṭiyā tividhakiriyāsampādanena aṇḍānaṃ apūtibhāvo viya bodhisattabhūtaṃ bhagavato tividhānupassanāsampādanena vipassanāññaṃsā aparīhāni. Kukkuṭiyā tividhakiriyākaraṇena aṇḍānaṃ allasine-hapariyādānaṃ viya bodhisattabhūtaṃ bhagavato tividhānupassanāsampādanena bhavattayānugatanikantisinehapariyādānaṃ. Kukkuṭiyā tividhakiriyākara-ṇena aṇḍakapālānaṃ tanubhāvo viya bodhisattabhūtaṃ bhagavato tividhānupa-ssanāsampādanena avijjaṇḍakosassa tanubhāvo, kukkuṭiyā tividhakiriyākara-ṇena kukkuṭapotakassa pādanakhatuṇḍakānaṃ thaddhakharabhāvo viya bodhisattabhūtaṃ bhagavato tividhānupassanāsampādanena vipassanāññaṃsā tikkha-kharavippasannasūrabhāvo. Kukkuṭiyā tividhakiriyākaraṇena kukkuṭapotakassa pariṇāmakālo viya bodhisattabhūtaṃ (3.0205) bhagavato tividhānupassanāsa-mpādanena vipassanāññaṃsā pariṇāmakālo vaḍḍhikālo gabbhaggaṇakālo. Kukkuṭiyā tividhakiriyākaraṇena kukkuṭapotakassa pādanakhasikhāya vā mukha-tuṇḍakena vā aṇḍakosam padāletvā pakkhe papphoṭetvā sotthinā abhinibbhidā-kālo viya bhagavato tividhānupassanāsampādanena vipassanāññaṃsāgabbhaṃ gaṇhāpetvā anupubbādhigatena arahattamaggena avijjaṇḍakosam padāletvā abhiññāpakkhe papphoṭetvā sotthinā sakalabuddhagaṇasacchikatakālo vedi-tabbo.

Ahañhi, brāhmaṇa, jeṭṭho seṭṭho lokassāti, brāhmaṇa, yathā tesam kukkuṭapota-kānaṃ paṭhamataram aṇḍakosam padāletvā abhinibbatto kukkuṭapotako jeṭṭho hoti, evaṃ avijjāgatāya pajāya taṃ avijjaṇḍakosam padāletvā paṭhamataram ari-yāya jātiyā jātattā ahañhi jeṭṭho vuddhatamoti saṅkhaṃ gato, sabbagaṇehi pana appaṭisamattā seṭṭhoti.

Evaṃ bhagavā attano anuttaram jeṭṭhaseṭṭhabhāvaṃ brāhmaṇassa pakāsetvā idāni yāya paṭipadāya taṃ adhigato, taṃ paṭipadaṃ pubbabhāgato pabhu-ti dassetuṃ **āraddhaṃ kho pana me, brāhmaṇāti-ādimāha**. Tattha **āraddhaṃ kho pana me, brāhmaṇa, vīriyaṃ ahoṣīti**, brāhmaṇa, na mayā ayaṃ anuttaro jeṭṭhase-ṭṭhabhāvo kusītena muṭṭhassatinā sāraddhakāyena vikkhittacitena adhigato, apica kho tadadhigamāya āraddhaṃ kho pana me vīriyaṃ ahoṣi. Bodhimaṇḍe nisi-

nnena mayā catusammappadhānabhedaṃ vīriyaṃ āraddhaṃ ahosi, paggaḥitaṃ asithilappavattitaṃ. Āraddhattāyeva ca me taṃ **asallīnaṃ** ahosi. Na kevalañca vīriyameva, satipi me ārammaṇābhimukhabhāvena **upaṭṭhitā** ahosi, upaṭṭhitattāyeva ca **asammutṭhā**. **Passaddho kāyo asāraddhoti** kāyacittappassaddhivasena kāyopi me passaddho ahosi. Tattha yasmā nāmakāye passaddhe rūpakāyopi passaddhoyeva hoti, tasmā “nāmakāyo rūpakāyo”ti avisesetvāva “passaddho kāyo”ti vuttaṃ. **Asāraddhoti** so ca kho passaddhattāyeva asāraddho, vigatadaraṭṭhoti vuttaṃ hoti (3.0206). **Samāhitaṃ cittaṃ ekagganti** cittampi me sammā āhitaṃ suṭṭhu ṭhapitaṃ appitaṃ viya ahosi, samāhitattā eva ca ekaggaṃ acalaṃ nipphananti. Ettāvataṃ jhānassa pubbabhāgapaṭipadā kathitā hoti.

Idāni imāya paṭipadāya adhigataṃ paṭhamajjhānaṃ ādiṃ katvā vijjāttayapariyosānaṃ visesaṃ dassento **so kho ahanti**-ādimāha. Tattha yaṃ yāva vinicchayana-yena vattabbaṃ siyā, taṃ visuddhimagge (visuddhi. 1.69) vuttameva.

Ayaṃ kho me, brāhmaṇāti-ādīsu pana **vijjāti** viditakaraṇaṭṭhena vijjā. Kiṃ viditaṃ karoti? Pubbenivāsaṃ. **Avijjāti** tasseva pubbenivāsassa aviditakaraṇaṭṭhena tappaṭicchādakamoho. **Tamo**Ti sveva moho tappaṭicchādakaṭṭhena tamo nāma. **Ālokoti** sā eva vijjā obhāsakaraṇaṭṭhena ālokoti. Ettha ca vijjā adhigatāti attho, sesaṃ pasamsāvacaṇaṃ. Yojanā panettha- ayaṃ kho me vijjā adhigatā, tassa me adhigatavijjassa avijjā vihatā, vinaṭṭhāti attho. Kasmā? Yasmā vijjā uppanā. Esa nayo itarasmimpi padadvaye. **Yathā tanti** ettha **tanti** nipātamattaṃ. Satiyā avi-ppavāsena appamattassa vīriyātāpena ātāpino kāye ca jīvite ca anapekkhātāya pahitattassa pesitattassāti attho. Idaṃ vuttaṃ hoti- yathā appamattassa ātāpino pahitattassa viharato avijjā vihaññeyya, vijjā uppajjeyya tamo vihaññeyya, āloko uppajjeyya, evameva mama avijjā vihatā, vijjā uppanā, tamo vihato, āloko uppano. Etassa me padhānānuyogassa anurūpameva phalaṃ laddhanti.

Ayaṃ kho me, brāhmaṇa, paṭhamā abhinibbidā ahosi kukkuṭacchāpakasseva aṇḍakosamhāti ayaṃ kho mama, brāhmaṇa, pubbenivāsānussatiñāṇamukhatuṇḍakena pubbe nivutthakkhandhappaṭicchādakaṃ avijjaṇḍakosaṃ padāletvā paṭhamā abhinibbidā paṭhamā nikkhanti paṭhamā ariyājāti ahosi kukkuṭacchāpakasseva mukhatuṇḍakena vā ṃ pādanakhasikhāya vā aṇḍakosaṃ padāletvā tamhā aṇḍakosamhā abhinibbidā nikkhanti kukkuṭanikāye paccājātīti. Ayaṃ tāva pubbenivāsakathāyaṃ nayo.

Cutupapātakathāya (3.0207) pana **vijjāti** dibbacakkhuñāṇavijjā. **Avijjāti** cutupapātaṭṭappaṭicchādikā avijjā. Yathā pana pubbenivāsakathāyaṃ “pubbenivāsānussatiñāṇamukhatuṇḍakena pubbe nivutthakkhandhappaṭicchādakaṃ avijjaṇḍakosaṃ padāletvā”ti vuttaṃ, evamidha “cutupapātañāṇamukhatuṇḍakena cutupapātaṭṭappaṭicchādakaṃ avijjaṇḍakosaṃ padāletvā”ti vattabbaṃ.

Yaṃ panetaṃ paccavekkhaṇaṇāṇapariggahitaṃ āsavānaṃ khayañāṇādhi-gamaṃ brāhmaṇassa dassento **ayaṃ kho me, brāhmaṇa, tatiyā vijjāti**-ādimāha, tattha **vijjāti** arahattamaggavijjā. **Avijjāti** catusaccappaṭicchādikā avijjā. **Ayaṃ kho me, brāhmaṇa, tatiyā abhinibbidā ahoṣīti** ettha ayaṃ kho mama, brāhmaṇa, āsavānaṃ khayañāṇamukhatuṇḍakena catusaccappaṭicchādakaṃ avijjaṇḍakosaṃ

padāletvā tatiyā abhinibbhidā tatiyā nikkhanti tatiyā ariyajāti ahosi kukkuṭacchāpakasseva mukhatuṇḍakena vā pādanakhasikhāya vā aṇḍakosaṃ padāletvā tamhā aṇḍakosaṃhā abhinibbhidā nikkhanti kukkuṭanikāye paccājātīti.

Ettāvatā kiṃ dassesīti? So hi, brāhmaṇa, kukkuṭacchāpako aṇḍakosaṃ padāletvā tato nikkhamanto sakimeva jāyati, ahaṃ pana pubbenivutthakkhandhappaṭicchādakaṃ avijjaṇḍakosaṃ bhinditvā paṭhamaṃ tāva pubbenivāsānussatiñāṇavijjāya jāto. Tato sattānaṃ cutipaṭisandhippaṭicchādakaṃ avijjaṇḍakosaṃ padāletvā dutiyaṃ dibbacakkhuñāṇavijjāya jāto, puna catusaccappaṭicchādakaṃ avijjaṇḍakosaṃ padāletvā tatiyaṃ āsavānaṃ khayañāṇavijjāya jāto. Evaṃ tīhi vijjāhi tikkhattuṃ jātomhi. Sā ca me jāti ariyā suparisuddhāti idaṃ dasseti. Evaṃ dassento ca pubbenivāsāñāṇena atitaṃsañāṇaṃ, dibbacakkhunā paccuppannānāgatasañāṇaṃ, āsavakkhayaena sakalalokiyalokuttaraguṇanti evaṃ tīhi vijjāhi sabbepi sabbaññuguṇe pakāsetvā attano ariyāya jātiyā jeṭṭhaseṭṭhabhāvaṃ brāhmaṇassa dassesi.

Evaṃ vutte verañjo brāhmaṇoti evaṃ bhagavatā lokānukampakena brāhmaṇaṃ anukampamānena niguhitabbepi attano ariyāya jātiyā jeṭṭhaseṭṭhabhāve vijjāttayapakāsikāya dhammadesanāya vutte pītivipphāraparipuṇṇagattacitto verañjo brāhmaṇo taṃ bhagavato ariyāya jātiyā jeṭṭhaseṭṭhabhāvaṃ veditvā “īdisaṃ nāmāhaṃ sabbalokajeṭṭhaṃ (3.0208) sabbaguṇasamannāgataṃ sabbaññuṃ ‘aññesaṃ abhivādanādikammaṃ na karotīti avacaṃ, dhiratthu vata, bho, aññānaṃ”ti attānaṃ garahitvā “ayaṃ dāni loke ariyāya jātiyā purejātaṭṭhena jeṭṭho, sabbaguṇehi appaṭisamaṭṭhena seṭṭho”ti niṭṭhaṃ gantvā bhagavantaṃ etadavoca- **jeṭṭho bhavaṃ gotamo seṭṭho bhavaṃ gotamoti**. Evañca pana vatvā puna taṃ bhagavato dhammadesanaṃ abbhanumodamāno **abhikkantaṃ bho gotamāti**-ādimāha. Taṃ vuttatthamevāti.

2. Sīhasuttavaṇṇanā

12. Dutiye **abhiññātā** Ti ñātā paññātā pākaṭā. **Santhāgāreti** mahājanassa vissamanatthāya kate agāre. Sā kira santhāgārasālā nagaramajjhe ahosi, catūsu ṭhānesu ṭhitānaṃ paññāyati, catūhi disāhi āgatamanussā paṭhamaṃ tattha vissamitvā pacchā attano attano phāsukaṭṭhānaṃ gacchanti. Rājakulānaṃ rajjakiccasantharaṇatthāya kataṃ agārantipi vadantiyeva. Tattha hi nisīditvā licchavirājāno rajjakiccaṃ santharanti karonti vicārenti. **Sannisinnāti** tesāṃ nisīdanatthaññeva paññattesu mahārahavarapaccattharaṇesu samussitasetacchattesu āsanesu sannisinnā. **Anekapariyāyena buddhassa vaṇṇaṃ bhāsantīti** rājakule kiccañceva lokatthacariyañca vicāretvā anekehi kāraṇehi buddhassa vaṇṇaṃ bhāsanti kathenti dīpenti. Paṇḍitā hi te rājāno saddhā pasannā sotāpannāpi sakadāgāminopi anāgāminopi ariyasāvaka, te sabbepi lokiyajaṭaṃ chinditvā buddhādīnaṃ tiṇṇaṃ ratanānaṃ vaṇṇaṃ bhāsanti. Tattha tividho buddhavaṇṇo nāma cariyavaṇṇo, sarīravaṇṇo, guṇavaṇṇoti. Tatrime rājāno cariyāya vaṇṇaṃ ārabhiṃsu- “dukkaraṃ vata kataṃ sammāsambuddhena kappasatasahassādhikāni cattāri

asaṅkheyyāni dasa pāramiyo, dasa upapāramiyo, dasa paramatthapāramiyoti samattiṃsa pāramiyo pūrentena, ñātatthacariyaṃ, lokatthacariyaṃ, buddhacariyaṃ matthakaṃ pāpetvā pañca mahāpariccāge pariccajantena”ti aḍḍhacchakkehi jātakasatehi buddhavaṇṇaṃ kathentā tusitabhavanaṃ pāpetvā ṭhapayimṣu.

Dhammassa (3.0209) **vaṇṇaṃ** bhāsantā pana “tena bhagavatā dhammo desito, nikāyato pañca nikāyā, piṭakato tīṇi piṭakāni, aṅgato nava aṅgāni, khandhato catu-rāsītiddhammakhandhasahassāni”ti koṭṭhāsavasena dhammaguṇaṃ kathayimṣu.

Saṅghassa vaṇṇaṃ bhāsantā satthu dhammadesanaṃ sutvā “paṭiladdha-saddhā kulaputtā bhogakkhandhañceva ñātiparivaṭṭaṅca pahāya setacchattaṃ oparajjaṃ senāpatiseṭṭhibhaṇḍāgārikaṭṭhānantarādīni agaṇetvā nikkhamma satthu varasāsane pabbajanti. Setacchattaṃ pahāya pabbajitānaṃ bhaddiyarāja-mahākappinapukkusāti-ādīnaṃ rājapabbajitānaṃyeva buddhakāle asītisahas-sāni ahesuṃ. Anekakoṭṭisataṃ dhanam pahāya pabbajitānaṃ pana yasakulapu-ttasoṇaseṭṭhiputtaraṭṭhapālakulaputtādīnaṃ paricchedo natthi. Evarūpā ca eva-rūpā ca kulaputtā satthu sāsane pabbajanti”ti pabbajjāsaṅkhepavasena saṅgha-guṇe kathayimṣu.

Sīho senāpatīti evaṃnāmako senāya adhipati. Vesāliyañhi satta sahas-sāni satta satāni satta ca rājāno. Te sabbepi sannipatitvā sabbesaṃ manam gahetvā “raṭṭhaṃ vicāretuṃ samatthaṃ ekaṃ vicinathā”ti vicinantā sīhaṃ rājakumāraṃ disvā “ayaṃ sakkhissati”ti sannitṭhānaṃ katvā tassa rattamaṇivaṇṇaṃ kambala-pariyonaddhaṃ senāpaticchattaṃ adamsu. Taṃ sandhāya vuttaṃ- “sīho senāpa-tī”ti. **Nigaṇṭhasāvako**ti nigaṇṭhassa nāṭaputtassa paccayadāyako upaṭṭhāko. Jambudīpatalasmiñhi tayo janā nigaṇṭhānaṃ aggupaṭṭhākā- nāḷandāyaṃ, upāli-gahapati, kapilapure vappo sakko, vesāliyaṃ ayaṃ sīho senāpatīti. **Nisinno hotīti** sesarājūnaṃ parisāya antarantare āsanāni paññāpayimṣu, sīhassa pana majjhe ṭhāneti tasmim paññatte mahārahe rājāsane nisinno hoti. **Nissamsayanti** nibbici-kicchaṃ addhā ekaṃsena, na hete yassa vā tassa vā appesakkhassa evaṃ ane-kasatehi kāraṇehi vaṇṇaṃ bhāsanti.

Yena nigaṇṭho nāṭaputto tenupasaṅkamīti nigaṇṭho kira nāṭaputto “sacāyaṃ sīho kassacideva samaṇassa gotamassa vaṇṇaṃ kathentassa sutvā samaṇaṃ gotamaṃ dassanāya upasaṅkamissati, mayhaṃ

parihāni bhavissatī”ti (3.0210) cintetvā paṭhamataramyeva sīhaṃ senāpatiṃ eta-
davoca- “senāpati imasmiṃ loke ‘ahaṃ buddho ahaṃ buddho’ti bahū vicaranti.
Sace tvaṃ kassaci dassanāya upasaṅkamtukāmo ahosi, maṃ puccheyyāsi.
Ahaṃ te yuttatṭhānaṃ pesessāmi, ayuttatṭhānato nivāressāmi”ti. So taṃ kathaṃ
anussarivā “sace maṃ pesessati, gamissāmi. No ce, na gamissāmi”ti cintetvā
yena nigaṇṭho nāṭaputto, tenupasaṅkami.

Athassa vacanaṃ sutvā nigaṇṭho mahāpabbatena viya balavasokena otthaṭo
“yattha dānissāhaṃ gamaṇaṃ na icchāmi, tattheva gantukāmo jāto, hatohama-
smī”ti anattamano hutvā “paṭibāhanupāyamassa karissāmi”ti cintetvā **kiṃ pana
tvanti-ādimāha**. Evaṃ vadanto vicarantaṃ goṇaṃ daṇḍena paharanto viya jala-
mānaṃ padīpaṃ nibbāpento viya bhattabharitaṃ pattamaṃ nikkujjanto viya ca
sīhassa uppannapītiṃ vināsesi. **Gamiyābhisāṅkhāro**ti hatthiyānādīnaṃ yojāpana-
gandhamālādiggahaṇavasena pavatto payogo. **So paṭippassambhīti** so vūpa-
santo.

Dutiyaṃpi khoti dutiyavārampi. Imasmiñca vāre buddhassa vaṇṇaṃ bhāsantā
tusitabhavanato paṭṭhāya yāva mahābodhipallaṅkā dasabalassa heṭṭhā pādā-
lehi upari kesaggehi paricchinditvā dvattiṃsamahāpurisalakkhaṇa-asīti-anubyañja-
nabyāmapabhānaṃ vasena sarīravaṇṇaṃ kathayīṃsu. Dhammassa vaṇṇaṃ
bhāsantā “ekapadepe ekabyañjanepi avakhalitaṃ nāma natthī”ti sukathitavase-
neva dhammaguṇaṃ kathayīṃsu. Saṅghassa vaṇṇaṃ bhāsantā “evarūpaṃ yasa-
sirivibhavaṃ pahāya satthu sāsane pabbajitā na kosajjapakatikā honti, terasasu
pana dhutaṅgaguṇesu paripūrakārino hutvā sattasu anupassanāsu kammaṃ
karonti, aṭṭhatīṃsārammaṇavibhattiyo vaḷaṅjenti”ti paṭipadāvasena saṅghaguṇe
kathayīṃsu.

Tatiyavāre pana buddhassa vaṇṇaṃ bhāsamānā “itipi so bhagavā”ti suttantapa-
riyāyeneva buddhaguṇe kathayīṃsu, “svākkhāto bhagavatā dhammo”ti-ādinā
suttantapariyāyeneva dhammaguṇe, “suppaṭipanno bhagavato (3.0211) sāvaka-
saṅgho”ti-ādinā suttantapariyāyeneva saṅghaguṇe ca kathayīṃsu. Tato sīho cintesi-
“imesañca licchavirājakumārānaṃ tatiyadivasato paṭṭhāya buddhadhammasa-
ṅghaguṇe kathentānaṃ mukhaṃ nappahoti, addhā anomaguṇena samannāgatā
so bhagavā, imaṃ dāni uppannaṃ pītiṃ avijahitvāva ahaṃ ajja sammāsa-
mbuddhaṃ passissāmi”ti. Athassa “kiṃ hi me karissanti nigaṇṭhā”ti vitakko uda-
pādi. Tattha **kiṃ hi me karissantīti** kiṃ nāma mayhaṃ nigaṇṭhā karissanti. **Apalo-
kitā vā anapalokitā vā**ti āpucchitā vā anāpucchitā vā. Na hi me te āpucchitā yāna-
vāhanasampattiṃ, na ca issariyavisesaṃ dassanti, nāpi anāpucchitā harissanti,
aphalaṃ etesaṃ āpucchanti adhippāyo.

Vesāliyā niyyāsīti yathā hi gimhakāle deve vuṭṭhe udakaṃ sandamānaṃ nadiṃ
otaritvā thokameva gantvā tiṭṭhati nappavattati, evaṃ sīhassa paṭhamadivase
“dasabalaṃ passissāmi”ti uppannāya pītiyā nigaṇṭhena paṭibāhitakālo. Yathāpi
dutiyaṃpi deve vuṭṭhe udakaṃ sandamānaṃ nadiṃ otaritvā thokaṃ gantvā
vālikāpuñjaṃ paharivā appavattaṃ hoti, evaṃ sīhassa dutiyaṃpi deve vuṭṭhe
“dasabalaṃ passissāmi”ti uppannāya pītiyā nigaṇṭhena paṭibāhitakālo. Yathā tatiyaṃpi

deve vuṭṭhe udakaṃ sandamānaṃ nadiṃ otarivā purāṇapaṇṇasukkhadaṇḍaka-
ṭṭhakacavarādīni parikaḍḍhantaṃ vālikāpuñjaṃ bhindivā samuddaninnameva
hoti, evaṃ sīho tatiyadivase tiṇṇaṃ vatthūnaṃ guṇakathaṃ sutvā uppanne pītipā-
mojje “aphalā nigaṇṭhā nipphalā nigaṇṭhā, kiṃ me ime karissanti, gamissāmaṃ
satthusantikaṃ”ti manaṃ abhinīharitvā vesāliyā niyyāsi. Niyyanto ca “cirassāhaṃ
dasabalassa santikaṃ gantukāmo jāto, na kho pana me yuttaṃ aññātakavesena
gantun”ti “yekeci dasabalassa santikaṃ gantukāmā, sabbe nikkhamantū”ti
ghosanaṃ kāretvā pañcarathasatāni yojāpetvā uttamarathe ṭhito tehi ceva
pañcahi rathasatehi mahatiyā ca parisāya parivuto gandhapupphacuṇṇavāsādīni
gāhāpetvā niyyāsi. **Divā divassāti** divasassa ca divā, majjhanhike atikkantamatte.

Yena bhagavā tenupasaṅkamīti ārāmaṃ pavisanto dūratova asīti-anubyañjana-
byāmapabhā-dvattiṃsa-mahāpurisalakkhaṇāni chabbaṇṇaghanabuddhara-
smiyo ca disvā “evarūpaṃ nāma purisaṃ evaṃ āsanne vasantaṃ ettakaṃ kālaṃ
nāddasaṃ, vañcito (3.0212) vatamhi, alābhā vata me”ti cintetvā mahānidhiṃ
disvā daliddapuriso viya sañjātapītipāmojjo yena bhagavā tenupasaṅkami.
Dhammassa cānudhammaṃ byākarontīti bhotā gotamena vuttakāraṇassa anukā-
raṇaṃ kathenti. Kāraṇavacano hettha dhammasaddo “hetumhi ñāṇaṃ dhamma-
paṭisambhidā”ti-ādīsu (vibha. 720) viya. Kāraṇanti cettha tathāpavattassa
saddassa attho adhippeto tassa pavattihetubhāvato. Atthappayutto hi saddappa-
yogo. Anukāraṇanti eso eva parehi tathā vuccamāno. **Sahadhammiko vādānuvā-
doti**. Parehi vuttakāraṇehi sakāraṇo hutvā tumhākaṃ vādo vā tato paraṃ tassa
anuvādo vā koci appamattakopi viññūhi garahitabbaṃ ṭhānaṃ kāraṇaṃ na āga-
cchati. Idaṃ vuttaṃ hoti- kiṃ sabbākārenapi tava vāde gārayhaṃ kāraṇaṃ
natthīti. **Anabbhakkhātukāmā** Ti na abhūtena vattukāmā. **Atthi sīhapariyāyoti-ā-**
dīnaṃ attho verañjakaṇḍe āgatanayeneva veditabbo. **Paramena assāsenāti** catu-
maggacatuphalasaṅkhātena uttamena. **Assāsāya dhammaṃ desemīti** assāsana-
tthāya santhambhanatthāya dhammaṃ desemi. Iti bhagavā aṭṭhahaṅgehi sīhassa
senāpatissa dhammaṃ desesi.

Anuviccakāranti anuviditvā cintetvā tulayitvā kattabbaṃ karohīti vuttaṃ hoti.
Sādhu hotīti sundaro hoti. Tumhādisasmiñhi maṃ disvā maṃ saraṇaṃ gacchante
nigaṇṭhaṃ disvā nigaṇṭhaṃ saraṇaṃ gacchante “kiṃ ayaṃ sīho diṭṭhaditṭhameva
saraṇaṃ gacchati”ti garahā uppajjati, tasmā anuviccakāro tumhādisānaṃ sādhuṃ
dasseti. **Paṭākaṃ parihareyyunti** te kira evarūpaṃ sāvakaṃ labhitvā “asuko nāma
rājā vā rājamahāmatto vā seṭṭhi vā amhākaṃ saraṇaṃ gato sāvako jāto”ti paṭākaṃ
ukkipitvā nagare ghosentā āhiṇḍanti. Kasmā? Evaṃ no mahantabhāvo āvibhavi-
ssatīti ca. Sace panassa “kimahaṃ etesaṃ saraṇaṃ gato”ti vipphaṭṭhāro uppa-
jjeyya, tampi so “etesamaṃ me saraṇagatabhāvaṃ bahū jānanti, dukkhaṃ idāni paṭi-
nivattitun”ti vinodetvā na paṭikkamissatīti ca. Tenāha- “paṭākaṃ parihareyyun”ti.
Opānabhūtanti paṭiyatta-udapāno viya ṭhitamaṃ. **Kulanti** tava nivesanaṃ. **Dātabbaṃ
maññeyyāsīti** pubbe dasapi vīsātipi saṭṭhipi jane āgate disvā (3.0213) natthīti
avatvā desi, idāni maṃ saraṇaṃ gatakāraṇamatteneva mā imesaṃ deyya-
dhammaṃ upacchindi. Sampattānañhi dātabbamevāti ovadi. **Sutaṃ metamaṃ,**

bhanteti kuto sutanti? Nigaṇṭhānaṃ santikā. Te kira kulagharesu evaṃ pakāsentī “mayāṃ yassa kassaci sampattassa dātabbanti vadāma, samaṇo pana gotamo ‘mayhameva dānaṃ dātabbaṃ nāññesaṃ, mayhameva sāvakānaṃ dānaṃ dātabbaṃ, nāññesaṃ sāvakānaṃ, mayhameva dinnaṃ dānaṃ mahapphalaṃ, nāññesaṃ, mayhameva sāvakānaṃ dinnaṃ mahapphalaṃ, nāññesaṃ’ti evaṃ vadatī”ti. Taṃ sandhāya ayaṃ “sutaṃ metan”ti āha.

Anupubbim kathanti dānānantaraṃ sīlaṃ, sīlānantaraṃ saggāna-
ntaraṃ magganti evaṃ anupaṭipāṭikathaṃ. Tattha **dānakathanti** idaṃ dānaṃ
nāma sukhānaṃ nidānaṃ, sampattinaṃ mūlaṃ, bhogānaṃ paṭiṭṭhā, visamaga-
tassa tāṇaṃ leṇaṃ gati parāyaṇaṃ, idhalokaparalokesu dānasadiso avassayo
paṭiṭṭhā ārammaṇaṃ tāṇaṃ leṇaṃ gati parāyaṇaṃ natthi. Idañhi avassayaṭṭhena
ratanamayasihāsanasadisaṃ, paṭiṭṭhānaṭṭhena mahāpathaviśadisaṃ, ārammaṇa-
ṭṭhena ālambanarajjusadisaṃ. Idañhi dukkhanittharaṇaṭṭhena nāvā, samassāsana-
ṭṭhena saṅgāmasūro, bhayaparitāṇaṭṭhena susaṅkhatanagaraṃ, maccheramalā-
dīhi anupalittaṭṭhena padumaṃ, tesaṃ nidhanaṭṭhena aggi, durāsadaṭṭhena āsi-
viso, asantāsanaṭṭhena sīho, balavantaṭṭhena hatthī, abhimaṅgalasammataṭṭhena
setavasabho, khemantabhūmisampāpanaṭṭhena valāhako assarājā. Dānaṃ
nāmetaṃ mayā gatamaggo, mayheso vaṃso, mayā dasa pāramiyo pūrentena
velāmahāyañño, mahāgovindamahāyañño, mahāsudassanamahāyañño,
vessantaramahāyaññoti, anekamahāyaññā pavattitā, sasabhūtena jalita-aggi-
kkhandhe attānaṃ niyyādentena sampattayācakānaṃ cittaṃ gahitaṃ. Dānañhi
loke sakkasampattiṃ deti mārasampattiṃ brahmasampattiṃ, cakkavattisampattiṃ,
sāvakaṃpāramiññaṃ, paccekabodhiññaṃ, abhisambodhiññaṃ detīti evamādi-
dānaguṇappaṭisaṃyuttaṃ kathaṃ.

Yasmā pana dānaṃ dento sīlaṃ samādātuṃ sakkoti, tasmā tadanantaraṃ sīla-
kathaṃ kathesi. **Sīlakathanti** sīlaṃ nāmetaṃ avassayo paṭiṭṭhā ārammaṇaṃ tāṇaṃ
leṇaṃ gati parāyaṇaṃ. Sīlaṃ nāmetaṃ mama vaṃso (3.0214), ahaṃ saṅkhapāla-
nāgarājakāle bhūridattanāgarājakāle campeyyanāgarājakāle sīlavarājakāle mātu-
posakahatthirājakāle chaddantahatthirājakāleti anantesu attabhāvesu sīlaṃ pari-
pūresiṃ. Idhalokaparalokasampattinañhi sīlasadiso avassayo paṭiṭṭhā āra-
mmaṇaṃ tāṇaṃ leṇaṃ gati parāyaṇaṃ natthi, sīlālaṅkārasadiso alaṅkāro natthi,
sīlapupphasadisaṃ pupphaṃ natthi, sīlagandhasadiso gandho natthi. Sīlālaṅkā-
rena hi alaṅkataṃ sīlagandhānulittaṃ sadevakopi loko olokento tittiṃ na gaccha-
tīti evamādisīlaguṇappaṭisaṃyuttaṃ kathaṃ.

“Idaṃ pana sīlaṃ nissāya ayaṃ saggo labbhatī”ti dassetuṃ sīlānantaraṃ
saggakathaṃ kathesi. **Saggakathanti** “ayaṃ saggo nāma iṭṭho kanto manāpo,
niccamettha kiḷā, niccaṃ sampattiyo labbhanti, cātumahārājikā devā navutivassa-
satasahasāni dibbasukhaṃ dibbasampattiṃ anubhavanti, tāvatimsā tisso ca
vassakoṭiyo satṭhi ca vassasatasahasānī”ti evamādisaggaguṇappaṭisaṃyuttaṃ
kathaṃ. Saggasampattiṃ kathayantānañhi buddhānaṃ mukhaṃ nappahoti.
Vuttampi cetāṃ- “anekapariyāyena khvāhaṃ, bhikkhave, saggakathaṃ katheyya-
n”ti-ādi (ma. ni. 3.255).

Evam saggakathāya palobhetvā pana hatthiṃ alaṅkaritvā tassa soḍḍaṃ chindanto viya “ayampi saggo anicco addhuvo, na ettha chandarāgo kattaḅbo”ti dassanattaṃ “appaṣādā kāmā bahudukkhā bahupāyāsā, ādīnavo ettha bhiyyo”-ti-ādīnā (ma. ni. 1.235-236; 2.42) nayena **kāmānaṃ ādīnaṃ okāraṃ saṃkilesaṃ** kathesi. Tattha **ādīnavoti** doso. **Okāroti** avakāro lāmakabhāvo. **Saṃkilesoti** tehi sattānaṃ saṃsāre saṃkilissaṃ. Yathāha- “saṃkilissanti vata, bho, sattā”ti (ma. ni. 2.351).

Evam kāmādīnavena tajjetvā **nekkhamme ānisaṃsaṃ pakāsesi. Kallacittanti** arogacittaṃ. **Sāmuksaṃsikāti** sāmaṃ ukksaṃsikā attanāyeva uddharitvā gahitā, sayambhuñāṇena diṭṭhā asādhāraṇā aññesanti attho. Kā pana sāti? Ariyasaccadesanā. Tenevāha- **dukkhaṃ samudayaṃ nirodhaṃ magganti. Virajaṃ vītamalaṃ** rāgarajādīnaṃ abhāvā virajaṃ, rāgamalādīnaṃ (3.0215) vigatattā vītamalaṃ. **Dhammacakkhanti** idha sotāpattimaggo adhippeto. Tassa uppatti-ākāradassanattaṃ **yaṃkiñci samudayadhammaṃ sabbaṃ taṃ nirodhadhammanti** āha. Tañhi nirodhaṃ āramaṇaṃ katvā kiccavasena evaṃ sabbasaṅkhataṃ paṭivijjhantaṃ uppajjati. Diṭṭho ariyasaccadhammo etenāti **diṭṭhadhammo**. Esa nayo sesesupi. Tiṇṇā vicikicchā anenāti **tiṇṇavicikiccho**. Vigatā kathaṃkathā assāti **vigata-kathaṃkatho**. Visārajjāṃ pattoti **vesārajjappatto**. Kattha? Satthusāsane. Nāssa paro paccayo, na paraṃ saddhāya ettha vattatīti **aparappaccayo**.

Pavattamaṃsanti pakatiyā pavattaṃ kappiyamaṃsaṃ mūlaṃ gahetvā antarāpaṇe pariyesāhīti adhippāyo. **Sambahulā nigaṇṭhāti** pañcasatamattā nigaṇṭhā. **Thūlaṃ pasunti** thūlaṃ mahāsarīraṃ gokaṇṇamahimsasūkarasaṅkhataṃ pasuṃ. **Uddissakatanti** attānaṃ uddisitvā kataṃ, māritanti attho. **Paṭiccamanti** svāyaṃ taṃ maṃsaṃ paṭicca taṃ pāṇavadhakammaṃ phusati. Tañhi akusalaṃ upaḍḍhaṃ dāyakassa, upaḍḍhaṃ paṭiggāhakassa hotīti nesam laddhi. Aparo nayo- **paṭiccamanti** attānaṃ paṭiccatamaṃ. Atha vā **paṭiccamanti** nimittakammasetamaṃ adhivacanaṃ, taṃ paṭiccamamaṃ ettha atthīti maṃsampi paṭiccamanti vuttaṃ. **Upakaṇṇaketi** kaṇṇamūle. **Alanti** paṭikkhepavacanaṃ, kiṃ imināti attho. **Na ca paneteti** ete āyasmanto dīgharattaṃ avaṇṇakāmā hutvā avaṇṇaṃ bhāsantāpi abbhācikkhantā na jiridanti, abbhakkhānassa antamaṃ na gacchantīti attho. Atha vā lajjanattaṃ idamaṃ **jiridantīti** padaṃ daṭṭhabbaṃ, na lajjantīti attho.

3. Assājānīyasuttavaṇṇanā

13. Tatiye aṅgehīti guṇaṅgehi. Tassaṃ disāyaṃ jāto hotīti tassaṃ sindhunadīti-radisāyaṃ jāto hoti. Aññepi bhadrā assājānīyā tattheva jāyanti. **Allaṃ vā sukkaṃ vāti** allatiṇaṃ vā sukkhatiṇaṃ vā. **Nāññe asse ubbejetāti** aññe asse na ubbejeti na paharati na ḍaṃsati na kalahaṃ karoti. **Sāṭheyyānīti** saṭhabhāvo. **Kūṭeyyānīti** kūṭa-bhāvo. **Jimheyyānīti** jimhabhāvo. **Vaṅkeyyānīti** vaṅkabhāvā. Iccassa catūhipi padehi asikkhitabhāvova kathito (3.0216). **Vāhīti** vahanasabhāvo dinnovādapaṭi-karo. **Yāva jīvitamaṇapariyādānā** Ti yāva jīvitassa maṇaṇena pariyosānā. **Sakkaccaṃ paribhuñjati** amataṃ viya paccavekkhitvā paribhuñjati. **Purisathāme-nāti**-ādīsu ṇāṇathāmādayo kathitā. **Saṅṭhānanti** osakkaṇaṃ paṭipassaddhi.

4. Assakhaḷuṅkasuttavaṇṇanā

14. Catutthe “**pehī**” ti vuttoti “gacchā” ti vutto. **Piṭṭhito rathaṃ pavattetīti** khandha-ṭṭhikena yugaṃ uppīlitvā pacchimabhāgena rathaṃ pavatṭento osakkati. **Pacchā laṅghati, kubbaraṃ hanatīti** dve pacchimapāde ukkhipitvā tehi paharivā rathaku-bbaraṃ bhindati. **Tidaṇḍaṃ bhañjati** rathassa purato tayo daṇḍakā honti, te bhañjati. **Rathīsāya satthiṃ ussajjitvāti** sīsāṃ nāmetvā yugaṃ bhūmiyaṃ pātetvā satthinā rathīsāṃ paharivā. **Ajjhomaddatīti** dvīhi purimapādehi īsaṃ maddanto tiṭṭhati. **Ubbatumaṃ rathaṃ karotī** Ti thalaṃ vā kaṇḍakaṭṭhānaṃ vā rathaṃ āropeti. **Anādiyitvāti** amanasikatvā agaṇitvā. **Mukhādhānanti** mukhaṭṭhapanatthāya dinnāṃ ayasaṅkhalikaṃ. **Khīlaṭṭhāyīti** cattāro pāde thambhe viya niccalaṃ ṭṭhapetvā khīla-ṭṭhānasadisena ṭṭhānena tiṭṭhati. Imasmiṃ sutte vaṭṭameva kathitaṃ.

5. Malasuttavaṇṇanā

15. Pañcame **asajjhāyamalāti** uggahitamantānaṃ asajjhāyakaraṇaṃ malaṃ nāma hoti. **Anuṭṭhānamalā gharā** Ti uṭṭhānavīriyābhāvo gharānaṃ malaṃ nāma. **Vaṇṇassāti** sarīravaṇṇassa. **Rakkhatoti** yaṃkiñci attano santakaṃ rakkhantassa. **Avijjā paramaṃ malanti** tato sesākusaladhammalato aṭṭhasu ṭṭhānesu aññāṇa-bhūtā vaṭṭamūlasaṅkhātā bahalandhakāra-avijjā paramaṃ malaṃ. Tato hi mala-taraṃ nāma natthi. Imasmimpi sutte vaṭṭameva kathitaṃ.

6. Dūteyyasuttavaṇṇanā

16. Chaṭṭhe **dūteyyanti** dūtakammaṃ. **Gantumarahatīti** taṃ dūteyyasaṅkhātaṃ sāsanaṃ dhāretvā haritum arahati. **Sotāti** yo taṃ assa sāsanaṃ deti (3.0217), tassa sotā. **Sāvetāti** taṃ uggaṇhitvā “idaṃ nāma tumhehi vuttan” ti paṭisāvetā. **Uggahetā** Ti suggahitaṃ katvā uggahetā. **Dhāretāti** sudhāritaṃ katvā dhāretā. **Viññāti** atthānatthassa atthaṃ jānitā. **Viññāpetāti** paraṃ vijānāpetā. **Sahitā sahita-**

ssāti idaṃ sahitam, idaṃ asahitanti evaṃ sahitāsahitassa kusalo, upagatānupagatesu cheko sāsanaṃ ārocento sahitam sallakkhetvā āroceti. **Na byathatīti** vedhati na chambhati. **Asandiddhanti** nissandehaṃ vigatasamṣayaṃ. **Pucchitoti** pañhatthāya pucchito.

7-8. Bandhanasuttadvayaṇṇanā

17-18. Sattame **ruṇṇenāti** ruditena. **Ākappenāti** nivāsanapārūpanādinā vidhānena. **Vanabhaṅgenāti** vanato bhañjitvā āhaṭena pupphaphalādipaṇṇākārena. **Aṭṭhamepi** eseva nayo.

9. Pahārādasuttavaṇṇanā

19. Navame **pahārādo** Ti evaṃnāmako. **Asurindoti** asurajeṭṭhako. Asuresu hi vepacitti rāhu pahārādoti ime tayo jeṭṭhakā. **Yena bhagavā tenupasaṅkamīti** dasabalassa abhisambuddhadivasato paṭṭhāya “ajja gamissāmi sve gamissāmi” ti ekā-dasa vassāni atikkamivā dvādasame vasse satthu verañjāyaṃ vasanakāle “sammāsambuddhassa santikaṃ gamissāmi” ti cittaṃ uppādetvā “mama ‘ajja sve’ ti dvādasā vassāni jātāni, handāhaṃ idāneva gacchāmi” ti taṅkhaṇaṃyeva asura-ḡaṇaparivuto asurabhavanā nikkhamivā divā divassa yena bhagavā tenupasaṅkami, **ekamantaṃ aṭṭhāsīti** so kira “tathāgataṃ pañhaṃ pucchitvā eva dhammaṃ suṇissāmi” ti āgato, tathāgatassa pana diṭṭhakālato paṭṭhāya buddhagāravena pucchituṃ asakkonto api satthāraṃ vanditvā ekamantaṃ aṭṭhāsī. Tato satthā cintesi- “ayaṃ pahārādo mayi akathente paṭhamataraṃ kathetuṃ na sakkhissati, ciṇṇavasitṭhāneyeva naṃ kathāsamuṭṭhāpanatthaṃ ekaṃ pañhaṃ pucchissāmi” ti.

Atha (3.0218) naṃ pucchanto **api pana pahārādāti**-ādīmāha. Tattha **abhiramanṭīti** ratim vindanti, anukkaṇṭhamānā vasantīti attho. So “pariciṇṇaṭṭhāneyeva maṃ bhagavā pucchati” ti attamano hutvā **abhiramanti**, **bhanteti** āha. **Anupubbaninnoti**-ādīni sabbāni anupaṭipāṭiyā ninnabhāvassa vevacanāni. **Na āyatakeneva papātoti** na chinnataṭamahāsobbho viya āditova papāto. So hi tīrato paṭṭhāya ekaṅgula-dvaṅgulavidatthiratanayaṭṭhi-usabha-aḡḡhagāvutagāvuta-aḡḡhayojanādivasena gambhīro hutvā gacchanto sinerupādamūle caturāsītiyojanasahassagambhīro hutvā ṭhitoti dasseti.

Ṭhitadhammoti ṭhitasabhāvo. **Kuṇapenāti** yena kenaci hatthi-assādīnaṃ kaḡeva-rena. **Thalaṃ ussāretīti** hatthena gaḡetvā viya vīcipahāreneva thalaṃ khipati.

Gaṅgāyamunāti idha ṭhatvā imāsaṃ nadīnaṃ uppattikathaṃ kathetuṃ vaṭṭati. Ayaṃ tāva jambudīpo dasasahassayojanaparimāṇo, tattha catusahassayojanaparimāṇo padeso udakena ajjhotthaṭo mahāsamuddoti saṅkhaṃ gato, tisahassayojanappamāṇe manussā vasanti, tisahassayojanappamāṇe himavā patiṭṭhito ubbedhena pañcayojanasatiko caturāsītikūṭasahassapaṭimaṇḡito samantato sandamā-napañcasatanadīvicitto, yattha āyāmaṃvitthārena ca gambhīrato ca paṇṇāsapaṇṇā-

sayojanā diyaḍḍhayaojanasataparimaṇḍalā anotattadaḥo kaṇṇamuṇḍadaḥo rathakāradaha chaddantadaḥo kuṇāladaha mandākinidaha sīhappapātadaḥoti satta mahāsarā patitṭhahanti.

Tesu **anotatto** sudassanakūṭaṃ cittakūṭaṃ kāḷakūṭaṃ gandhamādanakūṭaṃ kelāsakūṭanti imehi pañcahi pabbatehi parikkhitto. Tattha sudassanakūṭaṃ sovaṇṇamayamaṃ dviyojanasatubbedhamaṃ antovaṅkaṃ kākamukhasañṭhānaṃ tameva saraṃ paṭicchādetvā tiṭṭhati, cittakūṭaṃ sabbaratanamayaṃ, kāḷakūṭaṃ añjanamayaṃ, gandhamādanakūṭaṃ sānumayaṃ abbhantare muggavaṇṇamaṃ, mūlagandho sāragandho pheggugandho tacagandho papaṭikāgandho rasagandho pattagandho pupphagandho phalagandho (3.0219) gandhagandhoti imehi dasahi gandhehi ussannaṃ, nānappakāra-osadhasañchannaṃ kāḷapakkaḥa-uposathadivase ādittamiva aṅgāraṃ jalantaṃ tiṭṭhati, kelāsakūṭaṃ rajatamayaṃ. Sabbāni sudassanena samānubbedhasañṭhānāni tameva saraṃ paṭicchādetvā ṭhitāni. Tāni sabbāni devānubhāvena nāgānubhāvena ca vassanti, nadiyo cetesu sandanti. Taṃ sabbampi udakaṃ anotattameva pavisati. Candimasūriyā dakkhiṇena vā uttarena vā gacchantā pabbatantarena tattha obhāsaṃ karonti, ujum gacchantā na karonti. Tenevassa anotatto tisaṅkhā udapādi.

Tattha manoharasilātalāni nimmacchakacchapāni phalikasadisanimmalodakāni nhānatitthāni supaṭiyattāni honti, yesu buddhā khīṇāsavā ca paccekabuddhā ca iddhimantā ca isayo nhāyanti, devayakkhādayo udakakīḷamaṃ kīḷanti.

Tassa catūsu passesu sīhamukhaṃ, hatthimukhaṃ, assamukhaṃ, usabhamukhanti cattāri mukhāni honti, yehi catasso nadiyo sandanti. Sīhamukhena nikkhantanadīre sīhā bahutarā honti, hatthimukhādīhi hatthi-assa-usabhā. Puratthimadisato nikkhantanadī anotattaṃ tikkhattuṃ padakkhiṇamaṃ katvā itarā tisso nadiyo anupagamma pācīnahimavanteneva amanussapathaṃ gantvā mahāsamuddamaṃ pavisati. Pacchimadisato ca uttaradisato ca nikkhantanadiyopi tattheva padakkhiṇamaṃ katvā pacchimahimavanteneva uttarahimavanteneva ca amanussapathaṃ gantvā mahāsamuddamaṃ pavisanti. Dakkhiṇamukhato nikkhantanadī panataṃ tikkhattuṃ padakkhiṇamaṃ katvā uttarena ujukaṃ pāsāṇapitṭheneva saṭṭhiyojanāni gantvā pabbataṃ paharivā utṭhāya parikkhepena tigāvutappamāṇā udakadhārā hutvā ākāseṇa saṭṭhiyojanāni gantvā tiyaggaḷe nāma pāsāṇe patitā, pāsāṇo udakadhārāvegena bhinno. Tattha paññāsayaojanappamāṇā tiyaggaḷā nāma mahāpokkharāṇi jātā, pokkharāṇiyā kūlaṃ bhinditvā pāsāṇamaṃ pavisitvā saṭṭhiyojanāni gatā. Tato ghanapathaviṃ bhinditvā ummaṅgena saṭṭhiyojanāni gantvā giñjhaṃ nāma tiracchānapabbataṃ paharivā hatthatale pañcaṅgulisadisā pañca dhārā hutvā pavattati. Sā (3.0220) tikkhattuṃ anotattaṃ padakkhiṇamaṃ katvā gataṭṭhāne **āvattagaṅgā**ti vuccati. Ujukaṃ pāsāṇapitṭhena saṭṭhiyojanāni gataṭṭhāne **kaṇhagaṅgā**, ākāseṇa saṭṭhiyojanāni gataṭṭhāne **ākāsagaṅgā**, tiyaggaḷapāsāṇe paññāsayaojanokāse ṭhitā **tiyaggaḷapokkharāṇi**, kūlaṃ bhinditvā pāsāṇamaṃ pavisitvā saṭṭhiyojanāni gataṭṭhāne **bahalagaṅgā**ti, ummaṅgena saṭṭhiyojanāni gataṭṭhāne **umaṅgagaṅgā**ti vuccati. Viñjhaṃ nāma tiracchānapabbataṃ paharivā pañca dhārā hutvā pavattanaṭṭhāne pana gaṅgā, yamunā, aciravatī, sarabhū,

mahīti pañca saṅkhaṃ gatā. Evametā pañca mahānadiyo himavantato pavattantīti veditabbā.

Savantiyoti yā kāci savamānā gacchantī mahānadiyo vā kunnadiyo vā. **Appenti** Ti alliyanti osaranti. **Dhārāti** vuṭṭhidhārā. **Pūrattanti** puṇṇabhāvo. Mahāsamuddassa hi ayaṃ dhammatā- “imasmiṃ kāle devo mando jāto, jālakkipādīni ādāya macchakacchape gaṇhissāmā” ti vā “imasmiṃ kāle mahantā vuṭṭhi, labhissāma nu kho piṭṭhipasāraṇaṭṭhānan” ti vā vattum na sakkā. Paṭhamakappikakālato paṭṭhāya hi yaṃ sinerumekhalam āhacca udakam ṭhitam, tato ekaṅgulamattampi udakam neva heṭṭhā osīdati, na uddham uttarati. **Ekarasoti** asamhinnaraso.

Muttāti khuddakamahantavaṭṭadīghādibhedā anekavidhā. **Maṇīti** rattanīlādibhedo anekavidho. **Veluriyoti** vaṃsavaṇṇasirīsapupphavaṇṇādibhedo anekavidho. **Saṅkhoti** dakkhiṇāvaṭṭatambakucchikadhamanasaṅkhādibhedo anekavidho. **Silāti** setakālamuggavaṇṇādibhedo anekavidhā. **Pavāḷanti** khuddakamahantaratta-ghanarattādibhedam anekavidham. **Masāragallanti** kabaramaṇi. **Nāgāti** ūmipiṭṭhavāsinopi vimānaṭṭhakā nāgāpi.

Aṭṭha pahārādāti satthā aṭṭhapi dhamme vattum sakkoti, soḷasapi bāttiṃsapi catusaṭṭhipi sahasampi, pahārādēna pana aṭṭha kathitā, ahampi teheva sari-kkhake katvā kathessāmīti cintetvā evamāha. **Anupubbasikkhāti**-ādīsu anupubbasikkhāya tisso sikkhā gahitā, anupubbakiriyāya terasa dhutaṅgāni, anupubbapaṭi-padāya satta anupassanā aṭṭhārasa mahāvīpassanā aṭṭhatīṃsa ārammaṇavibhattiyo sattatīṃsa bodhapakkhiyadhammā (3.0221). **Na āyatakeneva aññāpaṭivedhoti** maṇḍūkassa uppativā gamanam viya āditova sīlapūraṇādīṃ akatvā arahattappaṭivedho nāma natthi, paṭipāṭiyā pana sīlasamādhīpaññāyo pūretvāva sakkā arahattam pattunti attho.

Ārakāvāti dūreyeva. **Na tena nibbānadhātuyā ūnattam vā pūrattam vāti** asaṅkhyeyyepi kappe buddhesu anuppannesu ekasattopi parinibbātum na sakkoti, tadāpi “tucchā nibbānadhātū” ti na sakkā vattum. Buddhakāle ca pana ekekasmiṃ samāgame asaṅkhyeyyāpi sattā amataṃ ārādhenti, tadāpi na sakkā vattum-“pūrā nibbānadhātū” ti.

10. Uposathasuttavaṇṇanā

20. Dasame **nisinno hotīti** uposathakaraṇatthāya upāsikāya ratanapāsāde nisinno. Nisajja pana bhikkhūnaṃ cittāni olokento ekaṃ dussīlapuggalaṃ disvā “sacāhaṃ imasmiṃ puggale nisinneyeva pātimokkhaṃ uddisissāmi, sattadhā tassa muddhā phalissati”ti tassa anukampāya tuṅhīyeva ahosi. **Abhikkantāti** atikkantā parikkhīṇā. **Uddhaste aruṇeti** uggate aruṇasīse. **Nandimukhiyāti** tuṅghamu-khiyā. **Aparisuddhā, ānanda, parisā**Ti “asukapuggalo aparisuddho”ti avatvā “aparissuddhā, ānanda, parisā”ti āha. Sesam sabbattha uttānamevāti.

Mahāvaggo dutiyo.

3. Gahapativaggo

1. Paṭhama-uggasuttavaṇṇanā

21. Tatiyassa paṭhame **paññatte āsane nisīdīti** tassa kira ghare pañcannaṃ bhikkhusatānaṃ pañca āsanasatāni niccaṃ paññattāneva honti, tesu aññatarasmiṃ āsane nisīdi. **Taṃ suṇāhīti** te suṇāhi, taṃ vā aṭṭhavidhaṃ acchariyadhammaṃ suṇāhi. **Cittaṃ pasīdīti** “buddho nu kho na buddho nu kho”ti vitakkamattampi na uppajji, ayameva buddhoti cittuppādo pasanno anāvilo ahosi. **Sakāni vā ṇātikulānīti** attano yāpanamattaṃ dhaṇaṃ (3.0222) gahetvā ṇātigharāni gacchatu. **Kassa vo dammīti** katarapurisassa tumhe dadāmi, ārocetha me attano adhippāyaṃ. **Appaṭivibhattāti** “ettakaṃ dassāmi ettakaṃ na dassāmi, idaṃ dassāmi idaṃ na dassāmi”ti cittaṃ uppādentena hi paṭivibhattā nāma hoti, mayhaṃ pana na evaṃ. Atha kho saṅghikā viya gaṇasantakā viya ca sīlavantehi saddhiṃ sādharāṇāyeva. **Sakkaccaṃyeva payirupāsāmīti** sahatthā upaṭṭhahāmi, cittikārena upasaṅkamāmi.

Anacchariyaṃ kho pana maṃ, bhanteti, bhante, yaṃ maṃ devatā upasaṅkamitvā evaṃ ārocenti, idaṃ na acchariyaṃ. Yaṃ panāhaṃ tatonidānaṃ cittassa uṇṇatiṃ nābhijānāmi, taṃ eva acchariyanti vadati. **Sādhu sādhu, bhikkhūti** ettha kiñcāpi bhikkhuṃ āmanteti, upāsakasseva pana veyyākaraṇasampahaṃsane esa sādhu kārōti veditabbo.

2. Dutiya-uggasuttavaṇṇanā

22. Dutīye **nāgavane**Ti tassa kira seṭṭhino nāgavanaṃ nāma uyyānaṃ, so tattha purebhattaṃ gandhamālādīni gāhāpetvā uyyānakīlikāṃ kīḷitukāmo gantvā paricāriyamāno bhagavantaṃ addasa. Saha dassanenevassa purimanayeneva cittaṃ pasīdi, surāpānena ca uppānamando taṅkhaṇaṃyeva pahīyi. Taṃ sandhāyevamāha. **Oṇoesinti** udakaṃ hatthe pātetvā adāsīṃ. **Asukoti** amuko. **Samacittova demīti** “imassa thokaṃ, imassa bahukaṃ”ti evaṃ cittaṇānattaṃ na karomi, deyya-

dhammaṃ pana ekasadisam karomīti dasseti. **Ārocentīti** ākāse ṭhatvā ārocenti. **Natthi taṃ saṃyojananti** iminā upāsako attano anāgāmiṃphalaṃ byākaroti.

3. Paṭhamahatthakasuttavaṇṇanā

23. Tatiye **hatthako āḷavakoti** bhagavatā āḷavakayakkhassa hatthato hatthehi sampaṭicchitattā hatthakoti laddhanāmo rājakumāro. **Sīlavāti** pañcasīladasasīlena sīlavā. **Cāgavāti** cāgasampanno. **Kaccittha, bhanteti, bhante,** kacci ettha bhagavato byākaraṇaṭṭhāne. **Appiccho** Ti adhigamappicchatāya appiccho.

4. Dutiyahatthakasuttavaṇṇanā

24. Catutthe (3.0223) **pañcamattehi upāsakasatehīti** sotāpannasakadāgāmīnaṃ yeva ariyasāvaka-upāsakānaṃ pañcahi satehi parivuto bhuttapātarāso gandhamālavilepenacuṇṇāni gahetvā yena bhagavā tenupasaṅkami. **Saṅgahavatthūnīti** saṅgaṇhanakāraṇāni. **Tehāhanti** tehi ahaṃ. **Taṃ dānena saṅgaṇhāmīti** naṅgalabalibaddabhattabijādīni ceva gandhamālamūlādīni ca datvā saṅgaṇhāmi. **Peyyavajjenā** Ti amma, tāta, bhātara, bhaginīti-ādikena kaṇṇasukhena mudukena piyavacanena saṅgaṇhāmi. **Atthacariyāyāti** “imassa dānena vā piyavacanena vā kiccaṃ natthi, atthacariyāya saṅgaṇhitabbayuttako ayan” ti ṅatvā uppannakiccanittharaṇasaṅkhātāya atthacariyāya saṅgaṇhāmi. **Samānattatāyāti** “imassa dānādīhi kiccaṃ natthi, samānattatāya saṅgaṇhitabbo ayan” ti ekato khādanapivananisajjādīhi attanā samānaṃ katvā saṅgaṇhāmi. **Daliddassa kho no tathā sotabbaṃ maññaṇtīti** daliddassa kiñci dātumaṃ vā kātumaṃ vā asakkontassa, yathā daliddassa no tathā sotabbaṃ maññaṇti, mama pana sotabbaṃ maññaṇti, dinnovāde tiṭṭhanti, na me anusāsaṇiṃ atikkamitabbaṃ maññaṇti. **Yoni kho tyāyanti** upāyo kho te ayaṃ. Imesu pana dvīsipi suttesu satthārā sīlacāgapaññā missakā kathitāti veditabbā.

5-6. Mahānāmasuttādivaṇṇanā

25-26. Pañcame **atthūpaparikkhitā hotīti** atthānatthaṃ kāraṇākāraṇaṃ upaparikkhitā hoti. Chaṭṭhe saddhāsīlacāgā missakā kathitā.

7. Paṭhamabalasuttavaṇṇanā

27. Sattame **ujjhattibalāti** ujjhānabalā. Bālānañhi “yaṃ asuko idañcidañca āha, maṃ so āha, na aññaṇ” ti evaṃ ujjhānameva balaṃ. **Nijjhattibalāti** “na idaṃ evaṃ, evaṃ nāmetan” ti atthānatthanijjhāpanaṃyeva balaṃ. **Paṭisaṅkhānabalāti** pacca-vekkhaṇabalā. **Khantibalāti** adhivāsanabalā.

8. Dutiyabalasuttavaṇṇanā

28. Aṭṭhame (3.0224) **balānīti** ñāṇabalāni. **Āsavānaṃ khayam paṭijānātīti** arahattam paṭijānāti. **Aniccatoti** hutvā abhāvākārena. **Yathābhūtanti** yathāsabhāvato. **Sammappaññāyāti** sahavipassanāya maggapaññāya. **Aṅgārakāsūpamāti** santāpanaṭṭhena aṅgārakāsuyā upamitā ime kāmāti. **Vivekaninnanti** phalasaṃpattiva-sena nibbānaninnaṃ. **Vivekaṭṭhanti** kilesehi vajjitaṃ dūrībhūtaṃ vā. **Nekkhammābhīratanti** pabbajjābhīrataṃ. **Byantibhūtanti** vigatantabhūtaṃ ekadesenāpi analīnaṃ viṣaṃyuttaṃ viṣaṃsaṭṭhaṃ. **Āsavaṭṭhāniyehīti** sampayogavasena āsavānaṃ kāraṇabhūtehi, kilesadhammeḥīti attho. Atha vā **byantibhūtanti** vigatavāyanti attho. Kuto? **Sabbaso āsavaṭṭhāniyehi dhammehi**, sabbehi tebhūmakadhammeḥīti attho. Imasmiṃ sutte ariyamaggo lokiyalokuttaro kathito.

9. Akkhaṇasuttavaṇṇanā

29. Navame khaṇe kiccāni karotīti **khaṇakicco**, okāsaṃ labhitvāva kiccāni karotīti attho. **Dhammoti** catusaccadhammo. **Opasamikoti** kilesūpasamaāvaho. **Parinibbāyikoti** kilesaparinibbānakaro. Catumaggañāṇasaṅkhātaṃ sambodhiṃ gacchati sampāpuṇātīti **sambodhagāmi**. **Dīghāyukaṃ devanikāyanti** idaṃ asaṅṅaṃ devanikāyaṃ sandhāya vuttaṃ. **Aviññātāresūti** ativiya aviññūsu.

Suppavediteti sukathite. **Antarāyikāti** antarāyakarā. **Khaṇo ve mā upaccagāti** ayaṃ laddho khaṇo mā atikkami. **Idha ceva naṃ virādhetīti** sace koci pamattacārī idha imaṃ khaṇaṃ labhitvāpi saddhammassa niyāmataṃ ariyamaggaṃ virādheti na sampādeti. **Atītatthoti** hāpitattho. **Cirattaṃ anutapissatīti** cirarattaṃ socissati. Yathā hi “asukaṭṭhāne bhaṇḍaṃ samuppannaṃ”ti sutvā eko vāṇijo na gaccheyya, aṅṅe gantvā gaṇheyyuṃ, tesam taṃ aṭṭhaguṇampi dasaguṇampi bhavēyya. Atha itaro “mama attho atikkanto”ti anutapeyya, evaṃ yo idha khaṇaṃ labhitvā appaṭipajjanto saddhammassa niyāmataṃ virādheti, so ayaṃ vāṇijova atītattho (3.0225) ciraṃ anutapissati socissati. Kiñca bhīyyo **avijjānivutoti** tathā. **Paccavidunti** paṭivijjhīsu. **Samvarāti** sīlasaṃvarā. **Māradheyypaparānugeti** māradheyysaṅkhātaṃ saṃsāraṃ anugate. **Pāraṅgatāti** nibbānaṃ gatā. **Ye pattā āsavakkhayanti** ye arahattam pattā. Evamidha gāthāsu vaṭṭavivaṭṭaṃ kathitaṃ.

10. Anuruddhamahāvitakkasuttavaṇṇanā

30. Dasame **cetisūti** cetināmakānaṃ rājūnaṃ nivāsaṭṭhānattā evaṃladdhavo hāre raṭṭhe. **Pācīnavaṃsadāyēti** dasabalassa vasanaṭṭhānato pācīnadisāya ṭhite vaṃsadāye nīlobhāsehi veḷūhi sañchane araṅṅe. **Evaṃ cetaso parivtakko udapādīti** thero kira pabbajitvā paṭhama-antovassamhiyeva saṃpattilābhī hutvā saḥassalokadhātudassanasamatthaṃ dibbacakkuṅṅaṃ uppādesi. So sārīputta-ttherassa santikaṃ gantvā evamāha- “idhāhaṃ, āvuso sārīputta, dibbena cakkhunā visuddhena atikkantaṃ mānusakena saḥassalokaṃ olokemi. Āraddhaṃ kho pana me vīriyaṃ asallīnaṃ, upaṭṭhitā sati asammaṭṭhā, passaddho kāyo asā-raddho, saṃāhitaṃ cittaṃ ekaggaṃ. Atha ca pana me anupādāya āsavehi cittaṃ

na vimuccatī”ti. Atha naṃ thero āha- “yaṃ kho te, āvuso anuruddha, evaṃ hoti ‘ahaṃ dibbena cakkhunā ...pe... olokemi”ti, idaṃ te mānasmim̃. Yampi te, āvuso, anuruddha evaṃ hoti ‘āraddhaṃ kho pana me vīriyaṃ ...pe... ekaggaṃ”ti, idaṃ te uddhaccasmim̃. Yampi te, āvuso anuruddha, evaṃ hoti ‘atha ca pana me anupā-dāya āsavehi cittaṃ na vimuccatī”ti, idaṃ te kukkuccasmim̃. Sādhū vatāyasmā anuruddho ime tayo dhamme pahāya ime tayo dhamme amanasikarivā amatāya dhātuyā cittaṃ upasaṃharatū”ti evamassa thero kammaṭṭhānaṃ kathesi. So kammaṭṭhānaṃ gahevā sathāraṃ āpucchivā cetiraṭṭhaṃ gantvā samaṇa-dhammaṃ karonto aṭṭhamāsaṃ caṅkamaṇa vītināmesi. So padhānaveganimma-thitattā kilantakāyo ekassa veḷugumbassa heṭṭhā nisīdi. Athassāyaṃ evaṃ cetaso parivitakko udapādi, esa mahāpurisavitakko uppajjīti attho.

Appicchassāti (3.0226) ettha paccayappiccho, adhigamappiccho, pariyatti-a-ppiccho, dhutaṅgappiccho cattāro appicchā. Tattha paccayappiccho bahū dente appaṃ gaṇhāti, appaṃ dente appataraṃ gaṇhāti, na anavasesaggāhī hoti. Adhigamappiccho majjhantikathero viya attano adhigamaṃ aññesaṃ jānituṃ na deti. Pariyatti-appiccho tepiṭakopi samāno na bahussutabhāvaṃ jānāpetukāmo hoti sāketatissathero viya. Dhutaṅgappiccho dhutaṅgapariharaṇabhāvaṃ aññesaṃ jānituṃ na deti dvebhātikatheresu jeṭṭhatthero viya. Vatthu visuddhi-magge kathitaṃ. **Ayaṃ dhammoti** evaṃ santagaṇaniguhanena ca paṭiggahaṇe mattaññutāya ca appicchassa puggalassa ayaṃ navalokuttaradhammo sampa-jjati, no mahicchassa. Evaṃ sabbattha yojetabbaṃ.

Santuṭṭhassāti catūsu paccayesu tīhi santosehi santuṭṭhassa. **Pavivittassāti** kāyacitta-upadhivivekehi vivittassa. Tattha kāyaviveko nāma gaṇasaṅgaṇikaṃ vinodetvā ārambhavatthuvasena ekībhāvo. Ekībhāvamatteneva kammaṃ na nipphajjatīti kasiṇaparikkammaṃ katvā aṭṭha samāpattiyo nibbatteti, ayaṃ cittavi-veko nāma. Samāpattimatteneva kammaṃ na nipphajjatīti jhānaṃ pādakaṃ katvā saṅkhāre sammāsivā saha paṭisambhidāhi arahattaṃ pāpuṇāti, ayaṃ sabbākā-rato upadhiviveko nāma. Tenāha bhagavā- “kāyaviveko ca vivekaṭṭhakāyānaṃ nekkhammābhiratānaṃ, cittaviveko ca parisuddhacittānaṃ paramavodānappa-ttānaṃ, upadhiviveko ca nirupadhīnaṃ puggalānaṃ visaṅkhāragatānaṃ”ti (mahāni. 7, 49).

Saṅgaṇikārāmassāti gaṇasaṅgaṇikāya ceva kilesasaṅgaṇikāya ca ratassa. **Āra-ddhavīriyassāti**

kāyikacetasikavīriyavasena āradhāvīriyassa. **Upaṭṭhitassatissāti** catusatipaṭṭhānavasena upaṭṭhitassatissa. **Samāhitassāti** ekaggacittassa. **Paññavatoti** kamma-ssakatapaññāya paññavato.

Sādhu sādhuti therassa vitakkaṃ sampahaṃsento evamāha. **Imaṃ aṭṭhamanti** satta nidhī laddhapurisassa aṭṭhamaṃ dento viya, satta maṇiratanāni, satta hatthiratanāni, satta assaratanāni laddhapurisassa aṭṭhamaṃ dento viya satta mahāpurisavitakke vitakketvā ṭhitassa aṭṭhamaṃ ācikkhanto evamāha. **Nippapañcārāmassāti** (3.0227) taṇhāmānadiṭṭhipapañcarahitattā nippapañcasāṅkhāte nibbānapade abhiratassa. Itaraṃ tasseva vevacanaṃ. **Papañcārāmassāti** yathāvuttesu papañcesu abhiratassa. Itaraṃ tasseva vevacanaṃ.

Yatoti yadā. Tatoti tadā. **Nānārattānanti** nilapītalohitodātavaṇṇehi nānārajanehi rattānaṃ. **Paṃsukūlanti** tevīsatiyā khettesu ṭhitapaṃsukūlacīvaraṃ. **Khāyissatīti** yathā tassa pubbaṇhasamayādīsu yasmim̐ samaye yaṃ icchatī, tasmim̐ samaye taṃ pārupantassa so dussakaraṇḍako manāpo hutvā khāyati, evaṃ tuyhampi cīvarasantosamahā-ariyavaṃsena tuṭṭhassa viharato paṃsukūlacīvaraṃ khāyissati upaṭṭhahissati. **Ratīyāti** rati-atthāya. **Aparitassāyā**ti taṇhādiṭṭhiparitassanāhi aparitassanatthāya. **Phāsuvihārāyāti** sukhavihāratthāya. **Okkamanāya nibbānassāti** amataṃ nibbānaṃ otaraṇatthāya.

Piṇḍiyālopabhojananti gāmanigamarājadhānīsu jaṅghābalaṃ nissāya gharapaṭipāṭiyā carantena laddhapiṇḍiyālopabhojanaṃ. **Khāyissatīti** tassa gahapatino nānaggarasabhojanaṃ viya upaṭṭhahissati. **Santuṭṭhassa viharatoti** piṇḍapātasantosamahā-ariyavaṃsena santuṭṭhassa viharato. **Rukkhamūlasenāsanamaṃ khāyissatīti** tassa gahapatino tebhūmakapāsāde gandhakusumavāsasugandhaṃ kūṭāgāraṃ viya rukkhamaṃ upaṭṭhahissati. **Santuṭṭhassāti** senāsanasantosamahā-ariyavaṃsena santuṭṭhassa. **Tiṇasanthārakoti** tiṇehi vā paṇṇehi vā bhūmiyaṃ vā phalapakāsāṇatalāni vā aññatarasmim̐ santhasanthato. **Pūtimuttanti** yaṃkiñci muttaṃ. Taṅkhaṇe gahitampi pūtimuttameva vuccati duggandhattā. **Santuṭṭhassa viharatoti** gilānapaccayabhesajaparikkhārasantosena santuṭṭhassa viharato.

Iti bhagavā catūsu ṭhānesu arahattaṃ pakkhipanto kammaṭṭhānaṃ kathetvā “katarasenāsane nu kho vasantassa kammaṭṭhānaṃ sappāyaṃ bhavissati”ti āvajjento “tasmiññeva vasantassā”ti ṇatvā **tena hi tvamaṃ, anuruddhāti**-ādimāha. **Pavivittassa viharatoti** tīhi vivekehi vivittassa viharantassa. **Uyyojanikaṭṭhisamaṃyuttanti** uyyojanikeheva vacanehi ṭṭhisamaṃyuttaṃ, tesamaṃ upaṭṭhānagamanaṃyevāti attho. **Papañcanirodheti** nibbānapade (3.0228). **Pakkhandatīti** ārammaṇakaraṇavasena pakkhandati. **Pasīdatīti**-ādīsipi ārammaṇavaseneva pasīdanasantiṭṭhanamuccanā veditabbā. Iti bhagavā cetiraṭṭhe pācīnavaṃsadāye āyasmato anuruddhassa kathite aṭṭha mahāpurisavitakke puna bhesakaḷāvanamahāvihāre nisīditvā bhikkhusaṅghassa vitthārena kathesi.

Manomayenāti manena nibbattitakāyopi manomayoti vuccati manena gatakāyopi, idha manena gatakāyaṃ sandhāyevamāha. **Yathā me ahu saṅkappoti** yathā mayamaṃ vitakko ahosi, tato uttari aṭṭhamaṃ mahāpurisavitakkaṃ dassento tato uttariṃ desayi. Sesamaṃ sabbattha uttānamevāti.

Gahapativaggo tatiyo.

4. Dānavaggo

1. Paṭhamadānasuttavaṇṇanā

31. Catutthassa paṭhame **āsajja dānaṃ detīti** patvā dānaṃ deti. Āgataṃ disvā taṃ muhuttaṃyeva nisīdāpetvā sakkāraṃ katvā dānaṃ deti, dassāmīti na kila-meti. **Bhayāti** “ayaṃ adāyako akārako”ti garahabhayā, apāyabhayā vā. **Adāsi Meti** mayhaṃ pubbe esa idaṃ nāma adāsīti deti. **Dassati meti** anāgate idaṃ nāma dassatīti deti. **Sāhu dānanti** dānaṃ nāma sādhu sundaraṃ buddhādīhi paṇḍitehi pasatthanti deti. **Cittālaṅkāracittaparikkhāratthaṃ dānaṃ detīti** samathavipassanā-cittassa alaṅkāratthañceva parikkhāratthañca deti. Dānañhi cittaṃ muduṃ karoti. Yena laddho, so “laddhaṃ me”ti muducitto hoti. Yena dinnaṃ, sopi “dinnaṃ mayā”-ti muducitto hoti. Iti ubhinnaṃ cittaṃ muduṃ karoti. Teneva “adantadamanan”ti vuccati. Yathāha-

“Adantadamanaṃ (3.0229) dānaṃ, adānaṃ dantadūsakaṃ;
dānena piyavācāya, unnamanti namanti cā”ti.

Imesu pana aṭṭhasu dānesu cittālaṅkāradānameva uttamanti.

2. Dutiyadānasuttavaṇṇanā

32. Dutiye **saddhāti** yāya saddhāya dānaṃ deti, sā saddhā. **Hiriyanti** yāya hiriyā dānaṃ deti, sāva adhippetā. **Kusalañca dānanti** anavajjañca dānaṃ. **Diviyanti** divaṅgamaṃ.

3. Dānavatthusuttavaṇṇanā

33. Tatiye **dānavatthūnīti** dānakāraṇāni. **Chandā dānaṃ detīti** pemena dānaṃ deti. **Dosāti** dosena kuddho hutvā yaṃ atthi, taṃ vegena gaṇhitvā deti. **Mohāti** mohena mūḷho deti. **Bhayāti** garahabhayena vā apāyabhayena vā, tassa tasseva vā pana bhayena deti. **Kulavaṃsanti** kulapaveṇiṃ.

4. Khettasuttavaṇṇanā

34. Catutthe **na mahapphalaṃ hotīti** dhaññaphalena mahapphalaṃ na hoti. **Na mahassādanti** yampissa phalaṃ hoti, tassa assādo na mahā hoti mandassādaṃ na madhuraṃ. **Na phātiseyyanti** seyyāpissa na hoti vuḍḍhi, tassa mahantaṃ vīhi-thambhasannivesaṃ na hotīti attho. **Unnāmaninnāmīti** thalaninnavasena visama-

talaṃ. Tattha thale udakaṃ na saṅṭhāti, ninne atibahu tiṭṭhati. **Pāsāṇasakkharikanti** pattharivā ṭhitapitṭhipāsāṇehi ca khuddakapāsāṇehi ca sakkharāhi ca samannāgataṃ. **Ūsaranti** ubbhinnaloṇaṃ. **Na ca gambhīrasitanti** thaddhabhūmitāya gambhīrānugataṃ, naṅgalamaggaṃ katvā kasituṃ na sakkā hoti, uttānanaṅgalamaggameva hoti. **Na āyasampannanti** na udakāgamanasampannaṃ. **Na apāyasampannanti** pacchābhāge udakaniggamanamaggasampannaṃ na hoti. **Na mātikā-sampannanti** na khuddakamahantīhi udakamātikāhi sampannaṃ hoti (3.0230). **Na mariyādasampannanti** na kedāramariyādāhi sampannaṃ. **Na mahapphalanti-**ādīni sabbāni vipākaphalavaseneva veditabbāni.

Sampanneti paripuṇṇe sampattiyutte. **Pavuttā bijasampadā**ti sampannaṃ bijaṃ ropitaṃ. **Deve sampādayantamhīti** deve sammā vassante. **Anītisampadā hotīti** kīṭakimi-ādipāṇaka-ītiyā abhāvo ekā sampadā hoti. **Virūḥīti** vaḍḍhi dutiyā sampadā hoti. **Vepullanti** vipulabhāvo tatiyā sampadā hoti. **Phalanti** paripuṇṇaphalaṃ catutthī sampadā hoti. **Sampannasīlesūti** paripuṇṇasīlesu. **Bhojanasampadā**ti sampannaṃ vividhabhojanaṃ. **Sampadānanti** tividhaṃ kusalasampadaṃ. **Upane-tīti** sā bhojanasampadā upanayati. Kasmā? **Sampannañhissa taṃ kataṃ**, yasmāssa taṃ katakammaṃ sampannaṃ paripuṇṇanti attho. **Sampannatthū-dhāti** sampanno atthu idha. **Vijjācaraṇasampannoti** tīhi vijjāhi ca pañcadasahi caraṇadhammehi ca samannāgato. **Laddhāti** evarūpo puggalo cittassa sampadaṃ avekallaparipuṇṇabhāvaṃ labhitvā. **Karoti kammāsampadanti** paripuṇṇakammaṃ karoti. **Labhati catthasampadanti** atthañca paripuṇṇaṃ labhati. **Diṭṭhisampadanti** vipassanādiṭṭhiṃ. **Maggasampadanti** sotāpattimaggaṃ. **Yāti sampannamānasoti** paripuṇṇacitto hutvā arahattaṃ yāti. **Sā hoti sabbasampadā**ti sā sabbadukkhehi vimutti sabbasampadā nāma hotīti.

5. Dānūpapattisuttavaṇṇanā

35. Pañcame **dānūpapattiyoti** dānapaccayā upapattiyo. **Dahatīti** ṭhapeti. **Adhiṭṭhā-tīti** tasseva vevacanaṃ. **Bhāvetīti** vaḍḍheti. **Hīne vimuttanti** hīnesu pañcasu kāmaguṇesu vimuttaṃ. **Uttari abhāvitanti** tato uttarimaggaphalattāya abhāvitaṃ. **Tatrū-papattiyā saṃvattatīti** yaṃ ṭhānaṃ patthetvā kusalaṃ kataṃ, tattha nibbattana-tthāya saṃvattati. **Vītarāgassāti** maggena vā samucchinnarāgassa samāpattiyā vā vikkhambhitarāgassa. Dānamatteneva hi brahmaloke nibbattituṃ na sakkā, dānaṃ pana samādhivipassanācittassa alaṅkāraparivāraṃ hoti. Tato dānena muducitto brahmavihāre bhāvetvā brahmaloke nibbattati. Tena vuttaṃ- “vītarā-gassa no sarāgassā”ti.

6. Puññakiriyavatthusuttavaṇṇanā

36. Chaṭṭhe (3.0231) puññakiriyāni ca tāni tesam tesam ānisaṃsānaṃ vatthūni cāti **puññakiriyavatthūni**. Dānādīnañhi lakkhaṇe cittaṃ ṭhapetvā “evarūpaṃ nāma amhehi dānaṃ dātabbaṃ, sīlaṃ rakkhitaṃ, bhāvanā bhāvetabbā”ti sattā

puññāni karonti. Dānameva **dānamayaṃ**, dānacetanāsu vā purimacetanāto nipphannā sannitṭhāpakacetanā **dānamayaṃ** silādīhi silamayādīni viya. Sesadvayesupi eseva nayo. **Parittaṃ kataṃ hotīti** thokaṃ mandaṃ kataṃ hoti. **Nābhisa-mbhotīti** na nipphajjati. **Akataṃ hotīti** bhāvanāyayogoyeva anāraddho hotīti attho. **Manussadobhagyanti** manussesu sampattirahitaṃ pañcavidhaṃ nīcakulaṃ. **Upa-pajjatīti** paṭisandhivasena upagacchati, tattha nibbattatīti attho. **Mattaso katanti** pamāṇena kataṃ, thokaṃ na bahu. **Manussasobhagyanti** manussesu subhaga-bhāvaṃ tividhakulasampattiṃ. **Adhimattanti** adhikappamāṇaṃ balavaṃ vā. **Adhiga-ṇhantīti** abhibhavitvā gaṇhanti, visiṭṭhatarā jeṭṭhakā hontīti attho.

7. Sappurisdānasuttavaṇṇanā

37. Sattame **sucinti** parisuddhaṃ vaṇṇasampannaṃ deti. **Paṇītanti** rasūpa-pannaṃ. **Kālenāti** yuttapattakālena. **Kappiyanti** yaṃ kappiyaṃ, taṃ deti. **Viceyya detīti** “imassa dinnaṃ mahapphalaṃ bhavissati, imassa na mahapphalan”ti evaṃ paṭiggāhakapariyesanavasena dānaṃ vā paṇidhāyavasena dānaṃ vā vicinitvā deti.

8. Sappurisasuttavaṇṇanā

38. Atṭhame **atthāyāti** atthatthāya. **Hitāya sukhāyāti** hitatthāya sukhathāya. **Pubbapetānanti** paralokagatānaṃ ñātīnaṃ. Imasmimṃ sutte anuppanne buddhe cakkavattirājāno bodhisattā paccekabuddhā labbhanti, buddhakāle buddhā ceva buddhasāvaka ca. Yathāvuttānañhi etesaṃ atthāya hitāya sukhāya saṃvattanti. **Bahunnaṃ vata atthāya, sappañño gharamāvasanti** sappañño ghare vasanto bahūnaṃ vata atthāya hoti. **Pubbeti** paṭhameva. **Pubbekatamanussaranti** (3.0232) mātāpitūnaṃ pubbakāraguṇe anussaranto. **Sahadhammenāti** sakāraṇena pacca-yapūjanena pūjeti. **Apace brahmacārayoti** brahmacārino apacayati, nīcavuttitaṃ nesaṃ āpajjati. **Pesaloti** piyasīlo.

9. Abhisandasuttavaṇṇanā

39. Navame **dānānī**ti cetanādānāni. **Aggaññānī**ti-ādīnaṃ attho heṭṭhā vuttoyeva.

10. Duccaritavipākasuttavaṇṇanā

40. Dasame **pāṇātipāto**ti pāṇātipātacetanā. **Sabbalahusoti** sabbalahuko. **Appāyukasaṃvattaniko**Ti tena parittakena kammavipākena appāyuko hoti, dinnamattāya vā paṭisandhiyā viliyati mātukucchito nikkhantamatte vā. Evarūpo hi na aññassa kassaci nissando, pāṇātipātasseva gatamaggo esoti. **Bhogabyasanasamvattanikoti** yathā kākaṇikāmatampi hatthe na tiṭṭhati, evaṃ bhogabyasanaṃ saṃvatteti. **Sapattaverasamvattaniko hotī**ti saha sapattehi veraṃ saṃvatteti. Tassa hi sapattā ca bahukā honti. Yo ca naṃ passati, tasmīṃ verameva uppādeti na nibbāyati. Evarūpo hi parassa rakkhitagopitabhaṇḍe aparādhassa nissando.

Abhūtabbhakkhānasamvattaniko hotīti abhūtena abbhakkhānaṃ saṃvatteti, yena kenaci kataṃ tasseva upari patati. **Mittehi bhedanasamvattaniko**Ti mittehi bhedaṃ saṃvatteti. Yaṃ yaṃ mittam karoti, so so bhijjatiyeva. **Amanāpasaddasamvattanikoti** amanāpasaddaṃ saṃvatteti. Yā sā vācā kaṇṭakā kakkasā kaṭukā abhisajjanī mammacchedikā, gatagataṭṭhāne tameva suṇāti, manāpasaddasavanaṃ nāma na labhati. Evarūpo pharusavācāya gatamaggo nāma. **Anādeyyavācāsamvattanikoti** aggahetabbavacanataṃ saṃvatteti, “tvaṃ kasmā kathesi, ko hi tava vacanaṃ gahessati”ti vattabbataṃ āpajjati. Ayaṃ samphappalāpassa gatamaggo. **Ummattakasaṃvattaniko hotī**Ti ummattakabhāvaṃ (3.0233) saṃvatteti. Tena hi manusso ummatto vā khittacitto vā eḷamūgo vā hoti. Ayaṃ surāpānassa nissando. Imasmīṃ sutte vaṭṭameva kathitanti.

Dānavaggo catuttho.

5. Uposathavaggo

4. Vāseṭṭhasuttavaṇṇanā

44. Pañcamassa catutthe **ime cepi, vāseṭṭha, mahāsālā**ti purato ṭhite dve sālārukkhe dassento parikappopamaṃ āha. Idaṃ vuttaṃ hoti- ime tāva mahāsālā acetanā. Sace etepi sacetanā hutvā aṭṭhaṅgasamannāgataṃ uposathaṃ upavaseyyuṃ, etesampi so uposathavāso dīgharattaṃ hitāya sukhāya assa. Bhūte pana vattabbameva natthīti.

6. Anuruddhasuttavaṇṇanā

46. Chaṭṭhe **yenāyasmā anuruddhoti** tā kira devatā attano sampattiṃ oloketvā “kiṃ nu kho nissāya ayaṃ sampatti amhehi laddhā”ti āvajjamānā theram disvā

“mayam amhākaṃ ayyassa pubbe cakkavattirajjam karontassa pādapari-cārīkā hutvā tena dinnovāde ṭhatvā imaṃ sampattiṃ labhimha, gacchāma theram ānetvā imaṃ sampattiṃ anubhavissāmā”ti divā yenāyasmā anuruddho tenupasaṅka-miṃsu. **Tīsu ṭhānesūti** tīsu kāraṇesu. **Ṭhānaso paṭilabhāmāti** khaṇeneva labhāma. **Saranti** vacanasaddam vā gītasaddam vā ābharaṇasaddam vā. **Pitā assūti**-ādīni nīlā tāva jātā, pītā bhavitum na sakkhissantīti-ādīnā nayena cintetvā vitakketi. Tāpi “idāni ayyo amhākaṃ pītabhāvam icchati, idāni lohītabhāvan”ti tādisāva ahesum.

Accharam vādesīti pāṇitalam vādesi. **Pañcaṅgikassāti** ātataṃ, vitataṃ, ātatavī-tataṃ, ghanam, susiranti imehi pañcahi aṅgehi samannāgatassa. Tattha ātataṃ nāma cammapariyonaddhesu bheri-ādīsu ekatalatūriyam, vitataṃ nāma ubhaya-talam, ātatavitataṃ nāma sabbaso (3.0234) pariyonaddham, susiram vaṃsādi, ghanam sammādi. **Suvinītassāti** ākaḍḍhanasithilakaraṇādīhi samucchitassa. **Suppaṭipatāḷitassāti** pamāṇe ṭhitabhāvajānanattham suṭṭhu paṭipatāḷitassa. **Kusa-lehi susamannāhatassāti** ye vādetum kusalā chekā, tehi vāditassa. **Vaggūti** cheko sundaro. **Rajanīyoti** rañjetum samattho. **Kamanīyoti** kāmetabbayutto. Khamanī-yoti vā pāṭho, divasampi suyyamāno khamateva, na nibbindatīti attho. **Madanīyoti** mānamadapurisamadajanano. **Indriyāni okkhipīti** “asāruppaṃ imā devatā karontī”-ti indriyāni heṭṭhā khipi, na akkhīni ummīletvā olokesi. **Na khvayyo anuruddho sādī-yatīti** “mayam naccāma gāyāma, ayyo pana anuruddho na kho sādīyati, akkhīni ummīletvā na oloketi, kiṃ mayam naccitvā vā gāyitvā vā karissāmā”ti tattheva antaradhāyimiṃsu. **Yena bhagavā tenupasaṅkamīti** tāsam devatānam ānubhāvam disvā “katīhi nu kho dhammehi samannāgato mātugāmo manāpakāyike devaloke nibbattatī”ti imamattham pucchitum upasaṅkami.

9-10. Idhalokikasuttadvayaṇṇanā

49-50. Navame **ayam’sa loko āraddho hotīti** ayamassa loko idhaloke karaṇama-ttāya āraddhattā paripuṇṇattā āraddho hoti paripuṇṇo. **Soḷasākārasampannāti** sutte vuttehi aṭṭhahi, gāthāsu aṭṭhahīti soḷasahi ākārehi samannāgatā, yāni vā aṭṭhaṅgāni parampi tesu samādapetīti evampi soḷasākārasampannāti eke. Saddhāsīlapaññā panettha missikā kathitā. Dasamaṃ bhikkhusaṅghassa kathitam. Sabbasuttesu pana yaṃ na vuttam, tam heṭṭhā āgatanayattā uttānatthamevāti.

Uposathavaggo pañcama.

Paṭhamapaṇṇāsakaṃ niṭṭhitam.

2. Dutiyapaṇṇāsakaṃ

(6) 1. gotamīvaggo

1. Gotamīsuttavaṇṇanā

51. Chaṭṭhassa (3.0235) paṭhame **sakkesu viharatīti** paṭhamagamanena gantvā viharati. **Mahāpajāpatīti** puttapajāya ceva dhītipajāya ca mahantattā evaṃladdhanāmā. **Yena bhagavā tenupasaṅkamīti** bhagavā kapilapuraṃ gantvā paṭhama-meva nandaṃ pabbājesi, sattame divase rāhulakumāraṃ. **Cumbaṭakakalahe** (dī. ni. aṭṭha. 2.331; saṃ. ni. aṭṭha. 1.1.37) pana ubhayanagaravāsikesu yuddhatthāya nikkhantesu satthā gantvā te rājāno saññāpetvā **attadaṇḍasuttaṃ** (su. ni. 941 ādayo; mahāni. 170 ādayo) kathesi. Rājāno pasīditvā aḍḍhatiyasate aḍḍhatiyasate kumāre adamsu, tāni pañca kumārasatāni satthu santike pabbajimsu, atha nesaṃ pajāpatiyo sāsanaṃ pesetvā anabhiratiṃ uppādayimsu. Satthā tesam anabhiratiyā uppannabhāvaṃ ñatvā te pañcasate daharabhikkhū kuṇāladahaṃ netvā attano kuṇālakāle nisinnapubbe pāsāṇatale nisīditvā **kuṇālajātakakathāya** (jā. 2.21.kuṇālajātaka) tesam anabhiratiṃ vinodetvā sabbepi te sotāpatti-phale patiṭṭhāpesi, puna mahāvanaṃ ānetvā arahattaphaleti. Tesam cittajānanatthaṃ punapi pajāpatiyo sāsanaṃ pahīṇimsu. Te “abhabbā mayaṃ gharāvāsassā”ti paṭisāsanaṃ pahīṇimsu. Tā “na dāni amhākaṃ gharaṃ gantuṃ yuttaṃ, mahāpajāpatiyā santikaṃ gantvā pabbajjaṃ anujānāpetvā pabbajissāmā”ti pañcasatāpi mahāpajāpatiṃ upasaṅkamitvā “ayye, amhākaṃ pabbajjaṃ anujānāpethā”ti āhaṃsu. Mahāpajāpatī tā itthiyo gahetvā yena bhagavā tenupasaṅkami. Setacchattassa heṭṭhā rañño parinibbutakāle upasaṅkamītipi vadantiyeva.

Alaṃ gotami, mā te ruccīti kasmā paṭikkhipi, nanu sabbesampi buddhānaṃ catasso parisā hontīti? Kāmaṃ honti, kilametvā pana anekavāraṃ yācite anuññātaṃ pabbajjaṃ “dukkhena laddhā”ti sammā paripālessantīti garuṃ katvā anuññātukāmo paṭikkhipi. **Pakkāmīti** puna kapilapurameva pāvisi. **Yathābhirantaṃ** (3.02 viharitvā)ti bodhaneyyasattānaṃ upanissayaṃ olokento yathājjhāsayane viharitvā. **Cārikaṃ pakkāmīti** mahājanasaṅgahaṃ karonto uttamāya buddhasiriyā anopamena buddhaviḷāsena aturitacārikaṃ pakkāmi.

Sambahulāhi sākiyānīhi saddhinti antonivesanamhiyeva dasabalaṃ uddissa pabbajjāvesaṃ gahetvā pañcasatā sākiyāniyo pabbajjāvesaṃyeva gāhāpetvā sabbāhipi tāhi sambahulāhi sākiyānīhi saddhiṃ. **Cārikaṃ pakkāmīti** gamanaṃ abhinīhari. Gamanābhiniharaṇakāle pana tā sukhumālā rājitthiyo padasā gantuṃ na sakkhissantīti sākiyakoliyarājāno sovaṇṇasivikāyo upaṭṭhāpayimsu. Tā pana “yāne āruyha gacchantīti satthari agāravo kato hotī”ti ekapaṇṇāsayojanikaṃ pada-sāva paṭipajjimsu. Rājānopi purato ca pacchato ca ārakkhaṃ saṃvidahāpetvā taṇḍulasappitelādīnaṃ sakaṭāni pūrāpetvā “gataṭṭhāne gataṭṭhāne āhāraṃ paṭiyā-dethā”ti purise pesayimsu. **Sūnehi pādehīti** tāsāñhi sukhumālattā pādesu eko phoṭo utṭheti, eko bhijjati. Ubho pādā katakaṭṭhisamparikiṇṇā viya hutvā uddhu-

mātā jātā. Tena vuttaṃ- “sūnehi pādehi”ti. **Bahidvārakoṭṭhaket**i dvārakoṭṭhakato bahi. Kasmā panevaṃ ṭhitāti? Evaṃ kirassā ahosi- “ahaṃ tathāgatena ananuññātā sayameva pabbajjāvesaṃ aggahesiṃ, evaṃ gahitabhāvo ca pana me sakalajambudīpe pākaṭo jāto. Sace satthā pabbajjaṃ anujānāti, iccetaṃ kusalaṃ. Sace pana nānujānissati, mahatī garahā bhavissati”ti vihāraṃ pavisitum asakkontī rodamānāva aṭṭhāsi.

Kiṃ nu tvaṃ gotamīti kiṃ nu rājakulānaṃ vipatti uppannā, kena tvaṃ kāraṇena evaṃ vivaṇṇabhāvaṃ pattā, sūnehi pādehi ...pe... ṭhitāti. **Aññenapi pariyāyenāti** aññenapi kāraṇena. **Bahukārā, bhanteti-**ādinā tassā guṇaṃ kathetvā puna pabbajjaṃ yācanto evamāha. Satthāpi “itthiyo nāma parittapaññā, ekayācitamattena pabbajjāya anuññātāya na mama sāsanaṃ garuṃ katvā gaṇhissanti”ti tikkhattuṃ paṭikkhipitvā idāni garuṃ katvā gāhāpetukāmatāya **sace, ānanda, mahāpajāpatī gotamī** (3.0237) **aṭṭha garudhamme paṭiggaṇhāti, sāva’ssā hotu upasampadāti-**ādimāha. Tattha **sāvassāti** sā eva assā pabbajjāpi upasampadāpi hotu.

Tadahūpasampannassāti taṃdivasaṃ upasampannassa. **Abhivādanaṃ paccuṭṭhānaṃ añjalikammaṃ sāmīcikkammaṃ kattabbanti** omānātimāne akatvā pañcapatiṭṭhitena abhivādanaṃ, āsanā paccuṭṭhāya paccuggamanavasena paccuṭṭhānaṃ, dasanakhe samodhānetvā añjalikammaṃ, āsanapaññāpanabījanādikaṃ anucchavikkammaṃsaṅkhātāṃ sāmīcikkammaṃca kattaṃ. **Abhikkhuke āvāseti** yattha vasantiyā anantarāyena ovādatthāya upasaṅkamanatṭhāne ovādadāyako ācariyo natthi, ayaṃ abhikkhuko āvāso nāma. Evarūpe āvāse vassaṃ na upagantabbaṃ. **Anvaḍḍhamāsanti** anuposathikaṃ. **Ovādūpasaṅkamananti** ovādatthāya upasaṅkamaṃ. **Diṭṭhenāti** cakkhunā diṭṭhena. **Sutenāti** sotena sutena. **Parisaṅkāyāti** diṭṭhasutavasena parisaṅkitena. **Garudhammanti** garukaṃ saṅghādisesāpattiṃ. **Pakkhamānattanti** anūnāni pannarasa divasāni mānattaṃ. **Chasu dhammesūti** vikālabhojanacchaṭṭhesu sikkhāpadesu. **Sikkhitasikkhāyāti** ekasikkhampi akhaṇḍaṃ katvā pūritasikkhāya. **Akkositabbo paribhāsittabboti** dasannaṃ akkosavatthūnaṃ aññatarena akkosavatthunā na akkosittabbo, bhayūpadaṃsanāya yāya kāyaci paribhāsāya na paribhāsittabbo.

Ovaṭo bhikkhunīnaṃ bhikkhūsu vacanapathoti ovādānusāsanaḍḍhammakathāsaṅkhāto vacanapatho bhikkhunīnaṃ bhikkhūsu ovarito pihito, na bhikkhuniyā koci bhikkhu ovadittabbo anusāsittabbo vā “bhante, porāṇakattherā idaṃ cīvaravattaṃ pūrayiṃsū”ti evaṃ pana paveṇivasena kathetuṃ vaṭṭati. **Anovaṭo bhikkhūnaṃ bhikkhūnisu vacanapathoti** bhikkhūnaṃ pana bhikkhūnisu vacanapatho anivārito, yathārucci ovadittuṃ anusāsittuṃ dhammakathaṃ kathetunti ayamettha saṅkhepo, vitthārato panesā garudhammakathā samantapāsādikāya vinayasaṃvaṇṇanāya (pāci. aṭṭha. 148) vuttanayeneva veditabbā.

Ime pana aṭṭha garudhamme satthu santike uggahetvā therena attano

ārociyamāne sutvāva mahāpajāpatiyā tāva mahantaṃ domanassaṃ khaṇena (3.023) paṭippassambhi, anotattadahato ābhatena sītudakassa ghaṭasatena matthake parisittā viya vigatapariḷāhā attamanā hutvā garudhammapaṭiggahaṇena uppanna-pītipāmojjaṃ āvikarontī **seyyathāpi, bhanteti-ādikaṃ udānaṃ udānesi.**

Kumbhatthenakehīti kumbhe dīpaṃ jāletvā tena ālokena paraghare bhaṇḍaṃ vicinitvā thenakacorehi. **Setaṭṭhikā nāma rogajātīti** eko pāṇako nālamajjhagataṃ kaṇḍaṃ vijjhati, yena viddhā kaṇḍā nikkhantampi sālīsisaṃ khīraṃ gahetuṃ na sakkoti. **Mañjīṭṭhikā nāma rogajātīti** ucchūnaṃ antorattabhāvo.

Mahato taḷākassa paṭikacceva āḷinti iminā pana etamatthaṃ dasseti- yathā mahato taḷākassa pāḷiyā abaddhāyapi kiñci udakaṃ tiṭṭhateva, paṭhamameva baddhāya pana yaṃ abaddhapaccayā na tiṭṭheyya, tampi tiṭṭheyya, evameva ye ime anuppanne vatthusmiṃ paṭikacceva anatikkamanatthāya garudhammā paññattā, tesu apaññattesu mātugāmassa pabbajitattā pañca vassasatāni saddhammo tiṭṭheyya. Paṭikacceva paññattattā pana aparānipi pañca vassasatāni ṭhassatīti evaṃ paṭhamaṃ vuttavassasahassameva ṭhassati. **Vassasahassanti** cetam paṭisambhidāpabhedappattakhīṇāsavānaṃ vaseneva vuttaṃ, tato pana uttaripi sukkhavipassakakhīṇāsavavasena vassasahassaṃ, anāgāmivasena vassasahassaṃ, sakadāgāmivasena vassasahassaṃ, sotāpannavasena vassasahassanti evaṃ pañcavassasahassāni paṭivedhasaddhammo ṭhassati. Pariyattidhammopi tāniyeva. Na hi pariyattiyā asati paṭivedho atthi, nāpi pariyattiyā sati paṭivedho na hoti. Liṅgaṃ pana pariyattiyā antarahitāyapi ciraṃ pavattissatīti.

2. Ovādasuttavaṇṇanā

52. Dutiye **bahussutoti** idha sakalassapi buddhavacanassa vasena bahussutabhāvo veditabbo. **Garudhammanti** kāyasaṃsaggaṃ. Ayamettha saṅkhepo. Bhikkhunovādakavinicchayo pana samantapāsādikāya (pāci. aṭṭha. 144 ādayo) vuttanayeneva veditabbo.

3. Saṃkhittasuttavaṇṇanā

53. Tatiye (3.0239) **sarāgāyāti** sarāgatthāya. **Virāgāyāti** virajjanatthāya. **Samyogāyāti** vaṭṭe saṃyogatthāya. **Visaṃyogāyāti** vaṭṭe visaṃyogabhāvatthāya. **Ācayāyāti** vaṭṭassa vaḍḍhanatthāya. **No apacayāyāti** na vaṭṭaviddhaṃsanatthāya. **Dubbharatāyāti** dupposanatthāya. **No subharatāyāti** na sukhaposanatthāya. Imasmim sutte paṭhamavārena vaṭṭaṃ kathitaṃ, dutiyavārena vivaṭṭaṃ kathitaṃ. Iminā ca pana ovādena gotamī arahattaṃ pattāti.

4. Dīghajāṇusuttavaṇṇanā

54. Catutthe **byagghapajjāti** idamassa paveṇi nāma vasena ālapanāṃ. Tassa hi pubbapurisā byagghapathe jātāti tasmim kule manussā byagghapajjāti

vuccanti. **Issatthenā**ti issāsakammena. **Tatrupāyāyā**ti “imasmim̄ kāle idaṃ nāma kātuṃ vaṭṭati”ti jānane upāyabhūtāya. **Vuddhasīlinoti** vaḍḍhitasīlā vuddhasamācārā. **Āyanti** āgamaṃ. **Nāccogāḷhanti** nātimahantaṃ. **Nātihinanti** nātikasiraṃ. **Pariyādāyā**ti gahetvā khepetvā. Tattha yassa vayato diguṇo āyo, tassa vayo āyaṃ pariyādātuṃ na sakkoti.

“Catudhā vibhaje bhoge, paṇḍito gharamāvasaṃ;
ekena bhoge bhuñjeyya, dvīhi kammaṃ payojaye;
catutthañca nidhāpeyya, āpadāsu bhavissati”ti. (dī. ni. 3.265)-

Evaṃ paṭipajjato pana vayo āyaṃ pariyādātuṃ na sakkotiyeva.

Udumbarakhādīvāti yathā udumbarāni khāditukāmena pakke udumbararukkhe cālīte ekappahāreneva bahūni phalāni patanti, so khāditabbayuttakāni khāditvā itarāni bahutarāni pahāya gacchati, evamevaṃ yo āyato vayaṃ bahutaraṃ katvā vippakiranto bhoge paribhuñjati, so “udumbarakhādikaṃvāyaṃ kulaputto bhoge khādati”ti vuccati. **Ajeṭṭhamaraṇanti** (3.0240) anāyakamaraṇaṃ. **Samam̄ jīvikam̄ kappetī**ti sammā jīvikam̄ kappeti. **Samajīvitā**ti samajīvitāya jīvitā. **Apāyamukhānī**ti vināsassa ṭhānāni.

Uṭṭhātā kammadheyyesūti kammakaraṇaṭṭhānesu uṭṭhānavīriyasampanno. **Vidhānavā**ti vidahanasampanno. **Sothhānaṃ samparāyikanti** sothhibhūtaṃ samparāyikaṃ. **Saccanāmenā**ti buddhattāyeva buddhoti evaṃ avitathanāmena. **Cāgo puññaṃ pavaḍḍhatī**ti cāgo ca sesapuññañca pavaḍḍhati. Imasmim̄ sutte saddhādayo missakā kathitā. Pañcamaṃ uttānameva.

6. Bhayasuttavaṇṇanā

56. Chaṭṭhe **gabbho**ti gabbhavāso. **Diṭṭhadhammikāpī**ti sandiṭṭhikā gabbhavāsa-sadisā punapi manussagabbhā. **Samparāyikāpī**ti ṭhapetvā manussagabbhe sesagabbhā. **Ubhayaṃ ete kāmā pavuccanti**ti bhayañca dukkhañca, bhayañca rogo ca, bhayañca gaṇḍo ca, bhayañca sallañca, bhayañca saṅgo ca, bhayañca paṅko ca, bhayañca gabbho cāti evaṃ ubhayaṃ ete kāmā pavuccanti. **Sātarūpenā**ti kāmasukhena. **Palipathanti** vaṭṭapalipathaṃ. **Atikkammā**ti imasmim̄ ṭhāne vipassanaṃ vaḍḍhetvā assa bhikkhuno arahattappattabhāvo gahito. Evarūpaṃ pajaṃ jātijarūpetam̄ tīsu bhavesu phandamaṃ avekkhatīti sutte vaṭṭam̄ kathetvā gāthāsu vivaṭṭam̄ kathitanti. Sattamaṭṭhamāni uttānatthāneva.

9-10. Puggalasuttadvayavaṇṇanā

59-60. Navame **ujubhū**toti kāyavaṅkādīnaṃ abhāvena ujuko. **Paññāsīlasamāhi-**toTi paññāya ca sīlena ca samannāgato. **Yajamānānanti** dānaṃ dadantānaṃ. **Puññapekkhānanti** puññaṃ oloketānaṃ gavesantānaṃ (3.0241). **Opadhikanti** upadhivipākaṃ, opadhibhūtaṃ ṭhānaṃ appamaṇaṃ. Dasame **samukkaṭṭhoti** ukkaṭṭho uttamo. **Sattānanti** sabbasattānaṃ. Sesam̄ sabbattha uttānamevāti.

Gotamīvaggo chaṭṭho.

(7) 2. bhūmicālavaggo

1. Icchāsuttavaṇṇanā

61. Sattamassa paṭhame **pavivittassā**ti kāyavivekena vivittassa. **Nirāyattavutti-**noti katthaci anāyattavuttino vipassanākammikassa. **Lābhāyā**ti catupaccayaābhāya. **Socī ca paridevī cā**ti sokī ca paridevī ca. Socicca parideviccātipi pāṭho. **Cuto ca saddhammā**ti taṃkhaṇaṃyeva vipassanāsaddhammā cuto. Imasmiṃ sutte vaṭṭavivaṭṭaṃ kathitaṃ.

2. Alaṃsuttavaṇṇanā

62. Dutiye **alaṃ attano alaṃ paresanti** attano ca paresaṅca hitapaṭipattiyaṃ samattho pariyatto anucchaviko. **Khippanisantī**ti khippaṃ upadhāreti, khandhadhātu-āyatanādīsu kathiyamānesu te dhamme khippaṃ jānātīti attho. Imasmiṃ sutte samathavipassanā kathitā. Puggalajjhāsayena pana desanāvīlāsena cetam matthakato paṭṭhāya heṭṭhā otarantaṃ kathitanti.

3. Saṃkhittasuttavaṇṇanā

63. Tatiye **evamevā**ti nikkāraṇeneva. Yathā vā ayaṃ yācati, evameva. **Moghapurisā**ti mūḷhapurisā tucchapurisā. **Ajjhesantī**ti yācanti. **Anubandhitabbanti** iriyāpathānugamanena anubandhitabbaṃ maṃ na vijahitabbaṃ maññanti. Ājānanatthaṃ apasādentō evamāha. Esa kira bhikkhu ovāde dinnepi pamādameva anuyuñjati, dhammaṃ sutvā tattheva vasati, samaṇadhammaṃ kātuṃ na icchati. Tasmā bhagavā evaṃ apasādetvā puna yasmā so arahattassa upanissayasampanno (3.02) tasmā taṃ ovaḍanto **tasmātiha te bhikkhu evaṃ sikkhitabbanti-**ādimāha. Tatha **ajjhattaṃ me cittaṃ ṭhitaṃ bhavissati susaṅghitaṃ, na ca uppannā pāpakā akusalā dhammā cittaṃ pariyādāya ṭhassantī**ti iminā tāvassa ovādena niyakajjhattavasena cittekaggatāmatto mūlasamādhi vutto.

Tato “ettakeneva santuṭṭhiṃ anāpajjitvā evaṃ so samādhi vaḍḍhetabbo”ti dassetuṃ **yato kho te bhikkhu ajjhattaṃ cittaṃ ṭhitaṃ hoti susaṅghitaṃ, na ca uppannā pāpakā akusalā dhammā cittaṃ pariyādāya tiṭṭhanti, tato te bhikkhu evaṃ sikkhitabbaṃ “mettā me cetovimutti bhāvitā bhavissati ...pe... susamāradhā”**ti evamassa mettāvasena bhāvanaṃ vaḍḍhetvā puna **yato kho te bhikkhu ayaṃ samādhi evaṃ bhāvito hoti bahulīkato, tato tvaṃ bhikkhu imaṃ samādhiṃ savitakkasavicārampi bhāveyyāsīti-**ādi vuttaṃ. Tassattho- yadā te bhikkhu ayaṃ mūlasamādhi evaṃ mettāvasena bhāvito hoti, tadā tvaṃ tāvatakenapi tuṭṭhiṃ anā-

pajjitvāva imaṃ mūlasamādhim aññesupi ārammaṇesu catukkapañcakajjhānāni pāpayamāno “savitakkasavicārampi” ti-ādinā nayena bhāveyyāsīti.

Evaṃ vatvā ca pana avasesabrahmavihārapubbaṅgamampissa aññesu ārammaṇesu catukkapañcakajjhānabhāvanaṃ kareyyāsīti dassento **yato kho te bhikkhu ayaṃ samādhī evaṃ bhāvito hoti subhāvito, tato te bhikkhu evaṃ sikkhitabbaṃ “karuṇā me cetovimutti”** ti-ādimāha. Evaṃ mettāpubbaṅgamaṃ catukkapañcakajjhānabhāvanaṃ dassetvā puna kāyānupassanādipubbaṅgamaṃ dassetuṃ **yato kho te bhikkhu ayaṃ samādhī evaṃ bhāvito hoti subhāvito, tato te bhikkhu evaṃ sikkhitabbaṃ “kāye kāyānupassī”** ti-ādimṃ vatvā **yato kho te bhikkhu ayaṃ samādhī evaṃ bhāvito hoti subhāvito, tato tvaṃ bhikkhu yena yeneva gagghasīti-ādimāha.** Tattha **gagghasīti** gamissasi. **Phāsumyevāti** iminā arahattaṃ dasseti. Arahattappatto hi sabbiriyāpathesu phāsu viharati nāma.

4. Gayāsīsasuttavaṇṇanā

64. Catutthe (3.0243) **etadvocāti** attano padhānabhūmiyaṃ uppannaṃ vitakkaṃ bhikkhusaṅghassa ārocetuṃ- “pubbāhaṃ, bhikkhave” ti-ādivacanaṃ avoca. **Obhāsanti** dibbacakkhuññāṇobhāsaṃ. **Ñāṇadassananti** dibbacakkhubhūtaṃ ñāṇasaṅkhātaṃ dassanaṃ. **Sannivutthapubbanti** ekato vasitapubbaṃ. Imasmiṃ pana sutte dibbacakkhuññāṇaṃ, iddhividhaññāṇaṃ, cetopariyaññāṇaṃ, yathākammupagaññāṇaṃ, anāgataṃsaññāṇaṃ, paccuppannaṃsaññāṇaṃ, atītaṃsaññāṇaṃ, pubbenivāsaññāṇanti imāni tāva aṭṭha ñāṇāni pāliyaṃyeva āgatāni, tehi pana saddhiṃ vipassanāññāṇāni cattāri maggaññāṇāni, cattāri phalaññāṇāni, cattāri paccavekkhaṇaññāṇāni, cattāri paṭisambhidāññāṇāni cha asādhāraṇaññāṇāni etāni ñāṇāni samodhānetvā kathentena evaṃ idaṃ suttaṃ kathitaṃ nāma hoti.

5. Abhibhāyatanasuttavaṇṇanā

65. Pañcame **abhibhāyatanāni** abhibhavanakāraṇāni. Kiṃ abhibhavanti? Paccanīkadhammepi ārammaṇāni. Tāni hi paṭipakkhabhāvena paccanīkadhamme abhibhavanti, puggalassa ñāṇuttariyatāya ārammaṇāni. **Ajjhattaṃ rūpa-saññīti-ādīsu** pana ajjhattarūpe parikammavasena ajjhattaṃ rūpasaññī nāma hoti. Ajjhattañhi nīlaparikammaṃ karonto kese vā

pitte vā akkhitarākāya vā karoti. Pītaparikammaṃ karonto mede vā chaviyā vā hatthatalapādatalesu vā akkhīnaṃ pītaṭṭhāne vā karoti. Lohitaparikammaṃ karonto maṃse vā lohite vā jivhāya vā akkhīnaṃ rattaṭṭhāne vā karoti. Odātaparikammaṃ karonto aṭṭhimhi vā dante vā nakhe vā akkhīnaṃ setaṭṭhāne vā karoti. Taṃ pana sunīlakaṃ supītakaṃ sulohitakaṃ su-odātaṃ na hoti, avisuddhameva hoti.

Eko bahiddhā rūpāni passatī Ti yassevaṃ parikammaṃ ajjhattaṃ uppannaṃ hoti, nimittaṃ pana bahiddhā, so evaṃ ajjhattaṃ parikammaṃ bahiddhā ca appanāya vasena “ajjhattaṃ rūpasaññī eko bahiddhā rūpāni passatī” ti vuccati. **Parittānīti** avaḍḍhitāni. **Suvaṇṇadubbaṇṇānīti** suvaṇṇāni vā hontu dubbaṇṇāni vā, parittavaseneva idaṃ abhibhāyatanaṃ vuttanti veditabbaṃ. **Tāni abhibhuyyāti** yathā nāma sampannaggahaṇiko kaṭacchumattaṃ bhattaṃ labhitvā “kiṃ ettha bhuñjitabbaṃ (3.0244) atthī” ti saṃkaḍḍhitvā ekakabaḷameva karoti, evameva ñāṇuttariko puggalo visadañāṇo “kimettha parittake ārammaṇe samāpajjitabbaṃ atthi, nāyaṃ mama bhāro” ti tāni rūpāni abhibhavivā samāpajjati, saha nimittuppādenevettha appanaṃ pāpetiti attho. **Jānāmi passāmīti** iminā panassa ābhogo kathito. So ca kho samāpattito vuṭṭhitassa, na antosamāpattiyaṃ. **Evaṃsaññī hotīti** ābhogasaññāyapi jhānasaññāyapi evaṃsaññī hoti. Abhibhavanasaññā hissa antosamāpattiyampi atthi, ābhogasaññā pana samāpattito vuṭṭhitasseva.

Appamāṇānīti vaḍḍhitappamāṇāni, mahantānīti attho. **Abhibhuyyāti** ettha ca pana yathā mahagghaso puriso ekaṃ bhattavaḍḍhitakaṃ labhitvā “aññāpi hotu, aññāpi hotu, kiṃ esā mayhaṃ karissatī” ti na taṃ mahantato passati, evameva ñāṇuttaro puggalo visadañāṇo “kiṃ ettha samāpajjitabbaṃ, nayidaṃ appamāṇaṃ, na mayhaṃ cittekaggatākaraṇe bhāro atthī” ti abhibhavivā samāpajjati, saha nimittuppādanevettha appanaṃ pāpetiti attho.

Ajjhattaṃ arūpasaññīti alābhitāya vā anathikatāya vā ajjhattarūpe parikamma-saññāviraḥito.

Eko bahiddhā rūpāni passatī Ti yassa parikammampi nimittampi bahiddhā uppannaṃ, so evaṃ bahiddhā parikammaṃ ceva appanāya ca vasena “ajjhattaṃ arūpasaññī eko bahiddhā rūpāni passatī” ti vuccati. Sesamettha catuṭṭhābhibhāyatane ca vuttanayameva. Imesu pana catūsu parittaṃ vitakkacaritavasena āgataṃ, appamāṇaṃ mohacaritavasena, suvaṇṇaṃ dosacaritavasena, dubbaṇṇaṃ rāgacaritavasena. Etesañhi etāni sappāyāni. Sā ca nesaṃ sappāyatā visuddhimagge (visuddhi. 1.43) carīyaniddese vuttā.

Pañcama-abhibhāyatanādīsu **nīlānīti** sabbasaṅgāhikavasena vuttaṃ. **Nīlavaṇṇānīti** vaṇṇavasena. **Nīlanidassanānīti** nidassanavasena. Apaññāyamānavivarāni asambhinnavaṇṇāni ekanīlāneva hutvā dissantīti vuttaṃ hoti. **Nīlanibhāsānīti** (3.0245) idaṃ pana obhāsavasena vuttaṃ, nīlobhāsāni nīlappabhāyuttānīti attho. Etena nesaṃ suvisuddhataṃ dasseti. Visuddhavaṇṇavaseneva hi imāni abhibhāyatanāni vuttāni. “Nīlakasiṇaṃ uggaṇhanto nīlasmīṃ nimittaṃ gaṇhāti pupphasmīṃ vā vatthasmīṃ vā vaṇṇadhātuyā vā” ti-ādikaṃ panettha kasiṇakaraṇaṅca parikammaṅca appanāvidhānaṅca sabbam visuddhimagge (visuddhi. 1.55) vitthārato

vuttamevāti.

6. Vimokkhasuttavaṇṇanā

66. Vimokkhāti kenatthēna vimokkhā? Adhimuccanatthēna. Ko panāyaṃ adhimuccanattho nāma? Paccaṇikadhammehi ca suṭṭhu muccanattho, ārammaṇe ca abhirativasena suṭṭhu muccanattho, pitu-aṅke vissatthāṅgapaccaṅgassa dāra-kassa sayanaṃ viya aniggahitabhāvena nirāsaṅkatāya ārammaṇe pavattiti vuttaṃ hoti. Ayaṃ panattho pacchime vimokkhe natthi, purimesu vimokkhesu atthi.

Rūpī rūpāni passatīti ettha ajjhattaṃ kesādīsu nīlakasiṇādivasena uppāditaṃ rūpajjhānaṃ rūpaṃ, tadassatthīti rūpī. Bahiddhāpi nīlakasiṇādīni rūpāni jhānacakkhunā passati. Iminā ajjhattabahiddhavatthukesu kasiṇesu uppāditaṃ jhānassa puggalassa cattāri rūpāvacarajjhānāni dassitāni. **Ajjhattaṃ arūpasaññīti** ajjhattaṃ na rūpasaññī, attano kesādīsu anuppāditārūpāvacarajjhānoti attho. Iminā bahiddhā parikammaṃ katvā bahiddhāva uppāditaṃ jhānassa rūpāvacarajjhānāni dassitāni.

Subhanteva adhimutto hotīti iminā suvisuddhesu nīlādīsu vaṇṇakasiṇesu jhānāni dassitāni. Tattha kiñcāpi anto-appanāya “subhan”ti ābhogo natthi, yo pana suvisuddhaṃ subhaṃ kasiṇaṃ ārammaṇaṃ katvā viharati, so yasmā “subhanti adhimutto hotīti”ti vattabbaṃ āpajjati, tasmā evaṃ desanā katā. Paṭisa-mbhidāmagge pana-

“Kathaṃ subhanteva adhimutto hotīti vimokkho? Idha bhikkhu mettāsahagatena cetasā ekaṃ disaṃ ...pe... viharati. Mettāya bhāvitattā sattā appaṭikūlā honti. Karuṇāsahagatena ...pe... muditāsahagatena (3.0246) ...pe... upekkhāsahagatena cetasā ekaṃ disaṃ ...pe... viharati. Upekkhāya bhāvitattā sattā appaṭikūlā honti. Evaṃ subhanteva adhimutto hotīti vimokkho”ti (paṭi. ma. 1.212) vuttaṃ.

Sabbaso rūpasaññānanti-ādīsu yaṃ vattabbaṃ, taṃ visuddhimagge (visuddhi. 1.276-277) vuttameva. **Ayaṃ atthamo vimokkhoti** ayaṃ catunnaṃ khandhānaṃ sabbaso vissatthattā vimuttattā atthamo uttamo vimokkho nāma.

7-8. Anariyavohārasuttavaṇṇanā

67-68. Sattame **anariyavohārāti** na ariyakathā sadosakathā. Yāhi cetanāhi te vohāre voharanti, tāsāṃ etaṃ nāmaṃ. Atthame vuttapaṭipakkhanayena attho veditabbo.

9. Parisāsuttavaṇṇanā

69. Navame **khattiyaparisāti** khattiyānaṃ parisānaṃ sannipāto samāgamo. Esa nayo sabbattha. **Anekasataṃ khattiyaparisanti** bimbisārasamāgama-ñāṭisamāgama-licchavisamāgamādisadisāṃ, aññesu cakkavāḷesupi labbhateva. **Sallapitapu-**

bbanti ālāpasallāpo katapubbo. **Sākacchāti** dhammasākacchāpi samāpajjita-pubbā. **Yādisako tesam vaṇṇoti** te odātāpi honti kāḷāpi maṅguracchavīpi, satthā suvaṇṇavaṇṇo. Idaṃ pana saṅṭhānaṃ paṭicca kathitaṃ. Saṅṭhānampi ca kevalaṃ tesam paññāyatiyeva. Na pana bhagavā milakkhasadiso hoti, nāpi āmuttamaṅkūṇḍalo, buddhaveseneva nisīdati. Tepi attano samānasaṅṭhānameva passanti. **Yādisako tesam saroti** te chinnassarāpi honti gaggassarāpi kākassarāpi, satthā brahmassarova. Idaṃ pana bhāsantaraṃ sandhāya kathitaṃ. Sacepi hi satthā rājāsane nisinno katheti, “ajja rājā madhurena katheti”ti nesaṃ hoti. Kathetvā pakkante pana bhagavati puna rājānaṃ āgataṃ disvā “ko nu kho ayan”ti vīmaṃsā uppajjati. Tattha **ko nu kho ayanti** “imasmim̃ ṭhāne idāneva māgadhabhāsāya siha-ḷabhāsāya madhurena ākāreṇa kathento ko nu kho ayaṃ antarahito, kiṃ devo udāhu (3.0247) manusso”ti evaṃ vīmaṃsantāpi na jānantīti attho. Kimatthaṃ panevaṃ ajānantānaṃ dhammaṃ desetīti? Vāsanatthāya. Evaṃ sutopi hi dhammo anāgate paccayo hotīti anāgataṃ paṭicca deseti. **Anekasataṃ brāhmaṇa-parisanti-**ādinaṃ soṇadaṇḍasamāgamādivasena ceva aññacakkavāḷavasena ca sambhavo veditabbo.

10. Bhūmicālasuttavaṇṇanā

70. Dasame **nisīdananti** idha cammakhaṇḍaṃ adhippetam. **Udenaṃ cetiyanti** udenayakkhassa vasanaṭṭhāne katavihāro vuccati. **Gotamakādisupi** eseva nayo. **Bhāvitāti** vadḍhitā. **Bahulikatāti** punappunaṃ katā. **Yānikatāti** yuttayānaṃ viya katā. **Vatthukatāti** patiṭṭhānaṭṭhena vatthu viya katā. **Anuṭṭhitāti** adhiṭṭhitā. **Paricitāti** samantato citā suvaḍḍhitā. **Susamāraddhāti** suṭṭhu samāraddhā.

Iti aniyamena kathetvā puna niyametvā dassento **tathāgatassa khoti-**ādimāha. Ettha **kappanti** āyukappaṃ. Tasmim̃ tasmim̃ kāle yaṃ manussānaṃ āyuppa-māṇaṃ, taṃ paripuṇṇaṃ karonto tiṭṭheyya. **Kappāvasesam vāti** “appaṃ vā bhiyyo”-ti vuttavassasatato atirekaṃ vā. Mahāsivatthero panāha- “buddhānaṃ aṭṭhāne gajjitaṃ nāma natthi, punappunaṃ samāpajjitvā maraṇantikavedanaṃ vikkhambhento bhaddakappameva tiṭṭheyya. Kasmā pana na ṭhitoti? Upādinna-kasarīraṃ nāma khaṇḍiccādīhi abhibhuyyati, buddhā ca khaṇḍiccādibhāvaṃ appatvā pañcame āyukoṭṭhāse bahujaṇassa piyamanāpakāleyeva parinibbāyanti. Buddhā-nubuddhesu ca mahāsāvakesu parinibbutesu ekakeneva khāṇukena viya ṭhātappaṃ hoti daharasāmaṇeraparivāreṇa vā, tato ‘aho buddhānaṃ parisā’ti hīle-tabbataṃ āpajjeyya. Tasmā na ṭhito”ti. Evaṃ vuttepi yo pana vuccati “āyukap-po”ti, idameva aṭṭhakathāya niyāmitaṃ.

Yathā taṃ mārena pariyaṭṭhitacittoti ettha **tanti** nipātamattaṃ, yathā mārena pariyaṭṭhitacitto ajjhotthaṭacitto aññopi koci puthujjano paṭivijjhitaṃ na sakuṇeyya, evameva nāsakkhi paṭivijjhitaṃ attho. Māro hi (3.0248) yassa sabbena sabbaṃ dvādasa vipallāsā appahīnā, tassa cittaṃ pariyaṭṭhāti. Therassa ca cattāro vipa-llāsā appahīnā, tenassa māro cittaṃ pariyaṭṭhāsi. So pana citta-pariyaṭṭhānaṃ karonto kiṃ karotīti? Bheravaṃ rūpārammaṇaṃ vā dasseti, saddārammaṇaṃ vā

sāveti. Tato sattā taṃ disvā vā sutvā vā satim̐ vissajjetvā vivaṭamukhā honti, tesam̐ mukhena hatthaṃ pavesetvā hadayaṃ maddati, tato visaññāva hutvā tiṭṭhanti. Therassa panesa mukhe hatthaṃ pavesetuṃ kiṃ sakkhissati, bheravārammaṇaṃ pana dassesi. Taṃ disvā thero nimittobhāsaṃ nappaṭivijjhi. Bhagavā jānantoyeva kimatthaṃ yāva tatiyaṃ āmantesīti? Parato “tiṭṭhatu, bhante bhagavā”ti yācite “tuyhevetam̐ dukkaṭam̐, tuyhevetam̐ aparaddhan”ti dosāropanena so katanukaraṇatthaṃ.

Māro pāpimāti ettha satte anatto niyojento māretīti **māro**. **Pāpimāti** tasseva vevacanaṃ. So hi pāpadhammasamannāgatattā “pāpimā”ti vuccati. Kaṇho, antako, namuci, pamattabandhūtipi tasseva nāmāni. **Bhāsītā kho panesāti** ayañhi bhagavato sambodhipattiyā aṭṭhame sattāhe bodhimaṇḍeyeva āgantvā “bhagavā yadatthaṃ tumhehi pāramiyo pūritā, so vo attho anuppatto, paṭividdhaṃ sabbaññutaññāṇaṃ, kiṃ te lokavicāraṇena”ti vatvā yathā ajja, evameva “parinibbātu dāni, bhante bhagavā”ti yāci. Bhagavā cassa “na tāvāhan”ti-ādīni vatvā paṭikkhipi. Taṃ sandhāya- “bhāsītā kho panesā, bhante”ti-ādīmāha.

Tattha **viyattāti** maggavasena byattā, tatheva **vinītā**, tathā **visāradā**. **Bahussutāti** tepiṭakavasena bahu sutam̐ etesanti **bahussutā**. Tameva dhammaṃ dhārentīti **dhammadharā**. Atha vā pariyattibahussutā ceva paṭivedhabahussutā ca. Pariyattipaṭivedhadhammānaṃyeva dhāraṇato dhammadharāti evamettha attho daṭṭhabbo. **Dhammānudhammappaṭipannāti** ariyadhammassa anudhamma-bhūtaṃ vipassanādhammaṃ paṭipannā. **Sāmicippaṭipannāti** anucchavikapaṭipadaṃ paṭipannā. **Anudhammacārinoti** anudhammaṃ caraṇasīlā. **Sakaṃ ācariya-kanti** attano ācariyavādaṃ. **Ācikkhissantīti**-ādīni sabbāni aññamaññavevacanāni. **Sahadhammenāti** sahetukena sakāraṇena vacanena. **Sappāṭihāriyanti** yāva niyyānikaṃ katvā dhammaṃ desessanti.

Brahmacariyanti (3.0249) sikkhāttayasaṅgahitaṃ sakalaṃ sāsana-brahmacariyaṃ. **Iddhanti** samiddhaṃ jhānassādasena. **Phītanti** vuddhipattaṃ sabbapāli-phullaṃ viya abhiññāsampattivasena.

Vitthārikanti vitthataṃ tasmim̄ tasmim̄ disābhāge paṭiṭṭhitavasena. **Bāhujaññanti** bahūhi ñātaṃ paṭividdhaṃ mahājanābhisamayavasena. **Puthubhūtanti** sabbākārena puthulabhāvappattaṃ. Kathaṃ? **Yāva devamanussehi suppakāsītanti**, yattakā viññujātikā devā ceva manussā ca atthi, sabbehi suṭṭhu pakāsītanti attho. **Appossukkoti** nirālayo. Tvañhi pāpima aṭṭhamasattāhato paṭṭhāya “parinibbātu dāni, bhante bhagavā, parinibbātu sugato”ti viravanto āhiṇḍittha. Ajja dāni paṭṭhāya vigatussāho hohi, mā mayhaṃ parinibbānatthaṃ vāyāmaṃ karohīti vadati.

Sato sampajāno āyusañkhāraṃ ossajjīti satim̄ sūpaṭṭhitam̄ katvā ñāṇena paricchinditvā āyusañkhāraṃ vissajji pajahi. Tattha na bhagavā hatthena leḍḍuṃ viya āyusañkhāraṃ ossaji, temāsamattameva pana phalasaṃpattim̄ samāpajjitvā tato paraṃ na samāpajjissāmīti cittaṃ uppādesi. Taṃ sandhāya vuttaṃ “ossaji”ti. Ussajjīti pāṭho. **Mahābhūmicāloti** mahanto pathavīkampo. Tadā kira dasasaṃhassī lokadhātu kampittha. **Bhimsanakoti** bhayajanako. **Devadundubhiyo ca phaliṃsūti** devabheriyo phaliṃsu, devo sukkhagajjitaṃ gajji, akālavijjulatā nicchariṃsu, khaṇikavassaṃ vassīti vuttaṃ hoti.

Udānaṃ udānesīti kasmā udānesi? Koci nāma vadeyya “bhagavā pacchato pacchato anubandhitvā ‘parinibbātu, bhante’ti upadduto bhayena āyusañkhāraṃ vissajjesi”ti, tassokāso mā hotu, bhītassa hi udānaṃ nāma natthīti pītivegavissatṭhaṃ udānaṃ udānesi.

Tattha sabbesaṃ soṇasiṅgālādīnampi paccakkhabhāvato tulitaṃ paricchinnanti **tulaṃ**. Kiṃ taṃ? Kāmāvacarakammaṃ. Na tulaṃ, na vā tulaṃ sadisaṃmassa aññaṃ lokiyaṃ kammaṃ atthīti **atulaṃ**. Kiṃ taṃ? Mahaggatakkammaṃ. Atha vā kāmāvacaraṃ rūpāvacaraṃ tulaṃ, arūpāvacaraṃ atulaṃ. Appavipākaṃ vā tulaṃ, bahuvipākaṃ atulaṃ. **Sambhavanti** sambhavahetubhūtaṃ, rāsikāraṃ piṇḍakāraṃ (3.0250) attho. **Bhavaśaṅkhāranti** punabbhavaśaṅkhāraṇakaṃ. **Avassajjīti** vissajjesi. **Munīti** buddhamuni. **Ajjhattaratoti** niyakajjhattarato. **Samāhitoti** upacārappanāsamaḍhivasena samāhito. **Abhindi kavacamivāti** kavacaṃ viya abhindi. **Attasambhavanti** attani sañjātaṃ kilesaṃ. Idaṃ vuttaṃ hoti- savipākaṭṭhena sambhavaṃ, bhavābhisaṅkharaṇaṭṭhena bhavaśaṅkhāranti ca laddhānāmaṃ tulātulasāṅkhātaṃ lokiyakammañca ossaji, saṅgāmasīse mahāyodho kavacaṃ viya attasambhavaṃ kilesañca ajjhattarato hutvā samāhito hutvā abhīndīti.

Atha vā **tulanti** tulento tīrento. **Atulañca sambhavanti** nibbānañceva sambhavañca. **Bhavaśaṅkhāranti** bhavagāmikammaṃ. **Avassaji munīti** “pañcakkhandhā aniccā, pañcannaṃ khandhānaṃ nirodho nibbānaṃ niccan”ti-ādinā (paṭi. ma. 3.37-38) nayena tulayanto buddhamuni bhava ādinavaṃ, nibbāne ca ānisaṃsaṃ disvā taṃ khandhānaṃ mūlabhūtaṃ bhavaśaṅkhāraṃ kammaṃ “kammakkhayaṃ saṃvattatī”ti (ma. ni. 2.81; a. ni. 4.232-233) evaṃ vuttena kammakkhayaṃ karena ariyamaggena avassaji. Kathaṃ? **Ajjhattarato samāhito, abhindi kavacamiva-ttasambhavaṃ**. So hi vipassanāvasena ajjhattarato, samathavasena samāhitoti evaṃ pubbabhāgato paṭṭhāya samathavipassanābalena kavacamiva attabhāvaṃ

pariyonandhitvā t̥hitam, attani sambhavattā “attasambhavan”ti laddhanāmaṃ sabbakilesajālaṃ abhindi. Kilesābhāvena ca kataṃ kammaṃ appaṭisandhikattā avassaṭṭhaṃ nāma hotīti evaṃ kilesappahānena kammaṃ pajahi. Pahīnakilesassa ca bhayaṃ nāma natthi, tasmā abhītova āyusañkhāraṃ ossajji, abhītabhāvañāpanatthañca udānaṃ udānesīti veditabbo.

Yaṃ mahāvātāti yena samayena yasmim vā samaye mahāvātā. **Vāyantī**ti upakkhepakavātā nāma uṭṭhahanti, te vāyantā saṭṭhisahassādhikanavayojanasatasahassabahalaṃ udakasandhārakavātaṃ upacchindanti, tato ākāse udakaṃ bhassati, tasmim bhassante pathavī bhassati, puna vāto attano balena antodhammakaraṇe viya udakaṃ ābandhitvā gaṇhāti, tato udakaṃ uggacchati, tasmim uggacchante pathavī uggacchati. Evaṃ udakaṃ kampitaṃ (3.0251) pathavim kampeti. Etañca kampanaṃ yāvajjakālāpi hotiyeva, bahubhāvena pana ogacchanuggacchanaṃ na paññāyati.

Mahiddhikā mahānubhāvāti ijghanassa mahantatāya mahiddhikā, anubhavita-bbassa mahantatāya mahānubhāvā. **Parittā**ti dubbalā. **Appamāṇā**ti balavā. **So imaṃ pathavim kampeti**ti so iddhim nibbattetvā saṃvejento mahāmoggallāno viya, vīmaṃsanto vā mahānāgattherassa bhāgineyyo saṅgharakkhitasāmaṇero viya pathavim kampeti. **Sañkampeti**ti samantato kampeti. **Sampakampeti**ti tasseva vevacanaṃ. Iti imesu aṭṭhasu pathavikampesu paṭhamo dhātukopena, dutiyo iddhānubhāvena, tatiyacatutthā puññatejena, pañcama ñāṇatejena, chaṭṭho sādhu-kāradānavasena, sattamo kāruññasabhāvena, aṭṭhamo ārodanena. Mātukucchim okkamante ca tato nikkhamante ca mahāsatte tassa puññatejena pathavī akampittha, abhisambodhiyaṃ ñāṇatejābhihatā hutvā akampittha, dhammacakkappa-vattane sādhu-kārabhāvasaṅgīhitā sādhu-kāraṃ dadamānā akampittha, āyusañkhāra-ossajjane kāruññasabhāvasaṅgīhitā cittasañkhobhaṃ asahamānā akampittha, parinibbāne ārodanavegatunnā hutvā akampittha. Ayaṃ panattho pathavidevatāya vasena veditabbo. Mahābhūtapathaviyā panetaṃ natthi acetanattā. Sesaṃ sabbattha uttānatthamevāti.

Bhūmicālavaggo sattamo.

(8) 3. yamakavaggo

1-2. Saddhāsuttadvayaṇṇanā

71-72. Aṭṭhamassa paṭhame **no ca sīlavā**ti na sīlesu paripūrakārī. **Samantapāsādikoti** samantato pasādajanako. **Sabbākāraparipūro**ti sabbehi samaṇākārehi samaṇadhammakotṭhāsehi paripūro. Dutiye **santā**ti paccanīkasantatāya santā. **Vimokkhā**ti paccanīkadhammehi vimuttattā ca vimokkhā.

3-9. Maraṇassatisuttadvayādivaṇṇanā

73-79. Tatiye (3.0252) **bhāvetha** noti bhāvetha nu. **Sāsananti** anusitṭhi. **Āsāvānaṃ khayāyāti** arahattaphalathāya. Catutthe **patihitāyāti** paṭipannāya. **So mamassa antarāyoti** so mama jīvitantarāyopi, puthujjanakālakiriyaṃ karontassa saggantarāyopi maggantarāyopi assa. **Satthakā vā me vātāti** satthaṃ viya aṅga-maṅgāni kantantīti satthakā. Pañcamādīni vuttanayāneva. Navame **samsaggārāmatāti** pañcavidhe samsagge ārāmatā.

10. Kusītārambhavatthusuttavaṇṇanā

80. Dasame **kusītavatthūnīti** kusītassa alasassa vatthūni patiṭṭhā, kosajjakāraṇānīti attho. **Kammaṃ kattabbaṃ hotīti** cīvaravicāraṇādikammaṃ kattabbaṃ hoti. **Na vīriyaṃ ārabhatīti** duvidhampi vīriyaṃ nārabhati. **Appattassāti** jhānavipassanāmaggapaladhammassa appattassa pattiya. **Anadhigatassāti** tasseva anadhigatassa adhigamatthāya. **Asacchikatassāti** tadeva asacchikatassa sacchikaraṇatthāya. **Idaṃ paṭhamanti** idaṃ “handāhaṃ nipajjāmi”ti evaṃ osīdanaṃ paṭhamaṃ kusītavatthu. Iminā nayena sabbattha attho veditabbo. **Māsācitakaṃ maññeti** ettha pana māsācitaṃ nāma tintamāso. Yathā tintamāso garuko hoti, evaṃ garukoti adhippāyo. **Gilānā vuṭṭhito hotīti** gilāno hutvā pacchā vuṭṭhito hoti. **Ārambhavatthūnīti** vīriyakāraṇāni. Tesampi imināva nayena attho veditabbo. Sesam sabbattha uttānamevāti.

Yamakavaggo aṭṭhamo.

(9) 4. sativaggo

1-2. Satisampajaññasuttavaṇṇanā

81-82. Navamassa paṭhamaṃ heṭṭhā vuttanayameva. Dutiye **saddhoti** duvidhāya saddhāya samannāgato. **No cupasaṅkamtāti** na upaṭṭhahati. **No** (3.0253) **ca paripucchitāti** atthānatthaṃ kāraṇākāraṇaṃ paripucchitā na hoti. **Samannāgatoti** sāmī-atthe paccattaṃ, samannāgatassāti vuttaṃ hoti. **Ekantapaṭibhānā tathāgataṃ dhammadesanā hotīti** tathāgatassa ekantapaṭibhānā dhammadesanā hoti, ekante-neva paṭibhāti upaṭṭhātīti attho.

3. Mūlakasuttavaṇṇanā

83. Tatiye **sabbe dhammāti** pañcakkhandhā. **Chandamūlakāti** ajjhāsaya-cchando kattukamyatācchando taṃ mūlaṃ etesanti chandamūlakā. Manasikārato

sambhavantīti **manasikārasambhavā**. Phassato samudenti rāsī bhavantīti **phassa-samudayā**. Vedanāya samosarantīti **vedanāsamosaṇā**. Samādhi etesaṃ pamukhoti **samādhippamukhā**. Jeṭṭhakatṭhena sati adhipati etesanti **satādhipateyyā**, satijeṭṭhakāti attho. Paññā uttarā etesanti **paññuttarā**. Vimutti eva sāro etesanti **vimuttisārā**. Ettha ca chandamūlakādayo cattāropi lokiyā kathitā, sesā lokiyalokuttaramissakāti.

4. Corasuttavaṇṇanā

84. Catutthe **mahācoroti** rajjantare dubbhituṃ samattho mahācoro. **Pariyāpajjati** pariyādānaṃ gacchati. **Na ciraṭṭhitiko hotīti** addhānaṃ pāleno ṭhātuṃ na sakkoti. **Appaharantassa paharatīti** attano averine appaharante guṇasampanne ca mahallake ca taruṇadārake ca appaharitabbayuttake paharati. **Anavasesaṃ ādiyati** nissesamaṃ gaṇhāti. Byattacorānañhi idaṃ vattaṃ- parassa dvīsu sātakesu eko gahetabbo, ekasmiṃ sante dubbalaṃ datvā thiro gahetabbo. Puṭabhattataṇḍulādīsu ekaṃ koṭṭhāsaṃ datvā eko gahetabboti. **Accāsanne kammaṃ karotīti** gāmanigamarājadhānīnaṃ āsannaṭṭhāne corikakammaṃ karoti. **Na ca nidhānakusalo hotīti** yaṃ laddhaṃ, taṃ dakkhiṇeyye nidahituṃ cheko na hoti, paralokamaggaṃ na sodheti.

5. Samaṇasuttavaṇṇanā

85. Pañcame (3.0254) **yaṃ samaṇenāti** yaṃ guṇajātaṃ samaṇena pattabbaṃ. **Vusīmatāti** brahmacariyavāsaṃvutena. **Mutto mocemi bandhanāti** ahaṃ sabbabandhanehi mutto hutvā mahājanampi rāgādibandhanato mocemi. **Paramadantoti** aññena kenaci asikkhāpito acodito sayambhuññaṇena paṭivijjhivā paramadama-thena dantattā paramadanto nāma. **Parinibbutoti** kilesaparinibbānena parinibbuto.

6. Yasasuttavaṇṇanā

86. Chaṭṭhe **mā ca mayā yasoti** yaso ca mayā saddhiṃ mā gañchi. **Akasiralābhīti** vipulalābhī. **Silapaññānti** sīlañceva ñāṇaṇca. **Saṅgammāti** sannipatitvā. **Samāgammāti** samāgantvā. **Saṅgaṇikavihāranti** gaṇasaṅgaṇikavihāraṃ. **Na hi nūnameti** na hi nūna ime. **Tathā hi panameti** tathā hi pana ime. **Aṅgulipatodayakehīti** aṅgulipatodayaṭṭhiṃ katvā vijjhanena. **Sañjagghanteti** mahāhasitaṃ hasante. **Saṃkīlanteti** keḷiṃ karonte.

7. Pattanikujjanasuttavaṇṇanā

87. Sattame **nikkujjeyyāti** tena dinnassa

deyyadhammassa appaṭiggahaṇattham pattanikkujjanakammavācāya nikuḷjeyya, na adhomukhaṭhapanena. **Alābhāyā**ti catunnam paccayānam alābhatthāya. **Anatthāyā**ti upaddavāya avaḍḍhiyā. **Ukkujjeyyā**ti ukkujjanakammavācāya ukkujjeyya.

8. Appasādapavedaniyasuttavaṇṇanā

88. Aṭṭhame **appasādam pavedeyyunti** appasannabhāvaṃ jānāpeyyuṃ. Appasādam pavedentena pana kiṃ kātābanti? Nisinnāsanato na utthātabbam na vanditabbam na paccuggamanam kātābham, na deyyadhammo dātābbo. **Agocareti** pañcavidhe agocare.

9. Paṭisāraṇīyasuttavaṇṇanā

89. Navame (3.0255) **dhammikañca ghipaṭissavanti** “imaṃ temāsaṃ idheva vasitabban”ti vutto “evaṃ hotū”ti-ādinā nayena paṭissavaṃ. **Na saccāpetīti** vuttam na saccam karoti visamvādeti.

10. Sammāvattanasuttavaṇṇanā

90. Dasame **paccekāṭṭhāneti** adhipatiṭṭhāne jeṭṭhakaṭṭhāne. Tañhi jeṭṭhakaṃ katvā kiñci saṅghakammaṃ kātuṃ na labhati. **Na ca tena mūlena vuṭṭhāpetabboti** taṃ mūlam katvā abbhānakammaṃ kātuṃ na labhati. Sesam sabbattha uttānamevāti.

Sativaggo navamo.

(10) 5. sāmāññavaggo

91. Ito param **atha kho bojjhā upāsikā**ti-ādīsu bojjhā upāsikā, sirimā upāsikā, padumā upāsikā, sutanā upāsikā, manujā upāsikā, uttarā upāsikā, muttā upāsikā, khemā upāsikā, rucī upāsikā, cundī rājakumārī, bimbī upāsikā, sumanā rājakumārī, mallikā devī, tissā upāsikā, tissāmātā upāsikā, soṇā upāsikā, soṇāya mātā upāsikā, kāṇā upāsikā, kāṇamātā upāsikā, uttarā nandamātā, visākhā migāramātā, khujjuttarā upāsikā, sāmāvatī upāsikā, suppvāsā koliyadhītā, suppiyā upāsikā, nakulamātā gahapatānīti imāsaṃ ettakānam aṭṭhaṅgasamannāgataṃ uposathakammameva kathitam. Icchantena vitthāretvā kathetabbam. Sesam sabbattha uttānatthamevāti.

Manorathapūraṇiyā aṅguttaranikāya-aṭṭhakathāya

Aṭṭhakanipātassa saṃvaṇṇanā niṭṭhitā.

Namo tassa bhagavato arahato sammāsambuddhassa

Aṅguttaranikāye

Navakanipāta-aṭṭhakathā

1. Paṭhamapaṇṇāsakaṃ

1. Sambodhivaggo

1. Sambodhisuttavaṇṇanā

1. Navakanipātassa (3.0257) paṭhame **sambodhipakkhikānanti** catumaggasa-
ṅkhātassa sambodhissa pakkhe bhavānaṃ, upakāraṅkanti attho. Pāḷiyaṃ āgate
nava dhamme sandhāyevaṃ pucchati. **Kā upanisāti** ko upanissayapaccayo. Abhi-
sallekhantīti **abhisallekhikā**. Samathavipassanācittassa vivaraṇe sappāyā upakā-
rakāti **cetovivaraṇasappāyā**. Appicchataṃ ārabha pavattā kathā **appicchakathā**.
Sesesupī eseva nayo.

Asubhā bhāvetabbā rāgassa pahānāyāti ayamatto sālilāyakopamāya vibhāve-
tabbo- eko hi puriso asitaṃ gahetvā koṭito paṭṭhāya sālīkkhette sālīyo lāyati.
Athassa vatiṃ bhinditvā gāvo pavisiṃsu. So asitaṃ ṭhapetvā yaṭṭhiṃ ādāya
teneva maggena gāvo nīharitvā vatiṃ pākatikaṃ katvā punapi asitaṃ ādāya
sālīyo lāyi. Ettha sālīkkhettaṃ viya buddhasāsaṇaṃ daṭṭhabbaṃ, sālīlāyako viya
yogāvācaro, asitaṃ viya paññā, lāyanakālo viya vipassanāya kammakaraṇakālo,
yaṭṭhi viya asubhakammaṭṭhānaṃ, vati viya saṃvaro, vatiṃ bhinditvā gāvīnaṃ
pavisaṇaṃ viya sahasā appaṭisaṅkhāya pamādaṃ ārabha rāgassa uppajjanaṃ,
asitaṃ ṭhapetvā yaṭṭhiṃ ādāya pavitṭhamaggeneva gāvo nīharitvā vatiṃ paṭipāka-
tikaṃ katvā puna koṭito paṭṭhāya sālīlāyanaṃ viya asubhakammaṭṭhānena rāgaṃ
vikkhambhetvā puna vipassanāya kammaṃ ārabhanakālo. Imamatthaṃ
sandhāya vuttaṃ- “asubhā bhāvetabbā rāgassa pahānāyā”ti.

Tattha (3.0258) **rāgassāti** pañcakāmaguṇikarāgassa. **Mettāti** mettākamma-
ṭṭhānaṃ. **Byāpādassa pahānāyāti** vuttanayeneva uppannassa kopassa pajhana-
tthāya. **Ānāpānassatīti** soḷasavatthukā ānāpānassati. **Vitakkupacchedāyāti** vutta-
nayeneva uppannānaṃ vitakkānaṃ upacchedanattāya. **Asmimānasamuggātā-**

yāti asmīti uppajjanakassa mānassa samugghātathāya. **Anattasaññā saṅghātīti** aniccalakkhaṇe diṭṭhe anattalakkhaṇaṃ diṭṭhameva hoti. Etesu hi tisu lakkhaṇesu ekasmiṃ diṭṭhe itaradvayaṃ diṭṭhameva hoti. Tena vuttaṃ- “aniccasaññino, bhikkhave, anattasaññā saṅghātī”ti. **Diṭṭheva dhamme nibbānanti** diṭṭheyeva dhamme apaccayaparinibbānañca pāpuṇātīti imasmiṃ sutte vaṭṭavivaṭṭaṃ kathitaṃ.

2. Nissayasuttavaṇṇanā

2. Dutiye **nissayasampannoti** patiṭṭhāsampanno. **Saddhanti** okappanasaddhaṃ. **Vīriyanti** kāyikacetasikavīriyaṃ. **Yamsāti** yaṃ assa. **Ariyāya paññāyāti** sahavipassanāya maggapaññāya. **Saṅkhāyāti** jānitvā. **Ekam paṭisevatīti** sevitaḥḥayuttakaṃ sevati. **Adhivāsetīti** adhivāsetabbayuttakaṃ adhivāseti. **Parivajjetīti** parivajjetabbayuttakaṃ parivajjeti. **Vinodetīti** nīharitabbayuttakaṃ nīharati. **Evam kho bhikkhūti** evaṃ kho bhikkhu uggahaparipucchāvasena ceva dhammavavatthānavasena ca paṭisevitabbādīni suppaṭividdhāni supaccakkhāni katvā paṭisevanto adhivāsento parivajjento vinodento ca bhikkhu nissayasampanno nāma hotīti.

3. Meghiyasuttavaṇṇanā

3. Tatiye **cālikāyanti** evaṃnāmake nagare. Taṃ kira calamaggaṃ nissāya katattā oloketānaṃ calamānaṃ viya upaṭṭhāti, tasmā cālikāti saṅkhaṃ gataṃ. **Cāliyapabbateti** sopi pabbato sabbasetattā kāḷapakkhuposathe oloketānaṃ calamāno viya upaṭṭhāti, tasmā cāliyapabbatoti vutto. Tattha mahantaṃ vihāraṃ kārayiṃsu. Iti bhagavā taṃ nagaraṃ nissāya cālikāpabbatamahāvihāre viharati. **Jantugāmanti** evaṃnāmakam aparampi tasseva vihārassa gocaragāmaṃ. Jattugāmantipi (3.0259) paṭhanti. **Padhānatthikassāti** padhānakammikassa. **Padhānāyāti** samaṇadhammakaraṇatthāya. **Āgamehi tāvāti** satthā therassa vacanaṃ sutvā upadhārento “na tāvassa ñāṇaṃ paripakkaṃ”ti ñatvā paṭibāhanto evamāha. **Eka-kamhi tāvāti** idaṃ panassa “evamayaṃ gantvāpi kamme anipphajjamāne nirāsaṅko hutvā pemavasena puna āgacchissati”ti cittamaddavajananatthaṃ āha. **Natthi kiñci uttari karaṇīyanti** catūsu saccesu catunnaṃ kiccānaṃ katattā aññaṃ uttari karaṇīyaṃ nāma natthi. **Katassa vā paṭicayoti** adhigatassa vā puna paṭicayopi natthi. Na hi bhāvitamaggo puna bhāvīyati, na pahīnakilesānaṃ puna pahānaṃ atthi. **Padhānanti kho, meghiya, vadamānaṃ kinti vadeyyāmāti** “samaṇadhammaṃ karomī”ti taṃ vadamānaṃ mayaṃ aññaṃ kiṃ nāma vadeyyāma.

Divāvihāraṃ nisīdīti divāvihāratthāya nisīdi. Nisīdanto ca yasmiṃ maṅgalasilāpaṭṭe pubbe anupaṭipāṭiyā pañca jātisatāni rājā hutvā uyyānakīḷikaṃ kīḷanto tividhanāṭakaparivāro nisīdi, tasmimyeva nisīdi. Athassa nisinnakālato paṭṭhāya samaṇabhāvo jahito viya ahosi, rājavesaṃ gahetvā nāṭakavaraparivuto setacchattassa heṭṭhā mahārahe pallaṅke nisinno viya jāto. Athassa taṃ sampattiṃ assādayato kāmavitakko udapādi. So tasmimyeva khaṇe mahāyodhehi gahite dve core

ānetvā purato ṭhapite viya addasa. Tesu ekassa vadhaṃ āṇāpanavasena byāpādavitaṃ uppajji, ekassa bandhanaṃ āṇāpanavaseṇa vihiṃsāvitaṃ. Evaṃ so latājālena rukkhō viya madhumakkhikāhi madhughātaṃ viya akusalavitaṃ parikkhitaṃ ahoṣi. Taṃ sandhāya- **atha kho āyasmato meghiyaṃ** ādi vuttaṃ. **Anvāsattā**ti anubaddhā samparivāritā. **Yena bhagavā tenupasaṅkamī**ti evaṃ pāpavitaṃ samparikaṇṇo kammaṭṭhānaṃ sappāyaṃ kātuṃ asakkonto “idaṃ vata disvā dīghadassī bhagavā paṭisedhesī”ti sallakkhetvā “idaṃ kāraṇaṃ dasabalassa ārocessāmī”ti nisinnāsanato vuṭṭhāya yena bhagavā tenupasaṅkami.

4. Nandakasuttavaṇṇanā

4. Catutthe (3.0260) **upaṭṭhānasālāyanti** bhojanasālāyaṃ. **Yenupaṭṭhānasālā**ti satthā nandakattherena madhurassareṇa āradhāya dhammadeśanāya saddaṃ sutvā, “ānanda, ko eso upaṭṭhānasālāya madhurassareṇa dhammaṃ deseti”ti pucchitvā “dhammakathikanandakattherassa aṃja, bhante, vāro”ti sutvā “atimadhuraṃ katvā, ānanda, eso bhikkhu dhammaṃ katheti, mayampi gantvā suṇissāma”ti vatvā yenupaṭṭhānasālā tenupasaṅkami. **Bahidvāra**koṭṭhake **aṭṭhāsī**ti chabbaṇṇarasmiyo cīvaragabbhe paṭicchādetvā aññātakavesena aṭṭhāsī. **Kathāpariyosānaṃ āgamaya**mānoti “idamavocā”ti idaṃ kathāvasānaṃ udikkhamāno dhammakathaṃ suṇanto aṭṭhāsīeva. Athāyasmā ānando nikkhante paṭhame yāme satthu saññaṃ adāsi- “paṭhamayāmo atikkanto, bhante, thokaṃ vissamathā”ti. Satthā tattheva aṭṭhāsī. Athāyasmā ānando majjhimayāme pi nikkhante, “bhante, tumhe pakatiyā khattiyasukhumālā, puna buddhasukhumālāti paramasukhumālā, majjhimayāme pi atikkanto, muhuttaṃ vissamathā”ti āha. Satthā tattheva aṭṭhāsī. Tattha ṭhitakassevassa aruṇaggaṃ paññāyittha. Aruṇuggamañca therassa “idamavocā”ti pāpetvā kathāpariyosānañca dasabalassa chabbaṇṇasarīrasmiṃvissajjanañca ekappahāreneva ahoṣi. **Aggaḷaṃ ākoṭesi**ti agganakhena dvāra kavāṭaṃ ākoṭesi.

Sārajjamānarūpoti harāyamāno ottappamāno. Domanassasārajjamānaṃ panassa natthi. **Ettakampi no nappaṭibhāseyyā**ti paṭisambhidāppattaṃ appaṭibhānaṃ nāma natthi. Ettakampi na katheyyanti dasseti. **Sādhu sādhu**ti therassa dhammadeśanaṃ sampahaṃsanto āha. Ayañhettha attho “sugahitā ca te dhammadeśanā sukathitā cā”ti. **Kulaputtānanti** ācāra kulaputtānañceva jātikulaputtānañca. **Ariyo ca tuṇhibhāvoti** dutiyajjhānasamāpattiṃ sandhāyeva māha. **Adhipaññā**dhammavipassanāyāti saṅkhārapariggahavipassanāññāssa. **Catuppādako**ti assaṅgaṇaḍḍha bhādiko. **Idaṃ vatvā**ti imaṃ catūhaṅgehi samannāgataṃ dhammaṃ kathayitvā. **Vihāraṃ pāvisī**ti gandhakuṭiṃ pavitṭho.

Kālena dhammassavaneti kāle kāle dhammassavanasmim. **Dhammasākacchāyā**ti pañhakathāya. **Gambhīraṃ atthapadanti** gambhīraṃ guḷhaṃ rahassaṃ atthaṃ. **Paññāyā**ti (3.0261) saḥavipassanāya maggapaññāya. Sammasanapaṭivedhapaññāpi uggahaparipucchāpaññāpi vaṭṭatiyeva. **Patto vā pajjati vā**ti arahattaṃ patto

vā pāpuṇissati vāti evaṃ guṇasambhāvanāya sambhāveti. **Appattamānasā**ti appa-
tta-arahattā, arahattaṃ vā appattaṃ mānasaṃ etesantipi appattamānasā. **Diṭṭha-**
dharmasukhavihāranti ettha diṭṭhadhammasukhavihāro lokiyopi vaṭṭati lokutta-
ropi.

5. Balasuttavaṇṇanā

5. Pañcame avijjākosajjasāvajja-assaddhiyesu akampanato **paññābalā**dīni daṭṭhabbāni. **Akusalasaṅkhātā**ti akusalāti ñātā. Esa nayo sabbattha. **Nālamariyā**ti ariyabhāvaṃ kātuṃ asamatthā, ariyānaṃ vā ananucchavikā. **Vodiṭṭhā**ti suṭṭhu diṭṭhā. **Vocaritā**ti manodvāre samudācārappattā. **Atthikassā**ti dhammadesanāya atthikassa. **Ājivikābhayanti** jīvitavuttibhayaṃ. **Asilokabhayanti** garahābhayaṃ. **Pari-sāsārajjabhayanti** parisam patvā sārjjaṃ okkamanabhayaṃ. Imasmiṃ sutte vaṭṭavivaṭṭaṃ kathitaṃ.

6. Sevanāsuttavaṇṇanā

6. Chaṭṭhe **jīvitaparikkhārā**ti jīvitasambhārā. **Samudānetabbā**ti samāharitabbā. **Kasirena samudāgacchantī**ti dukkhena uppajjanti. **Rattibhāgaṃ vā divasabhāgaṃ vā**ti ettha rattibhāge ñatvā rattibhāgeyeva pakkamitabbam, rattim caṇḍavāḷādiparipante sati aruṇuggamaṃ āgametabbam. Divasabhāge ñatvā divā pakkamitabbam, divā paripante sati sūriyatthaṅgamaṃ āgametabbam. **Saṅkhāpī**ti sāmāññatthassa bhāvanāpāripūri-āgamaṃ jānitvā. **So puggaloti** padassa pana “nānubandhitabbo”ti iminā sambandho. **Anāpucchā**ti idha pana taṃ puggalaṃ anāpucchā pakkamitabbanti attho. **Api panujjamānenā**ti api nikkadḍhiyamānena. Evarūpo hi puggalo sacepi dārukalāpasataṃ vā udakaghaṭasataṃ vā vālikāghaṭasataṃ vā daṇḍaṃ āropeti, mā idha vasīti nikkadḍhāpeti vā, taṃ khamāpetvāpi yāvajīvaṃ so anubandhitabbova, na vijahitabbo.

7. Sutavāsuttavaṇṇanā

7. Sattame (3.0262) **pañca ṭhānāni ajjhācaritunti** pañca kāraṇāni atikkamituṃ. **Pāṇanti** antamaso kunthakipillikaṃ. **Adinnanti** antamaso tiṇasalākampi parasa-ntakaṃ. **Theyyasaṅkhātanti** theyyacittena. **Sannidhikāraṃ kāme paribhuñjī-**tunti sannidhiṃ katvā ṭhapetvā vatthukāmakilesakāme paribhuñjituṃ abhabbo. Akappiyaṃ kāmaguṇaṃ sandhāyetaṃ vuttaṃ. **Buddhaṃ paccakkhātunti** “na buddho ayan”ti evaṃ paṭikkhipituṃ. **Dhammā**dīsupi eseva nayo. Evaṃ tāva aṭṭha-kathāya āgataṃ. Pāḷiyaṃ pana imasmiṃ sutte agatigamaṇāni kathitāni.

8-10. Sajjhasuttādivaṇṇanā

8-10. Aṭṭhame buddhādīnaṃ paccakkhānaṃ kathitaṃ. Navame puthujjanena saddhiṃ gahitattā “āhuneyyā”ti vuttaṃ. Dasame **gotrabhū**ti sotāpattimaggassa anantarapaccayena sikhāpattabalavavipassanācittena samannāgato. Sesam sabbattha uttānatthamevāti.

Sambodhavaggo paṭhamo.

2. Sīhanādavaggo

1. Sīhanādasuttavaṇṇanā

11. Dutiyassa paṭhame **yena bhagavā tenupasaṅkamīti** “sace satthā cārikaṃ pakkamitukāmo assa, imasmim̄ kāle pakkameyya. Handāhaṃ cārikaṃ gamana-tthāya satthāraṃ āpucchāmi”ti cintetvā bhikkhusaṅghaparivuto upasaṅkami. **Āyasmā maṃ, bhanteti** so kira bhikkhu therāṃ mahatā bhikkhuparivārena gacchantaṃ disvā “ime bhikkhū tathāgataṃ pahāya sārputtaṃ parivāretvā nikkhantā, gamanavicchedamassa karissāmi”ti aṭṭhāne kopaṃ bandhitvā evamāha. Tattha **āsajjāti** ghaṭṭetvā. **Appaṭinissajjāti** akkhamāpetvā accayaṃ adesetvā. Kismim̄ pana so kāraṇe āghātaṃ bandhīti? Therassa kira dasabalaṃ vanditvā uṭṭhāya gacchato cīvarakaṇṇo tassa sarīraṃ phusi, vāto paharītipi vadanti. Etta-kena āghātaṃ bandhitvā therāṃ mahatā parivārena gacchantaṃ disvā usūya-māno “gamanavicchedamassa karissāmi”ti evamāha. **Ehi tvam bhikkhūti** satthā (3.0 tassa bhikkhuno vacanaṃ sutvā “na taṃ bhikkhu sārputto paharīti vutte, ‘bhante, tumhe attano aggasāvakas-seva pakkhaṃ vahatha, na mayhan’ti mayi manopa-dosaṃ katvā apāye nibbatteyyā”ti ñatvā “sārputtaṃ pakkosāpetvā imamatthaṃ pucchissāmi”ti ekaṃ bhikkhuṃ āmantetvā evamāha. **Avāpuraṇaṃ ādāyāti** kuñcikaṃ gahetvā. **Sīhanādanti** seṭṭhanādaṃ pamukhanādaṃ appaṭivattiyanādaṃ. Evaṃ dvīhi mahātherehi ārocito bhikkhusaṅgho rattiṭṭhānadivāṭṭhānāni pahāya satthu santikaṃ agamāsi. **Khiyanadhammanti** kathādhammaṃ.

Gūthagatanti gūthameva. Sesesupi eseva nayo. **Pathavisamenāti** akujjhana-tṭhena pathaviyā samānena. Na hi pathavi “mayi suciṃ nikkhipanti”ti somanassaṃ karoti, na “asuciṃ nikkhipanti”ti domanassaṃ. Mayhampi evarūpaṃ cittanti dasseti. **Vipulenāti** aparittena. **Mahaggatenāti** mahantabhāvaṃ gatena. **Appamāṇe-nāti** vaḍḍhitappamāṇena. **Averenāti** akusalaverapuggalaverarahitena. **Abyāpajjhe-nāti** niddukkheṇa vigatadomanassena. **So idhāti** so anupaṭṭhitakāyānupassanāsa-tipaṭṭhāno bhikkhu evaṃ kareyya, mādiso kathaṃ evarūpaṃ karissati, bhanteti paṭhamaṃ sīhanādaṃ nadi. Evaṃ sabbattha yojanā veditabbā.

Rajoharaṇanti rajasammajjanacoḷakaṃ, pādapuñchanti, tasseva nāmaṃ. **Kaḷopi-hatthoti** pacchihattho ukkhalihattho vā. **Nantakavāsīti** antacchinnapilotikavasano. **Sūratoti** sucisīlo soraccena samannāgato. **Sudantoti** suṭṭhu damathaṃ upagato. **Suvinītoti** suṭṭhu sikkhito. **Na kañci hiṃsatīti** visāṇādīsu gaṇhantampi piṭṭhiṃ pari-majjantampi na kañci viheṭṭheti. **Usabhachinnavisāṇasamenāti** usabhassa chinna-visāṇassa cittasadisena.

Aṭṭiyeyyāti aṭṭo piḷito bhaveyya. **Harāyeyyāti** lajjeyya. **Jiguccheyyāti** jigucchamaṃ āpajjeyya.

Medakathālikanti medakathālikā vuccati sūnakārahehi yūsanikkhamanattāya tatha tatha katachiddā thālikā. **Parihareyyāti** maṃsassa pūretvā (3.0264) ukkhipitvā gaccheyya. **Chiddāvachiddanti** parittamahantehi chiddehi samannāgataṃ. **Uggharantanti** uparimukhehi chiddehi nikkhamamānayūsaṃ. **Paggharantanti** adhomukhehi nikkhamamānayūsaṃ. Evamassa sakalasarāṃ yūsamakkhitaṃ bhavēyya. **Chiddāvachiddanti** navahi vaṇamukhehi parittamahanta chiddaṃ. Evamettha aṭṭhamanavamehi dvīhi aṅgehi thero attano sarīre nicchandarāgataṃ kathesi.

Atha kho so bhikkhūti evaṃ therena navahi kāraṇehi sīhanāde nadite atha so bhikkhu. **Accayoti** aparādhō. **Maṃ accagamāti** maṃ atikkamma abhibhavitvā pavatto. **Paṭiggaṇhatūti** khamatu. **Āyatim saṃvarāyāti** anāgate saṃvaraṇattāya, puna evarūpassa aparādhassa akaraṇattāya. **Tagghāti** ekaṃsena. **Yathā-dhammaṃ paṭikarosīti** yathā dhammo ṭhito, tatheva karosi, khamāpesīti vuttaṃ hoti. **Taṃ te mayaṃ paṭiggaṇhāmāti** taṃ tava aparādhaṃ mayaṃ khamāma. **Vuddhihesā bhikkhu ariyassa vinayeti** esā bhikkhu ariyassa vinaye buddhassa bhagavato sāsane vuḍḍhi nāma. Katamā? Accayaṃ accayato disvā yathā-dhammaṃ paṭikarivā āyatim saṃvarāpajjanā. Desanaṃ pana puggalādhiṭṭhānaṃ karonto **yo accayaṃ accayato disvā yathā-dhammaṃ paṭikaroti, āyatim saṃvaraṃ āpajjatīti** āha. **Phalatīti** sace hi thero na khameyya, tassa bhikkhuno tattheva sattadhā muddhā phaleyya. Tasmā bhagavā evamāha. **Sace maṃ soTi** sace maṃ ayaṃ bhikkhu khamāhīti evaṃ vadati. **Khamatu ca me soti** ayampi cāyasmā mayhaṃ khamatūti evaṃ thero tassa accayaṃ paṭiggaṇhitvā sayampi taṃ satthu sammukhe khamāpesīti.

2. Sa-upādisesasuttavaṇṇanā

12. Dutiye **sa-upādisesanti** sa-upādānasesaṃ. **Anupādisesanti** upādānasesara-hitāṃ niggahaṇaṃ. **Mattaso kārīti** pamāṇakārī na paripūrakārī. **Na tāvāyaṃ, sārīputta, dhammapariyāyo paṭibhāsīti** appaṭibhānaṃ nāma bhagavato natthi, na tāvāhaṃ imaṃ dhammapariyāyaṃ kathesinti ayaṃ panettha attho. **Māyimaṃ dhammapariyāyaṃ sutvā pamādaṃ āharimsūti** “mayaṃ kira catūhi apāyehi muttā”-ti upari arahattattāya vīriyaṃ akarontā mā pamādaṃ āpajjimsu. **Pañhādhippāyena bhāsītoti** tayā pucchitapañhassa sabhāvena (3.0265) kathitoti dasseti. Imesaṃ pana navannaṃ puggalānaṃ bhavesu chandarāgavinodanattaṃ etameva atthupattiṃ katvā- “seyyathāpi, bhikkhave, appamattakopi gūtho duggandho hoti, evameva kho khvāhaṃ, bhikkhave, appamattakampi bhavaṃ na vaṇṇemi antamaso accharāsaṅghātamattampī”ti imaṃ suttaṃ (a. ni. 1.321) abhāsi. Na kevalaṅca etesaṃyeva navannaṃ puggalānaṃ gati nibaddhā, yesaṃ pana kulānaṃ tīṇi saraṇāni pañca sīlāni ekaṃ salākabhattaṃ ekaṃ pakkhiyabhattaṃ ekaṃ vassāvāsikaṃ ekā pokkharaṇī eko āvāso, evarūpāni nibaddhapuñṇāni atthi. Tesampi gati nibaddhā, sotāpannasadisāneva tāni kulāni.

3. Koṭṭhikasuttavaṇṇanā

13. Tatiye **diṭṭhadhammavedaniyanti** imasmiṃ yevattabhāve vipaccanaka-kammaṃ. **Samparāyavedaniyanti** dutiye attabhāve vipaccanakakammaṃ. **Sukhavedanīyanti** sukhavedanājanakakammaṃ. **Dukkhavedaniyanti** dukkhavedanājanakakammaṃ. **Paripakkavedaniyanti** laddhavipākavāraṃ. **Aparipakkavedaniyanti** aladdhavipākavāraṃ. **Bahurvedaniyanti** bahuvipākadāyakaṃ. **Appavedaniyanti** na bahuvipākadāyakaṃ. **Avedaniyanti** vipākavedanāya adāyakaṃ. Imasmiṃ sutte vaṭṭavivaṭṭaṃ kathitaṃ.

4. Samiddhisuttavaṇṇanā

14. Catutthe **samiddhī**ti attabhāvasamiddhatāya evaṃladdhanāmo therassa saddhivihārikatthero. **Kimārammaṇāti** kiṃpaccayā. **Saṅkappavitakkāti** saṅkappa-bhūtā vitakkā. **Nāmarūpārammaṇāti** nāmarūpapaccayā. Iminā cattāro arūpakkhandhā bhūtupādāyarūpañca vitakkānaṃ paccayoti dasseti. **Kva nānattaṃ gacchantīti** kasmīṃ ṭhāne nānāsabhāvataṃ vemattaṃ gacchanti. **Dhātusūti** rūpadhātu-ādīsu. Aññoyeva hi rūpavitakko, aññe saddavitakkādayoti. **Phassasamudayāti** sampayuttaphassapaccayā. **Vedanāsamosaṇāti** tisso vedanā samosaṇā. Ettakena kusalākusalamissakā kathitā. **Samādhippamukhāti**-ādayo pana apacaya-pakkhikāti veditabbā. Tattha pubbaṅgamaṭṭhena jeṭṭhakatṭhena vā samādhi-pamukhaṃ etesanti **samādhippamukhā**. Jeṭṭhakakāraṇatṭhena sati adhipateyyā etesanti **satādhipateyyā**. Maggapaññā uttarā etesanti **paññuttarā**. Phalavimuttiṃ patvā sārappattā hontīti **vimuttisārā**. Ārammaṇavasena amataṃ nibbānaṃ ogāhitvā (3.0266) tattha patiṭṭhitāti **amatogadhā**. **Tena ca mā maññīti** tena vissajjana “ahaṃ aggasāvakena pucchite pañhe vissajjesin”ti mā mānaṃ vā dappaṃ vā akāsi.

5-6. Gaṇḍasuttādivaṇṇanā

15-16. Pañcame tīṇi cattāri vassāni vassagaṇā, aneke vassagaṇā uppannā assāti **anekavassagaṇiko**. **Tassassūti** tassa bhavēyyuṃ. **Abhedanamukhānīti** na kenaci bhinditvā katāni, kevalaṃ kammamuṭṭhitāneva vaṇamukhāni. **Jegucchiyaṃyevāti** jigucchitabbameva paṭikūlameva. **Cātumahābhūtikassāti** catumahābhūtamayassa. **Odanakummāsūpacayassāti** odanena ceva kummāsena ca upacitassa vaḍḍhitassa.

Aniccucchādanaparimaddanabhedanaviddhaṃsanadhammassāti hutvā abhāva-
tṭhena aniccadhammassa, duggandhavighātattṭhāya tanuvilepanena ucchādana-
dhammassa, aṅgapaccaṅgābhāvinodanattṭhāya khuddakasambāhanena pari-
maddanadhammassa, daharakāle vā ūrūsu sayāpetvā gabbhavāsenā dussaṅṅhi-
tānaṃ tesāṃ tesāṃ aṅgapaccaṅgānaṃ saṅṅhānasampādanattṭhaṃ añchanapīḷa-
nādivasena parimaddanadhammassa, evaṃ pariharitassāpi ca bhedanaviddhaṃ-
sanadhammassa, bhijjanavikiraṇasabhāvassevāti attho. Ettha ca aniccapadena
ceva bhedanaviddhaṃsanapadehi cassa atthaṅgamo kathito, sesehi samudayo.
Nibbindathāti ukkaṅṅhatha pajahatha imaṃ kāyanti dasseti. Evamimasmiṃ sutte
balavavipassanā kathitā. Chaṅṅṅhaṃ vuttanayameva. Saṅṅāsīsena panettha ṅāṅa-
meva kathitaṃ.

7-8. Kulasuttādivaṅṅanā

17-18. Sattame **na manāpena paccuṅṅhentī**ti manavaḍḍhanena manaṃ allīyanā-
kārena āsanā vuṅṅṅhāya paccuggamaṃ na karonti. **Na manāpena abhivādentī**
na paṅcapatiṅṅhitena vandanti. **Asakkaccaṃ dentī**ti acittikārena denti. **No sakka-**
ccanti sahatthā na denti. **Na upanisīdanti dhammasavanāyāti** “dhammaṃ suṅṅissā-
mā”ti na samīpe nisīdanti. **Na sussūsantī**ti ghaṅṅapīṅṅthe āsitta-udakaṃ viya viva-
tṭetvā gacchati. Aṅṅṅhame veneyyajjhāsavāsena mettābhāvanaṃ pakkhipitvā **nava-**
ṅgasamannāgatoti vuttaṃ.

9. Devatāsuttavaṅṅanā

19. Navame (3.0267) **vippaṅṅisāriniyoti** vippaṅṅisāritaṃ maṅkubhāvaṃ āpajjimha.
Hīnaṃ kāyanti uparidevalokaṃ upādāya heṅṅṅhimo hīnoti vuccati. **No ca kho yathā-**
satti yathābalaṃ saṃvibhajimhāti attano sattiyaṃ ca balassa ca anurūpena sīlava-
ntānaṃ saṃvibhāgaṃ katvā na bhūṅṅjimhā.

10. Velāmasuttavaṅṅanā

20. Dasame **api nu te, gahapati, kule dānaṃ dīyatī**ti nayidaṃ bhagavā bhikkhu-
saṅṅghassa dānaṃ sandhāya pucchati. Seṅṅṅhissa hi ghare bhikkhusaṅṅghassa
niccaṃ paṅṅitadānaṃ dīyati, na taṃ satthā na jānāti. Lokiyamahājanassa pana
diyyamānadānaṃ atthi, taṃ lūkhaṃ hoti, seṅṅṅhissa cittaṃ na pīṅṅeti. Taṃ pucchā-
mīti pucchati. **Kaṅṅājakanti** sakuṅṅḍakabhattaṃ, sakuṅṅḍakehipi kaṅṅikataṅṅḍuleheva
pakkaṃ. **Bilaṅṅgadutiyaṃ**ti kaṅṅṅiyadutiyaṃ. **Asakkaccaṃ detī**ti asakkaritvā deti. **Ac-**
ittikatvāti acittikārena dakkhiṅṅeyya agāravana deti. **Asahatthā detī**ti sahatthena
adatvā parahatthena deti, āṅṅattimattameva karotīti attho. **Apaviddhaṃ detī**ti na
nirantaraṃ deti, saṃvaccharikaṃ soṅṅḍabali viya hoti. **Anāgamanadiṅṅṅhiko detī**ti na
kammaṅca phalaṅca saddahitvā deti.

Yattha yatthāti tīsu kulasampadāsu yasmīṃ yasmīṃ kule. **Na uḷārāya bhattabho-**

gāyāti-ādīsu nānaggarasasugandhasālibhojane upanīte cittam na namati, “harathetaṃ rogavaḍḍhanan”ti vatvā yena vā tena vā ḍākena saddhiṃ sakuṇḍakabhataṃ amataṃ viya sampiyāyamāno bhujjati. Kāsikādīsu varavatthesu upanītesu “harathetāni nivāsentassa paṭicchādetumpi na sakkonti, gattesupi na saṅṭhahanti”ti vatvā nāḷikerasāṭakamūlatacasadisāni pana thūlavatthāni “imāni nivāsentō nivatthabhāvampi jānāti, paṭicchādetabbampi paṭicchādentī”ti sampiyāyamāno nivāseti. Hatthiyāna-assayānarathayānasuvaṇṇasivikādīsu upanītesu “harathetāni calācalāni, na sakkā ettha nisīditun”ti vatvā jajjararathake upanīte “ayaṃ niccalo, ettha sukhaṃ nisīditun”ti taṃ sādīyati. **Na uḷāresu pañcasu kāmaguṇesūti alaṅkatapaṭiyattā rūpavatiyo itthiyo (3.0268) disvā “yakkhiniyo maññe, etā khāditukāmā, kiṃ etāhī”ti yathāphāsukeneva vītināmeti. **Na sussūsantīti** sotuṃ na icchanti, na saddahantīti attho. **Na sotaṃ odahantīti** kathitassa savanattaṃ na sotapasādaṃ odahanti. **Sakkaccanti-ādīni** vuttavipariyāyena vedittabbāni.**

Velāmoti jātigottarūpabhogasaddhāpaññādīhi mariyādavelaṃ atikkantehi uḷārehi guṇehi samannāgatattā evaṃladdhanāmo. **So evarūpaṃ dānaṃ adāsi mahādānanti** ettha ayaṃ anupubbīkathā- so kira atīte bārāṇasiyaṃ purohitagehe paṭisandhiṃ gaṇhi, velāmakumārotissa nāmaṃ akaṃsu. So soḷasavassakāle bārāṇasirājakumārena saddhiṃ sippuggahaṇattaṃ takkasiṃ agamāsi. Te ubhopi disāpāmoḁkhasa ācariyassa santike sippaṃ paṭṭhapayīṃsu. Yathā ca te, evaṃ aññepi jambudīpe caturāsītisahassarājakumārā. Bodhisatto attanā gahitaṭṭhāne piṭṭhi-ācariyo hutvā caturāsīti rājakumārasahassāni sikkhāpeti, sayampi soḷasavassasehi gahetabbasippaṃ tīhi vassehi uggaṇhi. Ācariyo “velāmakumārassa sippaṃ paguṇan”ti ñatvā, “tātā, velāmo mayā ñataṃ sabbaṃ jānāti, tumhe sabbepi samaggā gantvā etassa santike sippaṃ uggaṇhathā”ti caturāsīti kumārasahassāni bodhisattassa niyyādesi.

Bodhisatto ācariyaṃ vanditvā caturāsīti kumārasahassaparivāro nikkhamitvā ekaṃ āsannanagaraṃ patvā nagarasāmikaṃ rājakumāraṃ uggaṇhāpetvā tassa sippe paguṇe jāte taṃ tattheva nivattesi. Etenupāyena caturāsīti nagarasahassāni gantvā caturāsītiyā rājakumārānaṃ sippaṃ paguṇaṃ kāretvā tasmiṃ tasmiṃ nagare taṃ taṃ nivattetvā bārāṇasirājakumāraṃ ādāya bārāṇasiṃ paccāgañchi. Manussā kumāraṃ pariyositasippaṃ rajje abhisiñciṃsu, velāmassa purohitatṭhānaṃ adāṃsu. Tepi caturāsītisahassarājakumārā sakesu sakesu rajjesu abhisekaṃ patvā anusaṃvaccharaṃ bārāṇasirañño upaṭṭhānaṃ āgacchanti. Te rājānaṃ disvā velāmassa santikaṃ gantvā, “ācariya, amhe rajjesu patitṭhitā, vadeyyātha yenattho”ti vatvā gacchanti. Tesāṃ gamanāgamanakāle sakaṭasandamānikagāvigoṇakukkuṭasūkarādayo gaṇhantānaṃ janapado ativiya (3.0269) u-upadduto hoti, mahājano sannipatitvā rājaṅgaṇe kandati.

Rājā velāmaṃ pakkosivā, “ācariya, upadduto janapado, rājāno gamanāgamanakāle mahāvilopaṃ karonti, manussā sandhāretuṃ na sakkonti, janapadapīḷāya upasamaṃ ekaṃ upāyaṃ karothā”ti. Sādhu mahārāja, upāyaṃ karissāmi, tumhākaṃ yattakena janapadena attho, taṃ paricchinditvā gaṇhathāti. Rājā tathā akāsi. Velāmo caturāsītiyā rājasahassānaṃ janapade vicāretvā cakkānābhīyaṃ

are viya rañño janapadasmiṃ oropesi. Tato paṭṭhāya te rājāno āgacchantāpi gacchantāpi attano attano janapadeneva sañcaranti, amhākaṃ janapadoti vilopaṃ na karonti. Rājagāravena rañño janapadampi na piḷenti. Janapadā sannisinnā nissaddā niravā ahesuṃ. Sabbe rājāno haṭṭhatuṭṭhā “yena vo, ācariya, attho, taṃ amhākaṃ vadethā”ti pavārayiṃsu.

Velāmo sīsaṃnhāto attano antonivesane sattaratanaparipūrānaṃ gabbhānaṃ dvārāni vivarāpetvā yāva sattamā kulaparivaṭṭā ṭhapitaṃ dhanaṃ oloketvā āya-vayaṃ upadhāretvā “mayā sakalajambudīpaṃ khobhentena dānaṃ dātuṃ vaṭṭati”-ti rañño ārocetvā gaṅgāṭire dvādasayojanikā uddhanapantiyo kāretvā tasmīṃ tasmīṃ ṭhāne sappimadhuphāṇitatelatilataṇḍulādīnaṃ ṭhapanatthāya mahākoṭṭhā-gārāni patiṭṭhāpetvā “ekekasmīṃ ṭhāne ettakā ettakā janā saṃvidahatha, yaṃkiñci manussānaṃ laddhabbaṃ nāma atthi, tato ekasmīpi asati mayhaṃ āroceyyāthā”ti manusse saṃvidhāya “asukadivasato paṭṭhāya velāmabrāhma-ṇassa dānaṃ bhuñjantū”ti nagare bheriṃ carāpetvā “dānaggaṃ pariniṭṭhitan”ti dānayuttehi ārocite saḥassagghanaṃ vatthaṃ nivāsetvā pañcasatagghanaṃ ekaṃsaṃ katvā sabbālaṅkārahūsito dānavīmaṃsanatthāya phalikavaṇṇassa udakassa suvaṇṇabhiṅgāraṃ pūretvā “imasmiṃ loke sace imaṃ dānaṃ paṭiggahetum yuttarūpā dakkhiṇeyyapuggalā atthi, idaṃ udakaṃ nikkhamitvā pathaviṃ gaṇhātu. Sace natthi, evameva tiṭṭhatū”ti saccakiriyaṃ katvā bhīṅgāraṃ adho mukhaṃ akāsi. Udaṃ dhamakaraṇena gahitaṃ viya ahosi. Bodhisatto “suñño vata, bho, jambudīpo, ekapuggalopi dakkhiṇaṃ paṭiggahetum yuttarūpo natthī”ti vippaṭisāraṃ akatvā “sace dāyakaṃ (3.0270) vasenāyaṃ dakkhiṇā visujjhissati, udakaṃ nikkhamitvā pathaviṃ gaṇhātū”ti cintesi. Phalikavaṇṇasadiṣaṃ udakaṃ nikkhamitvā pathaviṃ gaṇhi. “Idāni dānaṃ dassāmi”ti dānaggaṃ patvā dānaṃ oloketvā yāguvelāya yāguṃ, khajjakavelāya khajjakaṃ, bhojanavelāya bhojanaṃ dāpesi. Eteneva nīhārena divase divase dānaṃ diyaṭi.

Tasmīṃ kho pana dānagge “idaṃ nāma atthi, idaṃ nāma natthī”ti vattabbaṃ natthi. Idāni taṃ dānaṃ ettakamatteneva na niṭṭhaṃ gamissatīti rattasuvaṇṇaṃ nīharāpetvā suvaṇṇapātiyo kāretvā caturāsītisuvaṇṇapātisahassādīnaṃ atthāya caturāsītirājasahassānaṃ sāsanaṃ paḥiṇi. Rājāno “cirassaṃ vata mayaṃ ācariyena anuggahitā”ti sabbaṃ sampādetvā pesesuṃ. Dāne diyyamāneyeva satta vassāni satta māsā atikkantā. Atha brāhmaṇo “hiraññaṃ bhājetvā dānaṃ dassāmi”ti mahante okāse dānaṃ sajjāpesi. Sajjāpetvā caturāsīti suvaṇṇapātisaha-ssāni ādiṃ katvā koṭito paṭṭhāya adāsi.

Tattha **rūpiyapūrānī**ti rajatataṭṭhirajataphālarajataṃsakehi pūrāni. Pātiyo pana khuddikāti na sallakkhetabbā, ekakarīsappamāṇe bhūmibhāge catassoṃ pātiyo ṭhapayiṃsu. Pātimakulaṃ navaratanaṃ hoti, mukhavaṭṭito paṭṭhāya aṭṭharatanaṃ, pātīmukhavaṭṭiyā chayutto ājaññaratho anupariyāyati, dadamāno pātiyā bāhira-ntena vaggavagge paṭiggāhake ṭhapetvā paṭhamam pātiyā pakkhitaṃ datvā pacchā sandhisandhito viyojetvā pātinti evaṃ caturāsīti pātisahassāni adāsi. **Rūpiyapāti**ādīsipi eseṃ nayo. Etthapi ca **suvaṇṇapūrānī**ti suvaṇṇataṭṭhisuvaṇṇaphāla-suvaṇṇamāsaṃkehi pūrāni. **Hiraññapūrānī**ti sattavidharatanapūrāni. **Sovaṇṇālaṅkā-**

rānīti suvaṇṇālaṅkāraṇi. **Kaṃsūpadhāraṇānīti** rajatamayakhīrapaṭicchakāni. Tāsaṃ pana dhenūnaṃ siṅgāni suvaṇṇakosakapariyonaddhāni ahesuṃ, gīvāya sumanadāmaṃ piḷandhiṃsu, catūsu pādesu nupūrāni, piṭṭhiyaṃ varadukūlaṃ pārutamaṃ, kaṅṭhe suvaṇṇaghaṅṭamaṃ bandhiṃsu. **Vatthakoṭisahassānīti** lokavohā-rato vīsativatthayugāni ekā koṭi (3.0271), idha pana dasa sātākāti vuttamaṃ. **Khomasu-khumānanti**-ādimhi khomādīsu yaṃ yaṃ sukhumamaṃ, taṃ tadeva adāsi. Yāni pane-tāni itthidānaṃ usabhadānaṃ majjadānaṃ samajjādānanti adānasammatāni, tānipi esa “velāmassa dānamukhe idaṃ nāma natthi”ti vacanapathaṃ pacchi-ndituṃ parivāratthāya adāsi. **Najjo maññe vissandantīti** nadiyo viya vissandanti.

Iminā satthā velāmassa dānaṃ kathetvā, “gahapati, etaṃ mahādānaṃ nāñño adāsi, ahaṃ adāsiṃ. Evarūpaṃ pana dānaṃ dadantopi ahaṃ paṭiggahetuṃ yuttarūpaṃ puggalaṃ nālatthaṃ, tvaṃ mādise buddhe lokasmiṃ diṭṭhamāne dānaṃ dadamāno kasmā cintesi”ti seṭṭhissa desanaṃ vaḍḍhento **siyā kho pana teti**-ādi-māha. Nanu ca yāni tadā ahesuṃ rūpavedanāsaññāsañkhāraviññāṇāni, tāni niruddhāni? Kasmā “ahaṃ tena samayena velāmo brāhmaṇo”ti āhāti? Paveṇiyā avicchinattā. Tāni hi rūpādīni nirujjhamānāni imesaṃ paccaye datvā niruddhāni aparāparaṃ avicchinnaṃ paveṇiṃ gahetvā evamāha. **Na taṃ koci dakkhiṇaṃ sodhe-tīti** koci samaṇo vā brāhmaṇo vā devo vā māro vā uṭṭhāya taṃ dakkhiṇaṃ sodhe-tīti vattabbo nāhosi. Tañhi dakkhiṇaṃ sodhento uttamakoṭiyā buddho, heṭṭhimako-ṭiyā dhammasenāpatīsāriputtattherasadiṣo sāvako sodheyya.

Diṭṭhisampannanti dassanasampannaṃ sotāpannaṃ. **Idaṃ tato mahapphalata-ranti** idaṃ sotāpannassa dinnadānaṃ lokiyamahājanassa sattamāsādhikāni satta saṃvaccharāni ettakaṃ hiraññasuvaṇṇaṃ pariccajantena dinnadānato mahapphalaṃ.

Yo ca satamaṃ diṭṭhisampannānanti ettha ekassa sakadāgāmissa vasena ekuttarasataṃ sotāpanne katvā sotāpannagaṇanā veditabbā. Iminā upāyena sabbavā-resu heṭṭhā heṭṭhā āgate anantarena sataguṇaṃ katvā puggalagaṇanā veditabbā.

Buddhappamukhanti ettha sammāsambuddhaṃ saṅghattheraṃ katvā nisinno saṅgho buddhappamukho saṅghoti veditabbo. **Cātuddisaṃ saṅghaṃ uddissāti** ettha cātuddisaṃ saṅghaṃ uddissa katavihāro nāma yattha cetiyaṃ patiṭṭhitamaṃ hoti, dhammassavanaṃ karīyati, catūhi disāhi

anudisāhi ca bhikkhū āgantvā appaṭipucchitvāyeva pāde dhovitvā kuñcikāya dvāraṃ vivaritvā senāsanam paṭijaggitvā (3.0272) vasitvā yathāphāsukaṃ gacchanti. So antamaso caturataniyā paṇṇasālāpi hotu, cātuddisaṃ saṅghaṃ uddissa katavihārotveva vuccati.

Saraṇam gaccheyyāti ettha maggenāgataṃ anivattanasaraṇam adhippetam. Apare panāhu- attānam niyyādetvā dinnattā saraṇāgamaṃ tato mahapphalataranti vuttaṃ. **Sikkhāpadāni samādiyeyyāti** pañca silāni gaṇheyya. Silampi maggena āgataṃ anivattanasilameva kathitaṃ. Apare panāhu- sabbasattānam abhayadānassa dinnattā silaṃ tato mahapphalataranti vuttaṃ. **Gandhohanamattanti** gandha-ūhanamattaṃ, dvīhaṅgulīhi gaṇḍapiṇḍam gaḥetvā upasiṅghanamattaṃ. Apare pana “gaddohanamattan”ti pāḷiṃ vatvā gāviyā ekavāraṃ thana-añchanamattanti atthaṃ vadanti. **Mettacittanti** sabbasattānam hitānupharaṇacittaṃ. Taṃ pana appanāvaseneva gaḥitaṃ. **Aniccaaññanti** maggassa anantarapaccayabhāvena sikkhāpattabalavavipassanaṃ.

Upamāto pana imāni dānādīni puññāni evaṃ veditabbāni- sacepi hi jambudīpaṃ bheritalasadiṣaṃ samatalaṃ katvā koṭito paṭṭhāya pallaṅke attharivā ariyapuggale nisīdāpeyya, tattha sotāpannānaṃ dasa pantiyo assu, sakadāgāmīnaṃ pañca, anāgāmīnaṃ aḍḍhateyyā, khiṇāsavānaṃ diyaḍḍhā, paccekabuddhānaṃ ekā panti bhaveyya, sammāsambuddho ekakova. Ettakassa janassa dinnadānato sammāsambuddhassa dinnameva mahapphalaṃ. Itaraṃ pana-

“Vihāradānaṃ paṇipāto, sikkhā mettāya bhāvanā;

khayato sammasantassa, kalam nāgghati soḷasiṃ”.

Teneva bhagavā parinibbānasamaye “dhammānudhammappaṭipatti anuttarā pūjā”ti āha. Sesam sabbattha uttānatthamevāti.

Sīhanādavaggo dutiyo.

3. Sattāvāsavaggo

1. Tiṭhānasuttavaṇṇanā

21. Tatiyassa (3.0273) paṭhame **uttarakurukāti** uttarakuruvāsino. **Adhiggaṇhaṇṭīti** adhibhavanti, adhikā viṣiṭṭhā jeṭṭhakā honti. **Amamāti** nittaṇhā. Aṭṭhakathāyaṃ pana niddukkhāti vuttaṃ. **Apariggahāti** “idaṃ mayhan”ti pariggaharahitā. **Niyatāyukāti** tesañhi nibaddhaṃ āyu vassasahassameva, gatipi nibaddhā, tato cavitvā saggeyeva nibbattanti. **Satimantoti** devatānañhi ekantasukhitāya sati thirā na hoti, nerayikānaṃ ekantadukkhitāya. Imesaṃ pana vokiṇṇasukhadukkhattā sati thirā hoti. **Idha brahmacariyavāsoti** jambudīpe buddhapaccekabuddhānaṃ uppajjanato aṭṭhaṅgikamaggabrahmacariyavāsopi idheva hoti.

2. Assakhaḷuṅkasuttavaṇṇanā

22. Dutiye **javasampannoti** padajavena sampanno. **Na vaṇṇasampannoti** na sarīravaṇṇena sampanno. Purisakhaḷuṅkesu **javasampannoti** ñāṇajavana sampanno. **Na vaṇṇasampannoti** na guṇavaṇṇena sampanno. Sesam pālinaye-neva veditabbaṃ. Yañhettha vattabbaṃ siyā, taṃ tikanipātavaṇṇanāyaṃ vutta-meva.

3. Taṇhāmūlakasuttavaṇṇanā

23. Tatiye **taṇhaṃ paṭiccāti** dve taṇhā esanataṇhā esitataṇhā ca. Yāya taṇhāya ajapathasaṅkupathādīni paṭipajjitvā bhoge esati gavesati, ayaṃ esanataṇhā nāma. Yā tesu esitesu gavesitesu paṭiladdhesu taṇhā, ayaṃ esitataṇhā nāma. Idha pana esanataṇhā daṭṭhabbā. **Pariyesanāti** rūpādi-ārammaṇapariyesanā. Sā hi esanataṇhāya sati hoti. **Lābhoti** rūpādi-ārammaṇapaṭilābho. So hi pariyesanāya sati hoti.

Vinicchayo pana ñāṇataṇhādiṭṭhivittakkavasena catubbidho. Tattha “sukhavini-cchayaṃ jaññā, sukhavinicchayaṃ ñatvā ajjhataṃ sukhamanuyuñjeyyā”ti (ma. ni. 3.323) ayaṃ ñāṇavinicchayo (3.0274). “Vinicchayāti dve vinicchayā taṇhāvinic-chayo ca diṭṭhivinicchayo cā”ti (mahāni. 102) evaṃ āgatāni aṭṭhasatataṇhāvicari-tāni taṇhāvinicchayo. Dvāsattḥi diṭṭhiyo diṭṭhivinicchayo. “Chando kho, devāna-minda, vitakkanidāno”ti (dī. ni. 2.358) imasmimṃ pana sutte idha vinicchayoti vutto vitakkoyeva āgato. Lābhaṃ labhitvā hi iṭṭhāniṭṭhaṃ sundarāsundaraṃ vitakke-neva vinicchianti “ettakaṃ me rūpārammaṇatthāya bhavissati, ettakaṃ saddhāra-mmaṇatthāya, ettakaṃ mayhaṃ bhavissati, ettakaṃ parassa, ettakaṃ paribhuñji-ssāmi, ettakaṃ nidahissāmi”ti. Tena vuttaṃ- **lābhaṃ paṭicca vinicchayoti**.

Chandarāgoti evaṃ akusalavitakkena vitakkite vatthusmimṃ dubbalarāgo ca bala-varāgo ca uppajjati. Idañhi idha chandoti dubbalarāgassādhivacanaṃ. **Ajjhosā-nanti** ahaṃ mamanti balavasanniṭṭhānaṃ. **Pariggahoti** taṇhādiṭṭhivasena parigga-hakaraṇaṃ. **Macchariyanti** parehi sādharmaṇabhāvassa asahanatā. Tenevassa porāṇā evaṃ vacanatthaṃ vadanti- “idaṃ acchariyaṃ mayhameva hotu, mā aññassa acchariyaṃ hotūti pavattattā macchariyanti vuccati”ti. **Ārakkhoti** dvārapi-dahanamañjūsāgopanādivasena suṭṭhu rakkhanaṃ. Adhikarotīti **adhikaraṇaṃ**, kāraṇassettaṃ nāmaṃ. **Ārakkhādhikaraṇanti** bhāvanapuṃsakaṃ, ārakkhāhetūti attho. **Daṇḍādānādīsu** paranisedhanatthaṃ daṇḍassa ādānaṃ **daṇḍādānaṃ**. Ekato dhārādīno satthassa ādānaṃ **satthādānaṃ**. **Kalahoti** kāyakalahopi vācākala-hopi. Purimo **viggaho**, pacchimo **vivādo** (dī. ni. aṭṭha. 2.103). Tuvamṭuvanti agāra-vavasena **tuvamṭuvamvacanaṃ**.

4. Sattāvāsasuttavaṇṇanā

24. Catutthe **sattāvāsāti** sattānaṃ āvāsā, vasanaṭṭhānānīti attho. Tattha suddhā-vāsāpi sattāvāsova, asabbakālikattā pana na gahitā. Suddhāvāsā hi buddhānaṃ

khandhāvāraṭṭhānasadisā, asaṅkheyyakappe buddhesu anibbattesu taṃ ṭhānaṃ suññaṃ hoti. Iti asabbakālikattā na gahitā. Sesamettha viññāṇaṭṭhitisu vuttanaye-
neva veditabbaṃ.

5. Paññāsuttavaṇṇanā

25. Pañcame (3.0275) **yatoti** yasmiṃ kāle. **Suparicitaṃ hotīti** suṭṭhu upacitaṃ suvaḍḍhitaṃ hoti. **Kallaṃ vacanāyāti** yuttaṃ vattaṃ. **Vitarāganti** vigatarāgaṃ. **Asa-
rāgadhammanti** na sarajjanasabhāvaṃ. **Anāvattidhammanti** anāvattanasabhāvaṃ
anibbattārahaṃ, appaṭisandhikabhāveneva nirujjhanasabhāvanti attho. Imasmiṃ
sutte khīṇāsavova kathito.

6. Silāyūpasuttavaṇṇanā

26. Chaṭṭhe **candikāputtoti** mātu nāmavasena paññāto candikāputtatthero. **Cetasā cittaṃ hotīti** cittavārapariyāyena cittavārapariyāyo cito vaḍḍhito hoti. **Cetasā cittaṃ suparicitanti** cittavārapariyāyena cittavārapariyāyo uparūpari sucito suvaḍḍhito hoti. **Nevassa cittaṃ pariyādiyanti** tāni ārammaṇāni tassa khīṇāsa-
vassa cittuppādaṃ gahetvā khepetvā ṭhātuṃ na sakkonti. **Amissikatanti** tāni āra-
mmaṇāni anallīnattā tehi amissikataṃ. **Āneñjappattanti** aniñjanabhāvaṃ nippha-
ndanabhāvaṃ pattaṃ.

Silāyūpoti silāthambho. **Soḷasakukkukoti** dīghato soḷasahattho. **Heṭṭhānemaṅga-
māti** āvāṭassa heṭṭhāgatā. **Upari nemassāti** upari āvāṭassa. **Sunikhātattāti** ayamu-
salehi koṭṭetvā koṭṭetvā suṭṭhu nikhātattā. **Evameva khoti** ettha silāyūpo viya khīṇā-
savo daṭṭhabbo, mahāvātā viya chasu dvāresu uppajjanakā kilesā, catūhi disāhi
āgantvā vātānaṃ silāyūpaṃ cāletuṃ asamatthabhāvo viya chasu dvāresu uppajja-
nakakilesānaṃ khīṇāsavassa cittaṃ cāletuṃ asamatthabhāvo veditabbo. Ima-
smimpi sutte khīṇāsavova kathito.

7-8. Verasuttadvayaṇṇanā

27-28. Sattame **bhayaṃ veraṃ pasavatīti** cittutrāsabhayañca puggalaverañca
paṭilabhati. **Cetasikanti** cittaṇissitaṃ. **Dukkanti** kāyavatthukaṃ. **Domanassanti** (3.02
paṭighasampayuttadukkhaṃ. Imasmiṃ sutte sotāpattimaggo kathito. Aṭṭhamaṃ
bhikkhusaṅghassa kathitaṃ, imasmiṃ pana sotāpannova kathitoti vuttaṃ.

9. Āghātavatthusuttavaṇṇanā

29. Navame **āghātavatthūnīti** āghātakāraṇāni. **Āghātaṃ bandhatīti** kopam
bandhati uppādeti.

10-11. Āghātaṭṭhavinayasuttādivaṇṇanā

30-31. Dasame **āghātaṭṭhavinayā**ti āghātassa ṭṭhavinayakāraṇāni. **Taṃ kutettha labbhā**ti “taṃ anattacaraṇaṃ mā ahosi”ti etasmiṃ puggale kuto labbhā, kena kāraṇena sakkā laddhuṃ, “paro nāma parassa attano cittaruciyaṃ anattaṃ karoti”-ti evaṃ cintetvā āghātaṃ ṭṭhavineti. Atha vā sacāhaṃ kopaṃ kareyyaṃ, taṃ kopa-karaṇaṃ ettha puggale kuto labbhā, kena kāraṇena laddhabbanti attho. Kuto lābhātipi pāṭho. Sacāhaṃ ettha kopaṃ kareyyaṃ, tasmiṃ me kopakaraṇe kuto lābhā lābhā, nāma ke siyunti attho. Imasmiṃca atthe **tanti** nipātamattameva hoti. Ekādasame **anupubbanirodhā**ti anuṭṭhavinayānirodhā. Sesam sabbattha uttānatta-mevāti.

Sattāvāsavaggo tatiyo.

4. Mahāvaggo

1-2. Anupubbavīhārasuttavaṇṇanā

32-33. Catutthassa paṭhame **anupubbavīhārā**ti anuṭṭhavinayā samāpajjitabbavīhārā. Dutiye **yattha kāmā nirujjhantī**ti yasmiṃ ṭṭhāne kāmā vūpasammanti. **Nirodhetvā**ti appaṭivatte katvā. **Nicchātā**ti taṇhādiṭṭhicchātānaṃ abhāvena nicchātā. **Nibbutā**ti attaparitāpanakilesānaṃ abhāvena nibbutā. **Tiṇṇā**ti kāmato tiṇṇā. **Pāraṃgatā**ti kāme pāraṃ gatā. **Tadaṅgena**ti tena jhānaṅgena. **Ettha kāmā nirujjhantī**ti ettha paṭhamajjhāne (3.0277) kāmā nirujjhanti. **Te cāti** ye paṭhamajjhānaṃ samāpajjanti, te kāme nirodhetvā nirodhetvā viharanti nāma. **Pañjalikoti** paggahita-añjaliko hutvā. **Payirupāseyyā**ti upaṭṭhāpeyya. Iminā upāyena sabbattha attho vedītabbo.

3. Nibbānasukhasuttavaṇṇanā

34. Tatiye **udāyī**ti lāḷudāyitthero. **Etadeva khvetthā**ti etadeva kho ettha. **Kāmasahagatā**ti kāmanissitā. **Samudācarantī**ti manodvāre sañcaranti. **Ābādhāyā**ti ābādhānāya piḷanāya. **Pariyāyenā**ti kāraṇena. Evaṃ sabbavāresu attho vedītabbo. Imasmiṃ sutte avedayitasukhaṃ nāma kathitaṃ.

4. Gāvī-upamāsuttavaṇṇanā

35. Catutthe **pabbateyyā**ti pabbatacārini. **Na suppatiṭṭhitam patitiṭṭhāpetvā**ti yathā suppatiṭṭhitā hoti, evaṃ na patitiṭṭhāpetvā. **Taṃ nimittanti** taṃ paṭhamajjhānasaṅkhātāṃ nimittāṃ. **Na svādhitiṭṭhitam adhiṭṭhātī**ti yathā suṭṭhu adhiṭṭhitāṃ hoti, na evaṃ adhiṭṭhātī. **Anabhihimsamānoti** apothento aviheṭhento. **Mudu cittaṃ hoti kammaññanti** yathā vipassanācittaṃ lokuttaramaggakkhaṇe mudu kamma-kkhamāṃ kammayoggaṃ hoti, evamassa abhiññāpādakaṃ catutthajjhānacittaṃ mudu hoti kammaññaṃ. **Appamāṇo samādhi**ti catubrahmavihārasamādhipi maggaphalasangāhī appamāṇo samādhi nāma, idha pana “appamāṇaṃ appamāṇārammaṇaṃ”ti iminā pariyāyena suppaguṇasamādhi appamāṇasamādhiṭi daṭṭhabbo. **So appamāṇena samādhinā subhāvitena**ti imasmiṃ tṭhāne ayaṃ bhikkhu vipassanaṃ vadḍhetvā arahattaṃ patto. Idāni khīṇāsavassa abhiññāpaṭi-pāṭiṃ dassento **yassa yassa cāti**-ādimāha.

5. Jhānasuttavaṇṇanā

36. Pañcame **āsavānaṃ khayanti** arahattaṃ. **Yadeva tattha hoti rūpagatanti** tasmim paṭhamajjhānakkhaṇe vatthivasena vā cittasamuṭṭhānikādivasena vā yaṃ rūpaṃ nāma pavattati. **Vedanāgatā**dīni sampayuttavedanādīnaṃ vasena vedita-bbāni (3.0278). **Te dhammeti** te rūpādayo pañcakkhandhadhamme. **Aniccatoti**-ādīsu hutvā abhāvākārena **aniccato**, Paṭipīḷanākārena **dukkhato**, rujanākārena **rogato**, antodussanaṭṭhena **gaṇḍato**, anupaviṭṭhaṭṭhena anukantanaṭṭhena ca **sallato**, dukkhaṭṭhena **aghato**, ābādhanaṭṭhena **ābādhato**, asakaṭṭhena **parato**, palujjanaṭṭhena **palokato**, assāmikaṭṭhena **suññato**, avasavattanaṭṭhena **anattato**. **Samanupassatī**ti balavavipassanāpāññāya passati.

Tehi dhammehīti tehi pañcakkhandhadhammehi. **Paṭivāpetī**ti nibbānavasena nivatteti. **Amatāya dhātuyā**ti nibbānadhātuyā. **Cittaṃ upasaṃharatī**ti ñāṇena āni-saṃsaṃ disvā otāreti. **Santanti** paccaṇikasantaṭṭhāya santaṃ. **Paṇīanti** atappakaṃ. **So tattha tṭhito āsavānaṃ khayaṃ pāpuṇātī**ti so tasmim paṭhamajjhāne tṭhito taṃ balavavipassanaṃ vadḍhetvā arahattaṃ pāpuṇāti. Aparo nayo- **so tehi dhammehī**ti yasmā aniccatoti-ādīsu aniccato palokatoti dvīhi padehi aniccalakkhaṇaṃ kathitaṃ, dukkhatoti-ādīhi chahi dukkhalakkhaṇaṃ, parato, suññato, anattatoti tīhi anattalakkhaṇaṃ. Tasmā so tehi evaṃ tilakkhaṇaṃ āropetvā diṭṭhehi antosamāpattiyāṃ pañcakkhandhadhammehi. **Cittaṃ paṭivāpetī**ti cittaṃ paṭisaṃharati moceti apaneti. **Upasaṃharatī**ti vipassanācittaṃ tāva savanavasena tṭhivasena pariya-ttivasena paññattivasena ca santaṃ nibbānanti evaṃ asaṅkhatāya amatāya dhātuyā upasaṃharati. Maggacittaṃ nibbānaṃ ārammaṇakaraṇavaseneva “etaṃ santaṃ etaṃ paṇītaṃ”ti na evaṃ vadati. Iminā panākārena taṃ paṭivijjhanto tattha cittaṃ upasaṃharatī attho.

So tattha tṭhitoti tassā tilakkhaṇārammaṇāya vipassanāya tṭhito. **Āsavānaṃ khayaṃ pāpuṇātī**ti anukkamena cattāro magge bhāvetvā arahattaṃ pāpuṇāti. **Teneva dhammarāgenā**ti samathavipassanādhamme chandarāgena. **Dhammanandiyā**ti tasseva vevacanaṃ. Samathavipassanāsu hi sabbaso chandarāgaṃ pari-

yādātum sakkonto arahattaṃ pāpuṇāti, asakkonto anāgāmi hoti.

Tiṇapurisarūpake (3.0279) **vāti** tiṇapotthakarūpe vā. Dūre kaṇḍe pātetīti **dūre-pāti**. Avirādhitam vijjhatīti **akkhaṇavedhī**. **Yadeva tattha hoti vedanāgatanti** idha rūpaṃ na gahitaṃ. Kasmā? Samatikkantattā. Ayañhi heṭṭhā rūpāvacarajjhānaṃ samāpajjitvā rūpaṃ atikkamitvā arūpāvacarasamāpattiṃ samāpannoti samathava-senāpi anena rūpaṃ samatikkantaṃ, heṭṭhā rūpaṃ sammāsītva taṃ atikkamma idāni arūpaṃ sammāsītīti vipassanāvasenāpi anena rūpaṃ atikkantaṃ. Āruppe pana sabbasopi rūpaṃ natthīti taṃ sandhāyapi rūpaṃ na gahitaṃ. Atha nevasa-ññānāsaññāyatanaṃ kasmā na gahitanti? Sukhumattā. Tasmīñhi cattāropi arūpa-kkhandhā sukhumā na sammasanūpagā. Tenevāha- “iti kho, bhikkhave, yāvatā saññāsamāpatti tāvatā aññāpaṭivedho”ti. Idaṃ vuttaṃ hoti- yāvatā sacittakasamā-patti nāma atthi, tāvatā oḷārike dhamme sammāsato aññāpaṭivedho hoti, ara-hattaṃ sampajjati. Nevasaññānāsaññāyatanaṃ pana sukhumattā saññāsamāpa-ttīti na vuccati. **Jhāyīheteti** jhāyīhi jhānābhīratehi etāni. **Vuṭṭhahitvāti** tato samāpa-ttito vuṭṭhāya. **Samakkhātabbānīti** sammā akkhātabbāni, “santāni paṇītāni”ti evaṃ kevalaṃ ācikkhitabbāni thometabbāni vaṇṇetabbānīti.

6. Ānandasuttavaṇṇanā

37. Chaṭṭhe **sambādheti** pañcakāmaguṇasambādhe. **Okāsādhigamoti** okāsassa adhigamo. **Sattānaṃ visuddhiyāti** sattānaṃ visuddhiṃ pāpanatthāya. **Samatikkamāyāti** samatikkamanatthāya. **Atthaṅgamāyāti** atthaṃ gamanatthāya. **Ñāyassa adhigamāyāti** sahavipassanakassa maggassa adhigamanatthāya. **Nibbānassa sacchikiriyāyāti** apaccayanibbānassa paccakkhakarāṇatthāya. **Tadeva nāma cakkhuṃ bhavissatīti** taññeva pasādacakkhu asamhinnam bhavissati. **Te rūpāti** tadeva rūpārammaṇam āpātham āgamissati. **Tañcāyatanaṃ no paṭisaṃvedissa-tīti** tañca rūpāyatanaṃ na jānissati. Sesesupi eseva nayo.

Udāyīti kāḷudāyitthero. **Saññīmeva nu khoti** sacittakoyeva nu kho. Makāro pada-sandhimattaṃ. **Kiṃsaññīti** katarasaññāya saññī hutvā. **Sabbaso** (3.0280) **rūpasa-ññānanti** idaṃ kasmā gaṇhi, kiṃ paṭhamajjhānādisamaṅgino rūpādipaṭisaṃve-danā hotīti? Na hoti, yāva pana kasiṇarūpaṃ ārammaṇam hoti, tāva rūpaṃ sama-tikkantaṃ nāma na hoti. Asamatikkantattā paccayo bhavituṃ sakkhissati. Samati-kkantattā pana taṃ natthi nāma hoti, natthitāya paccayo bhavituṃ na sakkotīti dassetuṃ idameva gaṇhi.

Jaṭilavāsikāti jaṭilanagaravāsini. **Na cābhinatoti**-ādīsu rāgavasena na **abhinato**, dosavasena na **apanato**. Sasaṅkhārena sappayogena kilese niggaṇhitvā vāretvā ṭhito, kilesānaṃ pana chinnante uppannoti **na sasaṅkhāraniggayhavāritagato**. **Vimuttattā ṭhitoti** kilesehi vimuttattāyeva ṭhito. **Ṭhitattā santusitoti** ṭhitattāyeva santuṭṭho nāma jāto. **Santusitattā no paritassatīti** santuṭṭhattāyeva paritāsam nāpa-jjati. **Ayaṃ, bhante ānanda, samādhī kiṃ phaloti** iminā ayaṃ therī tālaphalaññeva gahetvā “idaṃ phalaṃ kiṃ phalaṃ nāmā”ti pucchamānā viya arahattaphalasa-mādhī gahetvā “ayaṃ, bhante ānanda, samādhī kiṃ phalo vutto bhagavatā”ti

pucchati. **Aññāphalo vuttoti** aññā vuccati arahattaṃ, arahattaphalasaṃmādhī nāmeso vutto bhagavatāti attho. **Evamaññīpīti** imāya arahattaphalasaññāya saññīpi tadāyatanaṃ no paṭisaṃvedetīti evaṃ imasmiṃ sutte arahattaphalasaṃmādhī kathitoti.

7. Lokāyatikasuttavaṇṇanā

38. Sattame **lokāyatikāti** lokāyatavādakā. **Satatanti** sadā. **Samitanti** nirantaraṃ. **Tiṭṭhatetanti** tiṭṭhatu etaṃ, mā etaṃ paṭṭhapetha, ko vo etena attho. **Dhammaṃ vo brāhmaṇā desessāmīti** ahaṃ vo catusaccadhammaṃ desessāmi.

Daḷhadhammoti daḷhadhanuṃ gahetvā ṭhito. **Dhanuggahoti** issāso. Daḷhadhanu nāma dvisahassathāmaṃ vuccati. Dvisahassathāmaṃ nāma yassa āropitassa jiyābaddho (3.0281) lohasīsādīnaṃ bhāro daṇḍe gahetvā yāva kaṇḍappamaṇḍā ukkhittassa pathavito mucchati. **Sikkhitoti** dasa dvādasa vassāni ācariyakule ugga-hitasippo. **Katahatthoti** eko sippameva uggaṇhāti, katahattho na hoti ayaṃ pana katahattho ciṇṇavasibhāvo. **Katūpāsanoti** rājakulādīsu dassitasippo. **Lahukena asanenāti** anto susiraṃ katvā tūlādīhi pūretvā katalakkhaparikkammaṃ sallahukakaṇḍena. Evaṃ katañhi eka-usabhagāmī dve usabhānipi gacchati ...pe... aṭṭhasabhagāmī soḷasa usabhānipi gacchati. **Appakasirenāti** niddukkheṇa. **Atipāteyyāti** atikkameyya. Idaṃ vuttaṃ hoti- yathā so dhanuggaho taṃ vidatthacaturaṅgulaṃ chāyaṃ sīghameva atikkāmeti, evaṃ sakalacakkavāḷaṃ sīghaṃ sīghaṃ atikkama-nasamatthena javena samannāgato. **Sandhāvanikāyāti** padasā dhāvanena. **Eva-māhaṃsūti** evaṃ vadanti.

8. Devāsurasāṅgāmasuttavaṇṇanā

39. Aṭṭhame **samupabyūḷho** ahoṣīti paccupaṭṭhito ahosi. **Saṅgāmeyyāmāti** saṅgāmaṃ kareyyāma yujjheyyāma. **Apayimsuyevāti** palāyimsuyeva. **Uttarenābhī-mukhāti** uttarāmukhā hutvā. **Abhiyante vāti** anubandhantiyeva. **Bhīruttānagate-nāti** bhīruttānaṃ bhayanivāraṇaṃ paṭiṭṭhānaṃ gatena. **Akaraṇīyāti** yuddhena kiñci akattabbā. Kasmā pana nesam saṅgāmo hotīti? Asurā hi pubbe tāvatiṃsavā-sino, te cittapāṭaliyā pupphanakāle dibbapāricchattakapupphaṃ anussaranti. Tato uppannakodhā “gaṇhatha deve”ti sammukhasammukhaṭṭhāneneva sineruṃ abhi-ruhanti, devāpi nikkhamanti. Tesam gopālakadāraṇaṃ aññamaññaṃ daṇḍa-kehi paharaṇasadisam yuddhaṃ hoti. Sakko devarājā heṭṭhā pañcasu ṭhānesu ārakkhaṃ ṭhapetvā upari devapuraṃ parivāretvā attasadisā vajirahatthā paṭimā ṭhapāpesi. Asurā heṭṭhā pañca ṭhānāni paṭibāhitvā abhiruḷhā indapaṭimāyo disvā nivattitvā asurapurameva gacchanti.

Dakkhiṇenābhīmukhāti dakkhiṇāmukhā hutvā. **Apadaṃ vadhitvāti** nippadaṃ niravasesam vadhitvā. **Adassanaṃ gatoti** māropi vaṭṭapādakaṃ katvā rūpāvacara-catutthajjhānaṃ (3.0282) samāpannassa cittaṃ jānāti, tadeva vipassanāpādakaṃ katvā samāpannassa cittaṃ jānāti. Arūpāvacarasamāpatti pana vaṭṭapādā vā hotu

vipassanāpādā vā, taṃ samāpannassa māro cittaṃ na jānāti. Tena vuttaṃ- “ada-
ssanaṃ gato pāpimato” ti.

9. Nāgasuttavaṇṇanā

40. Navame āraññakassāti araññavāsino. Gocarapasutassāti gocaraggahaṇa-
tthāya gacchantassa. Hatthikalabhāti mahantā mahantā nāgā. Hatthicchāpāti taru-
ṇapotakā. Obhaggobhagganti nāmetvā nāmetvā ṭhapitaṃ. Ogāhaṃ otiṇṇassāti
ogāhitabbattā ogāhanti laddhanāmaṃ udakatitthaṃ otiṇṇassa. Ogāhā uttiṇṇa-
ssāti udakatitthato uttiṇṇassa. Vūpakaṭṭhoti vūpakaṭṭho hutvā. Idāni yasmā dasa-
balassa hatthināgena kiccaṃ natthi, sāsane pana taṃsarikkhakaṃ puggalaṃ
dassetuṃ idamāhaṭaṃ, tasmā taṃ puggalaṃ dassento **evameva khoti-ādimāha**.

10. Tapussasuttavaṇṇanā

41. Dasame mallesūti mallaraṭṭhe. Idheva tāva tvam, ānanda, hotīti idha
bhagavā “tapussagahapatino idha ṭhitena ānandena saddhiṃ kathāsallāpo bhavi-
ssati, tatonidānaṃ ahaṃ mahantaṃ dhammapariyāyaṃ desessāmi” ti ṇatvā āha.
Upasaṅkamīti so kira bhuttapātarāso “dasabalassa upaṭṭhānaṃ gamissāmi” ti
nikkhamanto dūratova theram disvā yenāyasmā ānando tenupasaṅkami. **Papāto
viya khāyati, yadidaṃ nekkhammanti** yamidaṃ pabbajjāsaṅkhātaṃ nekkhammaṃ,
taṃ amhākaṃ mahāpapāto viya ogāhitvā upaṭṭhāti. **Nekkhamme cittaṃ pakkhandā-
tīti** pabbajjāya cittaṃ ārammaṇavasena pakkhandati, tadeva ārammaṇaṃ katvā
pasīdati, tadeva **patiṭṭhāti**, paccanīkadhammehi ca **vimuccati**. ‘**Etaṃ santan’** ti passa-
toti etaṃ nekkhammaṃ santaṃ vigatadarathapariḷāhanti evaṃ passantānaṃ
bhikkhūnaṃ. **Bahunā janena visabhāgoti** tayidaṃ bahunā mahājanena saddhiṃ
bhikkhūnaṃ visabhāgaṃ, asadisanti attho.

Kathāpābhatanti kathāmūlaṃ. **Tassa mayhaṃ, ānanda,**

nekkhamme cittaṃ na pakkhandatīti tassa evaṃ vitakkentassāpi mayhaṃ pabbajjāya cittaṃ na otarati. “**Etam** (3.0283) **santan**”ti **passatoti** “sādhu nekkhamman”ti parivittakkanavasena “etaṃ nekkhammaṃ santan”ti passantassapi. **Anāsevitoti** na āsevito na phassito na sacchikato. **Adhigammāti** adhigantvā patvā sacchikatvā. **Tamāseveyyanti** taṃ ānisaṃsaṃ seveyyaṃ bhajeyyaṃ. **Yaṃ meti** yena kāraṇena mayhaṃ. **Adhigammāti** adhigantvā. **Svāssa me hoti ābādhoti** so mayhaṃ ābādhanatthēna ābādho hoti. **Avitakke cittaṃ na pakkhandatīti** avitakkavicāre dutiya-jjhāne ārammaṇavasena cittaṃ na pakkhandati. **Vitakkesūti** vitakkavicāresu. Sesam sabbattha uttānatthamevāti.

Mahāvaggo catuttho.

5. Sāmaññavaggo

1. Sambādhasuttavaṇṇanā

42. Pañcamassa paṭhame **udāyīti** kāḷudāyitthero. **Avidvāti** aññāsi. **Bhūrimedhasoti** mahāpañño. **Yo jhānamabujjhīti** yo jhānaṃ abujjhi. **Paṭilīnanisabhoti** ekībhāvasena paṭilīno ceva uttamaṭṭhena ca nisabho. **Munīti** buddhamuni. **Pariyāyenāti** ekena kāraṇena. Kāmasambādhasa hi abhāvamatteneva paṭhamajjhānaṃ okāsādhigamo nāma, na sabbathā sabbaṃ. **Tatrāpatthi sambādhoti** tasmimpi paṭhamajjhāne sambādho paṭipīlanaṃ atthiyeva. Tatrāpitthītipi pāṭho. **Kiñca tattha sambādhoti** tasmim̐ pana jhāne kiṃ sambādho nāma. **Ayamevā sambādhoti** ayaṃ vitakkavicārānaṃ aniruddhabhāvo sambādho saṃpiḷā nāma. Iminā upāyena sabbavāresu attho veditabbo. **Nippariyāyenāti** na ekena kāraṇena, atha kho āsavakkhayo nāma sabbasambādhanānaṃ pahīnattā sabbena sabbaṃ okāsādhigamo nāmāti.

2. Kāyasakkhisuttavaṇṇanā

43. Dutiye (3.0284) **yathā yathā ca tadāyatananti** yena yena kāraṇena yena yenākārena taṃ paṭhamajjhānasaṅkhātāṃ āyatanānaṃ hoti. **Tathā tathā naṃ kāyena phusitvā viharatīti** tena tena kāraṇena tena tenākārena taṃ samāpattim̐ saha-jātanāmakāyena phusitvā viharati, samāpattatīti attho. **Kāyasakkhi vutto bhagavatā pariyāyenāti** yasmā tena nāmākāyena paṭhamajjhānaṃ sacchikataṃ, tasmā iminā pariyāyena kāyasakkhi vutto. **Nippariyāyenāti** yattakaṃ kāyena sacchikātabbaṃ, sabbassa katattā ayaṃ nippariyāyena kāyasakkhi nāma.

3. Paññāvimuttasuttavaṇṇanā

44. Tatiye **paññāya ca naṃ pajānātī** taṃ paṭhamajjhānavipassanāpaññāya jānāti. Idhāpi pariyāyanippariyāyā purimanayeneva veditabbā. Yathā ca idha, evaṃ ito paresupi.

4. Ubhatobhāgavimuttasuttavaṇṇanā

45. Catutthaṃ ubhayena veditabbaṃ. Ettha ca **ubhatobhāgavimuttoti** ubhatobhāgehi samathavipassanānaṃ paccaṇikakilesehi vimutto. Pariyosāne pana samāpattiyā rūpakāyato, ariyamaggena nāmakāyato vimuttoyeva ubhatobhāgavimuttoti veditabbo.

5-10. Sandiṭṭhikadhammasuttādivaṇṇanā

46-51. Pañcamādīsu **sandiṭṭhikoti** sayaṃ passitabbako. **Nibbānanti** kilesanibbānaṃ. **Parinibbānanti** tasseva vevacanaṃ. **Tadaṅganibbānanti** paṭhamajjhānādinā tena tena aṅgena nibbānaṃ. **Diṭṭhadhammanibbānanti** ismiṃyeva attabhāve nibbānaṃ. Sesāṃ sabbattha uttānatthamevāti.

Sāmaññavaggo pañcamaṃ.

Paṭhamapaṇṇāsakaṃ niṭṭhitaṃ.

2. Dutiyaṇṇāsakavaṇṇanā

52. Ito (3.0285) paresu **khemanti** nirupaddavaṃ. **Khemappattoti** khemabhāvaṃ patto. **Sikkhādubbalyānī**ti sikkhāya dubbalabhāvakaraṇāni. Sesāṃ sabbattha uttānatthamevāti.

Manorathapūraṇiyā aṅguttaranikāya-aṭṭhakathāya

Navakanipātassa saṃvaṇṇanā niṭṭhitā.

Namo tassa bhagavato arahato sammāsambuddhassa

Aṅguttaranikāye

Dasakanipāta-aṭṭhakathā

1. Paṭhamapaṇṇāsakaṃ

1. Ānisaṃsavaggo

1. Kimatthiyasuttavaṇṇanā

1. Dasakanipātassa (3.0287) paṭhame **kusalāni silānīti** anavajjasilāni. Amaṅku-bhāvassa avippaṭṭisārassa atthāya saṃvattantīti **avippaṭṭisāratthāni**. So nesaṃ ānisaṃsoti **avippaṭṭisārānisaṃsāni**. **Yathābhūtañāṇadassanatthoti-ādīsu yathābhūtañāṇadassanaṃ** nāma taruṇavipassanā, **nibbidā** nāma balavavipassanā, **virāgo** nāma maggo, **vimutti** nāma arahattaphalaṃ, **ñāṇadassanaṃ** nāma paccavekkhaṇāñāṇaṃ. **Aggāya parentīti** arahattatthāya gacchanti.

2. Cetanākaraṇīyasuttavaṇṇanā

2. Dutiye **na cetanāya karaṇīyanti** na cetetvā kappetvā pakappetvā kātappaṃ. **Dhammatā esāti** dhammasabhāvo eso kāraṇaniyamo ayaṃ. **Abhisandentīti** pavattenti. **Paripūrentīti** paripuṇṇaṃ karonti. **Apārā pāraṃ gamanāyāti** orimatīrabhūtā tebhūmakavaṭṭā nibbānapāraṃ gamanatthāya.

3-5. Upanisasuttattayavaṇṇanā

3-5. Tatiye **hatūpanisoti** hatakāraṇo. Catutthapañcomesu dvīhi therehi kathitabhāvova viseso.

6. Samādhisuttavaṇṇanā

6. Chaṭṭhe **neva pathaviyaṃ pathavīsaññī assāti** pathaviṃ ārammaṇaṃ katvā pathavīti evaṃ uppannāya saññāya saññī na bhaveyya. **Āpādisupi** eseva (3.0288) nayo. **Na idhaloketi** idhaloke uppajjanakacatukkapañcakajjhānasaññāya na saññī bhaveyya. **Na paraloketi** paraloke uppajjanakacatukkapañcakajjhānasaññāya na saññī bhaveyya. **Saññī ca pana assāti** atha ca panassa samāpatti savitakkasamāpattiyeva assāti vuccati. **Etam santam etam paṇītanti** santam santanti appetvā nisinnassa divasampi cittuppādo “santam santan”teva pavattati, paṇītaṃ paṇītanti appetvā nisinnassa divasampi cittuppādo “paṇītaṃ paṇītan”teva pavattati. **Yadidaṃ sabbasañkhārasamatho** Ti nibbānaṃ nibbānanti appetvā nisinnassa divasampi cittuppādo “nibbānaṃ nibbānan”teva pavattatīti sabbampetaṃ phalasa-

māpattisamādhiṃ sandhāya vuttaṃ.

7. Sāriputtasuttavaṇṇanā

7. Sattame **saññī ca panāhaṃ, āvuso, tasmim samaye ahosinti**, āvuso, tasmim samaye ahaṃ “bhavanirodho nibbānan”ti imāya phalasamāpattisaññāya saññī ahoṣim. Sacittakā me sā samāpatti ahoṣīti paccavekkhaṇā kathitā.

8. Jhānasuttavaṇṇanā

8. Aṭṭhame **samantapāsādikoti pasādāvahānaṃyeva kāyakammādīnaṃ sabbhāvato samanto pāsādiko. Sabbākāraparipūroti** sabbehi kāraṇehi paripuṇṇo.

9. Santavimokkhasuttavaṇṇanā

9. Navame **santā**Ti ārammaṇasantatāyapi aṅgasantatāyapi santā. **Vimokkhāti** paccanīkadhammehi vimuttattā ārammaṇe ca nirāsaṅkabhāvena suṭṭhu muttattā evaṃladdhanāmā. **Atikkamma rūpeti** rūpajjhānāni atikkamitvā pavattā. Sesam sabbattha uttānatthamevāti.

Ānisaṃsavaggo paṭhamo.

2. Nāthavaggo

1. Senāsanasuttavaṇṇanā

11. Dutiya (3.0289) paṭhame **pañcaṅgasamannāgatoti** pañcahi guṇaṅgehi samannāgato. **Nātidūraṃ hoti nāccāsannanti** yañhi atidūre hoti, piṇḍāya caritvā tattha gacchantassa kāyacittadarathā hoti, tato anuppannaṃ vā samādhiṃ uppādetuṃ uppannaṃ vā thiraṃ kātuṃ na sakkoti. Accāsannaṃ bahujaṇākiṇṇaṃ hoti. Cattālīsa-usabhamatte pana padese vasataṃ dūrāsannadosavimuttañca gamanā-gamanasampannaṃ nāma hoti. **Divā-appākiṇṇanti** divasabhāge mahājanena anākiṇṇaṃ.

2. Pañcaṅgasuttavaṇṇanā

12. Dutiye **kevalīti** kevalehi sakalehi guṇehi samannāgato. **Vusitavāti** vutthabrahmacariyavāso. **Asekhenāti** asekhadhammapariyāpannena lokuttarena. **Sīlakkhandhenāti** sīlarāsinā. **Vimuttikkhandhenāti** ettha ṭhapetvā sīlādayo tayo sesā phala-dhammā vimutti nāma, vimuttiñānadassanaṃ paccavekkhaṇaññaṃ, taṃ lokiya-

meva.

3-4. Saṃyojanasuttādivaṇṇanā

13-14. Tatiye **orambhāgiyānīti** heṭṭhābhāgiyāni. **Uddhambhāgiyānīti** uparibhāgiyāni. Imasmimṃ sutte vaṭṭameva kathitaṃ. Catutthe **khilavinibandhā** pañcakanipāte vitthāritāyeva. **Ārohapariṇāhenāti** dīghaputhulantena.

5. Appamādasuttavaṇṇanā

15. Pañcame **evameva khoti** yathā sabbasattānaṃ sammāsambuddho aggo, evaṃ sabbesaṃ kusaladhammānaṃ kārāpaka-appamādo aggoti daṭṭhabbo. Nanu cesa lokiyova, kusaladhammā pana lokuttarāpi. Ayañca kāmāvacarova, kusaladhammā pana catubhūmakā. Kathamesa tesaṃ aggoti? Paṭilābhakattena. Appamādena hi te paṭilabhanti, tasmā so tesaṃ aggo. Teneva vuttaṃ- **sabbe te appamādamūlakāti.**

Jaṅgalānanti (3.0290) pathavitalacārīnaṃ. **Pāṇānanti** sapādakapāṇānaṃ. **Pada-jātānīti** padāni. **Samodhānaṃ gacchantīti** odhānaṃ pakkhepaṃ gacchanti. **Aggama-kkhāyatīti**

seṭṭhamakkhāyati. **Yadidaṃ mahantattenā**ti mahantabhāvena aggamakkhāyati, na guṇaggenāti attho. **Vassikanti** sumanapupphaṃ. Idaṃ kira suttaṃ sutvā bhātiyamahārājā vīmaṃsitukāmatāya ekasmiṃ gabbhe catujātigandhehi paribhaṇḍaṃ katvā sugandhapupphāni āharāpetvā ekassa samuggassa majjhe sumanapupphamuṭṭhiṃ ṭhapetvā sesāni tassa samantato muṭṭhiṃ katvā ṭhapetvā dvāraṃ pidhāya bahi nikkhanto. Athassa muhuttaṃ bahi vītināmetvā dvāraṃ vivarivā pavisantassa sabbapaṭhamaṃ sumanapupphagandho ghānaṃ pahari. So mahātalasmiṃyeva mahācetiyaḥbhimukho nipajjitvā “vassikaṃ tesam agganti kathe-ntena sukathitaṃ sammāsambuddhenā”ti cetiyaṃ vandi. **Khuddarājānoti** khudda-
karājāno. Kūṭarājānotipi pāṭho.

6. Āhuneyyasuttavaṇṇanā

16. Chaṭṭhe **gotrabhūti** sikhāpattavipassanābhūtena nibbānārammaṇena gotra-
bhuñāṇena samannāgato.

7. Paṭhamanāthasuttavaṇṇanā

17. Sattame **sanāthāti** sañātakā bahuñātivaggā hutvā viharatha. Nāthaṃ karo-
ntīti **nāthakaraṇā**, attano sanāthabhāvakarā paṭiṭṭhākarāti attho. **Kalyāṇamittoti**-ā-
dīsu sīlādiguṇasampannā kalyāṇā mittā assāti **kalyāṇamitto**. Tevassa ṭhānanisajjā-
dīsu saha ayanato sahāyāti **kalyāṇasahāyo**. Cittena ceva kāyena ca kalyāṇamitte-
suyeva sampavaṅko oṇatoti **kalyāṇasampavaṅko**. **Suvaco hotīti** sukhena vattabbo
hoti, sukhena anusāsitaṃ. **Khamoti** gāḥena pharusena kakkhaḥena vutto
khamati na kuppati. **Padakkhiṇaggāhī anusāsaninti** yathā ekacco ovadiyamāno
vāmato gaṇhāti, paṭippharati vā, assuṇanto vā gacchati, evaṃ akatvā “ovadatha (3.0
bhante, anusāsatha, tumhesu anovadantesu ko añño ovadissati”ti padakkhiṇaṃ
gaṇhāti.

Uccāvacānīti uccānīcāni. **Kiṃkaraṇīyānīti** “kiṃ karomī”ti evaṃ vatvā kattabbaka-
mmāni. Tattha uccakammaṃ nāma cīvarassa karaṇaṃ rajanaṃ, cetiye sudhā-
kammaṃ, uposathāgāracetiyaḥgharabodhigharesu kattabbakammanti evamādi.
Avacakammaṃ nāma pādadhovanamakkhānādikhuddakakammaṃ. **Tatrūpāyā-**
yāti tatrūpagamaniyāya. **Alaṃ kātunti** kātuṃ samattho hoti. **Alaṃ saṃvidhātunti**
vicāretuṃ samattho hoti.

Dhamme assa kāmo sinehoti **dhammakāmo**, tepiṭakaṃ buddhavacanaṃ piyāya-
tīti attho. **Piyasamudāhāroti** parasmim kathente sakkaccaṃ suṇāti, sayañca
paresaṃ desetukāmo hotīti attho. **Abhidhamme abhivinayeti** ettha dhammo abhi-
dhammo, vinayo abhivinayoti catukkaṃ vedittabbaṃ. Tattha **dhammoti** suttantapi-
ṭakaṃ. **Abhidhammoti** satta pakaraṇāni. **Vinayoti** ubhatovibhaṅgo. **Abhivinayoti**
khandhakaparivārā. Atha vā suttantapiṭakampi abhidhammapīṭakampi dhammo
eva, maggaphalāni abhidhammo. Sakalavinayapiṭakaṃ vinayo, kilesavūpasama-
karaṇaṃ abhivinayo. Iti sabbasmimpi ettha dhamme ca abhidhamme ca vinaye ca

abhivinaye ca uḷārapāmojjo hotīti attho. **Kusalesu dhammesūti** kāraṇatthe bhumbaṃ, cātubhūmakakusaladhammakāraṇā tesam adhigamattāya anikkhittadhuro hotīti attho.

8. Dutīyanāthasuttavaṇṇanā

18. Aṭṭhame **therānukampitassāti** therehi ovādānusāsānidānasamussāhitāya hitapharaṇāya anukampitassa.

9. Paṭhama-ariyāvāsasuttavaṇṇanā

19. Navame **ariyavāsāti** ariyānaṃ āvāso, te āvasiṃsu āvasanti āvasissantīti ariyāvāsā. **Yadariyāti** ye vāse ariyā.

10. Dutīya-ariyāvāsasuttavaṇṇanā

20. Dasamaṃ (3.0292) yasmā kururaṭṭhavāsino bhikkhū gambhīrapaññākārakā yuttappayuttā, tasmā yathā tesam dīghanikāyādīsu mahānidānādīni kathitāni, evamidampi gambhīraṃ sukhumaṃ tilakkhaṇāhataṃ suttaṃ tattheva avoca. Tattha **pañcaṅgavippahīnoti** pañcahi aṅgehi vippayutto hutvā khīṇāsavo avasi vasati vasissati. Tasmā ayaṃ pañcaṅgavippahīnatā ariyāvāsoti vutto. Esa nayo sabbattha. **Evaṃ kho, bhikkhave, bhikkhu chaḷaṅgasamannāgato hotīti** chaḷaṅguppekkhāya samannāgato hoti. Chaḷaṅguppekkhā dhammā nāma keti? **Ñāṇādayo.** “Ñāṇan”ti vutte kiriyato cattāri ñāṇasampayuttacittāni labbhanti, “satatavihāro”ti vutte aṭṭha mahācittāni, “rajjanadussanaṃ natthī”ti vutte dasa cittāni labbhanti. Somanassaṃ āsevanavasena labbhati. **Satārakkhena cetāsāti** khīṇāsavassa hi tīsu dvāresu sabbakāle sati ārakkhakkiccam sādheti. Tenevassa carato ca tiṭṭhato ca suttassa ca jāgarassa ca satataṃ samitaṃ ñāṇadassanaṃ paccupaṭṭhitaṃ hotīti vuccati.

Puthusamaṇabrāhmaṇānanti bahūnaṃ samaṇabrāhmaṇānaṃ. Ettha **samaṇāti** pabbajjūpagatā, **brāhmaṇāti** bhovādino. **Puthupaccekasaccānīti** bahūni pāṭekkasaccāni. “Idameva dassanaṃ saccaṃ, idameva saccaṃ”ti evaṃ pāṭiyekkaṃ gahitāni bahūni saccānīti attho. **Nuṇṇānīti** nīhaṭāni. **Panuṇṇānīti** suṭṭhu nīhaṭāni. **Cattānīti** vissaṭṭhāni. **Vantānīti** vamitāni. **Muttānīti** chinnabandhanāni katāni. **Pahīnānīti** pajahitāni. **Paṭinissaṭṭhānīti** yathā na puna cittaṃ ārohani, evaṃ paṭinissajjitāni. Sabbāneva tāni gahitaggahaṇassa vissaṭṭhabhāvavevacanāni.

Samavayasatṭhesanoti ettha **avayāti** anūnā, **satṭhāti** vissaṭṭhā. Sammā avayā satṭhā esanā assāti samavayasatṭhesano, suṭṭhuvissaṭṭhasabba-esanoti attho. **Rāgā cittaṃ vimuttanti** ādīhi maggassa kiccanipphatti kathitā. **Rāgo me pahīnoti** ādīhi paccavekkhaṇaphalaṃ kathitaṃ. Sesam sabbattha uttānatthamevāti.

Nāthavaggo dutiyo.

3. Mahāvaggo

1. Sīhanādasuttavaṇṇanā

21. Tatiyassa (3.0293) paṭhame **visamagateti** visamaṭṭhānesu gocaresu gate. **Saṅghātaṃ āpādesinti** ghātaṃ vadhaṃ pāpesiṃ. Tassa hi ussannatejatāya khuddakesu pāṇesu anukampā hoti. Tasmā ye paṭisattubhāvena saṅghātuṃ sakkhissanti, ye dubbalā palāyitukāmā bhavissanti, te palāyissantiti sīhanādaṃ naditvāva gocarāya pakkamati. **Tathāgatassetam̐ adhivacananti** yadi hi sahanatāya hananatāya ca siho, tathāgato hi sabbāni ca iṭṭhāniṭṭhāni sahati, sabbaparaṃppavādino ca vādānaṃ nimmathanena hanati. **Idamassa hoti sīhanādasminti** ayaṃ massa sīhanādo.

Tathāgatabalānīti aññehi asādhāraṇāni tathāgatasseva balāni. Yathā vā pubbabuddhānaṃ balāni puññasampattiyā āgatāni, tathā āgatabalānītipi attho. Tattha duvidhaṃ tathāgatassa balaṃ kāyabalaṃ ñāṇabalaṃ. Tesu kāyabalaṃ hatthikulānusārena veditabbaṃ. Vuttañhetam̐ porāṇehi-

“Kālāvakañca gaṅgeyyaṃ, paṇḍaraṃ tambapiṅgalaṃ;
gandhamaṅgalaHEMAṆCA, uposathachaddantime dasā”ti.

Imāni dasa hatthikulāni. Tattha **kālāvakanti** pakatihatthikulaṃ daṭṭhabbaṃ. Yaṃ dasannaṃ purisānaṃ kāyabalaṃ, taṃ ekassa kālāvakassa hatthino. Yaṃ dasannaṃ kālāvakānaṃ balaṃ, taṃ ekassa gaṅgeyyassa. Yaṃ dasannaṃ gaṅgeyyānaṃ, taṃ ekassa paṇḍarassa. Yaṃ dasannaṃ paṇḍarānaṃ, taṃ ekassa tambassa. Yaṃ dasannaṃ tambānaṃ, taṃ ekassa piṅgalassa. Yaṃ dasannaṃ piṅgalānaṃ, taṃ ekassa gandhahatthino. Yaṃ dasannaṃ gandhahatthīnaṃ, taṃ ekassa maṅgalassa. Yaṃ dasannaṃ maṅgalānaṃ, taṃ ekassa hemassa. Yaṃ dasannaṃ hemānaṃ, taṃ ekassa uposathassa. Yaṃ dasannaṃ uposathānaṃ, taṃ ekassa chaddantassa. Yaṃ dasannaṃ chaddantānaṃ, taṃ ekassa tathāgatassa. Nārāyanasaṅghātabalantipi idameva (3.0294) vuccati. Tadevaṃ pakatihatthigaṇanāya hatthīnaṃ koṭisahassānaṃ, purisagaṇanāya dasannaṃ purisakoṭisahassānaṃ balaṃ hoti. Iduṃ tāva tathāgatassa **kāyabalaṃ**.

Ñāṇabalaṃ pana pāḷiyaṃ tāva āgatameva. Dasabalañāṇaṃ, majjhime āgataṃ catuvesārajañāṇaṃ, aṭṭhasu parisāsu akampanañāṇaṃ, catuyoniparicchedañāṇaṃ, pañcagatiparicchedañāṇaṃ, saṃyuttake (saṃ. ni. 2.33) āgatāni tesattati ñāṇāni sattasattati ñāṇānīti, evaṃ aññānīpi anekāni **ñāṇabalaṃ** nāma. Idhāpi ñāṇabalameva adhippetam̐. Ñāṇaṃhi akampiyatṭhena upatthambhanaṭṭhena ca balanti vuttaṃ.

Āsabhaṃ ṭhānanti seṭṭhatṭhānaṃ uttamaṭṭhānaṃ. Āsabhā vā pubbabuddhā, tesam̐ ṭhānanti attho. Apica gavasatajeṭṭhako usabho, gavasahassajeṭṭhako vasabho. Vajasatajeṭṭhako vā usabho, vajasahassajeṭṭhako vasabho. Sabbagava-

seṭṭho sabbaparissayasaho seto pāsādiko mahābhāravaho asanisatasaddehipi asampakampiyo nisabho, so idha usabhoti adhippeto. Idampi hi tassa pariyāyavacanaṃ. Usabhassa idanti **āsabhaṃ**. **Ṭhānanti** catūhi pādehi pathaviṃ uppīletvā acalaṭṭhānaṃ. Idaṃ pana āsabhaṃ viyāti āsabhaṃ. Yatheva hi nisabhasaṅkhāto usabho usabhabalena samannāgato catūhi pādehi pathaviṃ uppīletvā acalaṭṭhānena tiṭṭhati, evaṃ tathāgatopi dasahi tathāgatabalehi samannāgato catūhi vesārajjapādehi aṭṭhaparisapathaviṃ uppīletvā sadevake loke kenaci paccatthikena paccāmittena akampiyo acalaṭṭhānena tiṭṭhati. Evaṃ tiṭṭhamāno ca taṃ āsabhaṃ ṭhānaṃ paṭijānāti upagacchati na paccakkhāti attani āropeti. Tena vuttaṃ- “āsabhaṃ ṭhānaṃ paṭijānāti” ti.

Parisāsūti aṭṭhasu parisāsu. **Sīhanādaṃ nadatīti** seṭṭhanādaṃ nadati, abhītanādaṃ nadati, sīhanādasadisamaṃ vā nādaṃ nadati. Tatrāyaṃ upamā- yathā sīho sīhabalena samannāgato sabbattha visārado vigatalomahaṃso sīhanādaṃ nadati, evaṃ tathāgatasīhopi tathāgatabalehi samannāgato aṭṭhasu parisāsu visārado vigatalomahaṃso “iti (3.0295) sakkāyo” ti-ādinā nayena nānāvidhadesanāvilāsasampannaṃ sīhanādaṃ nadati. Tena vuttaṃ- “parisāsu sīhanādaṃ nadati” ti.

Brahmacakkaṃ pavatteti Ti ettha **brahmanti** seṭṭhaṃ uttamaṃ visiṭṭhaṃ. **Cakkanti** dhammacakkaṃ. Taṃ panetaṃ duvidhaṃ hoti paṭivedhaññaṇṇeva desanāññaṇṇa. Tattha paññāpabhāvitā attano ariyaphalāvahaṃ paṭivedhaññaṃ, karuṇāpabhāvitā sāvakaṇaṃ ariyaphalāvahaṃ desanāññaṃ. Tattha paṭivedhaññaṃ uppajjamānaṃ uppannanti duvidhaṃ. Tañhi abhinikkhamaṇato yāva arahattamaggā uppajjamānaṃ, phalakkhaṇe uppannaṃ nāma. Tusitabhavanaṇato vā yāva mahābodhipallaṅke arahattamaggā uppajjamānaṃ, phalakkhaṇe uppannaṃ nāma. Dīpaṅkarato vā paṭṭhāya yāva arahattamaggā uppajjamānaṃ, phalakkhaṇe uppannaṃ nāma. Desanāññaṇṇampi pavattamānaṃ pavattanti duvidhaṃ. Tañhi yāva aññāsikoṇḍaññaṇṇassa sotāpattimaggā pavattamānaṃ, phalakkhaṇe pavattaṃ nāma. Tesu paṭivedhaññaṃ lokuttaraṃ, desanāññaṇṇaṃ lokiyaṃ. Ubhayampi panetaṃ aññehi asādhāraṇaṃ, buddhānaṃ yeva orasaññaṇṇaṃ.

Idāni yehi dasahi balehi samannāgato tathāgato āsabhaṃ ṭhānaṃ paṭijānāti, tāni vitthārato dassetuṃ **katamāni dasa? Idha, bhikkhave, tathāgato ṭhānaṇca ṭhānatoti**-ādimāha. Tattha **ṭhānaṇca ṭhānatoti** kāraṇaṇca kāraṇato. Kāraṇaṇhi yasmā tattha phalaṃ tiṭṭhati, tadāyattavuttitāya uppajjati ceva pavattati ca, tasmā ṭhānanti vuccati. Taṃ bhagavā “ye ye dhammā yesaṃ yesaṃ dhammānaṃ hetū paccayā uppādāya, taṃ taṃ ṭhānaṃ. Ye ye dhammā yesaṃ yesaṃ dhammānaṃ na hetū na paccayā uppādāya, taṃ taṃ aṭṭhānaṃ” ti pajānanto

ṭhānañca ṭhānato aṭṭhānañca aṭṭhānato yathābhūtaṃ pajānāti. Abhidhamme panetaṃ “tattha katamaṃ tathāgatassa ṭhānañca ṭhānato aṭṭhānañca aṭṭhānato yathābhūtaṃ ñāṇa”ti-ādinā (vibha. 809) nayena vitthāritameva. **Yampīti** yena ñāṇena. **Idampi, bhikkhave, tathāgatassāti** idampi ṭhānāṭṭhānañāṇaṃ tathāgatassa tathāgatabalaṃ nāma hotīti attho. Evaṃ sabbapadesu yojanā veditabbā.

Kammasamādānānti samādiyivā katānaṃ kusalākusalakammānaṃ, kamma-meva vā kammasamādānaṃ. **Ṭhānaso hetusoti** paccayato ceva (3.0296) hetuto ca. Tattha gati-upadhikālapayogā vipākassa ṭhānaṃ, kammaṃ hetu. Imassa pana ñāṇassa vitthārakathā “atthekaccāni pāpakāni kammasamādānāni gatisampattipaṭibāḥhāni na vipaccantī”ti-ādinā (vibha. 810) nayena abhidhamme āgatāyeva.

Sabbatthagāmininti sabbagatigāminiñca agatigāminiñca. **Paṭipadanti** maggaṃ. **Yathābhūtaṃ pajānātīti** bahūsupi manussesu ekameva pāṇaṃ ghātentesu “imassa cetanā nirayagāminī bhavissati, imassa tiracchānayanigāminī”ti iminā nayena ekavatthusmimpi kusalākusalacetanāsaṅkhātānaṃ paṭipattīnaṃ aviparītato sabhāvaṃ jānāti. Imassapi ca ñāṇassa vitthārakathā “tattha katamaṃ tathāgatassa sabbatthagāminiṃ paṭipadaṃ yathābhūtaṃ ñāṇaṃ? Idha tathāgato ayaṃ maggo ayaṃ paṭipadā nirayagāminīti pajānāti”ti-ādinā (vibha. 811) nayena abhidhamme āgatāyeva.

Anekadhātunti cakkhūdhātu-ādīhi kāmādhātu-ādīhi vā dhātūhi bahūdhātuṃ. **Nānādhātunti** tāsāmyeva dhātūnaṃ vilakkhaṇatāya nānappakāradhātuṃ. **Lokanti** khandhāyatanadhātulokaṃ. **Yathābhūtaṃ pajānātīti** tāsāṃ dhātūnaṃ aviparītato sabhāvaṃ paṭivijjhati. Idampi ñāṇaṃ “tattha katamaṃ tathāgatassa anekadhātu-nānādhātulokaṃ yathābhūtaṃ ñāṇaṃ? Idha tathāgato khandhanānattaṃ pajānātī”ti-ādinā nayena abhidhamme vitthāritameva.

Nānādhimuttikatanti hīnādīhi adhimuttīhi nānādhimuttikabhāvaṃ. Idampi ñāṇaṃ “tattha katamaṃ tathāgatassa sattānaṃ nānādhimuttikataṃ yathābhūtaṃ ñāṇaṃ? Idha tathāgato pajānāti santi sattā hīnādhimuttikā”ti-ādinā nayena abhidhamme vitthāritameva.

Parasattānanti padhānasattānaṃ. **Parapuggalānanti** tato aññesaṃ hīnasa-ttānaṃ. Ekatthameva vā etaṃ padadvayaṃ, veneyyavasena dvidhā vuttaṃ. **Indriya-paropariyattanti** saddhādīnaṃ indriyānaṃ parabhāvañca aparabhāvañca, vuddhiñca hāniñcāti attho. Imassāpi ñāṇassa vitthārakathā “tattha katamaṃ tathāgatassa parasattānaṃ parapuggalānaṃ indriyaparopariyattaṃ yathābhūtaṃ ñāṇaṃ (3.0297)? Idha tathāgato sattānaṃ āsayaṃ pajānāti”ti (vibha. 814) ādinā nayena abhidhamme āgatāyeva.

Jhānavimokkhasamādhisamāpattīnanti paṭhamādīnaṃ catunnaṃ jhānānaṃ, “rūpī rūpāni passatī”ti-ādīnaṃ aṭṭhannaṃ vimokkhānaṃ, savitakkasavicārādīnaṃ tiṇṇaṃ samādhīnaṃ, paṭhamajjhānasamāpattī-ādīnañca navannaṃ anupubbasa-māpattīnaṃ. **Samkilesanti** hānabhāgiyadhammaṃ. **Vodānanti** visesabhāgiya-dhammaṃ. **Vuṭṭhānanti** “vodānampi vuṭṭhānaṃ, tamhā tamhā samādhimhā vuṭṭhānampi vuṭṭhāna”ti (vibha. 828) evaṃ vuttaṃ paguṇajjhānañceva bhavaṅgaphala-samāpattiyo ca. Heṭṭhimaṃ heṭṭhimañhi paguṇajjhānaṃ uparimassa uparimassa

padaṭṭhānaṃ hoti, tasmā “vodānampi vuṭṭhānan”ti vuttaṃ. Bhavaṅgena pana sabbajjhānehi vuṭṭhānaṃ hoti, phalasaṃpattiyā nirodhasaṃpattito vuṭṭhānaṃ hoti. Taṃ sandhāya ca “tamhā tamhā saṃādhimhā vuṭṭhānampi vuṭṭhānan”ti vuttaṃ. Idampi ñāṇaṃ “tatha katamaṃ tathāgatassa jhānavimokkhasaṃādhisa-
māpattīnaṃ saṃkilesaṃ vodānaṃ vuṭṭhānaṃ yathābhūtaṃ ñāṇaṃ? **Jhāyīti** cattāro jhāyī, atthekacco jhāyī sampattiṃyeva saṃānaṃ vipattīti pacceṭi”ti-ādinā (vibha. 828) nayena abhidhamme vitthāritameva. Sabbañāṇaṃ vitthārakathāya vinicchayo sammohavinodaniyā vibhaṅgaṭṭhakathāya vutto, pubbenivāsānussati-
dibbacakkhuñṇakathā visuddhimagge vitthāritā, āsavakkhayaṃkathā heṭṭhā vuttā-
yevāti.

Tattha paravādīkathā hoti “dasabalañāṇaṃ nāma pāṭiyekkaṃ ñāṇaṃ natthi, sabbaññutaññāṇassevāyaṃ pabhedo”ti. Taṃ na tathā daṭṭhabbaṃ. Aññameva hi dasabalañāṇaṃ, aññaṃ sabbaññutaññāṇaṃ. Dasabalañāṇaṃhi sakasakakicca-
meva jānāti, sabbaññutaññāṇaṃ tampi tato avasesampi jānāti. Dasabalañāṇesu hi paṭhamaṃ kāraṇākāraṇameva jānāti, dutiyaṃ kammavipākantameva, tatiyaṃ kamma-
paricchedameva, catutthaṃ dhātunānattakāraṇameva, pañcamaṃ sattānaṃ ajjhāsayaḍhimuttameva, chaṭṭhaṃ indriyānaṃ tikkhamudubhāvameva, sattaṃ jhānādīhi saddhiṃ tesāṃ saṃkilesādimeva, aṭṭhamaṃ pubbenivuttha-
kkhandhasantatimeva, navamaṃ sattānaṃ cutipaṭisandhimeva, dasamaṃ sacca-
paricchedameva. Sabbaññutaññāṇaṃ pana etehi jānitabbañca tato uttariñca pajā-
nāti, etesaṃ pana kiccaṃ na sabbaṃ karoti. Tañhi jhānaṃ hutvā appetuṃ (3.0298) na sakkoti, iddhi hutvā vikubbituṃ na sakkoti, maggo hutvā kilese khepetuṃ na sakkoti.

Apica paravādī evaṃ pucchitabbo “dasabalañāṇaṃ nāmetaṃ savitakkasavi-
cāraṃ avitakkavicāramattaṃ avitakka-avicāraṃ, kāmāvacaraṃ rūpāvacaraṃ arū-
pāvacaraṃ, lokiyaṃ lokuttaraṃ”ti. Jānanto “paṭipāṭiyā satta ñāṇāni savitakkasavi-
cārāni”ti vakkhati, “tato parāni dve avitakka-avicārāni”ti vakkhati. “Āsavakkhaya-
ñāṇaṃ siyā savitakkasavicāraṃ siyā avitakkavicāramattaṃ, siyā avitakka-avicāra-
na”ti vakkhati. Tathā “paṭipāṭiyā satta kāmāvacarāni, tato dve rūpāvacarāni, ava-
sāne ekaṃ lokuttaraṃ”ti vakkhati. “Sabbaññutaññāṇaṃ pana savitakkasavicāra-
meva lokiyamevā”ti vakkhati.

Evamettha anupadavaṇṇanaṃ ñatvā idāni yasmā tathāgato paṭhamaṃyeva
ṭhānāṭṭhānañāṇena veneyyasattānaṃ āsavakkhayaḍhigamassa ceva anadhiga-
massa ca ṭhānāṭṭhānabhūtaṃ kilesāvaraṇābhāvaṃ passati lokiyasammādiṭṭhiṭṭhā-
nādidassanato niyatamicchādiṭṭhiṭṭhānābhāvadassanato ca. Atha nesaṃ kamma-
vipākāñāṇena vipākāvaraṇābhāvaṃ passati tihetukappaṭisandhidassanato,
sabbatthagāminipaṭipadāñāṇena kammāvaraṇābhāvaṃ passati ānantariyaka-
mmābhāvadassanato. Evamanāvaraṇānaṃ anekadhātunānādhātuñāṇena anukū-
ladhammadesanattaṃ cariyāvisesaṃ passati dhātuvemattadassanato. Atha
nesaṃ nānādhimuttikatañāṇena adhimuttiṃ passati payogaṃ anādiyitvāpi adhi-
muttivaseṇa dhammadesanattaṃ. Athevaṃ diṭṭhādhimuttīnaṃ yathāsatti yathā-
balaṃ dhammaṃ desetuṃ indriyaparopariyattiñāṇena indriyaparopariyattaṃ

passati saddhādīnaṃ tikkhamudubhāvadassanato. Evaṃ pariññātindriyaparopariyattā pana te sace dūre honti, atha jhānādiññāṇena jhānādīsu vasībhūtattā iddhivisesena te khippaṃ upagacchati. Upagantvā ca nesaṃ pubbenivāsānussatiññāṇena pubbjātibhavaṃ, dibbacakkhānubhāvato pattabbena cetopariyaññāṇena sampati cittavisesaṃ passanto āsavakkhayaññāṇanubhāvena āsavakkhayagāminiyā paṭipadāya vigatasammohattā āsavakkhayāya dhammaṃ deseti. Tasmā iminānukkamena imāni balāni vuttānīti veditabbāni.

2. Adhivuttipadasuttavaṇṇanā

22. Dutiye (3.0299) **ye te dhammāti** ye te dasabalaññāṇaṃ sabbaññutaññāṇadhama. **Adhivuttipadānanti** adhivacanapadānaṃ, khandhāyatanadhātudhammānanti attho. Adhivuttiyoti hi adhivacanāni vuccanti, tesam ye padabhūtā desanāya padaṭṭhānattā. Atītā buddhāpi hi ete dhamme kathayiṃsu, anāgatāpi eteva kathayissanti. Tasmā khandhādayo adhivuttipadāni nāma. Tesam adhivuttipadānaṃ. Atha vā bhūtamattaṃ abhibhavitvā yathāsabhāvato aggahetvā vattanato adhivuttiyoti diṭṭhiyo vuccanti, adhivuttīnaṃ padāni adhivuttipadāni, diṭṭhidīpakāni vacanānīti attho. Tesam adhivuttipadānaṃ diṭṭhivohārānaṃ. **Abhiññā sacchikiriyāyāti** jānitvā paccakkhakarāṇatthāya. **Visāradoti** ñāṇasomanassappatto. **Tatthāti** tesu dhammesu **tesam tesam tathā tathā dhammaṃ desetunti** tesam tesam diṭṭhigatīkānaṃ vā itaresaṃ vā āsayam natvā tathā tathā dhammaṃ desetum. **Hīnaṃ vā hīnanti** ñassatīti hīnaṃ vā dhammaṃ “hīno dhammo”ti jānissati. **Ñāteyyanti** ñātabbaṃ. **Daṭṭheyyanti** daṭṭhabbaṃ. **Sacchikareyyanti** sacchikātabbaṃ. **Tattha tattha yathābhūtaññānanti** tesu tesu dhammesu yathāsabhāvāññāṇaṃ. Iminā sabbaññutaññāṇaṃ dasseti. Evaṃ sabbaññutaññāṇaṃ dassetvā puna dasabalaññāṇaṃ dassento **dasayimānīti**-ādīmāha. Dasabalaññāṇampi hi tattha tattha yathābhūtaññānamevāti.

3. Kāyasuttavaṇṇanā

23. Tatiye **āpanno hoti kañcideva desanti** kañci āpattikoṭṭhāsaṃ āpanno hoti. **Anuviccāti** anupavisitvā pariyogāhetvā. **Kāyaduccaritanti** tividhaṃ kāyaduccaritaṃ. **Vacīduccaritanti** catubbidhaṃ vacīduccaritaṃ. **Pāpikā issāti** lāmikā usūyā. **Paññāya disvāti** sahavipassanāya maggapaññāya passitvā passitvā pahātabbā. **Ijhatīti** samijjhati. **Upavāsassāti** nissāya upasaṅkamtivā vasantassa. **Abhibhuyyāti** ajjhottharivā (3.0300) madditvā. **Irīyatīti** vattati. Imasmiṃ sutte sahavipassanāya maggo kathito.

4. Mahācundasuttavaṇṇanā

24. Catutthe **jānāmimaṃ dhammanti** iminā ñāṇavādassa vadanākāro vutto. **Bhāvitakāyomhīti**-ādīhi bhāvanāvādassa. Tatiyavāre dvepi vādā ekato vuttā,

tayopi cete arahattameva paṭijānanti. **Aḍḍhavādaṃ vadeyyāti** aḍḍhohamasmiṭi vādaṃ vadeyya. **Upanīhātunti** nīharitvā dātuṃ.

5. Kasiṇasuttavaṇṇanā

25. Pañcame sakalaṭṭhena kasiṇāni, tadārammaṇānaṃ dhammānaṃ khettaṭṭhena adhiṭṭhānaṭṭhena vā āyatanānīti **kasiṇāyatanāni**. **Uddhanti** upari gagaṇatalābhimukhaṃ. **Adhoti** heṭṭhā bhūmitalābhimukhaṃ. **Tiriyanti** khettaṃaṇḍalaṃ viya samantā paricchinditvā. Ekacco hi uddhameva kasiṇaṃ vaḍḍheti, ekacco adho, ekacco samantato. Tena tena vā kāraṇena evaṃ pasāreti ālokaṃiva rūpadassana-kāmo. Tena vuttaṃ- “pathavīkasiṇameko sañjānāti uddhaṃ adho tiriyaṃ”ti. **Advayanti** idaṃ pana ekassa aññabhāvānupagamanatthaṃ vuttaṃ. Yathā hi udakaṃ pavīṭṭhassa sabbadisāsu udakameva hoti na aññaṃ, evameva pathavīkasiṇaṃ pathavīkasiṇameva hoti. Natthi tassa aññakasiṇasambhedoti. Eseva nayo sabbattha. **Appamāṇanti** idaṃ tassa tassa pharaṇa-appamāṇavasena vuttaṃ. Tañhi cetasā pharanto sakalameva pharati, “ayamassa ādi, idaṃ majjhaṃ”ti pamāṇaṃ na gaṇhāti. **Viññāṇakasiṇanti** cettha kasiṇugghāṭimākāse pavattaviññāṇaṃ. Tattha kasiṇavasena kasiṇugghāṭimākāse, kasiṇugghāṭimākāsavasena tattha pavattaviññāṇe uddhaṃ-adhotiriyatā veditabbā. Ayamettha saṅkhepo, kammaṭṭhānabhāvanāyena panetāni pathavīkasiṇādīni vitthārato visuddhimagge (visuddhi. 1.51 ādayo) vuttāneva.

6. Kālīsuttavaṇṇanā

26. Chaṭṭhe (3.0301) **kumāripañhesūti** kumārīnaṃ māradhītānaṃ pucchāsu. **Atthassa pattiṃ hadayassa santinti** dvīhipi padehi arahattameva kathitaṃ. **Senanti** rāgādikilesasenaṃ. **Piyasātarūpanti** piyajātikesu ca sātajātikesu ca vatthūsu uppajjanato evaṃladdhanāmaṃ. **Ekohaṃ jhāyaṃ sukhamanubodhinti** evaṃ kilesasenaṃ jinitvā ahaṃ ekakova jhāyanto sukhaṃ anubujjhiṃ sacchi-a-kāsiṃ. **Sakkhinti** sakkhibhāvappattaṃ dhammasakkhiṃ. **Na sampajjati kenaci meti** mayhaṃ kenaci saddhiṃ mittadhammo nāma natthi. **Pathavīkasiṇasamāpattiparamā kho, bhagini, eke samaṇabrāhmaṇā atthoti abhinibbattesunti** pathavīkasiṇasamāpattiparamo uttamo atthoti gahetvā abhinibbattesuṃ. **Yāvatā kho, bhagini, pathavīkasiṇasamāpattiparamatāti** yattakā pathavīkasiṇasamāpattiyā uttamakoṭi. **Tadabhiññāsi bhagavāti** taṃ bhagavā abhiññāpaññāya abhiññāsi. **Assādamaddasāti** samudayasaccaṃ addasa.

Ādinavamaddasāti dukkhasaccaṃ addasa. **Nissaraṇamaddasā**ti nirodhasaccaṃ addasa. **Maggāmaggañāṇadassanamaddasā**ti maggasaccaṃ addasa. **Atthassa pattī**ti etesaṃ catunnaṃ saccānaṃ diṭṭhattā arahattasaṅkhātassa atthassa patti, sabbadarathapariḷāhavūpasantatāya **hadayassa santī**ti.

7. Paṭhamamahāpañhasuttavaṇṇanā

27. Sattame **abhijānāthā**ti abhijānitvā paccakkhaṃ katvā viharatha. **Abhiññāyā**ti abhijānitvā. **Idhā**ti imāya. **Dhammadesanāya vā dhammadesananti** yadidaṃ samaṇassa gotamassa dhammadesanāya saddhiṃ amhākaṃ dhammadesanaṃ, amhākaṃ vā dhammadesanāya saddhiṃ samaṇassa gotamassa dhammadesanaṃ ārabba nānākaraṇaṃ vuccetha, taṃ kiṃ nāmāti vadanti. Dutiyapadepi eseva nayo. Iti te majjhe bhinnasuvaṇṇaṃ viya sāsanaena saddhiṃ attano laddhiṃ vacanamattena samadhuraṃ ṭhapayimsu. **Neva abhinandiṃsūti** “evametan”ti na sampaṭicchimsu. **Nappaṭikkosiṃsūti** “na idaṃ evan”ti nappaṭisedhesuṃ. Kasmā? Te kira “titthiyā nāma andhasadisā jānitvā vā ajānitvā vā katheyun”ti nābhinaṇdiṃsu.

Na (3.0302) **sampāyissantī**ti sampādetvā kathetuṃ na sakkhissanti. **Uttari ca vighātanti** asampādanato uttarimpi dukkhaṃ āpajjissanti. Sampādetvā kathetuṃ asakkontānañhi dukkhaṃ uppajjati. **Yathā taṃ, bhikkhave, avisayasminti** ettha ca **tanti** nipātamattaṃ. **Yathā**ti kāraṇavacanaṃ, yasmā avisaye pañhaṃ pucchitā hotīti attho. **Ito vā pana sutvā**ti ito vā pana mama sāsanaato sutvā. Itoti tathāgata-topi tathāgatasāvakatopi. **Ārādheyā**ti paritoseyya, aññathā ārādhanāṃ nāma natthīti dasseti.

Ekadhammeti ekasmiṃ dhamme. Iminā uddeso dassito. Parato **katamasmiṃ ekadhammeti** iminā pañho dassito. **Sabbe sattā āhāraṭṭhitikā**ti idaṃ panettha veyyākaraṇaṃ. Sesesupi eseva nayo. **Sammā nibbindamānoti-ādīsu** pana sammā hetunā nayena nibbidānupassanāya nibbindanto ukkaṇṭhanto, virāgānupassanāya virajjanto, paṭisaṅkhānupassanāya muccanassa upāyaṃ katvā vimuccamāno, adhimokkhasena vā vimuccamāno sannīṭṭhānaṃ kurumānoti attho. Udayabbayehi paricchinditvā pubbantāparantadassanaena **sammā pariyantadassāvī**. **Sammadatthaṃ abhisameccā**ti sammā sabhāgatthaṃ ñāṇena abhisamāgantvā. **Dukkassantakaro hotīti** sakalavaṭṭadukkhassa pariyantaṃ parivaṭṭumaṃ karo hoti.

Sabbe sattāti kāmabhavādīsu ekavokārabhavādīsu ca sabbabhavesu sabbe sattā. **Āhāraṭṭhitikā**ti āhārato ṭhiti etesanti āhāraṭṭhitikā. Iti sabbasattānampi ṭhiti-hetu āhāro nāma eko dhammo, tasmīṃ ekadhamme. Nanu ca evaṃ sante yaṃ vuttaṃ- “asaññasattā devā ahetukā anāhārā aphasakā”ti-ādi (vibha. 1017), taṃ virujjhatīti. Na virujjhati. Tesañhi jhānaṃ āhāro hoti. Evaṃ santepi “cattārome, bhikkhave, āhārā”ti (saṃ. ni. 2.11) idaṃ virujjhatīti. Idampi na virujjhati. Etasmiñhi sutte nippariyāyena āhāralakkaṇā dhammā āhārāti vuttā, idha pana pariyāyena paccayo āhāroti vutto. Sabbadhammānañhi paccayo laddhuṃ vaṭṭati. So ca yaṃ

yaṃ phalaṃ janeti, taṃ taṃ āharati nāma. Tasmā āhāroti vuccati. Tenevāha- “avi-
jjampāhaṃ, bhikkhave, sāhāraṃ vadāmi, no anāhāraṃ. Ko (3.0303) ca, bhikkhave,
avijjāya āhāro? Pañca nīvaraṇātissa vacaniyan”ti (a. ni. 10.61). Ayaṃ idha adhi-
ppeto. Etasmiñhi paccayāhāre gahite pariyāyāhāropi nippariyāyāhāropi sabbo
gahitova hoti.

Tattha asaññībhava paccayāhāro labbhati. Anuppanne hi buddhe titthāyatane
pabbajitā vāyokasiṇe parikammaṃ katvā catutthajjhānaṃ nibbattetvā tato
vuṭṭhāya “dhi cittaṃ, dhi vatetaṃ cittaṃ, cittassa nāma abhāvoyeva sādhu.
Cittañhi nissāya vadhabandhādipaccayaṃ dukkhaṃ uppajjati. Citte asati natthetan”
ti khantiṃ ruciṃ uppādetvā aparihīnajjhānā kālaṃ katvā asaññībhava nibba-
ttanti. Yo yassa iriyāpatho manussaloke paṇihito ahosi, so tena iriyāpathena nibba-
ttitvā cittarūpasadiso hutvā pañca kappasatāni tiṭṭhati. Ettakaṃ addhānaṃ sayito
viya hoti. Evarūpānampi sattānaṃ paccayāhāro labbhati. Te hi yaṃ jhānaṃ
bhāvetvā nibbattā, tadeva nesaṃ paccayo hoti. Yathā jiyāvegena khittasaro yāva
jiyāvego atthi, tāva gacchati. Evaṃ yāva jhānapaccayo atthi, tāva tiṭṭhanti. Tasmīṃ
niṭṭhite khīṇavego viya saro patanti. Cavanakāle ca tesāṃ so rūpakāyo antaradhā-
yati, kāmāvacarasaññā uppajjati, tena saññuppādena te devā tamhā kāyā cutāti
paññāyanti.

Ye pana te nerayikā neva vuṭṭhānaphalūpajīvī, na puññaphalūpajīvīti vuttā,
tesāṃ ko āhāroti? Tesāṃ kammameva āhāro. Kiṃ pañca āhārā atthīti? Pañca, na
pañcāti idaṃ na vattabbaṃ, nanu “paccayo āhāro”ti vuttametaṃ. Tasmā yena
kammena niraye nibbattanti, tadeva tesāṃ ṭhitipaccayattā āhāro hoti. Yaṃ
sandhāya idaṃ vuttaṃ- “na ca tāva kālaṃ karoti, yāva na taṃ pāpakammaṃ
byantī hoti”ti (ma. ni. 3.250, 268; a. ni. 3.36).

Kabaḷikārāhāraṃ ārabbhāpi cettha vivādo na kātabbo. Mukhe uppajjanakhe-
ḷopi hi tesāṃ āhāraḷakiccaṃ sādheti. Kheḷo hi niraye dukkhavedaniyo hutvā
paccayo hoti, sagge sukhavedaniyo. Iti kāmabhava nippariyāyena cattāro āhārā,
rūpārūpabhavesu ṭhapetvā asaññe (3.0304) sesānaṃ tayo, asaññānañceva ava-
sesānañca paccayāhāroti iminā ākārena sabbe sattā āhāraṭṭhitikāti veditabbā.
Tattha cattāro āhāro yo vā pana koci paccayāhāro dukkhasaccaṃ, āhārasamuṭṭhā-
pikā purimataṇhā samudayasaccaṃ, ubhinnaṃ appavatti nirodhasaccaṃ, nirodha-
ppajānanā paññā maggasaccanti evaṃ catusaccavasena sabbavāresu yojanā
kātabbā.

8. Dutiyamahāpañhasuttavaṇṇanā

28. Atṭhame **kajaṅgalāyanti** evaṃnāmake nagare. **Kajaṅgalāti** kajaṅgalāvāsino.
Mahāpañhesūti mahanta-atthapariggāhakesu pañhesu. **Yathā mettha khāyatīti**
yathā me ettha upaṭṭhātī. **Sammā subhāvitacitto**ti hetunā nayena suṭṭhu bhāvita-
citto. **Eso ceva tassa atthoti** kiñcāpi bhagavatā “cattāro dhammā”ti-ādayo pañhā
“cattāro āhārā”ti-ādinā nayena vissajjitā, yasmā pana catūsu āhāresu pariññātesu
cattāro satipaṭṭhānā bhāvitā honti, tesu ca bhāvitesu cattāro āhārā pariññātāva

honti. Tasmā desanāvilāsenā byañjanamevettha nānaṃ, attho pana ekoyeva. Indriyādīsopi eseva nayo. Tena vuttaṃ- “eso ceva tassa attho”ti. Atthato hi ubhayaṃpettaṃ majjhe bhinnasuvaṇṇamiva hoti.

9. Paṭhamakosalasuttavaṇṇanā

29. Navame yāvatāti yattakā. Kāsikosalāti kāsikosalajanapadā. Attheva aññathattanti ṭhitassa aññathattaṃ atthiyeva. Atthi vipariṇāmoti maraṇampi atthiyeva. Tasmimpi nibbindatīti tasmimpi sampattijāte ukkaṇṭhati. Agge virajjatīti sampattiyā agge kosalarājabhāve virajjati. Pageva hīnasminti paṭhamataraṃyeva hīne ittaraṃmanussānaṃ pañca kāmagaṇajāte.

Manomayāti jhānāmanena nibbattā. **Bārāṇaseyyakanti** bārāṇasiyaṃ uppannaṃ. Tattha kira kappāsopi mudu, suttakantikāyopi tantavāyāpi chekā, udakampi suci siniddhaṃ. **Ubhatobhāgavimaṭṭhanti** dvīsopi passesu maṭṭhaṃ mudu (3.0305) siniddhaṃ khāyati. Catasso paṭipadā lokiyalokuttaramissikā kathitā. Saññāsu paṭhamā kāmāvacarasaññā, dutiyā rūpāvacarasaññā, tatiyā lokuttarasaññā, catutthā ākiñcaññāyatanaññā. Yasmā pana sā saññā aggāti āgatā, tato paraṃ saññāpaññatti nāma natthi, tasmā agganti vuttā.

Bāhirakānanti sāsanaṃ bahiddhā pavattānaṃ. **No cassaṃ no ca me siyāti** sace ahaṃ atīte na bhavissaṃ, etarahipi me ayaṃ attabhāvo na siyā. **Na bhavissāmi na me bhavissatīti** sacepi anāgate na bhavissāmi, na ca me kiñci palibodhajātaṃ bhavissati. **Agge virajjatīti** ucchedadiṭṭhiyaṃ virajjati. Ucchedadiṭṭhi hi idha nibbānassa santatāya agganti jātā.

Paramatthavisuddhanti uttamatthavisuddhiṃ. Nevasaññānāsaññāyatanaṃ samāpattiyā etaṃ adhivacanaṃ. Ākiñcaññāyatanañhi vipassanāpadaṭṭhānattā aggaṃ nāma jātaṃ, nevasaññānāsaññāyatanaṃ dīghāyukattā. **Paramadiṭṭhadhammani-bbānanti** imasmiññeva attabhāve paramanibbānaṃ. **Anupādā vimokkhoti** catūhi upādānehi aggaṃhetvā cittassa vimokkho. Arahattasetaṃ nāmaṃ. **Pariññanti** samatikkamaṃ. Tattha bhagavā paṭhamajjhānena kāmānaṃ pariññaṃ paññāpeti, arūpāvacarehi rūpānaṃ pariññaṃ paññāpeti, anupādānibbānena vedanānaṃ pariññaṃ paññāpeti. Nibbānañhi sabbavedayitappahānattā vedanānaṃ pariññā nāma. **Anupādāparinibbānanti** apaccayaparinibbānaṃ. Idaṃ pana suttaṃ kathento bhagavā anabhiratipīlitāni pañca bhikkhusatāni disvā tesāṃ anabhirativinodanattaṃ kathesi. Tepi anabhiratiṃ vinodetvā desanānusārena ñāṇaṃ pesetvā sotāpannā hutvā aparabhāge vipassanaṃ vadḍhetvā arahattaṃ pāpuṇiṃsūti.

10. Dutiyakosalasuttavaṇṇanā

30. Dasame uyyodhikā nivatto hotīti yuddhato nivatto hoti. **Laddhādhippāyoti** mahākosalaraññā kira bimbisārassa dhītaraṃ dentena dvinnaṃ rajjānaṃ antare satahassuṭṭhāno kāsīgāmo nāma dhītu dinno (3.0306). Ajātasattunā pitari

mārite mātāpissa rañño viyogasokena nacirasseva matā. Tato rājā pasenadiko-
salo “ajātasattunā mātāpitaro mārītā, mama pitu santako gāmo”ti tassatthāya
aṭṭaṃ karoti, ajātasattupi “mama mātu santako”ti tassa gāmassatthāya. Dvepi
mātulabhāgineyyā caturaṅginiṃ senaṃ sannayhitvā yujjhiṃsu. Tattha pasenadiko-
salo dve vāre ajātasattunā parājito nagarameva pāvisi. Tatiyavāre “kathaṃ nu kho
me jayo bhavēyyā”ti upassutivasena yujjhitabbākāraṃ ñatvā byūhaṃ racayitvā
ubho hi passehi parikkhipitvā ajātasattum gaṇhi. Tāvadeva jayādhippāyassa
laddhattā laddhādhippāyo nāma ahosi.

Yena ārāmo tena pāyāsīti bahinagare jayakhandhāvāraṃ nivesetvā “yāva
nagaraṃ alaṅkaronti, tāva dasabalaṃ vandissāmi. Nagaraṃ pavitṭhakālato
paṭṭhāya hi papañco hoti”ti amaccagaṇaparivuto yenārāmo tena pāyāsī, ārāmaṃ
pāvisi. Kasmīṃ kāle pāvisīti? Piṇḍapātappaṭikkantānaṃ bhikkhūnaṃ ovādaṃ
datvā sammāsambuddhe gandhakuṭiṃ pavitṭhe bhikkhusaṅghe ca ovādaṃ
sampaṭicchitvā attano attano rattitṭhānadivāṭṭhānāni gate. **Caṅkamantīti** kasmīṃ
samaye caṅkamanti? Paṇītabhojanapaccayassa thinamiddhassa vinodanattaṃ,
divā padhānikā vā te. Tādisānañhi pacchābhattaṃ caṅkamitvā nhatvā sarīraṃ
utuṃ gāhāpetvā nisajja samaṇadhammaṃ karontānaṃ cittaṃ ekaggaṃ hoti. **Ye te
bhikkhūti** so kira “kahaṃ satthā kahaṃ sugatoti pariveṇena pariveṇaṃ āgantvā
pucchitvāva pavisissāmī”ti vilokento araṇṇahatthī viya mahācaṅkame caṅkama-
māne paṃsukūlike bhikkhū disvā tesāṃ santikaṃ agamāsi. Taṃ sandhāyetaṃ
vuttaṃ. **Dassanakāmāti** passitukāmā. **Vihāroti** gandhakuṭiṃ sandhāya āhaṃsu.
Ataramānoti aturito, saṅikaṃ padapamāṇaṭṭhāne padaṃ nikkhipanto vattaṃ katvā
susammaṭṭhaṃ muttajālasinduvārasadisāṃ vālukaṃ avināsentoti attho. **Ālindanti**
pamukhaṃ. **Aggaḷanti** kavāṭaṃ. **Ukkāsitvāti** ukkāsitassaddaṃ katvā. **Ākoṭehīti** agga-
nakhena īsakaṃ kuñcīkāchiddasamīpe koṭehīti vuttaṃ hoti. Dvāraṃ kira ati-upari
amanussā, atihetṭhā dīghajātikā koṭenti. Tathā akoṭetvā majjhe chiddasamīpe koṭe-
tabbanti idaṃ dvāraakoṭanavattanti (3.0307) vadanti. **Vivari bhagavā dvāranti** na
bhagavā utṭhāya dvāraṃ vivarati, vivaratūti pana hatthaṃ pasāreti. Tato “bhagavā
tumhehi anekakappaṅkoṭīsu dānaṃ dadamānehi na sahatthā dvāravivaraṇa-
kammaṃ katan”ti sayameva dvāraṃ vivaṭaṃ. Taṃ pana yasmā

bhagavato manena vivaṭaṃ, tasmā “vivari bhagavā dvāraṃ” ti vattuṃ vaṭṭati.

Mettūpahāraṇti mettāsampayuttaṃ kāyikavācasika-upahāraṃ. **Kataññutanti** ayañhi rājā pubbe thūlasarīro ahosi, doṇapākaṃ bhuñjati. Athassa bhagavā divase divase thokaṃ thokaṃ hāpanatthāya-

“Manujassa sadā satīmato,
mattaṃ jānato laddhabhojane;
tanukassa bhavanti vedanā,
saṅikaṃ jīrati āyupālayan” ti. (saṃ. ni. 1.124)-

Imaṃ ovādaṃ adāsi. So imasmiṃ ovāde ṭhatvā divase divase thokaṃ thokaṃ hāpetvā anukkamena nāḷikodanaparamatāya saṅghāsi, gattānipissa tanūni thirāni jātāni. Taṃ bhagavatā kataṃ upakāraṃ sandhāya “kataññutaṃ kho ahaṃ, bhante, kataveditaṃ sampassamāno” ti āha. **Ariye ñāyeti** saḥavipassanake magge. **Vuddha-sīloti** vaḍḍhitasīlo. **Ariyasīloti** apothujjanikehi sīlehi samannāgato. **Kusalasīloti** anavajjehi sīlehi samannāgato. **Āraññakoti** jāyamānopi araññe jāto, abhisambujjhamānopi araññe abhisambuddho, devavimānakappāya gandhakuṭiyā vasantopi araññeyeva vasiti dassento evamāha. Sesam sabbattha uttānatthamevāti.

Mahāvaggo tatiyo.

4. Upālivaggo

1. Upālisuttavaṇṇanā

31. Catutthassa paṭhame **saṅghasutṭhutāyāti**-ādīsu saṅghasutṭhutā nāma saṅghassa sutṭhubhāvo, “sutṭhu devā” ti āgataṭṭhāne viya “sutṭhu, bhante” ti (3.0308) vacanasampannicchanabhāvo. Yo ca tathāgatassa vacanaṃ sampannicchati, tassa taṃ dīgharattaṃ hitāya sukhāya saṃvattati. Tasmā saṅghassa “sutṭhu, bhante” ti vacanasampannicchanatthaṃ paññattaṃ, asampannicchane ādīnavaṃ, sampannicchane ānisaṃsaṃ dassetvā, na balakkārena abhibhavitvāti etamatthaṃ āvikaronto āha- **saṅghasutṭhutāyāti**. **Saṅghaphāsutāyāti** saṅghassa phāsubhāvāya, saḥajīvitāya sukhavīhāratthāyāti attho.

Dummaṅkūnaṃ puggalānaṃ niggahāyāti dummaṅkūnāma dussīlapuggalā, ye maṅkutaṃ āpādiyamānāpi dukkhena āpajjanti, vītikkamaṃ karontā vā katvā vā na lajjanti, tesam niggahatthāya. Te hi sikkhāpade asati “kiṃ tumhehi diṭṭhaṃ, kiṃ suttaṃ, kiṃ amhehi kataṃ, katamasmiṃ vatthusmiṃ katamaṃ āpattiṃ ropetvā amhe niggāṇhathā” ti saṅghaṃ viheṭṭheyuṃ. Sikkhāpade pana sati te saṅgho sikkhāpadaṃ dassetvā saḥa dhammena niggahessati. Tena vuttaṃ- “dummaṅkūnaṃ puggalānaṃ niggahāyā” ti.

Pesalānanti piyasīlānaṃ bhikkhūnaṃ phāsuvīhāratthāya. Piyasīlā hi bhikkhū kattabbākattabbaṃ sāvajjānavajjaṃ vellaṃ mariyādañca ajānantā sikkhāttayapāri-

pūriyā ghaṭamānā kilamanti, te pana sāvajjānavajjaṃ vemaṃ mariyādañca ñatvā sikkhāpāripūriyā ghaṭamānā na kilamanti. Tena tesam sikkhāpadapaññāpanaṃ phāsuvihārāya saṃvattatiyeva. Yo vā dummañkūnaṃ puggalānaṃ niggaho, sveva tesam phāsuvihāro. Dussīlapuggale nissāya hi uposathappavāraṇā na tiṭṭhanti, saṅghakammāni nappavattanti, sāmaggī na hoti, bhikkhū anekaggā udde-sādīsu anuyuñjituṃ na sakkonti. Dussīlesu pana niggahitesu sabbopi ayaṃ upa-ddavo na hoti, tato pesalā bhikkhū phāsu viharanti. Evaṃ “pesalānaṃ bhikkhūnaṃ phāsuvihārāyā”ti ettha dvidhā attho veditabbo.

Diṭṭhadhammikānaṃ āsavānaṃ saṃvarāyāti diṭṭhadhammikā āsavā nāma asaṃvare ṭhitena tasmimyeva attabhāve pattabbā paṇippahāradaṇḍappahārasatthapahārahathacchedapādaccheda-akitti-ayasavippaṭisārādayo dukkhaviseso, tesam saṃvarāya pidahanāya āgamanamaggathakanāyāti attho. **Samparāyikā-**nanti samparāyikā āsavā nāma asaṃvare ṭhitena katapāpakammamūlakā (3.0309) samparāye narakādīsu pattabbā dukkhavisesā, tesam paṭighātathāya vūpasama-tthāya.

Appasannānanti sikkhāpadapaññattiyā hi sati sikkhāpadapaññattiṃ ñatvā vā, yathāpaññattaṃ paṭipajjamāne bhikkhū disvā vā, yepi appasannā paṇḍitamānussā, te “yāni vata loke mahājanassa rajjanadussanamuyhanaṭṭhānāni, tehi ime samaṇā ārakā viratā viharanti, dukkaraṃ vata karonti”ti pasādaṃ āpajjanti vinaya-piṭakapotthakaṃ disvā micchādiṭṭhikatavedibrāhmaṇā viya. Tena vuttaṃ- “appasannānaṃ pasādāyā”ti.

Pasannānanti yepi sāsane pasannā kulaputtā, tepi sikkhāpadapaññattiṃ vā ñatvā, yathāpaññattaṃ paṭipajjamāne bhikkhū vā disvā “aho ayyā dukkaraṃ karonti, ye yāvajivaṃ ekabhaddā vinayasamvaram pārenti”ti bhiyyo bhiyyo pasī-danti. Tena vuttaṃ- “pasannānaṃ bhiyyobhāvāyā”ti.

Saddhammaṭṭhitiyāti tividho saddhammo pariyattisaddhammo paṭipattisa-ddhammo adhigamasaddhammoti. Tattha sakalampi buddhavacanaṃ pariyattisa-ddhammo nāma. Terasa dhutaguṇā cārittavārittasilasamādhivipassanāti ayaṃ paṭipattisaddhammo nāma. Navalokuttaradhammo adhigamasaddhammo nāma. So sabbopi yasmā sikkhāpadapaññattiyā sati bhikkhū sikkhāpadañca tassa vibha-ṅgañca tadatthajotanattaṃ aññañca buddhavacanaṃ pariyāpuṇanti, yathāpañña-ttañca paṭipajjamānā paṭipattiṃ pūretvā paṭipattiyā adhigantabbaṃ lokuttara-dhammaṃ adhigacchanti, tasmā sikkhāpadapaññattiyā saddhammo ciraṭṭhitiko hoti. Tena vuttaṃ- “saddhammaṭṭhitiyā”ti.

Vinayānuggahāyāti sikkhāpadapaññattiyā sati saṃvaravinayo, pahānavinayo, samathavinayo, paññattivinayoti catubbidho vinayo anuggahito hoti sūpattham-bhito. Tena vuttaṃ- “vinayānuggahāyā”ti.

2. Pātimokkhaṭṭhapanāsuttavaṇṇanā

32. Dutiye **pārājiko** Ti pārājikāpattiṃ āpanno. **Pārājikakathā vipakatā hotīti** “asu-kapuggalo pārājikaṃ āpanno nu kho no”ti (3.0310) evaṃ kathā ārabhitvā anīṭṭhā-

pitā hoti. Esa nayo sabbattha.

3. Ubbāhikāsuttavaṇṇanā

33. Tatiye **ubbāhikāyā**ti sampatta-adhikaraṇaṃ vūpasametum saṅghato ubbāhitvā uddharitvā gahaṇatthāya. **Vinaye kho pana t̥hito hotīti** vinayalakkhaṇe patiṭṭhito hoti. **Asaṃhīroti** na aññassa vacanamatteneva attano laddhiṃ vissajjeti. **Paṭibaloti** kāyabalenapi ñāṇabalenapi samannāgato. **Saññāpetunti** jānāpetum. **Paññāpetunti** sampajānāpetum. **Nijjhāpetunti** olokāpetum. **Pekkhatunti** passāpetum. **Pasādetunti** sañjātapasādaṃ kātum. **Adhikaraṇanti** vivādādhikaraṇādicatu-bbidhaṃ. **Adhikaraṇasamudayanti** vivādamūlādikaṃ adhikaraṇakārakaṃ. **Adhikaraṇanirodhanti** adhikaraṇānaṃ vūpasamaṃ. **Adhikaraṇanirodhagāminiṃ paṭipadanti** sattavidha-adhikaraṇasamathaṃ.

4. Upasampadāsuttavaṇṇanā

34. Catutthe **anabhiratinti** ukkaṇṭhitabhāvaṃ. **Vūpakāsetunti** vinetum. **Adhisīleti** uttamasīle. **Cittapaññāsupi** eseva nayo.

7. Saṅghabhedasuttavaṇṇanā

37. Sattame **vatthūhī**ti kāraṇehi. **Avakassantīti** parisam ākaḍḍhanti vijaṭenti ekamantaṃ ussārenti. **Apakassantīti** ativiya ākaḍḍhanti, yathā viṣaṃsaṭṭhā honti, evaṃ karonti. **Āveni kammāni karontīti** visuṃ saṅghakammāni karonti.

9-10. Ānandasuttadvayavaṇṇanā

39-40. Navame **kappaṭṭhikanti** āyukappaṃ nirayamhi t̥hitikāraṇaṃ. **Kibbisam pasavatīti** pāpaṃ paṭilabhati. **Āpāyikoti** apāyagamaniyo. **Nerayikoti** niraye nibbattanako. **Vaggaratoti** bhedarato. **Yogakkhemā (301) padhaṃsatīti** yogehi khemato arahattato dhaṃsati vigacchati. Dasame **anuggahoti** aññamaññassa saṅghānuggaho. Sesam sabbattha uttānatthamevāti.

Upālivaggo catuttho.

5. Akkosavaggo

4. Kusinārasuttavaṇṇanā

44. Pañcamassa catutthe **kusinārāyanti** evaṃnāmake nagare. Devatānaṃ

atthāya baliṃ haranti etthāti **baliharaṇo**, tasmīṃ baliharaṇe. **Acchiddena appaṭi-maṃsenāti**-ādīsu yena kenacideva paḥaṭo vā hoti, vejjakammādīni vā katāni, tassa kāyasamācāro upacikādīhi khāyitatālapaṇṇaṃ viya chiddo ca, paṭimasitūṃ yattha katthaci gaḥetvā ākaḍḍhitūṃ sakkūneyyatāya paṭimaṃso ca hoti, viparīto acchiddo appaṭimaṃso nāma. Vacīsamācāro pana musāvāda-omasavādapesu-ñña-amūlakānuddhaṃsanādīhi chiddo sappāṭimaṃso ca hoti, viparīto acchiddo appaṭimaṃso. **Mettaṃ nu kho me cittanti** palibodhaṃ chinditvā kammaṭṭhānabhāvanānuyogena adhigataṃ me mettacittaṃ. **Anāghātanti** āghātavirahitaṃ, vikkhambhanena vihatāghātanti attho. **Kattha vuttanti** idaṃ sikkhāpadaṃ kismiṃ nagare vuttaṃ.

Kālena vakkhāmīti-ādīsu eko ekaṃ okāsaṃ kāretvā codento **kālena vadati** nāma. Saṅghamajjhe vā gaṇamajjhe vā salākaggayāgaggavitakkamāḷakabhikkhācāramagga-āsanāsālādīsu vā upaṭṭhākehi parivāritakkaṇe vā codento **akālena vadati** nāma. Tacchena vadanto **bhūtena vadati** nāma. “Daharamahallakaparisāvacaṇakapaṃsukūlikadhammakathikapatirūpaṃ tava idan”ti vadanto **pharusena vadati** nāma. Kāraṇanissitaṃ pana katvā, “bhante mahallakattha, parisāvacaṇakattha, paṃsukūlikattha, dhammakathikapatirūpaṃ tumhākamidan”ti vadanto (3.0312) **saṇhena vadati** nāma. Kāraṇanissitaṃ katvā vadanto **atthasaṃhitena vadati** nāma. **Mettacitto vakkhāmi no dosantaroti** mettacittaṃ paccupaṭṭhapetvā vakkhāmi, na duṭṭhacitto hutvā.

5. Rājantepurappavesanasuttavaṇṇanā

45. Pañcame **kataṃ vā karissanti vāti** methunavītikkamaṃ kariṃsu vā kariṃssanti vā. **Ratananti** maṇiratanādīsu yaṃkiñci. **Patthetīti** māretuṃ icchati. **Hatthisambādanti** hatthīhi sambādhaṃ. Hatthisammaddanti vā pāṭho, tassattho- hatthīhi sammaddo etthāti hatthisammaddaṃ. Sesesupi eseva nayo. **Rajanīyāni rūpasaddagandharasaphoṭṭhabbānīti** etāni rāgajanakāni rūpādīni tattha paripūrāni hontī.

6. Sakkasuttavaṇṇanā

46. Chaṭṭhe **sokasabhayeti** sokena sabhaye. Sokabhayeti vā pāṭho, ayamevattho. Dutiyapadepe eseva nayo.

Yena kenaci kammaṭṭhānenāti kasivaṇijjādikammesu yena kenaci kammena. **Anāpajja akusalanti** kiñci akusalaṃ anāpajjitvā. **Nibbiseyyā**ti uppādeyya ācineyya. **Dakkhoti** cheko. **Uṭṭhānasampannoti** uṭṭhānavīriyena samannāgato. **Alaṃ vacanāyā**ti yutto vacanāya. **Ekantasukhappaṭisaṃvedī vihareyyā**ti ekantameva kāyikacetikasukhaṃ ñāṇena paṭisaṃvedento vihareyya. **Aniccā**ti hutvā abhāvato. **Tucchā**ti sārarahitā. **Musā**ti niccasubhasukhā viya khāyamānāpi tathā na hontīti musā. **Mosadhammā**ti nassanasabhāvā. Tasmā te paṭicca dukkhaṃ uppajjatīti sandasseti. **Idha pana voti ettha vo** ti nipātamattaṃ. **Apaṇṇakaṃ vā sotāpannoti** avirādhitam ekamsena sotāpanno vā hoti. Sopi jhānaṃ nibbatteti, brahmalokaṃ vā gantvā chasu vā kāmasaggesu ekantasukhappaṭisaṃvedī hutvā vihareyya. Imasmiṃ sutte satthā aṭṭhaṅguposathassa guṇaṃ kathesi.

7. Mahālisuttavaṇṇanā

47. Sattame (3.0313) micchāpaṇihitanti micchā ṭhapitaṃ. **Adhammacariyāvisamacariyā**ti akusalakammappaṭisaṃvedāna adhammacariyasaṅkhātā visamacariyā. Kusalakammappaṭisaṃvedāna itarā veditabbā. Evamidha vaṭṭameva kathitaṃ.

8. Pabbajita-abhiṇhasuttavaṇṇanā

48. Aṭṭhame pabbajitenāti gharāvāsaṃ pahāya sāsane pabbajam upagatena. **Abhiṇhanti** abhikkhaṇaṃ punappunaṃ, **paccavekkhitabbā** oloketabbā sallakkhetabbā. **Vevaṇṇiyanti** vivaṇṇabhāvaṃ. Taṃ panetaṃ vevaṇṇiyaṃ duvidhaṃ hoti sarīravevaṇṇiyaṃ parikkhāravevaṇṇiyaṃ. Tattha kesamassu-oropana sarīravevaṇṇiyaṃ veditabbam. Pubbe pana nānāviraṅgāni sukhumavatthāni nivāsetvāpi nānaggarasabhojanaṃ suvaṇṇarajatabhājanesu bhuñjitvāpi sirigabbhe varasayanāsanesu nipajjitvāpi nisīditvāpi sappinavanītādīhi bhesajjam katvāpi pabbajitakālato paṭṭhāya chinnasaṅghaṭṭitakasāvarasapītāni vatthāni nivāsetabbāni, ayapatte vā mattikapatte vā missakodano bhuñjitabbo, rukkhāmūlādisenāsane muñjatiṇasantharaṇādīsu nipajjitabbam, cammakhaṇḍataṭṭikādīsu nisīditabbam, pūtimuttādīhi bhesajjam kattabbam hoti. Evamettha parikkhāravevaṇṇiyaṃ veditabbam. Evaṃ paccavekkhato kopo ca māno ca pahiyati.

Parapaṭibaddhā me jīvikāti mayham paresu paṭibaddhā parāyattā catupaccaya-jīvikāti. Evaṃ paccavekkhato hi ājīvo parisujjhati, piṇḍapāto ca apacito hoti, catūsu paccayesu apaccavekkhitaparibhogo nāma na hoti. **Añño me ākappo karaṇīyoti** yo gihīnaṃ uraṃ abhinīharitvā gīvaṃ paggahevā lalitenākārena aniyatapadavīti-hārena gamanākappo hoti, tato añño me ākappo mayā karaṇīyo, santindriyena santamānasena yugamattadassinā visamaṭṭhāne udakasakaṭeneva mandamitapadavīti-hārena hutvā gantabbanti paccavekkhitabbam. Evaṃ paccavekkhato hi iriyāpatho sārūppo hoti, tisso sikkhā paripūrenti. **Kaccinukhoti** salakkhaṇe nipātasamudāyo. **Attā**ti cittaṃ. **Sīlato na upavadatīti** (3.0314) aparisuddham te sīlanti sīlapaccayo na upavadati. Evaṃ paccavekkhato hi ajjhataṃ hirī samuṭṭhāti, sā tisu

dvāresu saṃvaram sādheti, tīsu dvāresu saṃvaro catupārisuddhisīlam hoti, catupārisuddhisīle t̥hito vipassanam vaḍḍhetvā arahattam gaṇhāti. **Anuvicca viññū sabrahmacārīti** paṇḍitā sabrahmacārīno anuvicāretvā. Evaṃ paccavekkhato hi bahiddhā ottappam saṇṭhāti, tam tīsu dvāresu saṃvaram sādhetīti anantaranaye-neva veditabbam.

Nānābhāvo vinābhāvoti jātiyā nānābhāvo, maraṇena vinābhāvo. Evaṃ paccavekkhato hi tīsu dvāresu asaṃvutākāro nāma na hoti, maraṇassati sūpaṭṭhitā hoti. **Kammassakomhīti**-ādīsu kammam mayham sakaṃ attano santakanti **kammassakā. Kammena dātabbam phalam dāyam, kamma dāyam kammadāyam, tam ādiyāmīti kammadāyādo.** Kammam mayham yoni kāraṇanti **kammayoni.** Kammam mayham bandhu ñātakoti **kammabandhu.** Kammam mayham paṭisaraṇam paṭiṭṭhāti **kammaṭisaraṇo. Tassa dāyādo bhavissāmīti** tassa kamma dāyādo tena dinnaphalam paṭiggāhako bhavissāmi. Evaṃ kammassakataṃ pana paccavekkhato pāpakaraṇam nāma na hoti. **Kathambhūtassa me rattindivā vītivattantīti** kinnu kho me vattappaṭipattiṃ karontassa, udāhu akarontassa, buddhavacanaṃ sajjhāyantassa, udāhu asajjhāyantassa, yonisomanasikāre kammam karontassa, udāhu akarontassāti **kathambhūtassa me rattindivā vītivattanti, parivattantīti** attho. Evaṃ paccavekkhato hi appamādo paripūراتي.

Suññāgāre abhiraṃmāmīti vivittokāse sabbiriyāpathesu ekakova hutvā kacci nu kho abhiraṃmāmīti attho. Evaṃ paccavekkhato kāyaviveko paripūراتي. **Uttarimanussadhammoti** uttarimanussānam ukkaṭṭhamanussabhūtānam jhāyīnañceva ariyānañca jhānādidhammo, dasakusalakammaṭṭhasaṅkhātamanussadhammato vā uttaritaro visiṭṭhataro dhammo me mama santāne atthi nu kho, santi nu khoti attho. **Alamariyañāṇadassanaviseso** Ti mahaggatalokuttarapaññā pajānanaṭṭhena ñāṇam, cakkhunā diṭṭhamiva dhammam paccakkhakarāṇato dassanaṭṭhena dassananti ñāṇadassanam, ariyam visuddham uttamaṃ ñāṇadassananti (3.0315) ariyañāṇadassanam, alam pariyaṭṭakam kilesavidhamṣanasamattham ariyañāṇadassanamettha, assa vāti alamariyañāṇadassano, jhānādibhedo uttarimanussa-dhammo alamariyañāṇadassano ca so viseso cāti **alamariyañāṇadassanaviseso.** Atha vā tameva kilesavidhamṣanasamattham visuddham ñāṇadassanameva visesoti alamariyañāṇadassanaviseso vā. **Adhigatoti** paṭiladdho me atthi nu kho. **Sohanti** paṭiladdhaviseso so aham. **Pacchime kāleti** maraṇamañce nipannakāle. **Putṭhoti** sabrahmacārīhi adhigataguṇavisesam pucchito. **Na maṅku bhavissāmīti** patitakkhandho nittejo na hessāmīti. Evaṃ paccavekkhantassa hi moghakālakiriyā nāma na hoti.

9-10. Sarīraṭṭhadhammasuttādivaṇṇanā

49-50. Navame **ponobbhavikoti** punabbhavanibbattako. **Bhavaṣaṅkhāroti** bhavaṣaṅkharāṇakammam. Imasmiṃ sutte vaṭṭameva kathitam. Dasame sīlabāhusaccavīriyasatipaññā lokiya lokuttarāmissikā kathitā. Sesam sabbattha uttānattamevāti.

Akkosavaggo pañcama.

Paṭhamapaṇṇāsakaṃ niṭṭhitaṃ.

2. Dutiyapaṇṇāsakaṃ

(6) 1. sacittavaggo

1-4. Sacittasuttādivaṇṇanā

51-54. Dutiyassa (3.0316) paṭhame **sacittapariyāyakusaloti** attano cittavāraku-salo. **Rajanti** āgantuka-upakkilesaṃ. **Aṅgaṇanti** tatthajātaka-aṅgakāḷatilakādiṃ. **Āsavānaṃ khayāyāti** arahattatthāya. Tatiye **paṭibhānenāti** vacanasañṭhānena. Catutthe **adhipaññādhammavipassanāyāti** saṅkhārapariggāhakavipassanāya.

8. Mūlakasuttavaṇṇanā

58. Aṭṭhame **amatogadhāti** ettha sa-upādisesā nibbānadhātu kathitā, **nibbānapariyosānāti** ettha anupādisesā. Anupādisesaṃ pattassa hi sabbe dhammā pariyosā-nappattā nāma honti. Sesapadāni heṭṭhā vuttatthāneva.

9. Pabbajjāsuttavaṇṇanā

59. Navame **tasmāti** yasmā evaṃ aparicitacittassa sāmāññattho na sampajjati, tasmā. **Yathāpabbajjāparicitañca no cittaṃ bhavissatīti** yathā pabbajjānurūpena paricitaṃ. Ye hi keci pabbajanti nāma, sabbe te arahattaṃ patthetvā. Tasmā yaṃ cittaṃ arahattādhigamattāya paricitaṃ vaḍḍhitaṃ, taṃ yathāpabbajjāparicitaṃ nāmāti veditabbaṃ. Evarūpaṃ pana cittaṃ bhavissatīti sikkhitabbaṃ. **Lokassa samañca visamañcāti** sattalokassa sucaritaduccaritāni. **Lokassa bhavañca vibhavañcāti** tassa vaḍḍhiñca vināsañca, tathā sampattiñca vipattiñca. **Lokassa samudayañca atthaṅgamañcāti** pana saṅkhāralokaṃ sandhāya vuttaṃ, khandhānaṃ nibbattiñca bhedañcāti attho.

10. Girimānandasuttavaṇṇanā

60. Dasame (3.0317) **anukampaṃ upādāyāti** girimānandatthere anukampaṃ paṭicca. **Cakkhurogoti-ādayo** vatthivasena veditabbā. Nibbattitappasādānañhi

rogo nāma natthi. **Kaṇṇarogoti** bahikaṇṇe rogo. **Pināsoti** bahināsikāya rogo. **Nakha-**
sāti nakhehi vilekhitatṭhāne rogo. **Pittasamuṭṭhānāti** pittasamuṭṭhitā. Te kira
dvattiṃsa honti. **Semhasamuṭṭhānā**disupi eseva nayo. **Utupariṇāmajāti** utupariṇā-
mena accuṇhātisītena uppajjanakarogā. **Visamaparihārajāti** aticiratṭhānanisajjā-
dinā visamaparihārena jātā. **Opakkamikāti** vadhabandhanādinā upakkamena jātā.
Kammavipākajāti balavakammavipākasambhūtā. **Santanti** rāgādisantatāya
santaṃ. Atappakaṭṭhena **paṇitaṃ**. Sesam sabbattha uttānatthamevāti.

Sacittavaggo paṭhamo.

(7) 2. yamakavaggo

1. Avijjāsuttādivaṇṇanā

61-62. Dutiyaassa paṭhame **sāhāranti** sapaccayaṃ. **Vijjāvimuttinti** phalañña-
ñceva sesasampayuttadhamme ca. **Bojjhaṅgāti** maggabojjhaṅgā. Dutiye **bhavata-**
ṇhāyāti bhavapatthanāya. Evaṃ dvīsipi suttesu vaṭṭameva kathitaṃ, vaṭṭaṅcetha
paṭhame sutte avijjāmūlakaṃ vaṭṭaṃ kathitaṃ, dutiye taṇhāmūlakaṃ.

3-4. Niṭṭhaṅgatasuttādivaṇṇanā

63-64. Tatiye **niṭṭhaṃ gatāti** nibbematikā. **Idha niṭṭhāti** imasmimyeva loke parini-
bbānaṃ. **Idha viḥāyāti** imaṃ lokaṃ vijahitvā suddhāvāsabrahmalokaṃ. Catutthe
aveccappasannāTi acalappasādena sampannā. **Sotāpannāti** ariyamaggasotaṃ
āpannā.

5-7. Paṭhamasukhasuttādivaṇṇanā

65-67. Pañcame (3.0318) vaṭṭamūlakaṃ sukhadukkhaṃ pucchitaṃ, chaṭṭhe
sāsanamūlakaṃ. Sattame **naḷakapānanti** atīte bodhisattassa ovāde ṭhatvā vānara-
yūthena naḷehi udakassa pītaṭṭhāne māpitattā evaṃladdhanāmo nigamo. **Tuṇhī-**
bhūtaṃ tuṇhībhūtanti yaṃ yaṃ disaṃ anuviloketi, tattha tattha tuṇhībhūtameva.
Anuviloketvāti tato tato viloketvā. **Piṭṭhi me āgilāyatīti** kasmā āgilāyati? Bhagavato
hi cha vassāni mahāpadhānaṃ padahantassa mahantaṃ kāyadukkhaṃ ahosi,
athassa aparabhāge mahallakakāle piṭṭhivāto uppajji. Upādinna-kasarīrassa ṭhāna-
nisajjādīhi appamattakena ābādhena na sakkā kenaci bhavituṃ. Taṃ gahetvāpi
therassa okāsakaraṇatthaṃ evamāha. **Saṅghāṭiṃ paññāpetvā** ekamante patirūpa-
ṭṭhāne paññattassa kappiyamañcassa upari attharivā.

9-10. Kathāvatthusuttadvayavaṇṇanā

69-70. Navame **tiracchānakathanti** aniyyānikattā saggamokkhamaggānaṃ tiracchānabhūtaṃ kathaṃ. Tattha rājānaṃ ārabha

“mahāsammato mandhātā dhammāsoko evaṃmahānubhāvo”ti-ādinā nayena pavattakathā **rājakathā**. Esa nayo **corakathā**dīsu. Tesu “asuko rājā abhirūpo dassanīyo”ti-ādinā gehasitakathāva tiracchānakathā hoti, “sopi nāma evaṃmahānubhāvo khayam gato”ti evaṃ pavattā pana kammaṭṭhānabhāve tiṭṭhati. Core-supi “mūladevo evaṃmahānubhāvo, meghadevo evaṃmahānubhāvo”ti tesam kammaṃ paṭicca “aho sūrā”ti gehasitakathāva **tiracchānakathā**. Yuddhesupi bhāratayuddhādīsu “asukena asuko evaṃ mārito evaṃ viddho”ti kammassādavaseneva kathā tiracchānakathā, “tepi nāma khayam gatā”ti evaṃ pavattā pana sabbattha kammaṭṭhānameva hoti. Apica annādīsu “evaṃ vaṇṇavantam rasavantam phassasampannam khādimha bhuñjima pivimha paribhuñjimhā”ti kāmārasassādavasena kathetum na vaṭṭati, sātthakam pana katvā “pubbe evaṃ vaṇṇādisampannam annam pānam vattham yānam mālam gandham sīlavantānam adamha, cetiyam pūjimhā”ti kathetum vaṭṭati.

Ñātikathādīsupi “amhākam ñātakā sūrā samatthā”ti vā “pubbe mayam evaṃ vicitrehi yānehi vicarimhā”ti vā assādavasena vattum na vaṭṭati (3.0319), sātthakam pana katvā “tepi no ñātakā khayam gatā”ti vā “pubbe mayam evarūpā upāhanā saṅghassa adamhā”ti vā kathetabbam. **Gāmakathā**pi suniviṭṭhadunniviṭṭhasubhikkhadubbhikkhādivasena vā “asukagāmavāsino sūrā samatthā”ti vā evaṃ assādavaseneva na vaṭṭati, sātthakam pana katvā “saddhā pasannā”ti vā “khayavayam gatā”ti vā vattum vaṭṭati. **Nigamanagarajanapadakathā**supi eseva nayo.

Itthikathāpi vaṇṇasaṅghānādīni paṭicca assādavasena na vaṭṭati, “saddhā pasannā khayam gatā”ti evameva vaṭṭati. **Sūrakathā**pi “nandimitto nāma yodho sūro ahosī”ti assādavaseneva na vaṭṭati, “saddho ahosi khayam gato”ti evameva vaṭṭati. **Surākathā**nti pāliyam pana anekavidham majjakatham assādavasena kathetum na vaṭṭati, ādinavavaseneva vattum vaṭṭati. **Visikhākathā**pi “asukavī-sikhā suniviṭṭhā dunniviṭṭhā sūrā samatthā”ti assādavaseneva na vaṭṭati, “saddhā pasannā khayam gatā”ti vaṭṭati. **Kumbhaṭṭhānakathā** nāma kūṭaṭṭhānakathā udakatitthakathā vuccati (dī. ni. aṭṭha. 1.17; ma. ni. aṭṭha. 2.223; sam. ni. aṭṭha. 3.5.1080). Kumbhadāsikathā vā. Sāpi “pāsādikā naccitum gāyitum chekā”ti assādavasena na vaṭṭati, “saddhā pasannā”ti-ādinā nayeneva vaṭṭati.

Pubbapetakathā nāma atitāñātikathā. Tattha vattamānañātikathāsadisova vini-cchayo. **Nānattakathā** nāma purimapacchimakathāvimuttā avasesā nānāsabhāvā tiracchānakathā. **Lokakkhāyikā** nāma “ayam loko kena nimmīto? Asukena nāma nimmīto. Kāko seto aṭṭhīnam setattā, balākā rattā lohitassa rattattā”ti-evamādikā lokāyatavitaṇḍasallāpakathā. **Samuddakkhāyikā** nāma kasmā samuddo sāgaroti. Sāgaradevena khatattā sāgaro, khato meti hatthamuddāya niveditattā samuddoti-evamādikā niratthakā samuddakkhāyanakathā. **Bhavo**Ti vuddhi, **abhavoti** hāni. Iti bhavo iti abhavoti yam vā tam vā niratthakakāraṇam vatvā pavattitakathā **itibhāvābhavakathā** nāma.

Tejasā tejanti attano tejasā tesam tejam. **Pariyādiyeyyāthā**ti khepetvā gahetvā abhibhaveyyātha. Tatridam vatthu- eko piṇḍapātiko (3.0320) mahātheram pucchi-

“bhante, tejasā tejaṃ pariyādiyamānā bhikkhū kiṃ karonti”ti. Thero āha- āvuso, kiñcideva ātape ṭhapetvā yathā chāyā heṭṭhā na otarati, uddhamyeva gacchati tathā karonti. Dasame **pāsaṃsāni ṭhānāni** pasamaṃsāvahāni kāraṇāni. Sesamaṃ sabbattha uttānatthamevāti.

Yamakavaggo dutiyo.

(8) 3. ākaṅkhavaggo

1. Ākaṅkhasuttavaṇṇanā

71. Tatiyassa paṭhame **sampannasīlā**ti paripuṇṇasīlā, sīlasamaṅgino vā hutvāti attho. Tattha dvīhi kāraṇehi sampannasīlatā hoti sīlavipattiyā ca ādīnavadassanena, sīlasampattiyā ca ānisaṃsadassanena. Tadubhayampi visuddhimagge (visuddhi. 1.9, 21) vitthāritaṃ. Tattha “sampannasīlā”ti ettāvata kira bhagavā catupārisuddhisīlaṃ uddisitvā “pātimokkhasamaṃvarasamaṃvutā”ti iminā tattha jeṭṭhaka-sīlaṃ vitthāretvā dassesīti dīpavīhāravāsī sumanatthero āha. Antevāsiko panassa tepiṭakacūlanāgatthero āha- ubhayatthapi pātimokkhasamaṃvarova bhagavatā vutto. Pātimokkhasamaṃvaroyeva hi sīlaṃ, itarāni pana tīṇi sīlanti vuttatṭhānaṃ atthīti ananujānanto vatvā āha- indriyasamaṃvaro nāma chadvārārakkhāmattakameva, ājīva-pārisuddhi dhammena samena paccayuppattimattakaṃ, paccayasannissitaṃ paṭiladdhapaccaye idamatthanti paccavekkhitvā paribhuñjanamattakaṃ. Nippariyāyena pātimokkhasamaṃvarova sīlaṃ. Yassa so bhinno, ayaṃ sīsacchinno viya puriso hatthapāde sesāni rakkhissatīti na vattabbo. Yassa pana so arogo, ayaṃ acchinnasīso viya puriso jīvitaṃ sesāni puna pākātikāni kātuṃ sakkoti. Tasmā “sampannasīlā”ti iminā pātimokkhasamaṃvaraṃ uddisitvā “sampannapātimokkhā”ti tasseva vevacanaṃ vatvā taṃ vitthāretvā dassento **pātimokkhasamaṃvarasamaṃvutā**-ti-ādīmāha. Tattha **pātimokkhasamaṃvarasamaṃvuttā**ti-ādīni vuttatṭhāneva. **Ākaṅkheyya ceti** (3.0321) idaṃ kasmā āraddhanti? Sīlānisaṃsadassanattaṃ. Sacepi acirapa-bbajitānaṃ vā duppaññānaṃ vā evamassa “bhagavā ‘sīlaṃ pūretha sīlaṃ pūrethā’-ti vadati, ko nu kho sīlapūraṇe ānisaṃso, ko vireso, kā vaḍḍhī”ti tesamaṃ dasa ānisaṃse dassetuṃ evamāha- “appeva nāma etaṃ sabrahmacārīnaṃ piyamaṇāpa-tādi-āsavakkhayapariyosānaṃ ānisaṃsaṃ sutvāpi sīlaṃ paripūreyyun”ti.

Tattha **ākaṅkheyya ceti** yadi iccheyya. **Piyo cassanti** piyacakkhūhi sampassitabbo, sinehuppattiyā padaṭṭhānabhūto bhavēyyaṃ. **Manāpoti** tesamaṃ manava-ḍḍhanako, tesamaṃ vā manena pattabbo, mettacittena pharitabboti attho. **Garūti** tesamaṃ garuṭṭhāniyo pāsānacchattasadiṣo. **Bhāvanīyoti** “addhāyamāyasmā jānaṃ jānāti passaṃ passati”ti evamaṃ sambhāvanīyo. **Sīlesvevassa paripūrakārī**ti catupārisuddhisīlesuyeva paripūrakārī assa, anūnena ākārena samannāgato bhavēyyāti vuttaṃ hoti. **Ajjhattama cetosamathamanuyuttoti** attano cittasamathe yutto. **Anirāka-**

tajjhānoti bahi anīhaṭajjhāno, avināsitajjhāno vā. **Vipassanāyāti** sattavidhāya anupassanāya. **Brūhetā suññāgārānanti** vaḍḍhetā suññāgārānaṃ. Ettha ca samathavipassanāvasena kammaṭṭhānaṃ gahetvā rattindivaṃ suññāgāraṃ pavisitvā nisīdamāno bhikkhu “brūhetā suññāgārānaṃ”ti veditabbo. Ayamettha saṅkhepo, vitthāro pana icchantena majjhimanikāyaṭṭhakathāya (ma. ni. aṭṭha. 1.64 ādayo) ākaṅkheyyasuttavaṇṇanāya oloketabbo.

Lābhīti ettha na bhagavā lābhanimittaṃ silādiparipūraṇaṃ katheti. Bhagavā hi “ghāsesanaṃ chinnakatho, na vācaṃ payutaṃ bhaṇe”ti (su. ni. 716) evaṃ sāvake ovadati. So kathaṃ lābhanimittaṃ silādiparipūraṇaṃ katheyya. Puggalajjhāsaya vasena panetaṃ vuttaṃ. Yesaṅhi evaṃ ajjhāsayo bhavēyya “sace mayaṃ catūhi paccayehi na kilameyyāma, silāni paripūretuṃ sakuṇeyyāmā”ti, tesāṃ ajjhāsaya vasenevamāha. Apica sarasānisaṃso esa silassa yadidaṃ cattāro paccayā nāma. Tathā hi paṇḍitamānussa koṭṭhādīsu ṭhapitaṃ nīharitvā attanāpi aparibhuñjitvā silavantānaṃ dentīti silassa sarasānisaṃsadassanattampetaṃ vuttaṃ.

Tatīyavāre (3.0322) **yesāhanti** yesaṃ ahaṃ. **Tesaṃ te kārāti** tesaṃ devānaṃ vā manussānaṃ vā te mayi katā paccayadānakārā. **Mahapphalā hontu mahānisaṃsāti** lokiyasukhena phalabhūtena mahapphalā, lokuttarena mahānisaṃsā. Ubhayaṃ vā etaṃ ekatthameva. Silādiguṇayuttassa hi kaṭacchubhikkhāpi pañcāratanaṃ mattāya bhūmiyā paṇṇasālāpi katvā dinnā anekāni kappasahassāni duggatīvinipātato rakkhati, pariyoṣāne ca amatāya dhātuyā parinibbānassa paccayo hoti. “Khīrodanaṃ ahamadāsīn”ti-ādīni (vi. va. 413) cettha vatthūni. Sakalameva vā petavatthu vimānavatthu ca sādhaṃ.

Catutthavāre **petāti** peccabhavaṃ gatā. **Ñātīti** sassusasurapakkhikā. **Sālohitāti** ekalohitabaddhā pitipitāmahādayo. **Kālaṅkatāti** matā. **Tesaṃ tanti** tesaṃ taṃ mayi pasannacittaṃ, taṃ vā pasannena cittaṃ anussaraṇaṃ. Yassa hi bhikkhuno kālakato pitā vā mātā vā “amhākaṃ ñātakatthero silavā kalyāṇadhammo”ti pasannacitto hutvā taṃ bhikkhuṃ anussarati, tassa so cittappasādopi taṃ anussaraṇamattampi mahapphalaṃ mahānisaṃsameva hoti.

Aratiratisahoti nekkhammapaṭipattiyā aratīyā kāmaguṇesu ratīyā ca saho abhībhavitā ajjhottharītā. **Bhayabheravasahoti** ettha bhayaṃ cittutrāsopi ārammaṇampi, bheravaṃ ārammaṇameva.

2. Kaṇṭakasuttavaṇṇanā

72. Dutiye **abhiññātehi**ti gaganamajjhe puṇṇacando viya sūriyo viya ñātehi pākātehi. **Parapurāyāti** paraṃ vuccati pacchimabhāgo, purāti purimabhāgo, purato dhāvāntena pacchato anubandhāntena ca mahāparivārenāti attho. **Kaṇṭakoti** vijjhanatṭhena kaṇṭako. **Visūkadassananti** visūkabhūtaṃ dassanaṃ. **Mātugāmūpacāroti** mātugāmassa samīpacāritā.

3-4. Itṭhadhammasuttādivaṇṇanā

73-74. Tatiye (3.0323) **vaṇṇoti** sarīravaṇṇo. **Dhammā**ti nava lokuttaradhammā. Catutthe **ariyāyā**ti apothujjanikāya, sīlādīhi missakattā evaṃ vuttaṃ. **Sārādāyī ca hoti varadāyī**ti sārassa ca varassa ca ādāyako hoti. Yo kāyassa sāro, yañcassa varam, taṃ gaṇhātīti attho.

5. Migasālāsuttavaṇṇanā

75. Pañcamassa ādimhi tāva yaṃ vattabbaṃ, taṃ chakkanipāte vuttameva. **Dussīlo hotī**ti-ādīsu pana **dussīloti** nissīlo. **Cetovimuttinti** phalasaṃmādhim. **Paññāvimuttinti** phalañāṇaṃ. **Nappajānātī**ti uggahaparipucchāvasena na jānāti. **Dussīyaṃ aparisesaṃ nirujjhatī**ti ettha pañca dussīyāni tāva sotāpattimaggena pahiyanti, dasa arahattamaggena. Phalakkhaṇe tāni pahīnāni nāma honti. Phalakkhaṇaṃ sandhāya idha “nirujjhatī”ti vuttaṃ. Puthujjanassa sīlaṃ pañcahi kāraṇehi bhijjati pārājikāpajjanena sikkhāpaccakkhānena titthiyapakkhandanena arahattena maraṇenāti. Tattha purimā tayo bhāvanāparihānāya saṃvattanti, catuttho vaḍḍhiyā, pañcama neva hānāya na vaḍḍhiyā. Kathaṃ panetaṃ arahattena sīlaṃ bhijjatīti? Puthujjanassa hi sīlaṃ accantakusalameva hoti, arahattamaggo ca kusalākusalakammakkhayāya saṃvattatīti evaṃ tena taṃ bhijjati. **Savanenapi akataṃ hotī**ti sotabbayuttakaṃ assutaṃ hoti. **Bāhusaccenapi akataṃ hotī**ti ettha **bāhusaccanti** vīriyaṃ. Vīriyena kattabbayuttakaṃ akataṃ hoti, tassa akatattā saggatopi maggatopi parihāyati. **Diṭṭhiyāpi appaṭividdhaṃ hotī**ti diṭṭhiyā paṭivijjhitabbaṃ appaṭividdhaṃ hoti apaccakkhakatāṃ. **Sāmayikampi vimuttiṃ na labhatī**ti kālānukālaṃ dhammassavanaṃ nissāya pītipāmojjaṃ na labhati. **Hānāya paretī**ti hānāya pavattati.

Yathābhūtaṃ pajānātīti “sotāpattiphalaṃ patvā pañcavidhaṃ dussīyaṃ aparisesaṃ nirujjhatī”ti uggahaparipucchāvasena jānāti. **Tassa savanenapi kataṃ hotī**ti sotabbayuttakaṃ sutāṃ hoti. **Bāhusaccenapi kataṃ hotī**ti (3.0324) vīriyena kattabbayuttakaṃ antamaso dubbalavipassanāmatkampi kataṃ hoti. **Diṭṭhiyāpi suppaṭividdhaṃ hotī**ti antamaso lokiyapaññāyapi paccayaapaṭivedho kato hoti.

Imassa hi puggalassa paññā sīlaṃ paridhovati, so paññāparidhotena visesaṃ pāpuṇāti.

Pamāṇikāti puggalesu pamāṇaggāhakā. **Pamiṇantī**ti pametuṃ tuletumuṃ arahanti. **Eko hīnoti** eko guṇehi hīno. **Paṇītoti** eko guṇehi paṇīto uttamo. **Taṃ hīti** taṃ pamāṇakaraṇaṃ. **Abhikkantataroti** sundarataro. **Paṇītatataroti** uttamataro. **Dhammasoto nibbahatīti** sūraṃ hutvā pavattamānaṃ vipassanāññaṃ nibbahati, ariyabhūmiṃ pāpeti. **Tadantaraṃ ko jāneyyāti** taṃ evaṃ kāraṇaṃ ko jāneyya. **Sīlavā hotīti** lokiyasīlena sīlavā hoti. **Yatthassa taṃ sīlanti** arahattavimuttiṃ patvā sīlaṃ aparisesampi nirujjhati nāma, tattha yutti vuttāyeva. Ito paresu dvīsu aṅgesu anāgāmiṃphalaṃ vimutti nāma, pañcame arahattameva. Sesamettha vuttanayānusāre-
neva veditabbaṃ. Chaṭṭhaṃ uttānatthameva.

7. Kākasuttavaṇṇanā

77. Sattame **dhaṃsīti** guṇadhamaṃsako. Kassaci guṇaṃ anādiyitvā hatthenapi gahito tassa sīsepi vaccaṃ karoti. **Pagabbhoti** pāgabbhiyena samannāgato. **Tintiṇoti** tintiṇaṃ vuccati taṇhā, tāya samannāgato, āsaṅkābahulo vā. **Luddoti** dāruṇo. **Akāruṇikoti** nikkāruṇiko. **Dubbaloti** abalo appathāmo. **Oravitāti** oravayutto oravanto carati. **Necayikoti** nicayakaro.

9. Āghātavatthusuttavaṇṇanā

79. Navame **aṭṭhāneti** akāraṇe. Sacittakapavattiyañhi “anattaṃ me acarī”ti-ādi kāraṇaṃ bhavēyya, khāṇupahaṭṭhādisu taṃ natthi. Tasmā tattha āghāto aṭṭhāne āghāto nāma. Sesam sabbattha uttānatthamevāti.

Ākaṅkhavaggo tatiyo.

(9) 4. theravaggo

1-3. Vāhanasuttādivaṇṇanā

81-83. Catutthassa (3.0325) paṭhame **vimariyādīkatenāti** kilesamariyādaṃ bhinditvā vimariyādaṃ katena. Dutiyaṃ uttānatthameva. Tatiye **no ca payirupāsītāti** na upaṭṭhāti.

4. Byākaraṇasuttavaṇṇanā

84. Catutthe **jhāyī samāpattikusalo**ti jhānehi ca sampanno samāpattiyañca cheko. **Irīṇanti** tucchabhāvaṃ. **Vicinanti** guṇavicinataṃ nigguṇabhāvaṃ. Atha vā

irīṇasaṅkhātaṃ araṅṅaṃ vicinasaṅkhātaṃ mahāgahanaṅca āpanno viya hoti. **Anayanti** avaḍḍhiṃ. **Byasananti** vināsaṃ. **Anayabyasananti** avaḍḍhivināsaṃ. **Kim nu khoti** kena kāraṇena.

5-6. Katthīsuttādivaṇṇanā

85-86. Pañcame **katthī hoti vikatthī**ti katthanasīlo hoti vikatthanasīlo, vivaṭaṃ katvā katheti. **Na santatakārī**ti na satatakārī. Chaṭṭhe **adhimānikoti** anadhigate adhigatamānena samannāgato. **Adhimānasaccoti** adhigatamānameva saccato vadati.

7. Nappiyasuttavaṇṇanā

87. Sattame **adhikaraṇiko hotī**ti adhikaraṇakārako hoti. **Na piyatāyāti** na piya-bhāvāya. **Na garutāyāti** na garubhāvāya. **Na sāmāññāyāti** na samaṇadhammabhāvāya. **Na ekībhāvāyāti** na nirantarabhāvāya. **Dhammānaṃ na nisāmakajātikoti** navannaṃ lokuttaradhammānaṃ na nisāmanasabhāvo na upadhāraṇasabhāvo. **Na paṭisallānoti** na paṭisallīno. **Sāṭheyyānīti** saṭhabhāvo. **Kūṭeyyānīti** kūṭabhāvo. **Jimheyyānīti** na ujubhāvā. **Vaṅkeyyānīti** vaṅkabhāvā.

8. Akkosakasuttavaṇṇanā

88. Aṭṭhame (3.0326) **akkosakaparibhāsako ariyūpavādī sabrahmacārinanti** ettha sabrahmacāripadaṃ akkosakaparibhāsakapadehi yojetabbaṃ “akkosako sabrahmacāriṇaṃ, paribhāsako sabrahmacāriṇaṃ”ti. Ariyānaṃ pana guṇe chindissāmīti antimavatthunā upavadanto ariyūpavādī nāma hoti. **Saddhammassa na vodāyantī**ti sikkhāttayasaṅkhātā sāsanasaddhammā assa vodānaṃ na gacchanti. **Rogātaṅkanti** ettha rogova kicchājīvitabhāvakaraṇena ātaṅkoti veditabbo.

9. Kokālikasuttavaṇṇanā

89. Navame **kokāliko bhikkhu yena bhagavā tenupasaṅkamī**ti koyaṃ kokāliko, kasmā ca upasaṅkami? Ayaṃ kira kokālikaraṭṭhe kokālikanagare kokālikaseṭṭhissa putto pabbajitvā pitarā kārite vihāre vasati cūḷakokālikoti nāmena, na pana devadattassa sisso. So hi brāhmaṇaputto mahākokāliko nāma. Bhagavati pana sāvattiyaṃ viharante dve aggasāvaka pañcamattehi bhikkhusatehi saddhiṃ janapadacārikaṃ caramānā upakaṭṭhāya vassūpanāyikāya vivekavāsaṃ vasitukāmā te bhikkhū uyyojetvā attano pattacivaramādāya tasmīṃ janapade taṃ nagaraṃ patvā vihāraṃ agamiṃsu. Tattha nesaṃ kokāliko vattaṃ akāsi. Tepi tena saddhiṃ sammoditvā, “āvuso, mayaṃ idha temāsaṃ vasissāma, mā no kassaci ārocesi”ti paṭiññaṃ gahetvā vasiṃsu. Vasitvā pavāraṇādivase pavāretvā “gacchāma mayaṃ, āvuso”ti kokālikaṃ āpucchiṃsu. Kokāliko “ajja, āvuso, ekadivasaṃ vasitvā sve

gamissathā”ti vatvā dutiyadivase nagaraṃ pavisitvā manusse āmantesi- “āvuso, tumhe dve aggasāvake idha āgantvā vasamānepi na jānātha, na te koci paccayenapi nimanteti”ti. Nagaravāsino “kahaṃ, bhante, therā, kasmā no nārocayitthā”ti? Kiṃ, āvuso, ārocitena, kiṃ na passatha dve bhikkhū therāsane nisīdante, ete aggasāvakāti. Te khippaṃ sannipatitvā sappiphāṇitādīni ceva cīvaradussāni ca saṃharīṃsu.

Kokāliko (3.0327) cintesi- “paramappicchā aggasāvakā payuttavācāya uppannalābhaṃ na sādīyissanti, asādīyantā ‘āvāsikassa dethā’ti vakkhanti”ti taṃ lābhaṃ gāhāpetvā therānaṃ santikaṃ agamāsi. Therā disvāva “ime paccayā neva amhākaṃ, na kokālikassa kappanti”ti paṭikkhipitvā pakkamiṃsu. Kokāliko “kathañhi nāma sayāṃ aggaṇhantā mayhampi adāpetvā pakkamissanti”ti āghātaṃ uppādesi. Tepi bhagavato santikaṃ gantvā bhagavantaṃ vanditvā puna attano parisaṃ ādāya janapadacārikaṃ carantā anupubbena tasmīṃ raṭṭhe tameva nagaraṃ paccāgamīṃsu. Nāgarā there sañjānitvā saha parikkhārehi dānaṃ sajjitvā nagaramajjhe maṇḍapaṃ katvā dānaṃ adaṃsu, therānañca parikkhāre upanāmesuṃ. Therā bhikkhusaṅghassa niyyādayiṃsu. Taṃ disvā kokāliko cintesi- “ime pubbe appicchā ahesuṃ, idāni pāpicchā jātā, pubbepi appiccha-santuṭṭhapavivittasadisāva maññe”ti there upasaṅkamtivā, “āvuso, tumhe pubbe appicchā viya, idāni pana pāpabhikkhū jātathā”ti vatvā “mūlaṭṭhāneyeva nesaṃ patiṭṭhaṃ bhindissāmi”ti taramānarūpo nikkhamitvā yena bhagavā tenupasaṅkami. Ayamesa kokāliko, iminā ca kāraṇena upasaṅkamīti veditabbo.

Bhagavā taṃ turitaturitaṃ āgacchantaṃ disvāva āvajjento aññāsi “ayaṃ aggasāvake akkositukāmo āgato, sakkā nu kho paṭisedhetun”ti. Tato “na sakkā paṭisedhetuṃ, theresu aparajjhitvā āgato, ekaṃsena pana padumaniraye nibbattissanti”ti disvā “sāriputtamoggallānepi nāma garahantaṃ sutvā na nisedheti”ti vādamocanattaṃ ariyūpavādassa ca mahāsāvajjabhāvadassanattaṃ **mā hevanti** tikkhattuṃ paṭisedhesi. Tattha **mā hevanti** mā evaṃ abhaṇi. **Saddhāyikoti** saddhāya āgamakaro pasādāvaho, saddhātabbavacano vā. **Paccayikoti** pattiyāyitabbavacano.

Pakkāmīti kammānubhāvena codiyamāno pakkāmi. Okāsakatañhi kammaṃ na sakkā paṭibāhituṃ. **Acirapakkantassāti** pakkantassa sato nacireneva. **Sabbo kāyo phuṭo ahoṣīti** kesaggamattampi okāsaṃ avajjetvā sakalasarīraṃ aṭṭhīni bhinditvā uggatāhi piḷakāhi ajjhotthaṃ (3.0328) ahoṣi. Yasmā pana buddhānubhāvena tathārūpaṃ kammaṃ buddhānaṃ sammukhībhāve vipākaṃ dātuṃ na sakkoti, dassanūpacāre vijahitamatte deti, tasmā tassa acirapakkantassa piḷakā uṭṭhahiṃsu. **Kalāyamattiyoti** caṇakamattiyoti. **Beluvasalāṭṭukamattiyoti** taruṇabeluvamattiyoti. **Pabhijjimsūti** bhijjimsu. Tāsu bhinnāsu sakalasarīraṃ panasapakkaṃ viya ahoṣi. So pakkena gattena jetavanadvārakoṭṭhake visagilito maccho viya kadalipattesu nipajji. Atha dhammassavanattaṃ āgatāgatā manussā “dhi kokālika, dhi kokālika, ayuttamakāsi, attanoyeva mukhaṃ nissāya anayabyasanaṃ pattosī”ti āhaṃsu. Tesāṃ saddaṃ sutvā ārakkhadevatā dhikkāramakaṃsu, ārakkhadevatānaṃ ākāsadevatāti iminā upāyena yāva akaniṭṭhabhavanā ekadhikkāro uda-

pādi.

Turūti kokālikassa upajjhāyo turutthero nāma anāgāmiphalaṃ vatvā brahmaloke nibbatta. So bhummaṭṭhadavatā ādiṃ katvā “ayuttaṃ kokālikena kataṃ agga-sāvake antimavatthunā abbhācikkhantena”ti paramparāya brahmalokasampattaṃ taṃ saddaṃ sutvā “mā mayhaṃ passantasseva varāko nassi, ovadissāmi naṃ theresu cittappasādatthāyā”ti āgantvā tassa purato aṭṭhāsi. Taṃ sandhāyetaṃ vuttaṃ- “turū paccekabrahmā”ti. **Pesalāti** piyasilā. **Kosi tvam, āvusoti** nisinnakova kabarakkhīni ummīletvā evamāha. **Passa yāvañca te idaṃ aparaddhati** yattakaṃ tayā aparaddhaṃ, attano nalāṭe mahāgaṇḍaṃ apassanto sāsapamattāya piḷakāya maṃ codetabbaṃ maññasīti āha.

Atha naṃ “adiṭṭhippatto ayaṃ kokāliko, gilitaviso viya na kassaci vacanaṃ na karissati”ti ñatvā **purisassa hīti**-ādimāha. Tattha **kuṭhārīti** kuṭhārisadisā pharusa-vācā. **Chindatīti** kusalamūlasaṅkhāte mūleyeva nikanntati. **Nindiyanti** ninditabbaṃ dussīlapuggalaṃ. **Pasaṃsatīti** uttamatthe sambhāvetvā khīṇāsavoti vadati. **Taṃ vā nindati yo pasaṃsiyoti** yo vā pasaṃsitabbo khīṇāsavo, taṃ antimavatthunā codento “dussīlo ayan”ti vadati. **Vicināti mukhena so kalinti** so taṃ aparādhaṃ (3.03 mukhena vicināti nāma. **Kalinā tenāti** tena aparādhenā sukhaṃ na vindati. Nindiyapasaṃsāya hi pasaṃsiyanindāya ca samakova vipāko.

Sabbassāpi sahāpi attanāti sabbena sakena dhanenapi attanāpi saddhiṃ yo akkhesu dhanaparājayo nāma, ayaṃ appamattako aparādho. **Yo sugatesūTi** yo pana sammaggatesu puggalesu cittaṃ dūseyya, ayaṃ cittapadosova tato kalito mahantataro kali.

Idāni tassa mahantatarabhāvaṃ dassento **sataṃ sahasānanti**-ādimāha. Tattha **sataṃ sahasānanti** nirabbudagaṇanāya sata-sahassañca. **Chattiṃsatīti** aparāni chattiṃsati nirabbudāni. **Pañca cāti** abbudagaṇanāya pañca abbudāni. **YamariyagarahīTi** yaṃ ariye garahanto nirayaṃ upapajjati, tattha ettakaṃ āyuppa-māṇanti attho.

Kālamakāsīti upajjhāye pakkante kālaṃ akāsi. **Padumanirayanti** pāṭiyekko padumanirayo nāma natthi, avīcimahānirayasmiṃyeva pana padumagaṇanāya pacci-tabbe ekasmiṃ ṭhāne nibbatti.

Vīsatikhārikoti māgadhakena patthena cattāro patthā, kosalaraṭṭhe eko pattho hoti. Tena patthena cattāro patthā āḷhakaṃ, cattāri āḷhakāni doṇaṃ, catudoṇā mānikā,

catumānikā khārī, tāya khāriyā vīsatikhāriko. **Tilavāhoti** māgadhakānaṃ sukhuma-tilānaṃ tilasakaṭaṃ. **Abbudo nirayoti** abbudo nāma pāṭiyekko nirayo natthi, avīci-mhiyeva pana abbudagaṇanāya paccitabbaṭṭhānassetāṃ nāmaṃ. **Nirabbudādi-**supi eseva nayo.

Vassagaṇanāpi panettha evaṃ veditabbā- yatheva hi sataṃ satasahassāni koṭi hoti, evaṃ sataṃ satasahassakoṭiyo pakoṭi nāma hoti, sataṃ satasahassapa-koṭiyo koṭipakoṭi nāma, sataṃ satasahassakoṭipakoṭiyo nahutaṃ, sataṃ satasaha-ssanahutāni ninnahutaṃ, sataṃ satasahassaninnahutāni ekaṃ abbudaṃ, tato vīsatiṅgaṇaṃ nirabbudaṃ, esa nayo sabbatthāti. Dasamaṃ heṭṭhā vuttanayeneva veditabbaṃ. Sesamaṃ sabbattha uttānatthamevāti.

Theravaggo catuttho.

(10) 5. upālivaggo

1-2. Kāmabhogīsuttādivaṇṇanā

91-92. Pañcamassa (3.0330) paṭhame **sāhasenāti** sāhasiyakammena. Dutiye **bhayānīti** cittutrāsabhayāni. **Verānīti** akusalaverapuggalaverāni. **Ariyo cassa ṅāyoti** saha vipassanāya maggo. **Iti imasmiṃ sati idaṃ hotīti** evaṃ imasmiṃ avijjā-dike kāraṇe sati idaṃ saṅkhārādikaṃ phalaṃ hoti. **Imassuppādā idaṃ uppajjātīti** yo yassa sahaṅgāpaccayo hoti, tassa uppādā itaraṃ uppajjati nāma. **Imasmiṃ asa-**tīti avijjādike kāraṇe asati saṅkhārādikaṃ phalaṃ na hoti. **Imassa Nirodhāti** kāra-ṇassa appavattiyā phalassa appavatti hoti.

3. Kimḍiṭṭhikasuttavaṇṇanā

93. Tatiye **saṅṭhāpesunti** iriyāpathampi vacanapathampi saṅṭhāpesuṃ. **Appasa-**ddavinītāti appasaddena mattabhāṇinā satthārā vinītā. **Paratoghosa-**paccayā vāti parassa vā vacanakāraṇā. **Cetayitāti** pakappitā. **Maṅkubhūtāti** domanassappattā nittejā. **Pattakkhandhāti** patitakkhandhā. **Sahadhammenāti** sahetukena kāraṇena vacanena.

4. Vajjiyamāhitasuttavaṇṇanā

94. Catutthe **vajjiyamāhitoti** evaṃnāmakko. **Sabbaṃ tapanti** sabbameva dukkara-kārikaṃ. **Sabbaṃ tapassinti** sabbaṃ tapanissitakaṃ. **Lūkhājivinti** dukkarakārikajī-vikānuyogaṃ anuyuttaṃ. **Gārayhanti** garahitabbayuttakaṃ. **Pasaṃsiyanti** pasaṃ-sitabbayuttakaṃ. **Venayikoti** sayamaṃ avinīto aññehi vinetabbo. **Apaññattikoti** na kiñci paññāpetuṃ sakkoti. Atha vā **venayikoti** sattavināsako. **Apaññattikoti** apa-

ccakkhaṃ nibbānaṃ paññāpeti, sayamkatādīsu kiñci paññāpetuṃ na sakkoti. **Na so bhagavā venayikoti** so bhagavā evaṃ yāthāvato ñatvā kusalākusalaṃ paññāpento na aññena vinetabbo na aññasikkhito. Ye ca dhamme upādāya satto paññāpiyati, tesam paññāpanato na sattavināsako, suvinīto susikkhito sattavināyakoti attho. Tassa ca paññattiyo (3.0331) sapaññattiyoyevāti dasseti. **Vimuttiṃ vimuccato akusalā dhammā**ti micchādiṭṭhisañkhātaṃ cittassa adhimuttiṃ adhimuccato akusalā dhammā vaḍḍhanti nāma, taṃ sandhāyetaṃ vuttaṃ. Sāsane pana cittassa vimuttisañkhāto vimutti kusalānaṃyeva paccayo hoti.

5. Uttiyasuttavaṇṇanā

95. Pañcame **tuṅhī ahoṣī**ti sattūpaladdhiyaṃ ṭhatvā apucchaṃ pucchati tuṅhī ahoṣi. **Sabbasāmukkaṃsikaṃ vata meti** mayā sabbapucchānaṃ uttamapucchaṃ pucchito samaṇo gotamo saṃsādeti no vissajjeti, nūna na visahati na sakkoti vissajjetunti evaṃ pāpikaṃ diṭṭhiṃ mā paṭilabhīti. **Tadassāti** taṃ evaṃ uppannaṃ diṭṭhigataṃ bhaveyya. **Paccantimanti** yasmā majjhimadese nagarassa uddhāpādīni thirāni vā hontu dubbalāni vā, sabbaso vā pana mā hontu, corāsañkā na hoti. Tasmā taṃ aggahetvā “paccantimaṃ nagaran”ti āha. **Daḷhuddhāpanti** thirapākārapādaṃ. **Daḷhapākāratoraṇanti** thirapākārañceva thirapiṭṭhisānghāṭaṅca. **Ekadvāranti** kasmā āha? Bahudvārasmiñhi nagare bahūhi paṇḍitadovārikehi bhavitabbaṃ, ekadvāre ekova vaṭṭati. Tathāgatassa ca paññāya añño sadiso natthi. Tasmā satthu paṇḍitabhāvassa opammatthaṃ ekaṃyeva dovārikaṃ dassetuṃ “ekadvāran”ti āha. **Paṇḍitoti** paṇḍiccena samannāgato. **Byattoti** veyyattiyena samannāgato. **Medhāvīti** ṭhānuppattiyapaññāsañkhātāya medhāya samannāgato. **Anupariyāyapathanti** anupariyāyanāmakam maggaṃ. **Pākārasandhanti** dvinnam iṭṭhakānaṃ apagataṭṭhānaṃ. **Pākāravivaranti** pākārassa chinnaṭṭhānaṃ. **Tadevetam pañhanti** taṃyeva “sassato loko”ti-ādinā nayena puṭṭhaṃ ṭhapaniyapañhaṃ punapi pucchi. **Sabbo ca tena lokoti** sattūpaladdhiyaṃyeva ṭhatvā aññenākārena pucchati dasseti.

6. Kokanudasuttavaṇṇanā

96. Chaṭṭhe **pubbāpayamānoti** pubbasadisāni nirudakāni kurumāno. **Kvettha, āvusoti** ko ettha, āvuso. **Yāvatā, āvuso, diṭṭhīti** (3.0332) yattikā dvāsaṭṭhividhāpi diṭṭhi nāma atthi. **Yāvatā diṭṭhiṭṭhānanti** “khandhāpi diṭṭhiṭṭhānaṃ, avijjāpi, phassopi, saññāpi, vitakkopi ayonisomanasikāropi, pāpamittopi, paratoghosopi diṭṭhiṭṭhānan”ti evaṃ yattakam aṭṭhavidhampi diṭṭhiṭṭhānaṃ diṭṭhikāraṇaṃ nāma atthi. **Diṭṭhādhiṭṭhānanti** diṭṭhīnaṃ adhiṭṭhānaṃ, adhiṭṭhatvā adhibhavitvā pavattāya diṭṭhiyā etaṃ nāmaṃ. **Diṭṭhipariyutṭhānanti** “katamāni aṭṭhārasa diṭṭhipariyutṭhānāni? Yā diṭṭhi diṭṭhigataṃ diṭṭhigahanaṃ diṭṭhikantāraṃ diṭṭhivisūkaṃ diṭṭhivipphanḍitaṃ diṭṭhisamyojanaṃ diṭṭhisallaṃ diṭṭhisambādho diṭṭhipalibodho diṭṭhibandhanaṃ diṭṭhipapāto diṭṭhānusayo diṭṭhisantāpo diṭṭhipariḷāho diṭṭhigantho diṭṭhu-

pādānaṃ diṭṭhābhiniveso diṭṭhiparāmāso. Imāni aṭṭhārasa diṭṭhipariyuṭṭhānāni”ti evaṃ vuttaṃ diṭṭhipariyuṭṭhānaṃ. **Samuṭṭhānanti** diṭṭhiṭṭhānasseva vevacanaṃ. Vuttañhetuṃ- “khandhā paccayo diṭṭhīnaṃ upādāya samuṭṭhānaṭṭhenā”ti (paṭi. ma. 1.124) sabbaṃ vitthāretabbaṃ. Sotāpattimaggo pana **diṭṭhisamugghāto** nāma sabbadiṭṭhīnaṃ samugghātakattā. **Tamahanti** taṃ sabbaṃ ahaṃ jānāmi. **Kyāhaṃ vakkhāmi**ti kiṃkāraṇā ahaṃ vakkhāmi.

7-8. Āhuneyyasuttādivaṇṇanā

97-98. Sattame **sammādiṭṭhikoti** yāthāvadiṭṭhiko. Aṭṭhame **adhikaraṇasamuppā-davūpasamakusaloti** catunnaṃ adhikaraṇānaṃ mūlaṃ gahetvā vūpasamena samuppādavūpasamakusalo hoti.

9. Upālisuttavaṇṇanā

99. Navame **durabhisambhavānī**ti sambhavituṃ dukkhāni dussahāni, na sakkā appesakkhehi ajjhogāhitunti vuttaṃ hoti. **Araññavanapatthānī**ti araññāni ca vana-patthāni ca. Araññakaṅganipphādanena araññāni, gāmantaṃ atikkamitvā manu-ssānaṃ anupacāraṭṭhānabhāvena vanapatthāni. **Pantānī**ti pariyantāni atidūrāni. **Dukkaraṃ pavivekanti** kāyaviveko dukkaro. **Durabhiramanti** abhiramituṃ na sukaraṃ. **Ekatteti** ekībhāve. Kiṃ dasseti? Kāyaviveke katepi tattha cittaṃ abhira-māpetuṃ dukkaraṃ. Dvayaṃdvayārāmo hi ayaṃ lokoti. **Haranti maññeti** haranti viya ghasanti viya. **Manoti** cittaṃ. **Samādhiṃ alabhamānassāti** upacārasamādhiṃ vā appanāsamādhiṃ vā alabhantassa (3.0333). Kiṃ dasseti? Īdisassa bhikkhuno tiṇapaṇṇamigādisaddehi vividhehi ca bhīsanakehi vanāni cittaṃ vikkhipanti maññeti. **Saṃsīdissatī**ti kāmavitakkena saṃsīdissati. **Uplavissatī**ti byāpādavihiṃ-sāvitaṃkehi uddhaṃ plavissati.

Kaṇṇasaṃdhovikanti kaṇṇe dhovantena kīṭitabbaṃ. **Piṭṭhisamdhovikanti** piṭṭhiṃ dhovantena kīṭitabbaṃ. Tattha udakaṃ soṇḍāya gahetvā dvīsu kaṇṇesu āsi-ñcanaṃ kaṇṇasaṃdhovikā nāma, piṭṭhiyaṃ āsiñcanaṃ piṭṭhisamdhovikā nāma. **Gādhaṃ vindatī**ti patiṭṭhaṃ labhati. **Ko cāhaṃ ko ca hatthināgoti** ahaṃ ko, hatthināgo ko, ahampi tiracchānagato, ayampi, mayhampi cattāro pādā, imassapi, nanu ubhopi mayaṃ samasamāti.

Vaṅkakanti kumārakānaṃ kīṭanakaṃ khuddakanaṅgalaṃ. **Ghaṭikanti** dīghada-ṇḍakena rassadaṇḍakaṃ paharaṇakīṭaṃ. **Mokkhacikanti** saṃparivattakakīṭaṃ, ākāse daṇḍakaṃ gahetvā bhūmiyaṃ vā sīsaṃ ṭhapetvā heṭṭhupariyabhāvena parivattanakīṭanti vuttaṃ hoti. **Ciṅgulakanti** tālapaṇṇādīhi kataṃ vātappahārena paribbhamanacakkaṃ. **Pattāḷhakaṃ** vuccati paṇṇanāḷi, tāya vālukādīni minantā kīṭanti. **Rathakanti** khuddakarathaṃ. **Dhanukanti** khuddakadhanumeva.

Idha kho pana voti ettha **voti** nipātamattaṃ, idha kho panāti attho. **Īngha tvaṃ, upāli, saṅghe viharāhī**ti ettha **īnghā**ti codanatthe nipāto. Tena therāṃ saṅgha-majjhe viharatthāya codeti, nāssa araññavāsaṃ anujānāti. Kasmā? Araññasenā-

sane vasato kirassa vāsadhurameva pūrissati, na ganthadhuraṃ. Saṅghamajjhe vasanto pana dve dhurāni pūretvā arahattaṃ pāpuṇissati, vinayapiṭake ca pāmokkho bhavissati. Athassāhaṃ parisamajjhe pubbapatthanaṃ pubbābhinihārañca kathetvā imaṃ bhikkhuṃ vinayadharānaṃ aggaṭṭhāne ṭhapessāmīti imamatthaṃ passamāno satthā therassa araññavāsaṃ nānujānīti. Dasamaṃ uttānatthamevāti.

Upālivaggo pañcama.

Dutiyapaṇṇāsakaṃ niṭṭhitaṃ.

3. Tatiyapaṇṇāsakaṃ

(11) 1. samaṇasaññāvaggo

1. Samaṇasaññāsuttavaṇṇanā

101. Tatiyassa (3.0334) paṭhame **samaṇasaññāti** samaṇānaṃ uppajjanakasaññā. **Santatakārīti** nirantarakārī. **Abyāpajjhoti** niddukkho. **Idamatthaṃtissa hotīti** idamatthaṃ ime paccayāti evamassa jīvitaparikkhāresu hoti, paccavekkhitapari-bhogaṃ paribhuñjatīti attho. Dutiyamaṃ uttānatthameva.

3. Micchattasuttavaṇṇanā

103. Tatiye **virādhanā hotīti** saggato maggato ca virajjanaṃ hoti. **No ārādhanaṃ** na sampādanā na paripūrakārītā hoti. **Pahotīti** pavattati.

4-5. Bijasuttādivaṇṇanā

104-105. Catutthe **yathādiṭṭhi samattaṃ samādinnaṃ** diṭṭhānurūpena paripuṇṇaṃ samādinnaṃ sakalaṃ gahitaṃ. **Cetanāti** tīsu dvāresu nibbattitacetanāva gahitā. **Patthanāti** “evarūpo siyan”ti evamaṃ patthanā. **Paṇidhīti** “devo vā bhavi-ssāmi devaññataro vā”ti cittaṭṭhapanā. **Saṅkhārāti** sampayuttakasaṅkhārā. Pañcame purecārikaṭṭhena **pubbaṅgamā**. **Anvadevāti** taṃ anubandhamānameva.

6. Nijjarasuttavaṇṇanā

106. Chaṭṭhe **nijjaravatthūnīti** nijjarakāraṇāni. **Micchādiṭṭhi nijjiṇṇā hotīti** ayaṃ

heṭṭhā vipassanāyapi

nijjiṇṇā eva pahīnā. Kasmā puna gahitāti? Asamucchinnattā. Vipassanāya hi kiñcāpi nijjiṇṇā, na pana samucchinnā. Maggo pana uppajjitvā taṃ samucchindati, na puna vuṭṭhātum deti. Tasmā puna gahitā. Evaṃ sabbapadesu yojetabbo. Ettha ca sammāvimuttipaccayā catusaṭṭhi dhammā bhāvanāpāripūriṃ gacchanti. Katame catusaṭṭhi? Sotāpattimaggakkhaṇe adhimokkhaṭṭhena (3.0335) saddhindriyaṃ paripūrati, paggahaṭṭhena vīriyindriyaṃ, upaṭṭhānaṭṭhena satindriyaṃ, avikkhepaṭṭhena samādhindriyaṃ, dassanaṭṭhena paññindriyaṃ paripūreti, vijānaṭṭhena manindriyaṃ, abhinandanaṭṭhena somanassindriyaṃ, pavattasantati-ādhipateyyaṭṭhena jīvitindriyaṃ paripūrati ...pe... arahattaphalakkhaṇe adhimokkhaṭṭhena saddhindriyaṃ ...pe... pavattasantati-ādhipateyyaṭṭhena jīvitindriyaṃ paripūrātīti evaṃ catūsu ca maggesu catūsu ca phalesu aṭṭhaṭṭha hutvā catusaṭṭhi dhammā pāripūriṃ gacchanti.

7. Dhovanāsuttavaṇṇanā

107. Sattame **dhovananti** aṭṭhidhovanaṃ. Tasmiñhi janapade manussā ñātake mate na jhāpenti, āvāṭaṃ pana khaṇitvā bhūmiyaṃ nidahanti. Atha nesaṃ pūtibhūtānaṃ aṭṭhīni nīharitvā dhovitvā paṭipāṭiyā ussāpetvā gandhamālehi pūjetvā ṭhapenti. Nakkhatte patte tāni aṭṭhīni gahetvā rodanti paridevanti, tato nakkhattaṃ kīḷanti.

8-10. Tikicchakasuttādivaṇṇanā

108-110. Aṭṭhame **virecananti** dosanīharaṇabhesajjaṃ. **Virittā hotīti** nīhaṭā hoti panuditā. Navame **vamananti** vamanakaraṇabhesajjaṃ. Dasame **niddhamanīyāti** niddhamitabbā. **Niddhantāti** niddhamitā.

11. Paṭhama-asekhasuttavaṇṇanā

111. Ekādasame aṅgaparipūraṇatthaṃ sammādiṭṭhiyeva **sammāñāṇanti** vuttā. Evamete sabbepi arahattaphaladhammā asekhā, asekhassa pavattattā paccavekkhaṇañāṇampi asekhanti vuttaṃ.

12. Dutiya-asekhasuttavaṇṇanā

112. Dvādasame **asekhiyāti** asekhāyeva, asekhasantakā vā. Iminā suttena khīṇāsavova kathitoti.

Samaṇasaññāvaggo paṭhamo.

(12) 2. paccorohaṇivaggo

1-2. Adhammasuttadvayaṇṇanā

113-114. Dutiyassa (3.0336) paṭhame pāṭiyekkaṃ pucchā ca vissajjanā ca katā. Dutīye ekatova.

3. Tatiya-adhammasuttavaṇṇanā

115. Tatiye **uddesaṃ uddisitvā**ti mātikaṃ nikkhipitvā. **Satthu ceva saṃvaṇṇitoti** pañcasu ṭhānesu etadagge ṭhapentena satthārā saṃvaṇṇito. **Sambhāvitoti** guṇa-sambhāvanāya sambhāvito. **Pahotīti** sakkoti. **Atisitvā**ti atikkamitvā. **Jānaṃ jānā-****tī**ti jānitabbakaṃ jānāti. **Passaṃ passatī**ti passitabbakaṃ passati. **Cakkhubhūtoti** cakkhu viya bhūto jāto nibbatto. **Ñāṇabhūtoti** ñāṇasabhāvo. **Dhammabhūtoti** dhammasabhāvo. **Brahmabhūtoti** seṭṭhasabhāvo. **Vattāti** vattuṃ samattho. **Pavattāti** pavattetuṃ samattho. **Atthassa ninnetā**ti atthaṃ nīharitvā dassetā. **Yathā no bhagavā**ti yathā amhākaṃ bhagavā byākareyya.

4. Ajitasuttavaṇṇanā

116. Catutthe **ajitoti** evaṃnāmako. **Cittaṭṭhānasatānī**ti cittuppādasatāni. **Yehīti** yehi cittaṭṭhānasatehi anuyuññijyamānā. **Upāraddhāva jānanti upāraddhasmā**ti viraddhā niggahitā evaṃ jānanti “viraddhā mayaṃ, niggahitā mayaṃ, āropito no doso”ti. **Paṇḍitavatthūnī**ti paṇḍitabhāvatthāya kāraṇāni.

5-6. Saṅgāravasuttādivaṇṇanā

117-118. Pañcame **orimaṃ tīranti** lokiyaṃ orimatīraṃ. **Pārimaṃ tīranti** lokuttaraṃ pārimatīraṃ. **Pāragāminoti** nibbānagāmino. **Tīramevānudhāvātī**ti sakkāya-ditṭhitīraṃyeva anudhāvati. **Dhamme dhammānuvattinoti** sammā akkhāte nava-vidhe lokuttaradhamme anudhammavattino, tassa dhammassānucchavikāya sahasilāya pubbabhāgapaṭipattiyā pavattamānā. **Maccudheyyaṃ** (3.0337) **suduttaranti** maccuno ṭhānabhūtaṃ tebhūmakavaṭṭaṃ suduttaraṃ taritvā. **Pāramessa-****ntī**ti nibbānaṃ pāpuṇissanti.

Okā anokamāgammāti vaṭṭato vivaṭṭaṃ āgamma. **Viveke yattha dūramanti** yasmimṃ kāyacitta-upadhiviveke durabhiramaṃ, tatrābhiratimiccheyya. **Hitvā kāmeti** duvidhepi kāme pahāya. **Akiñcanoti** nippalibodho. **Ādānapaṭinissageti** gahaṇapaṭinissaggasañkhāte nibbāne. **Anupādāya ye ratā**ti catūhi upādānehi kiñcīpi anupādiyitvā ye abhiratā. **Parinibbutā**ti te apaccayaparinibbānena parinibbutā nāmāti veditabbā. Chaṭṭhaṃ bhikkhūnaṃ desitaṃ.

7-8. Paccorohaṇīsuttadvayaṇṇanā

119-120. Sattame **paccorohaṇīti** pāpassa paccorohaṇaṃ. **Pattharivāti** santharivā. **Antarā ca velaṃ antarā ca agyāgāranti** vālikārāsissa ca aggi-agārassa ca antare. Aṭṭhamaṃ bhikkhusaṅghassa desitaṃ. Sesamaṃ sabbattha uttānatthamevāti.

Paccorohaṇivaggo dutiyo.

(13) 3. parisuddhavaggavaṇṇanā

123. Tatiyassa paṭhame **parisuddhāti** nimmalā. **Pariyodātāti** pabhassarā. Dutiyādīni uttānatthānevāti.

Parisuddhavaggo tatiyo.

(14) 4. sādhuvaṅgavaṇṇanā

134. Catutthassa paṭhame **sādhunti** bhaddakaṃ siliṭṭhakaṃ. Dutiyādīni uttānatthānevāti. Ariyamaggavaggo uttānatthoyevāti.

Sādhuvaggo catuttho.

Tatiyapaṇṇāsakaṃ niṭṭhitaṃ.

4. Catutthapaṇṇāsakaṃ

155. Catutthassa (3.0338) paṭhamādīni uttānatthānevāti.

8. Kammanidānasuttavaṇṇanā

174. Aṭṭhame **lobhahetukampīti** pāṇātipātassa lobho upanissayakoṭiyā hetu hoti dosamohasampayuttopi. Iminā upāyena sabbattha attho veditabbo.

9. Parikkamanasuttavaṇṇanā

175. Navame **parikkamaṃ hotīti** parivajjanaṃ hoti.

10. Cundasuttavaṇṇanā

176. Dasame **kammāraputtassāti** suvaṇṇakāraputtassa. **Kassa no tvanti** kassa nu tvaṃ. **Pacchābhūmakāti** pacchābhūmivāsikā. **Kamaṇḍalukāti** kamaṇḍaludhārino. **Sevālamālikāti** sevālamālā viya dhārenti. Sevālapaṭṭanivāsītātipi vuttameva. **Udakorohakāti** sāyatatiyakaṃ udakorohanānuyogamanuyuttā. **Āmaseyyāsīti** hatthena parimajjeyyāsi.

11. Jāṇussoṇisuttavaṇṇanā

177. Ekādasame **upakappatūti** pāpuṇātu. **Ṭhāneti** okāse. **No aṭṭhāneti** no anokāse. **Nerayikānaṃ āhāro** nāma tattha nibbattanakkammameva. Teneva hi te tattha yāpenti. **Tiracchānayanikānaṃ** pana tiṇapaṇṇādivasena āhāro veditabbo. **Manussānaṃ** odanakummāsādivasena, **devānaṃ** sudhābhojanādivasena, **pettivesayikānaṃ** kheḷasiṅghāṇikādivasena. **Yaṃ vā panassa ito anuppaveccantīti** yaṃ tassa mittādayo ito dadantā anupavesenti. Pettivesayikā eva hi paradattūpajīvino honti, na aññesaṃ parehi dinnāṃ (3.0339) upakappati. **Dāyakopi anipphaloti** yaṃ sandhāya taṃ dānaṃ dinnāṃ, tassa upakappatu vā mā vā, dāyakena pana na sakkā nipphalena bhavituṃ, dāyako tassa dānassa vipākaṃ labhatiyeva.

Aṭṭhānepi bhavaṃ gotamo parikappaṃ vadatīti anokāse uppannepi tasmimṃ ñātake bhavaṃ gotamo dānassa phalaṃ parikappetiyeva paññāpetiyevāti pucchati. Brāhmaṇassa hi “evaṃ dinnassa dānassa phalaṃ dāyako na labhati”ti laddhi. Athassa bhagavā pañhaṃ paṭijānitvā “dāyako nāma yattha katthaci puñña-phalūpajīvitṭhāne nibbatta dānassa phalaṃ labhatiyevā”ti dassetuṃ **idha brāhmaṇāti-ādimāha**. **So tattha lābhī hotīti** so tattha hatthiyoniyaṃ nibbattopi maṅgalahatthiṭṭhānaṃ patvā lābhī hoti. Assādīsipi eseva nayo. Sādhuvaṃ uttānatthoyevāti.

Jāṇussoṇivaggo dutiyo.

Catutthapaṇṇāsakaṃ niṭṭhitaṃ.

(21) 1. karajakāyavaggo

211. Pañcamassa (3.0340) paṭhamādīni uttānatthāneva.

6. Saṃsappanīyasuttavaṇṇanā

216. Chaṭṭhe **saṃsappanīyapariyāyaṃ vo, bhikkhave, dhammapariyāyanti** saṃsappanassa kāraṇaṃ desanāsaṅkhātāṃ dhammadeśanaṃ. **Saṃsappatīti** taṃ kammaṃ karonto āsappati parisappati vipphandati. **Jimhā gatīti** tena kammena

yaṃ gatiṃ gamissati, sā jimhā hoti. **Jimhupapattī**ti tassa yaṃ gatiṃ upapajjissati, sāpi jimhāva hoti. **Saṃsappajātikā**ti saṃsappanasabhāvā. **Bhūtā bhūtassa upapatti hotī**ti bhūtaṃ sabbhāvato vijjamānakammā sattassa nibbatti hoti. **Phassā phusantī**ti vipākaphassā phusanti.

7-8. Sañcetanikasuttadvayaṇṇā

217-218. Sattame **sañcetanikānanti** cetetvā pakappetvā katānaṃ. **Upacitānanti** citānaṃ vaḍḍhitānaṃ. **Appaṭisaṃveditvā**ti tesaṃ kammānaṃ vipākaṃ avediyitvā. **Byantībhāvanti** vigatantabhāvaṃ tesaṃ kammānaṃ paricchedaparivaṭumātākaraṇaṃ. **Tañca kho diṭṭheva dhammeti** tañca

kho vipākaṃ diṭṭhadhammavedaniyaṃ diṭṭheva dhamme. **Upapajjanti** upapajjavedaniyaṃ anantare attabhāve. **Apare vā pariyāyenti** aparapariyāyavedaniyaṃ pana saṃsārappavatte sati saḥassimepi attabhāveti. Iminā idaṃ dasseti “saṃsārappavatte paṭiladdhaviṭṭhārahakamme na vijjati so jagatippadeso, yattha tṭhito mucceyya pāpakammā”ti. **Tividhāti** tippakārā. **Kāyakammantasandosabyāpattīti** kāyakammantasāṅkhātā vipatti. Iminā nayena sabbapadāni veditabbāni. Aṭṭhame **apaṇṇako maṇīti** samantato caturasso pāsako.

9. Karajakāyasuttavaṇṇanā

219. Navame **dukkhassāti** vipākadukkhassa, vaṭṭadukkhasseva vā. Imasmiṃ sutte maṇi-opammaṃ natthi. **Evam vigatābhijjhoti evanti** nipātamattaṃ. Yathā vā mettaṃ (3.0341) bhāventā vigatābhijjhā bhavanti, evaṃ vigatābhijjho. Evamassa vigatābhijjhatādīhi nīvaraṇavikkhambhanaṃ dassetvā idāni akusalanissaraṇāni kathento **mettāsahagatenāti-ādimāha**. **Appamāṇanti** appamāṇasattārammaṇatāya ciṇṇavasitāya vā appamāṇaṃ. **Pamāṇakataṃ kammaṃ** nāma kāmāvacarakammaṃ. **Na taṃ tatrāvatiṭṭhatīti** taṃ mahogho parittaṃ udakaṃ viya attano okāsaṃ gahetvā tṭhātuṃ na sakkoti, atha kho naṃ oghe parittaṃ udakaṃ viya idameva appamāṇaṃ kammaṃ ajjhottharivā attano vipākaṃ nibbatteti. **Daharata-ggeti** daharakālato paṭṭhāya.

Nāyaṃ kāyo ādāyagamaniyoti imaṃ kāyaṃ gahetvā paralokaṃ gantuṃ nāma na sakkāti attho. **Cittantaroti** cittakāraṇo, atha vā citteneva antariko. Ekasseva hi cuticittassa anantarā dutiye paṭisandhicitte devo nāma hoti, nerayiko nāma hoti, tiracchānagato nāma hoti. Purimanayepi cittena kāraṇabhūtena devo nerayiko vā hotīti attho. **Sabbaṃ taṃ idha vedaniyanti** diṭṭhadhammavedaniyakoṭṭhāsavanetaṃ vuttaṃ. **Na taṃ anugaṃ bhavissatīti** mettāya upapajjavedaniyabhāvassa upacchinnatā upapajjavedaniyavasena na anugataṃ bhavissati. Idaṃ sotāpanna-sakadāgāmi-ariyapuggalānaṃ paccavekkhaṇaṃ veditabbaṃ. **Anāgāmitāyāti** jhānānāgāmitāya. **Idhapaññassāti** imasmiṃ sāsane paññā idhapaññā nāma, sāsana-caritāya ariyapaññāya tṭhassa ariyasāvakaṃ assāti attho. **Uttarivimuttinti** arahattaṃ. Dasamaṃ uttānatthamevāti.

Karajakāyavaggo paṭhamo.

(22) 2. sāmāññavaggavaṇṇanā

221. Dutiyassa paṭhamaṃ ādiṃ katvā sabbā peyyālatanti uttānatthāyevāti.

Manorathapūraṇiyā aṅguttaranikāya-aṭṭhakathāya

Dasakanipātassa saṃvaṇṇanā niṭṭhitā.

Namo tassa bhagavato arahato sammāsambuddhassa

Aṅguttaranikāye

Ekādasakanipāta-aṭṭhakathā

1. Nissayavaggo

1-6. Kimatthiyasuttādivaṇṇanā

1-6. Ekādasakanipātassa (3.0343) paṭhamādīni heṭṭhā vuttanayāneva. Kevala-ñcetha ādito pañcasu nibbidāvirāgaṃ dvidhā bhinditvā ekādasaṅgāni katāni. Chaṭṭhe sikkhāpaccakkhānaṃ adhikaṃ.

7-8. Paṭhamasaññāsuttādivaṇṇanā

7-8. Sattame **atthena atthoti** atthena saddhimattho. **Byañjanena byañjananti** byañjanena saddhiṃ byañjanaṃ. **Saṃsandissatīti** sampavattissati. **Samessatīti** samānaṃ bhavissati. **Na viggayhissatīti** na virajjhissati. **Aggapadasminti** nibbāne. Aṭṭhame paccavekkhāṇā kathitā.

9. Saddhasuttavaṇṇanā

9. Navame **doṇiyā baddhoti** yavasassadoṇiyā samīpe baddho. **Antaraṃ kari-tvāti** abbhantare katvā. **Jhāyatīti** cinteti. **Pajjhāyatīti** ito cito ca nānappakāraṃ jhāyati. **Nijjhāyatīti** nirantaravasena nibaddhaṃ jhāyati. **Pathavimpi nissāya jhāyatīti** samāpattiyā sanikantikavasena vuttaṃ. Samāpattiyāñhi sanikantikattā esa khaḷuṅko nāma kato. **Āpādisupi** eseva nayo.

Kathañca saddha ājāniyajhāyitaṃ hotīti kathaṃ kāraṇākāraṇaṃ jānantassa sindhavassa jhāyitaṃ hoti. **Yathā iṇanti-ādīsu iṇasadisāṃ bandhanasadisāṃ dhanajānisadisāṃ kalisaṅkhātamaḥāparādhasadisāñca** katvā attano abhimukhassa patodassa ajjhoharaṇasaṅkhātaṃ patanaṃ vipassatīti attho. **Neva pathaviṃ nissāya jhāyatīti** samāpattisukhanikantiyā abhāvena pathavi-ārammaṇāya (3.0344) catukkapañcakajjhānasaññāya na jhāyati, niyantiyā abhāveneva so ājāniyo nāma

hotīti. **Jhāyati ca panāti** nibbānārammaṇāya phalasaṃpattiyā jhāyati. **Pathaviyaṃ pathavisaññā vibhūtā hotīti** pathavārammaṇe uppannā catukkapañcakajjhāna-
saññā vibhūtā pākaṭā hoti. “Vibhūtā, bhante, rūpasaññā avibhūtā aṭṭhikasaññā”ti
imasmiñhi sutte samatikkamassa atthitāya vibhūtata vuttā, idha pana vipassanāva-
sena aniccadukkhānattato diṭṭhattā vibhūtā nāma jātā. **Āposaññā**disupi eseva
nayo. Evamettha heṭṭhā viya samāpattivāsena samatikkamaṃ avatvā vipassanā-
cāravāsena samatikkamo vutto. **Evam jhāyīti** evaṃ vipassanāpaṭipāṭiyā āgantvā
uppāditāya phalasaṃpattiyā jhāyanto.

10. Moranivāpasuttavaṇṇanā

10. Dasame **accantaniṭṭho**ti antaṃ atītattā accantasaṅkhātamaṃ avināsadhammaṃ
nibbānaṃ niṭṭhā assāti accantaniṭṭho. Iminā nayena sesapadāni veditabbāni. **Jane-**
tasminti janitasmim, pajāyāti attho. **Ye gottapaṭisārīnoti** ye janā tasmim gotte paṭi-
saranti “ahaṃ gotamo, ahaṃ kassapo”ti, tesu loke gottapaṭisārīsu khattiyo seṭṭho.
Anumatā mayāti mama sabbaññutaññāṇena saddhim saṃsandetvā desitā mayā
anuññātā. Sesam sabbattha uttānatthamevāti.

Nissayavaggo paṭhamo.

2. Anussativaggo

1-2. Mahānāmasuttadvayaṇṇanā

11-12. Dutiyaṃ paṭhame **nānāvihārehi viharatanti** gihīnaṃ nibaddho eko
vihāro nāma natthi, tasmā amhākaṃ anibaddhavihārena viharantānaṃ kena vihā-
rena katarena nibaddhavihārena vihātābanti pucchati. **Ārādhakoti** sampādako
paripūrako. **Dhammasotasamāpanno buddhānussatiṃ** (3.0345) **bhāvetīti** dhamma-
sotasamāpanno hutvā buddhānussatiṃ bhāveti. Dutiye **gilānā vuṭṭhitoti** gilāno
hutvā vuṭṭhito.

3. Nandiyasuttavaṇṇanā

13. Tatiye **kalyāṇamitteti** sumitte. Evamettha kalyāṇamittavasena saṅghānu-
ssati kathitā. **Kabaḷikārāhārabhakkhānanti** kāmāvacaradevānaṃ. **Asamayavimu-**
ttoti asamayavimuttīyā vimutto khīṇāsavo.

4. Subhūtisuttavaṇṇanā

14. Catutthe **ko nāmāyaṃ subhūtī bhikkhūti** jānantopi satthā kathāsamuṭṭhāpa-

nattham pucchati. **Sudattassa upāsakassa puttoti** anāthapiṇḍikaṃ sandhāyāha. Anāthapiṇḍikassa hi putto attano cūlapitu santike pabbajito, atha naṃ subhūti-tthero ādāya satthu santikaṃ agamāsi. **Saddhāpadānesūti** saddhānaṃ puggalānaṃ apadānesu lakkhaṇesu.

5. Mettasuttavaṇṇanā

15. Pañcame **sukhaṃ supatīti** yathā sesajanā samparivattamānā kākacchamānā dukkhaṃ supanti, evaṃ asupitvā sukhaṃ supati. Niddaṃ okkamantopi samāpattiṃ samāpanno viya hoti. **Sukhaṃ paṭibujjhatīti** yathā aññe nitthunantā vijambhamānā samparivattantā dukkhaṃ paṭibujjhanti, evaṃ appaṭibujjhitvā vika-samānaṃ viya padumaṃ sukhaṃ nibbikāro paṭibujjhati. **Na pāpakaṃ supinaṃ passatīti** supinaṃ passantopi bhaddakameva supinaṃ passati, cetiyaṃ vandanto viya pūjaṃ karonto viya ca dhammaṃ suṇanto viya ca hoti. Yathā panaññe attānaṃ corehi samparivāritaṃ viya vāḷehi upaddutaṃ viya papāte patantaṃ viya ca passanti, na evaṃ pāpakaṃ supinaṃ passati.

Manussānaṃ piyo hotīti ure āmukkamuttāhāro viya sīse piḷandhitamālā viya ca manussānaṃ piyo hoti manāpo. **Amanussānaṃ piyo hotīti** yatheva manussānaṃ, amanussānampi piyo hoti visākhathero viya. Vatthu visuddhimagge (visuddhi. 1.258) mettākammaṭṭhānaniddese vitthāritameva. **Devatā rakkhatīti** puttamiva mātāpitaro devatā rakkhanti. **Nāssa aggi** (3.0346) **vā visam vā sattham vā kama-tīti** mettāvihārissa kāye uttarāya upāsikāya viya aggi vā, saṃyuttabhāṇakacūḷasi-vattherasseva visam vā, saṃkiccāsamaṇerasseva sattham vā na kamati nappavi-sati, nāssa kāyaṃ vikopetīti vuttaṃ hoti. Dhenuvatthumpi cettha kathayanti. Ekā kira dhenu vacchakassa khīradhāraṃ muñcamānā aṭṭhāsi. Eko luddako “taṃ vijjhissāmī”ti hatthena samparivattetvā dīghadaṇḍaṃ sattim muñci. Sā tassā sarīraṃ āhacca tālapaṇṇaṃ viya vaṭṭamānā gatā, neva upacārabalena na appanā-balena, kevalaṃ vacchake balavahitacittatāya. Evaṃ mahānubhāvā mettā.

Tuvaṭaṃ cittaṃ samādhiyatīti mettāvihārino khippameva cittaṃ samādhiyati, natthi tassa dandhāyitattaṃ. **Mukhavaṇṇo vipasīdatīti** bandhanā pavuttatāla-pakkaṃ viya cassa vipasannaṃ mukhaṃ hoti. **Asammūḷho kālaṃ karotīti** mettāvihārino sammohamaṇaṃ nāma natthi, asammūḷho pana niddaṃ okka-manto viya kālaṃ karoti. **Uttari appaṭivijjhantoti** mettāsamāpattito uttari arahattaṃ adhigantaṃ asakkonto ito cavitvā suttappabuddho viya brahmalokaṃ upapajjatīti.

6. Aṭṭhakanāgarasuttavaṇṇanā

16. Chaṭṭhe **dasamoti** jātigottavasena ceva sārapattakulagaṇanāya ca dasame ṭhāne gaṇiyati, tenassa dasamotveva nāmaṃ jātaṃ. **Aṭṭhakanāgaroti** aṭṭhakanaga-ravāsī. **Kukkuṭārāmeti** kukkuṭaseṭṭhinā kārīte ārāme.

Tena bhagavatā ...pe... sammadakkhātoti ettha ayaṃ saṅkhepattho- yo so bhagavā samatiṃsa pāramiyo pūretvā sabbakilese bhañjivā anuttaraṃ sammāsa-

mbođhiṃ abhisambuddho, tena bhagavatā tesam tesam sattānaṃ āsayānusayaṃ
jānatā, hatthatale ṭhapitaṃ āmalakaṃ viya sabbañeyyadhamme passatā, apica
pubbenivāsādīhi jānatā, dibbena cakkhunā passatā, tīhi vā vijjāhi chahi vā pana

abhiññāhi jānatā, sabbattha appaṭihatena samantacakkhunā passatā, sabbadhammajānanasamatthāya paññāya jānatā, sabbasattānaṃ cakkhuvisayātītāni tirokuṭṭādigatāni cāpi (3.0347) rūpāni ativissuddhena maṃsacakkhunā vā passatā, atthitasādhikāya samādhipadaṭṭhānāya paṭivedhapaññāya jānatā, parahitasādhikāya karuṇāpadaṭṭhānāya desanāpaññāya passatā, antarāyikadhamme vā jānatā, niyyānikadhamme passatā, arīnaṃ hatattā arahatā, sammā sāmaṃ sabbadhammānaṃ buddhattā sammāsambuddhenāti evaṃ catuvesārajjasena catūhi kāraṇehi thomitena atthi nu kho eko dhammo akkhātoti.

Abhisankhatanti kataṃ uppāditam. **Abhisāñcetayitanti** cetayitam kappayitam. **So tattha ṭhitoti** so tasmim samathavipassanādhamme ṭhito. **Dhammarāgena dhammanandiyāti** padadvayenapi samathavipassanāsu chandarāgo vutto. Samathavipassanāsu hi sabbena sabbaṃ chandarāgaṃ pariyādiyitum sakkonto arahā hoti, asakkonto anāgāmī hoti. So samathavipassanāsu chandarāgassa appahinattā catutthajjhānacetanāya suddhāvāse nibbattati. Ayaṃ ācariyānaṃ samānatthakathā.

Vitaṇḍavādī panāha- “teneva dhammarāgenāti vacanato akusalena suddhāvāse nibbattati”ti. So “suttaṃ āharāhi”ti vattabbo. Addhā aññaṃ apassanto idameva āharissati. Tato vattabbo “kimpanidaṃ suttaṃ nītatthaṃ, udāhu neyyatthan”ti. Addhā “nītatthan”ti vakkhati. Tato vattabbo- evaṃ sante anāgāmiphalatthikena samathavipassanāsu chandarāgo kattabbo bhavissati, chandarāge uppādite anāgāmiphalaṃ paṭiladdhaṃ bhavissati, mā “suttaṃ me laddhan”ti yaṃ vā taṃ vā dīpehi. Pañhaṃ kathentena hi ācariyassa santike uggahetvā attharasam paṭivijjhivā kathetum vaṭṭati. Akusalena hi sagge, kusalena ca apāye paṭisandhi nāmanatthi. Vuttañcetam bhagavatā-

“Na, bhikkhave, lobhajena kamma, dosajena kamma, mohajena kamma devā paññāyanti, manussā paññāyanti, yā vā panaññāpi kāci sugatiyo. Atha kho, bhikkhave, lobhajena kamma, dosajena kamma, mohajena kamma nirayo paññāyati, tiracchānāyoni paññāyati, pettivisayo paññāyati, yā vā panaññāpi kāci duggatiyo”ti (a. ni. 6.39)-

Evaṃ (3.0348) saññāpetabbo. Sace sañjānāti, sañjānātu. No ce sañjānāti, “gaccha pātova vihāraṃ pavisitvā yāgum pivā”ti uyyojetabbo.

Ayaṃ kho, gahapati, ekadhammo akkhātoti ekaṃ dhammaṃ pucchitena “ayampi ekadhammo akkhāto, ayampi ekadhammo akkhāto”ti evaṃ pucchāvasena kathitattā ekādasapi dhammā ekadhammo nāma kato. Amatuppatti-atthena vā sabbepi ekadhammoti vattum vaṭṭati.

Nidhimukhaṃ gavesantoti nidhiṃ pariyesanto. **Sakidevāti** ekappayogeneva. Kathaṃ pana ekappayogeneva ekādasannaṃ nidhinaṃ adhigamo hotīti? Idhekacco araṇṇe jīvitavuttiṃ gavesamāno carati. Tameṇaṃ aññataro atthacarako disvā “kiṃ, bho, carasī”ti pucchati. So “jīvitavuttiṃ pariyesāmi”ti āha. Itaro “tena hi samma āgaccha, etaṃ pāsāṇaṃ pavaṭṭehi”ti āha. So taṃ pavaṭṭetvā uparūpariṭṭhitā vā kucchiyā kucchiṃ āhacca ṭhitā vā ekādasā kumbhiyo passati. Evaṃ ekappayogena ekādasannaṃ adhigamo hoti.

Ācariyadhanam pariyesissantīti aññatitthiyā hi yassa santike sippam ugga-
ṇhanti, tassa sippuggahaṇato pure vā pacchā vā antarantarā vā gehato nīharitvā
dhanam denti. Yesam gehe natthi, te ñātisabhāgato pariyesanti. Yesam tampi
natthi, te sabhāgato pariyesanti. Tathā alabhamānā bhikkhampi caritvā dentiyeva.
Tam sandhāyetaṃ vuttaṃ.

Kim panāhanti bāhirakā tāva aniyyānikepi sāsane sippamattadāyakassa
dhanam pariyesanti, aham pana evaṃvidhe niyyānikasāsane ekādasavidham
amatuppattipaṭipadam desentassa ācariyassa pūjam kim na karissāmi, karissāmi-
yevāti vadati. **Paccekam dussayugena acchādesīti** ekamekassa bhikkhuno
ekekam dussayugam adāsīti attho. Samudācāravacanam panettha evarūpaṃ
hoti, tasmā acchādesīti vuttaṃ. **Pañcasatam vihāranti** pañcasatagghanikam
pañnasālam kāresīti attho.

7. Gopālasuttavaṇṇanā

17. Sattame tisso kathā ekanālikā caturassā nisinnavattikāti. Tattha pāḷiṃ vatvā
ekekassa padassa atthakathanam **ekanālikā** nāma (3.0349). Apaṇḍitagopālakaṃ
dassetvā, apaṇḍitabhikkhum dassetvā, paṇḍitagopālakaṃ dassetvā, paṇḍita-
bhikkhum dassetvāti catukkam bandhitvā kathanam **caturassā** nāma. Apaṇḍitago-
pālakaṃ dassetvā pariyosānagamanaṃ, apaṇḍitabhikkhum dassetvā pariyosāna-
gamaṃ, paṇḍitagopālakaṃ dassetvā pariyosānagamanaṃ, paṇḍitabhikkhum
dassetvā pariyosānagamanaṃ anti ayam **nisinnavattikā** nāma. Ayam idha sabbācari-
yānam āciṇṇā.

Ekādasahi, bhikkhave, aṅgehīti ekādasahi aguṇakoṭṭhāsehi. **Gogaṇanti** goma-
ṇḍalam. **Pariharitunti** pariggahetvā vicarituṃ. **Phātim kātunti** vaḍḍhiṃ āpādetuṃ.
Ihdhāti imasmim loke. **Na rūpaññū hotīti** gaṇanato vā vaṇṇato vā rūpaṃ na jānāti.
Gaṇanato na jānāti nāma attano gunnam satam vā sahasam vāti saṅkhyam na
jānāti, so gāvīsu haṭṭāsu vā palātāsu vā gogaṇam gaṇetvā “ajja ettakā na dissanti”-
ti dve tīṇi gāmantarāni vā aṭṭaviṃ vā vicaranto na pariyesati. Aññesam gāvīsu
attano gogaṇam pavitṭhāsupi gogaṇam gaṇetvā “imā ettikā gāvo na amhākaṃ”ti
yaṭṭhiyā pothetvā na nīharati. Tassa naṭṭhā gāvīyo naṭṭhāva honti. Paragāvīyo
gahetvā carati. Gosāmikā disvā “ayam ettakam kalam amhākam dhenū duhi”ti
tajjetvā attano gāvīyo gahetvā gacchanti. Tassa gogaṇopi parihāyati, pañca gora-
saparibhogatopi paribāhiro hoti. Vaṇṇato na jānāti nāma “ettikā gāvī setā, ettikā
rattā, ettikā kāḷā, ettikā odātā, ettikā kabarā, ettikā nīlā”ti na jānāti. So gāvīsu
haṭṭāsu vā palātāsu vā ...pe... pañcagorasaparibhogatopi paribāhiro hoti.

Na lakkhaṇakusaloti gāvīnam sarīre kataṃ dhanusattisūlādibhedam lakkhaṇam
na jānāti. So gāvīsu haṭṭāsu vā palātāsu vā “ajja asukalakkhaṇā asukalakkhaṇā ca
gāvo na dissanti”ti ...pe... pañcagorasaparibhogatopi paribāhiro hoti.

Na āsāṭikam hāretāti gunnam khāṇukaṇṭakādīhi pahaṭṭhānesu vaṇo hoti.
Tattha nīlamakkhikā aṇḍakāni ṭhapenti, tesam āsāṭikāti nāmaṃ. Tāni daṇḍakena
apanetvā bhesajjam dātabbam hoti, bālo gopālako tathā na karoti. Tena vuttaṃ-

“na āsāṭikaṃ hāretā (3.0350) hotī”ti. Tassa gunnaṃ vaṇā vadḍhanti, gambhīrā honti, pāṇakā kucchiṃ pavisanti, gāvo gelaññābhibhūtā neva yāvadatthaṃ tiṇaṃ khādituṃ na pāṇiyaṃ pātuṃ sakkonti. Tattha gunnaṃ khīraṃ chijjati, goṇānaṃ javo hāyati, ubhayesampi jīvitantarāyo hoti. Evamassa gogaṇopi parihāyati ...pe... pañcagorasatopi paribāhiro hoti.

Na vaṇaṃ paṭicchādetā hotīti gunnaṃ vuttanayeneva sañjāto vaṇo bhesajjaṃ datvā vākena vā cīrakena vā bandhitvā paṭicchādetabbo hoti. Bālagopālako taṃ na karoti. Athassa gunnaṃ vaṇehi yūsā paggharanti, tā aññamaññaṃ nighaṃsanti. Tena aññesampi vaṇā jāyanti. Evaṃ gāvo gelaññābhibhūtā neva yāvadatthaṃ tiṇāni khādituṃ ...pe... paribāhiro hoti.

Na dhūmaṃ kattā hotīti antovasse ḍaṃsamakasādīnaṃ ussannaṃ gogaṇe vajaṃ pavitṭhe tattha tattha dhūmo kātabbo hoti. Apaṇḍitagopālako taṃ na karoti, gogaṇo sabbarattiṃ ḍaṃsādīhi upadduto niddaṃ alabhitvā punadivase araññe tattha tattha rukkhamaṭṭhāsu nipajjitvā niddāyati. Neva yāvadatthaṃ tiṇāni khādituṃ ...pe... paribāhiro hoti.

Na titthaṃ jānātīti titthampi samanti vā visamanti vā sagāhanti vā niggāhanti vā na jānāti. So atitthena gāviyo otāreti. Tāsaṃ visamatitthe pāsāṇādīni akkamaṇṭṭīnaṃ pādā bhijjanti. Sagāhaṃ gambhīraṃ titthaṃ otiṇṇe kumbhīlādayo gāvo gaṇhanti, “ajja ettikā gāvo naṭṭhā, ajja ettikā”ti vattabbaṃ āpajjanti. Evamassa go gaṇopi parihāyati ...pe... pañcagorasatopi paribāhiro hoti.

Na pītaṃ jānātīti pītampi apītampi na jānāti. Gopālakena hi “imāya gāviyā pītaṃ, imāya na pītaṃ, imāya pāṇiyatitthe okāso laddho, imāya na laddho”ti evaṃ pītāpītaṃ jānitabbaṃ hoti. Ayaṃ pana divasabhāge araññe gogaṇaṃ rakkhitvā “pāṇiyaṃ pāyessāmī”ti nadiṃ vā taḷākaṃ vā ogāhetvā gacchati. Tattha mahā-udabhā ca anusabhā ca balavagāviyo ca dubbalāni ceva mahallakāni ca gorūpāni siṅgehi (3.0351) vā phāsukāhi vā paharivā attano okāsaṃ katvā ūruppamaṇaṃ udakaṃ pavisitvā yathākāmaṃ pivanti. Avasesā okāsaṃ alabhamānā tīre ṭhatvā kalalamissakaṃ udakaṃ pivanti vā apītā eva vā honti. Atha so gopālako piṭṭhiyaṃ paharivā puna araññaṃ paveseti. Tattha apītā gāviyo pipāsāya sussaṃānā yāvadatthaṃ tiṇāni khādituṃ na sakkonti. Tattha gunnaṃ khīraṃ chijjati. Goṇānaṃ javo hāyati ...pe... paribāhiro hoti.

Na vīthiṃ jānātīti “ayaṃ maggo samo khemo, ayaṃ visamo sāsaṅko sappaṭibhāyo”ti na jānāti. So samaṃ khemaṃ maggaṃ vajjetvā gogaṇaṃ itaramaggaṃ paṭipādeti. Tattha gāvo sīhabyagghādīnaṃ gandhena coraparissayena ca abhibhūtā bhantamigasappaṭibhāgā gīvaṃ ukkhipitvā tiṭṭhanti, neva yāvadatthaṃ tiṇāni khādanti, na pāṇiyaṃ pivanti. Tattha gunnaṃ khīraṃ chijjati ...pe... paribāhiro hoti.

Na gocarakusalo hotīti gopālakena hi gocarakusalena bhavitabbaṃ, pañcāhikacāro vā sattāhikacāro vā jānitabbo. Ekadisāya gogaṇaṃ cāretvā punadivase tattha na cāretabbo. Mahatā hi gogaṇena ciṇṇaṭṭhānaṃ bheritalaṃ viya suddhaṃ hoti nittiṇaṃ, udakampi āluliyati. Tasmā pañcame vā sattame vā divase puna tattha cāretuṃ vaṭṭati. Ettakena hi tiṇampi paṭiviruhati, udakampi pasīdati, ayaṃ

pana imaṃ pañcāhikacāraṃ vā sattāhikacāraṃ vā na jānāti, divase divase rakkhi-taṭṭhāneyeva rakkhati. Athassa gogaṇo haritatiṇaṃ na labhati, sukkhatiṇaṃ khādanto kalalamissakaṃ udakaṃ pivati. Tattha gunnaṃ khīraṃ chijjati ...pe... paribāhiro hoti.

Anavasesadohī ca hotīti paṇḍitagopālakena hi yāva vacchakassa maṃsalohitaṃ saṇṭhāti, tāva ekaṃ dve thane ṭhapetvā sāvasesadohinā bhavitabbaṃ. Ayaṃ vacchakassa kiñci anavasesetvā duhati. Khīrapako vaccho khīrapipāsāya sussati, saṇṭhātuṃ asakkonto kampamāno mātu purato patitvā kālaṃ karonti. Mātā puttakaṃ disvā, “mayhaṃ puttako attano mātukhīraṃ pātuṃ na labhati”ti (3.0352) puttasokena neva yāvadatthaṃ tiṇāni khādituṃ na pāṇiyaṃ pātuṃ sakkoti, thanesu khīraṃ chijjati. Evamassa gogaṇopi parihāyati ...pe... pañcagorasatopi paribāhiro hoti.

Gunnaṃ pitiṭṭhānaṃ karontīti **gopitaro**. Gāvo pariṇāyanti yathāruciṃ gahetvā gacchantīti **gopariṇāyakā**. **Te na atirekapūjāyāti** paṇḍito hi gopālako evarūpe usabhe atirekapūjāya pūjeti, paṇītaṃ gobhattaṃ deti, gandhapañcaṅgulikehi maṇḍeti, mālaṃ piḷandheti, siṅgesu suvaṇṇarajatakosake ca dhāreti, rattiṃ dīpaṃ jāletvā celavitānassa heṭṭhā sayāpeti. Ayaṃ pana tato ekasakkārampi na karoti. Usabhā atirekapūjaṃ alabhamānā gogaṇaṃ na rakkhanti, parissayaṃ na vārenti. Evamassa gogaṇopi parihāyati ...pe... pañcagorasatopi paribāhiro hoti.

Idhāti imasmim̐ sāsane. **Na rūpaññū hotīti** “cattāri mahābhūtāni catunnañca mahābhūtānaṃ upādāyarūpan”ti evaṃ vuttaṃ rūpaṃ dvihākārehi na jānāti gaṇa-nato vā samuṭṭhānato vā.

Gaṇanato na jānāti nāma- “cakkhāyatanaṃ sotāyatanaṃ ghānāyatanaṃ jivhākā-yarūpasaddagandharasaphoṭṭhabbāyatanaṃ, itthindriyaṃ purisindriyaṃ jīvitindriyaṃ kāyaviññatti vacīviññatti ākāśadhātu āpodhātu rūpassa lahutā, mudutā, kammaññatā, upacayo, santati, jaratā, rūpassa aniccatā, kabaḷikāro āhāro”ti (dha. sa. 657-665) evaṃ pāḷiyā āgatā pañcavīsati rūpakoṭṭhāsāti na jānāti. Seyyathāpi so gopālako gaṇanato gunnaṃ rūpaṃ na jānāti, tathūpamo ayaṃ bhikkhu. So gaṇanato rūpaṃ ajānanto rūpaṃ pariggahetvā arūpaṃ vavatthapetvā rūpārūpaṃ pariggahetvā paccayaṃ sallakkhetvā lakkhaṇaṃ āropetvā kammaṭṭhānaṃ matthakaṃ pāpetuṃ na sakkoti. So yathā tassa gopālakassa gogaṇo na vaḍḍhati, evaṃ imasmiṃ sāsane sīlasamādhivipassanāmaggaḥalanibbānehi na vaḍḍhati. Yathā ca so gopālako pañcahi gorasehi paribāhiro hoti, evamevāyaṃ asekhena sīlakkhandhena asekhena samādhipaññāvimutti vimuttiñāṇadassanakkhandhenāti pañcahi dhammakkhandhehi paribāhiro hoti.

Samuṭṭhānato (3.0353) **na jānāti** nāma- “ettakaṃ rūpaṃ ekasamuṭṭhānaṃ, ettakaṃ dvisamuṭṭhānaṃ, ettakaṃ tisamuṭṭhānaṃ, ettakaṃ catusamuṭṭhānaṃ, ettakaṃ nakutoci samuṭṭhāti”ti na jānāti. Seyyathāpi so gopālako vaṇṇato gunnaṃ rūpaṃ na jānāti, tathūpamo ayaṃ bhikkhu. So samuṭṭhānato rūpaṃ ajānanto rūpaṃ pariggahetvā ...pe... paribāhiro hoti.

Na lakkhaṇakusalo hotīti “kammalakkhaṇo bālo, kammalakkhaṇo paṇḍito”ti evaṃ vuttaṃ kusalākusalakammaṃ paṇḍitabālalakkhaṇanti na jānāti. So evaṃ ajānanto bāle vajjetvā paṇḍite na sevati. Bāle vajjetvā paṇḍite asevento kappiyākappiyaṃ kusalākusalaṃ sāvajjānavajjaṃ garukalahukaṃ satekicchātekkicchāṃ kāraṇākāraṇaṃ na jānāti. Taṃ ajānanto kammaṭṭhānaṃ gahetvā vaḍḍhetuṃ na sakkoti. So yathā tassa gopālakassa gogaṇo na vaḍḍhati, evaṃ imasmiṃ sāsane yathāvuttehi sīlādīhi na vaḍḍhati. So gopālako viya ca pañcahi gorasehi, pañcahi dhammakkhandhehi paribāhiro hoti.

Na āsāṭikaṃ hāretā hotīti “uppannaṃ kāmavitakkaṃ”ti evaṃ vutte kāmavitakkādayo na vinodeti. So imaṃ akusalavitakkaṃ āsāṭikaṃ ahāretvā vitakkavasiko hutvā vicaranto kammaṭṭhānaṃ gahetvā vaḍḍhetuṃ na sakkoti. So yathā tassa gopālakassa ...pe... paribāhiro hoti.

Na vaṇaṃ paṭicchādetā hotīti “cakkhunā rūpaṃ disvā nimittaggāhī hoti”ti-ādinā nayena sabbāramaṇesu nimittaṃ gaṇhanto yathā so gopālako vaṇaṃ na paṭicchādeti, evaṃ saṃvaraṃ na sampādeti. So vivaṭadvāro vicaranto kammaṭṭhānaṃ gahetvā vaḍḍhetuṃ na sakkoti ...pe... paribāhiro hoti.

Na dhūmaṃ kattā hotīti so gopālako dhūmaṃ viya dhammadesanādhūmaṃ na karoti, dhammakathaṃ vā sarabhaññaṃ vā upanisinnakakathaṃ vā anumodanaṃ vā na karoti, tato naṃ manussā “bahussuto guṇavā”ti na jānanti. Te guṇāguṇaṃ ajānanto catūhi paccayehi saṅghaṃ na karonti. So paccayehi kilamamāno buddhavacanaṃ sajjhāyaṃ kātuṃ vattapaṭivattaṃ pūretuṃ kammaṭṭhānaṃ gahetvā vaḍḍhetuṃ na sakkoti ...pe... paribāhiro hoti.

Na (3.0354) **titthaṃ jānāti**ti titthabhūte bahussutabhikkhū na upasaṅkamati. Anupasaṅkamanto “idaṃ, bhante, byañjanaṃ kathaṃ ropetabbaṃ? Imassa bhāsi-

tassa ko attho? Imasmim̄ ṭhāne pāḷi kim vadati? Imasmim̄ ṭhāne attho kim dīpeti”ti evaṃ na paripucchati na paripaṅhati, na jānāpeti attho. Tassa te evaṃ aparipucchitā avivaṭaṅceva na vivaranti, bhājetvā na dassenti, anuttānikataṅca na uttānim̄ karonti, apākaṭaṃ na pākaṭaṃ karonti. **Anekavihitesu ca kaṅkhāṭhānīyesu dhammesūti** anekavidhāsu kaṅkhāsu ekakaṅkhampi na paṭivinodenti. Kaṅkhāyeva hi kaṅkhāṭhānīyā dhammā nāma. Tattha ekaṃ kaṅkhampi na nīharantīti attho. So evaṃ bahussutatitthaṃ anupasaṅkamtivā sakaṅkho kammaṭṭhānaṃ gahetvā vaḍḍhetuṃ na sakkoti. Yathā vā so gopālako titthaṃ na jānāti, evaṃ ayampi bhikkhu dhammatitthaṃ na jānāti. Ajānanto avisaye paṅhaṃ pucchati, ābhidhammikaṃ upasaṅkamtivā kappiyākappiyaṃ pucchati, vinayadharaṃ upasaṅkamtivā rūpārūpaparicchedaṃ pucchati. Te avisaye puṭṭhā kathetuṃ na sakkonti. So attanā sakaṅkho kammaṭṭhānaṃ gahetvā vaḍḍhetuṃ na sakkoti ...pe... paribāhiro hoti.

Na pītaṃ jānāti Ti yathā so gopālako pītāpītaṃ na jānāti, evaṃ dhammūpasaṅghitaṃ pāmojjaṃ na jānāti na labhati. Savanamayaṃ puññakiriyavatthuṃ nissāya ānisaṃsaṃ na vindati, dhammassavanaggaṃ gantvā sakkaccaṃ na suṇāti, nisinno niddāyati, kathaṃ katheti, aññavihitako hoti. So sakkaccaṃ dhammaṃ assuṇanto kammaṭṭhānaṃ gahetvā vaḍḍhetuṃ na sakkoti ...pe... paribāhiro hoti.

Na vīthim̄ jānāti ti so gopālako maggāmaggaṃ viya “ayaṃ lokiyo, ayaṃ lokuttaro” - ti ariyaṃ aṭṭhaṅgikaṃ maggaṃ yathābhūtaṃ nappajānāti. Ajānanto lokiyamagge abhinivisitvā lokuttaraṃ nibbattetuṃ na sakkoti ...pe... paribāhiro hoti.

Na gocarakusalo hotīti so gopālako pañcāhikasattāhikacāre viya cattāro satipaṭṭhāne “ime lokiyā, ime lokuttarā” ti yathābhūtaṃ nappajānāti. Ajānanto sukhumāṭṭhānesu attano ṅāṇaṃ carāpetvā lokiyasatipaṭṭhāne abhinivisitvā lokuttaraṃ nibbattetuṃ na sakkoti ...pe... paribāhiro hoti.

Anavasesadohī (3.0355) **hotīti** paṭiggahaṇe mattaṃ ajānanto anavasesaṃ duhati. Niddesavāre panassa **abhihaṭṭhuṃ pavārentīti** abhiharitvā pavārenti. Ettha dve abhihārā vācābhihāro ca, paccayābhihāro ca. **Vācābhihāro** Nāma manussā bhikkhussa santikaṃ gantvā “vadeyyātha, bhante, yenattho” ti pavārenti. **Paccayābhihāro** nāma vatthādīni vā sappinavanītaṭṭhādīni vā gahetvā bhikkhussa santikaṃ gantvā “gaṇhatha, bhante, yāvatakena attho” ti vadanti. **Tatra bhikkhu mattaṃ na jānāti** ti bhikkhu tesu paccayesu pamāṇaṃ na jānāti. “Dāyakassa vaso veditabbo, deyyadhammassa vaso veditabbo, attano thāmo veditabbo” ti iminā nayena pamāṇayuttakaṃ aggahetvā yaṃ āharanti, taṃ sabbaṃ gaṇhātīti attho. Manussā vipaṭṭisārino na puna abhiharitvā pavārenti. So paccayehi kilamanto kammaṭṭhānaṃ gahetvā vaḍḍhetuṃ na sakkoti ...pe... paribāhiro hoti.

Te na atirekapūjāya pūjetā hotīti so gopālako mahā-usabhe viya there bhikkhū imāya āvi ceva raho ca mettākāyakammādikāya atirekapūjāya na pūjeti. Tato therā “ime amhesu garucittikāraṃ na karonti” ti navake bhikkhū dvīhi saṅgahehi na saṅgaṇhanti, neva dhammasaṅgahena saṅgaṇhanti, na āmisasaṅgahena, cīvaraṇa vā pattena vā pattapariyāpanna vā vasanaṭṭhānena vā kilamantepi nappaṭijagganti, pāḷim̄ vā aṭṭhakathaṃ vā dhammakathābandhaṃ vā guḷhaganthaṃ vā

na sikkhāpentī. Navakā therānaṃ santikā sabbaso ime dve saṅgahe alabhamānā
imasmīṃ sāsane paṭiṭṭhātum na sakkonti. Yathā tassa gopālakassa gogaṇo na
vaḍḍhati, evaṃ silādīhi na vaḍḍhanti. Yathā ca so gopālako pañcahi gorasehi,
evaṃ pañcahi dhammakhandhehi paribāhirā honti. Sukkapakkho kaṇhapakkhe
vuttavipallāsavasena yojetvā veditabbo.

Anussativaggo dutiyo.

Manorathapūraṇiyā aṅguttaranikāya-aṭṭhakathāya

Ekādasakanipātassa saṃvaṇṇanā niṭṭhitā.

Nigamanakathā

Ettāvatā (3.0356) ca-

Āyācito sumatinā therena **bhadantajotipālena**.
kañcipurādīsu mayā pubbe saddhiṃ vasantena.
Varatambapaṇṇidīpe mahāvihāramhi vasanakālepi;
pākaṃ gate viya dume valañjamānamhi saddhamme.
Pāraṃ piṭakattayasāgarassa gantvā ṭhitena sumatinā;
parisuddhājīvenābhiyācito jīvakenāpi.
Dhammakathāya nipuṇaparamanikāyassaṭṭhakathaṃ āraddho;
yamahaṃ cirakālaṭṭhitimicchanto sāsanaavarassa.
Sā hi mahā-aṭṭhakathāya sāramādāya niṭṭhitā esā;
catunavuttiparimāṇāya pāḷiyā bhāṇavārehi.
Sabbāgamasamvaṇṇanamanoratho pūrito ca me yasmā;
etāya **manorathapūraṇīti** nāmaṃ tato assā.
Ekūnasatṭhimatto visuddhimaggopi bhāṇavārehi;
atthappakāsanatthāya āgamānaṃ kato yasmā.
Tasmā tena sahāyaṃ gāthāgaṇanāyena aṭṭhakathā;
tīhādhikadiyaḍḍhasataṃ viññeyyā bhāṇavārānaṃ.
Tīhādhikadiyaḍḍhasatappamāṇamiti bhāṇavārato esā;
samayaṃ pakāsayantī mahāvihārādhivāsīnaṃ.
Mūlaṭṭhakathāsāraṃ ādāya mayā imaṃ karontena;
yaṃ puñnamupacitaṃ tena hotu loko sadā sukhitoti.

Paramavisuddhasaddhābuddhivīriyappaṭimaṇḍitena (3.0357) silācārajjavama-
ddavādiguṇasamudayasamuditena sakasamayasantaragahanajjhogāhana-
samatthena paññāveyyattiyasamannāgatena tipīṭakapariyattippabhede sātṭha-
kathe satthu sāsane appaṭihatañāṇappabhāvena mahāveyyākaraṇena karaṇasa-

mpattijanitasukhaviniggatamadhurodāravacanalāvaṇṇayuttena yuttamuttavādinā
vādīvarena mahākavinā pabhinnapaṭisambhidāparivāre chaḷabhiññādippabheda-
guṇappaṭimaṇḍite uttarimanussadhamme suppatiṭṭhitabuddhīnaṃ therānaṃ thera-
vaṃsappadīpānaṃ mahāvihāravāsīnaṃ vaṃsālaṅkārabhūtena suvipulavisuddha-
buddhinā **buddhaghosoti** garūhi gahitanāmadheyena therena katā ayaṃ **manora-
thapūraṇī** nāma aṅguttaranikāyaṭṭhakathā-

Tāva tiṭṭhatu lokasmiṃ, lokanittharaṇesinaṃ;
dassentī kulaputtānaṃ, nayaṃ cittavisuddhiyā.
Yāva buddhoti nāmampi, suddhacittassa tādino;
lokamhi lokajeṭṭhassa, pavattati mahesinoti.

Manorathapūraṇī nāma

Aṅguttaranikāya-aṭṭhakathā sabbākārena niṭṭhitā.